


國學基
本叢書
明詩紀事
五



書叢本基學國

事紀詩明

(五)

輯田陳

行發館書印務商

天有文而雲霞變色。地有絡而川岳殊形。五色同適於目。而藻績異施。八音同傾於耳。而絲竹別器。文章派別。極意營構。模範無越。性靈自淪。故雅趣風情。騷懷賦心。體有不同。并臻於妙。若夫城中高髻。里婦捧心。下士趨風。有識避走。無他。識曲者聽其真。逐迹者難爲巧也。有明詩流。吳下擅於青邱。越中倡於犂眉。八閩工於膳部。東粵盛於西庵。西江妙於子高。各有軌轍。不相沿襲。自茶陵崛起。籠罩才俊。然當時倡和。襲其體者。不過門生執友十數輩而已。暨前後七子出。趨塵躡景。萬喙一聲。其間獨照之匠。若荆川、遵巖、震川。變秦漢爲歐曾。易詰屈警牙。爲字順文從。允矣君子。展也大成已。至升菴子業諸公。藻豔攝乎齊梁。簡質得自魏晉。沖淡趨於陶韋。沈雅參之杜韓。滅竈再炊。異軍特起。余於戊集。採輯十數名家。直取胸情。劃絕畦町。冀與海內詞客。共究斯旨也。光緒戊申仲夏。黔靈山樵陳田。

明詩紀事戊籤目

卷一

楊慎五十九首

卷二

高叔嗣三十四首

卷三

薛蕙三十八首

卷四

華察二十二首

卷五

皇甫冲八首

皇甫汸三十五首

卷六

王廷陳三十三首

楊巍三十二首

皇甫孝四十九首

皇甫濂九首

頓銳二十四首

齊之鸞十首

李濂二十六首

卷七

許宗魯三十二首

黃佐三十一首

張時徹二十六首

卷八

張含十一首

張合一首

金大車四首

金大輿三首

馮惟健一首

馮惟重二首

馮惟敏七首

馮惟訥七首

栗應麟三首

栗應宏八首

侯一元二首

侯一麀一首

何良俊二首

何良傅一首

王昺一首

王杲一首

卷九

李開先二首 嘉靖八才子

唐順之八首

趙時春一首

熊過一首

卷十

鄧黻一首

吳益夫一首

呂柟一首

戴大賓一首

戴冠五首

唐龍五首

周金二首

歐陽鐸一首

王慎中十三首

陳束七首

任瀚四首

呂高一首

汪本一首

周允中一首

景暘一首

方豪三首

胡纘宗二首

毛伯溫二首

王應鵬二首

徐文華一首

夏良勝一首

程啓充一首

王大用一首

陸伸一首

胡德一首

卷十一

鄒守益三首

林文俊二首

柴奇三首

王以旂一首

王道一首

汪文盛一首

游璉一首

汪必東一首

陸震一首

盧煦一首

顧可適一首

丁奉五首

顧彥夫一首

夏尙樸四首

常倫四首

張璧一首

許成名二首

屠僑三首

王思二首

趙德剛一首

周廷用三首

孫繼芳一首

周敘一首

南大吉一首

胡佩一首

王濬一首

鄒頤賢二首

卷十二

唐皋一首

劉天民六首

馬明衡一首

劉儲秀一首

簡霄一首

翟瓚一首

林炫二首

范輅一首

朱鳴陽一首

陸倬一首

盧雍一首

袁達十三首

張縉七首

蔡昂二首

蔣山卿十二首

林大輅一首

顧璫三首

吳鎧一首

彭大治一首

桑溥一首

顧可久一首

陳能一首

雷應龍一首

陳器一首

戴欽二首

霍韜一首

田汝棟一首

吉梁二首

卷十三

舒芬一首

崔桐一首

張經三首

顏木五首

王謳十三首

錢憲一首

范永鑾一首

金賁亨一首

林春澤一首

張治道二首

左國璣二首

董穀二首

陳文學一首

倫以訓一首

張岳一首

夏言十八首

馬汝驥五首

汪應軫二首

王鳳靈二首

楊士雲七首

朱豹一首

戴鰲一首

陳文沛一首

林希元一首

李鶴鳴三首

曹嘉一首

葉桂章一首

徐哲一首

張鉉一首

卷十四

陸鈇十首

楊麒一首

鄭洛書一首

許相卿六首

郭波一首

胡侍一首

汪佃一首

李士允一首

王漸達一首

江暉一首

彭簪一首

方邦望二首

張治十首

敖英十二首

張袞三首

王同祖二首

何棟一首

童承敘二首

廖道南一首

謝蕢一首

任瀆一首

田頊一首

王洙一首

鄭一鵬二首

吳文之二首

陳講一首

邵經邦一首

趙兌一首

張鳳翀一首

吳廷翰四首

李默一首

倫以諒一首

周祚三首

楊言一首

吳檄一首

陳大濩一首

蔣泮一首

洪珠一首

王璜一首

朱子和一首

胡森一首

彭汝寔一首

浦瑾一首

王汝礪一首

李松一首

祝時泰一首

卷十五

王教一首

潘恩二首

朱廷立二首

李仁十首

陸銓一首

柯維騏四首

馮世雍二首

馬坤一首

盧襄一首

林汝永一首

陳東一首

錢文爵一首

徐階六首

鄭曉三首

屠大山一首

李舜臣二首

顧夢圭四首

李新芳一首

劉隅一首

朱瀚四首

王激二首

黃直一首

鄭弼一首

葉良佩一首

王度一首

吳鵬一首

徐獻忠一首

孟思五首

卷十六

龔用卿一首

蘇祐八首

陸埒一首

屠應峻四首

陸燦四首

林雲同一首

方一蘭一首

黃禎一首

金克厚一首

陳表一首

毛衢一首

錢楞一首

劉陽一首

袁袞十五首

張鏊一首

張子立一首

王格二首

江以達一首

翁萬達三首

李元陽三首

田汝成四首

聞人銓一首

岑萬一首

王宣一首

陳仲錄一首

李學詩一首

高遠一首

孫宜五首

鄧遷一首

卷十七

羅洪先十一首

胡松四首

楊博一首

崔廷槐七首

樊鵬二首

范言一首

郭鳳儀一首

祝文冕一首

谷繼宗一首

張鐸一首

于玘一首

顧聞一首

程文德三首

蔡雲程一首

鄭大同一首

鄭綱一首

楊祐一首

楊本仁八首

崔涯一首

陳節之一首

馮彬一首

周顯宗一首

張選一首

程烈一首

林垠二首

黃中一首

劉成穆三首

黃省曾一首

林恕四首

吳子孝十首

沈愷四首

陳子文一首

胡經一首

趙鯤一首

蔡鑿一首

王表一首

史元中一首

唐鉞一首

強仕三首

許炯八首

孔天胤四首

許應元十一首

王梅四首

趙伊五首

吳嶽二首

范欽二首

蘇志皋四首

浦應麒一首

包節一首

謝少南一首

李徵一首

沈越一首

姚虞一首

陳芹二首

尹耕六首

蔡汝楠十首

程瑤三首

錢薇三首

朱衡一首

林應亮一首

周復俊一首

顧存仁一首

白悅一首

廖希顏六首

王廷幹一首

秦鳴夏一首

高應冕五首

王鏞二首

薛欽三首

卷十九

尹臺十二首

趙貞吉二首

靳學顏五首

劉繪五首

林廷機三首

康大和一首

張舜臣一首

張瀚二首

林應麒一首

施峻一首

陳暹三首

任萬里二首

謝啓元一首

郭朴二首

王立道十首

王維楨六首

趙大佑一首

何維柏一首

馬森一首

孫植一首

陳鳳六首

牛恆二首

趙統二首

許穀四首

陳棐一首

薛應旂一首

盧宗哲一首

郭萬程一首

陳策一首

汪宗凱一首

胡汝霖一首

洗桂奇一首

陳紹文一首

陶庚一首

卷二十

何御二十一首

沈鍊一首

徐良傅三首

萬虞愷一首

陳堯一首

劉佐一首

駱文盛一首

鄭富一首

李樂一首

饒相一首

黃釗一首

蔡宗堯二首

郭文涓二首

喬世甯十七首

周怡一首

袁煒一首

蔣宗魯一首

陳昌積一首

黃注一首

楊載鳴一首

王炯一首

茅坤一首

莫如忠二首

周鯤一首

王崇義一首

黃洪昆一首

林萬潮一首

陳應魁一首

符驗一首

溫新一首

劉乾一首

王健一首

馬廷錫一首

劉熠一首

程應登二首

方輿邦三首

卷二十一

邢一鳳一首

陸樹聲三首

方逢時十五首

王崇古一首

萬士和四首

林懋和三首

謝東山一首

雷賀一首

范惟一一首

殷邁一首

陳時範一首

王應鍾一首

何遷二首

王材二首

邵元善二首

向鬢一首

卷二十二

金鑾十七首

徐麟六首

賈惟孝二首

萬衣一首

洪朝選一首

龔秉德十首

鄭渭一首

張鐸一首

何孟倫一首

董份五首

許邦才十首

沈九思一首

趙邦彥六首

湯珍四首

董難四首

張本七首

傅起巖一首

何炳一首

潘城一首

丁玘一首

晏睿一首

蕭引鳳一首

張軌一首

明詩紀事卷一

戊籤

楊慎五十九首

慎字用修。新都人。大學士廷和子。正德辛未。第一人及第。授修撰。以議禮杖謫永昌。天啟初。追諡文憲。有升菴集八十一卷。遺集二十六卷。

四庫總目。慎以博洽冠一時。其詩含吐六朝。於明代獨立門戶。

薛濼考功集。升菴詩窮極詞章之綺靡。可以見其卓絕之才。牢籠載籍之菁華。可以見其宏博之學。唐四傑不能過也。

升菴集。陸賈南中行紀云。南中百花。惟素馨奇特酷烈。彼中女子。以採絲穿花心。繞髻爲飾。梁章隱詠素馨花詩云。細花穿弱縷。盤向綠雲鬢。用陸賈語。貫花繞髻之飾。至今猶然。予嘗有詩云。金碧佳人墮馬絛。鷓鴣林裏採秋芳。穿花貫縷盤香雪。曾把風流惱陸郎。姜孟賓笑謂予曰。不謂陸賈風流之案。千年而始發耶。

藝苑卮言。楊用修詩。如暴富兒郎。銅山金埒。不曉喫飯著衣。用修謫滇中。有東山之癖。諸夷曾欲得其詩。翰不可。乃以精白綾作緘。道諸伎服之。使酒間乞書。楊欣然命筆。醉墨淋漓。裾袖會重。賞伎女。購歸裝演成卷。楊後亦知之。便以爲快。用修在瀘州。嘗醉胡粉傅面。作雙丫髻。插花。門生昇之。諸伎捧觴。遊行城市。了不爲忤。人謂此君故自污非也。一措大裏緒衣。亦何所可忌。特是壯心不塌牢落。故耗磨之耳。

國雅楊修撰詩如錦城雪棧險怪高峻

詩敵楊用修格不能高而清新綺縟獨擬六朝之秀合作自斐然如題柳七言律云垂楊垂柳縮芳年飛絮飛花媚遠天金距
鬪雞寒食後玉蛾翻雪暖風前別離江上還河上拋擲橋邊與路邊遊子魂銷青塞月美人腸斷翠樓煙風流蘊藉字字天成
如初發芙蓉鮮華莫比滇中作春興八首語亦多工

魚竑玉堂叢話正德丁丑歲武廟閣文獻通考天文星名有注張問欽天監不知爲何星也內使下問翰林院同館相視愕然
楊公慎曰注張柳星也周禮以注鳴者註注味也史記律書南方諸鳥七宿柳爲鳥之味也史記律書西至於注張漢書天文
志柳爲鳥喙內使以復同館戲曰子言誠辯且博矣不干私習天文之禁乎嘉靖初給事中張紳疏有肅宇鬼瑣四字上令問
內閣不知也慎取荀子非十二子篇以復梁文康歎曰用修之強記何必減蘇頌乎

續玉筍詩談升菴題唐僖宗行宮柱礎云唐帝行宮有露臺礎蓮幾度換春苔軍容再向鷺叢狩王氣遙從駱谷來萬里山川
神駿老五更風雨杜鵑哀始知蜀道蒙塵駕不及胡僧度海杯礎今故在游太初爲予言寺僧令匠鑿而丹之乃知李文饒方
竹未嘗無對

明詩選宋轅文曰用修病在貧博故使事處往往求巧得拙要其天才本是奇麗如百寶流蘇陳臥子曰用修繁蔚之中時見
新警李舒章曰用修山光嵐翠金碧之中時見雲霞之潤

王士禛皇華記聞楊用修在滇製小肩輿如升之形僅可容膝張愈光舍題一聯其上云人到東京須氣節地當西晉且風流
所謂升菴者以此

香祖筆記明詩至楊升菴真以六朝之才而兼六朝之學者其詩如詠柳垂楊垂柳縮芳年一篇世共知之又古意浚波洛浦
遇陳王鷓鴣詞秦時明月玉弓懸關山月迢迢賤妾隔湘川出關擬唐人狼弧芒角正彎環塞下曲長榆塞上接龜沙諸篇工
妙天成不減前作又青蛉行寄內絕句亦絕妙大抵皆自古樂府出益都王遵坦太平論明詩獨推新都爲性之者亦自有見

明詩別裁。升菴以高明伉爽之才。宏博絕麗之學。隨題賦形。一空依傍。于李何諸子外。拔戟自成一隊。五言非其所長。以過於穆麗。失穆如清風之旨也。

田按升菴詩。早歲醉心六朝。豔情麗曲。可謂絕世才華。晚乃漸入老蒼。有少陵謫仙格調。亦間入東波涪翁一派。前後七子。執盟騷壇。海內附和。翕翕成風。余採升菴蘇門君采。稚欽。鴻山。夢山。子安。少玄。數君子詩。次於李何之後。王李之前。別爲一集。以見豪傑能自樹立者。類不隨風會爲轉移也。

關嶺曲

關索嶺四十三盤高。前有安龍箐。行人莫辭勞。

禽言

勸君早歸。君歸恨不早。鐵橋銅柱靈山道。焚雲爨霧連晴昊。客頭未白心先老。歸恨不早。

游女行

東風春正韶。南浦美人嬌。下蔡君休問。上宮誰敢邀。折花斜寶珥。映水正金翹。娉婷惜未嫁。應待逐文簫。

梅花落

古梅飄古香。新梅綴新粧。那枝傳妾恨。何樹近君鄉。

峽東曲

白帝到江陵。一千二百里。欲試一日程。須待春水起。布帆一百尺。出自三梭織。風順早歸來。天際遙相識。

江陵別內

同上洞庭波。獨上西陵渡。孤棹泝寒流。天涯歲將暮。此際話離情。羈心忽自驚。佳期在何許。別恨轉難平。蕭條滇海曲。相思隔寒燠。蕙風悲搖心。茵露愁沾足。山高瘴癘多。鴻雁少經過。故園千萬里。夜夜夢煙蘿。

和余懋忠青衣別後追寄之作

抽簪畫江沙。寫出腸斷詞。遙寄百里人。見君昨夜思。昨夜復今朝。百里又千里。歡遊坐成隔。乖離從此始。乖離渺何許。異國猶鄉土。雲從青衣來。月自峨眉吐。雲月兩悠悠。光景爲君留。因之託宵夢。遠到海西頭。

送徐用先歸嘉州

客有歸歟嘆。言從隱者流。高議在青瑣。吾道付滄洲。滄洲多故人。夙昔諧幽賞。嘯歌丹崖邊。攜手紫霞上。壁津春水生。波浪動江城。岷嶺秋芳落。清音漢蘭若。亦知江湖憂。不廢登臨樂。迢迢結桂枝。望望阻相思。殷勤三歲字。惆悵四愁詩。伊予慕儔侶。睽離分晤語。何時峨眉雲。來作人間雨。

玉蟾寺

我問金鰲僧。誰名玉蟾寺。題自黃涪翁。苔蝕銀鈎字。佛住兜羅界。僧居琉璃地。絕頂似高秋。清涼失炎季。解鞍契夙心。橫枕諧幽思。岫幌雲勿扃。結夏期重至。

賦得烏龍山送安公石

亭亭烏龍峰。屹立九頂左。翠微壓洪濤。清音叩危壑。沈犀星渚幽。浮韃雪涪妥。風雲徑路通。烟霞巖洞鎖。若人富奇遊。茲山近燕坐。弭節入仙源。心賞忘旅疴。迢迢海月期。嚮靡江花朵。日下遲來音。天際候歸舸。題唐人閨秀熨帛圖

碧梧葉落紅閨晚。玫玷敲月催金翦。重重海簾銀蒜垂。曲曲山屏阜羅展。廣儲懸月月初臨。綵幕染霜霜已深。禁瘁銖衣圍夜玉。嗟峨寶髻辟寒金。雲母箱闔同心鎖。鉛鉤香浮九微火。秦篝齊縷鬪紛華。蜀錦吳綾分婀娜。熨帛巾繪憶遠行。遙遙夜夜不勝情。百斛妾住垂花隴。萬里君居碎葉城。垂花碎葉音塵隔。春去秋來感行迹。深閨心斷結蠶書。絕塞眼穿無雁帛。明燭蘭膏照獨眠。蛾眉曼淥爲誰妍。試看裴羽相思夕。何似徐吾共績年。

題夏仲昭竹寄陶良伯驥

太常胸次瀟湘寬。少年愛寫生琅玕。白頭藝苑更入妙。筆法遠追王孟端。兩家名藻雄吳下。品題未覺風流亞。一紙能令百世傳。兩竿不啻雙金價。人言畫竹非畫工。草書結構將無同。誰家高堂名寶繪。徐熙花鳥迷青紅。主人佳興松江東。寄圖索賦隨長風。遙知把玩清香裏。正是相思月明中。

射虎圖爲箬溪都憲題

錢選好手工。白描粉墨丹青色。阻喪細觀逸迹迴不俗。氣骨深穩形蕭放。中丞此圖開似我。行行遊獵極

殊狀漢家昔日李將軍。生射猛獸天下聞。彎弓半夜沒白羽。飛鞍晴晝生黃雲。今之圖畫無乃是。披卷似
覺陰風起。積雪慘淡長白山。草木蒼乾松漠間。將軍身乘大宛馬。從騎亦是驍雄者。合圍射虎虎帶箭。相
持不肯遽相下。虎鬪馬驟兩若飛。咆吼欲震長平瓦。東海黃公魯卞莊。裴旻舞劍相頡頏。古來英英者數
子。繪事簡冊傳芬芳。何物少陵愁杜甫。短衣南山思射虎。老驥伏櫪悲鳴苦。壯士哀歌淚如雨。天狼煌芒
直威弧。安得此輩西滅胡。卻走馬蹄報神都。爲獻單于款塞圖。

高曉曉發過滇

碧雞關頭月上霞。高曉海色分人家。菱塘眠柳猶藏鴉。雙雙柔櫓聲啞啞。船尾風輕浪不花。轉盼已屆滇
之涯。

交河令行贈袁子變

袁侯出宰古交河。銅章墨綬雜雕戈。黃雲高闕芳非少。紫塞長城氛祲多。桑榆蔭入嫖姚幕。絃誦音諧敕
勒歌。公主琵琶玉連瑣。將軍驤囊金盤陀。袁侯雕龍且縞豹。白羽指揮坐中誦。阮瑀軍書王粲詩。魯連飛
箭劉琨嘯。始信扶顛籌策長。赫赫威棱動北荒。虎鈴帳外關山月。燕寢香中鼓角霜。君不見隆州虞允文。
海鱗船破百萬軍。又不見巴渝甘興霸。江表虎臣雄吳下。古來文武道本同。樽俎笑談能折衝。六鈞弓與
一丁字。譚言悠悠非至公。

觀打魚

石梁水落天波澄。漁人放獺如放鷹。編筠作航來往便。往似飛梭來似箭。蛟潭無極龍堂幽。江空獺飢漁人愁。漁人愁。河魴喜。清江一曲孤煙起。

河橋篇寄用貞懋昭

渾河流水桑乾潮。何年伐石架長橋。玄蘿窟近填烏鵲。滄海波平上赤霄。尋源知近遠。浩浩鴻流滿。平連太液池。迴接昆明苑。帝里神皋紫氣中。天江析木銀潢通。澗灑卜落應相並。灞滻朝宗詎可同。星傳雲槎下城闕。電逝颿馳交翼越。橋外車音響若雷。橋畔闌干明似月。可憐楊柳裊晴煙。才見藏鴉又噪蟬。東西溝水分歧路。南北煙霜感歲年。沈璜使者辭芳甸。聯璧才人遙出餞。別浦晴沙漾縠紋。回澗秋濤收組練。飛蓋臨風緩去旌。青門落日彩霞生。懸知濯錦江邊夢。轉見蘆溝河上情。

送客還西江

武昌楊柳荊州麥。楚江春色催行色。萬里遙憐左蠡人。十年同作南濱客。烏柏門前紫荇莊。歸來養拙更何鄉。鬱金美酒盈千斛。藥玉新筠醉幾場。

江樓曲送祝鳴和

江上樓高枕錦江流。雲霞連劍閣。煙樹出刀州。登樓送君秋色裏。旌旗影落清波水。眺望應隨斗牛遙。嘯

歌直感魚龍起。江樓高。江思遠。闌干曲曲山宛宛。雁湖寒。牛渚晚。石頭城。如在眼。王人過家朝玉京。離筵一餉惜離情。別來定有相思賦。好寄同聲慰友生。

月溪曲爲晉甯張太守賦

青天行月溪行水。水月相去八萬里。龍宮罔象巧能移。月行翻向清溪底。月溪主人家在涪江濱。襟懷洒落意清真。金波影裏流金篆。玉練光中臥玉輪。月溪子。君不聞。一月普現一切水。一切水月一月攝。洞鑿虛明有如此。又不見東坡赤壁水月賦。太白青天問月歌。二仙仙去去不返。廣寒宮闕高嵯峨。今夕復何夕。逢君螳螂河。舉頭見明月。正照金叵羅。持斧邀吳剛。開篷納嫦娥。殺卻蝦蟆綠烟滅。斫卻桂樹清光多。共言銀燭未須乘。不飲如此良夜何。仙舟歸來仍我過。解紅鞵。舞柘枝。傜。主人踉蹌客逃席。起看江月墜江波。君家侍立小童清似玉。劈牋泥我醉寫月溪曲。

東坡先生守湖州。遊道場山。命官奴秉燭寫風雨竹一枝於壁。題詩其上。至正間吳仲珩有臨本。少岷丈藏之。慎作長歌。

東坡老守湖山暇。南國清遊繼顏謝。舟楫行供蒼雪吟。烟雲坐入瀟湘畫。越人翠被雨波寒。官奴綿麗歌聲殘。揮毫寫出風中態。掀筆猶疑掌上看。琅玕落紙珠生睡。畫絕名縑詩寡和。未論品價重三都。先有風流傾四座。仙翁一去幾春秋。江光清徹魚龍收。珮環夜冷黃州夢。簫韶天遠蒼梧愁。梅逕何人深慕蘭。欲

從手軸傳心印。文藻葳蕤賸逼真。筆端飛動唐臨晉。玉雪曾郎瘦竹姿。青門別我滄州期。滄州吏隱丹霞想。想想見珊瑚拂水枝。

送譚汝賢之常德

子昔逍遙龍門之橋。子乘五馬蜻蛉之野。龍橋爲別。蛉野見夢。境界分明。速流電忽。漫相逢復語離。澧蘭沅芷。楚芳時後。期期未有期。長風長寄長相思。

題趙東臺落伯畫汪方伯周潭圖

青嶂插雕梁。白波吹粉壁。周潭之景在咫尺。斷崖韋假樹。橫竄郭熙山。東臺之筆縹緲間。我雖不善畫。鑒畫莫如我。籠煙渲水墨如金。苦心獨識良工頗。詩興長疑燕寢香。真遊遙寄洪濤杙。船虹貫月棟飛雲。犀潭龍綾如絨鎖。

春江曲

時女玩春翹。新梅發遠條。風香隨步步。雲彩豔朝朝。悵望迷晴浦。音書候晚潮。玉輪江上水。心斷木蘭橈。趙龍巖少參載酒過普賢寺還舟同醉賦此

鷺寺敞初筵。鷗波送酒泉。沈陰迷卜晝。爛醉忘回船。別夢昆明水。離心蜀國弦。側身東望處。高誼屬雲天。

李文瑞自金沙窮源至

使者尋源至。將軍上隴回。江流通沫若。雲氣自昂峽。古樹枕榔出。殘花苜蓿開。關山有明月。今夜近香臺。

留別三池

垂老復生離。相思天一涯。四愁憐遠道。五噫感明時。樹繞青衣國。花深黑水祠。從茲萬里去。莫遣雁書遲。

贈玉蟾僧

山是岷峨派。峰如岫嶺尖。仙遊還駐鶴。僧號亦栖蟾。蘿月懸天鏡。松風襲暮檐。有詩休疥壁。徒爲葛藤添。

辰州留別王文濟

五峰蟠五溪。愁望跼鳶低。三巴接三峽。客淚聽猿啼。夢繞浮雲北。身遙落日西。歸期無歲月。春草又萋萋。

琴姬

離筵良夜如何。張女清琴當歌。商聲若出金石。楚奏渾非綺羅。浮雲柳絮無蒂。明月桂華有波。伯牙意在山水。湘靈休鼓雲和。

十六日丙寅雲頂山寺

昨暝靈燈淨土。茲晨廣濟盤陀。三百六十飛陞。八萬四千宰波。灌頂涼生甘露。妙鬘雲結兜羅。何處松濤清轉。似聞魚山梵歌。

春興

諸葛提兵大渡津。河流禹鑿迴如新。彩雲城郭那無迹。黑水波濤亦有神。象馬遠來銅柱貢。犬羊不動鐵橋塵。靈關在眼平於掌。歲歲蒲桃苜蓿春。

謁二忠祠

學士文章謁日月。尙書劍履上星辰。九原松柏香臺夜。雙廟莓苔影坐春。山鬼嘯歌寒薜荔。海童奔走薦芳蘋。經過此地同揮淚。況是江潭放逐臣。

見梅花

一辭青瑣滄江臥。山城三見梅花破。正愛家家臨水開。還愁樹樹和烟墮。清樽欲醉不成歡。雪調空歌誰與和。小院回廊日又斜。高樓知笛風前過。

弔孟拾遺

駱谷鸞輿再播移。橫流滄海廣明時。刑餘周召田中令。地下逢于孟拾遺。赤水探珠迷象罔。青霄蝕月任墓頤。懷沙沈石何曾問。帳殿毬宮總不知。

病中秋懷

造蓬城西百尺樓。登茲銷暑亦銷憂。江山平遠難爲畫。雲物高寒易得秋。吉甫清風來玉塵。涪翁妙墨換銀鈎。餘甘渡口斜陽外。鷓鴣漁歌雜棹謳。

百梅亭

綠萼紅跗映碧瀧。山香水調換新腔。翰林風月三千首。樂府鴛鴦七十雙。陳閣臨春森玉樹。漢宮不夜爛金釭。梨雲梨雪都成夢。桃葉桃根枉渡江。

次雲樓上公韻五月十九日魚池雅會

環衢窈窕錦亭東。珍樹留春綴繡紅。烏度屏風青嶂裏。魚窺明鏡碧瀾中。賓筵鄴下詩篇盛。軍次漁陽鼓角雄。獨有白頭虛授簡。梁園應愧長卿工。

冬夜宿羅漢寺

霜林金碧迷青紅。木葉蕭蕭澄遠空。長湖洲渚亂吞吐。上方樓殿森玲瓏。廊僧暝汲怯寒溜。舟子夜語驚天風。朝曦照檻堪一望。羨爾冥冥高邁鴻。

秦始皇陵

掃旦金星白晝懸。似傷鶉首翦秦川。俄傳江璧神徂日。誰見鈞天夢帝年。借問茅焦歷井幹。何如徐福泛樓船。烏錐三月咸陽火。還是書坑竹帛煙。

平山橋離夕贈任直夫

平山橋畔水沄沄。隄楊風裊陌草薰。綠蟻行觴九蘭醞。青驪出餞五花文。遙夢直挂嶺南月。離歌不散江

東雲誰言千里非絕國。已覺黯然銷別魂。

春晴

曉枕忽聞黃鳥歌。起看芳草紛成窩。梨花杏花風信早。晴雲雨雲春態多。青絲玉壺銀鑿落。紅韞寶鉸金盤陀。駘蕩神皋足游衍。其奈文園病渴何。

雨阻太華之遊中宿華亭寺釋智充山樓

信宿零雨不肯歇。咫尺太華那可登。平湖粘天波杳渺。長林籠霧寒淩兢。山樓暝榻對漁火。野竈晨炊分佛燈。皋橋酒家幸相近。徑欲取醉酣騰騰。

春泛滇海至小孤浪山

海藻海花春競鮮。東流東風新泛船。雜英芳甸漢皋珮。虛籟聲林湘國絃。菰蒲叢叢綠堪把。檉柳枝枝青可憐。茗芋不共習池醉。觸忤良爲羈思牽。

十一月十三日雪

飛雪正應大雪節。明年復是豐年期。山城豺虎戶且閉。水國鼃鼃舟懶移。竹葉金樽慣貫酒。梅花玉樹工撩詩。擁爐熾炭坐深夜。笑看燈前兒女嬉。

觀妙亭新梅始放花月夜獨酌

餒臘迓春梅。有期繁苞不駛。亦不遲。分梢已出月右脇。抽箭忽橫參左旗。倚牀三弄競筠瑄。夾門一條爭柳姿。陶潛詩梅樹夾門雙雙遏雲付清轉。九九消寒須泛卮。

蘇祠懷古

眉山學士百代豪。夜郎謫仙兩爭高。岷峨凌雲挾天藻。江漢流湯驅硯濤。虎豹虬龍自登踞。鱷鱔狐狸休舞號。井絡鍾靈竟誰繼。海若望洋增我勞。

有贈

添聲楊柳葉。唐裴誠有添聲楊柳詞減字木蘭花。不學東山傅。哀箏惱鬢華。

草堂寺

却毀纒巴火。碑失周顛字。試問坐禪僧。猶記梁朝寺。

卽事

蘋末清風起。涼生近水樓。盈盈樓上女。齊唱楚江秋。

松隱菴

松菴饒古松。露鬣交雲尾。蘿徑少行人。日暮嘯山鬼。

楚江曲

巫山花已紅。楚水波新綠。兩兩浣紗人。照影鬪粧束。

王子淵祠

煒曄靈芝發秀翹。子淵摘藻挾天朝。漢皇不賞賢臣頌。只教宮人詠洞簫。

竹枝詞

紅粧女伴碧江濱。蓮草花簪茜草裙。西舍東鄰同夜燭。吹笙打鼓賽朝雲。
無義灘頭風浪收。黃雲開處見黃牛。白波一道青峰裏。聽盡猿聲是峽州。

詠史

月仗雲門五彩毬。御前爭賭最先籌。須臾贏得西川印。便脫青衣擁碧油。

于役江鄉歸經板橋

千里長征不憚遙。解鞍明日問歸橈。真如謝朓宣城路。南浦新林過板橋。

居易錄李侍讀漁村演行日記載板橋驛驛壁有題句云云其有風調不知誰作按此升庵詩也演程記云楊林達板橋號三亭寶六亭。

無題

青雀銜花向海東。非烟如黛掃晴空。小喬嫁後風情減。曾見新粧亞水紅。

花汀曉夢

秦樓織月隱花汀。煙淡春山曉黛青。一百八聲鐘吼罷。夢回七十五長亭。

明詩紀事卷二

戊籤

高叔嗣三十四首

叔嗣字子業，祥符人。嘉靖癸未進士，授工部主事，改吏部，歷員外郎，中出爲山西參政，遷湖廣按察使，有蘇門集八卷。

四庫總目：叔嗣詩初受知於李夢陽，然擺脫窠臼，自抒情性，乃迥與夢陽異調。

陳東后岡集：弘治文教大起，學士輩出力振古風，盡削凡調。嘉靖改元，更爲初唐之體。蘇門高子業，束髮就傅，受知北郡李生，弱冠登朝，亳州薛孝功一見歎服。既雅見推重，益自貴珍，謝絕品流。因心師古，涉周秦之委源，酌二京之精祕，會管餘潤，契唐本宗，每有屬綴，佇典而就，甯復滯闌，不爲淺易之談。故其篇什往往直舉胸情，剖抉浮華，存之隱冥，獨妙閑曠，合於風騷，有應物之沖淡，兼曲江之沈雅，體王孟之清適，具岑高之悲壯，詞質而腴，興近而遠，洋洋乎斯可謂之詩也。

中麓閒居集：何李雖成大家，去唐卻遠。蘇門雖云小就，去唐卻近。蔡白石、王廢潭以蘇門爲我朝第一，其言雖過，要之不可厚非也。

藝苑卮言：高子業詩如高山鼓琴，沈思忽往，木葉盡脫，石氣自青。又如衝洗馬言愁，憔悴宛篤，令人心折。子業少負淵敏，牛支千與僞漢友諒同，既遷楚臬，恆邑邑不自得，發病卒。實友諒彭湖之歲也。其詩如積賤詎有基，履榮誠無階，既妨來者途，誰明

去矣懷。茫然大楚國。白日失兼城。久臥不知春。茫然怨行役。爲客難稱意。逢人不敢言。失路還爲客。他鄉獨送君。衆女競中閨。獨退反成怒。寒星出戶少。秋露墜衣繁。以我不如意。逢君同此心。當軒留駟馬。出戶倚雙童。里中夷門監。橋外酒家胡。爲農信可歡。世自薄耕稼。問年有短髮。逐世無長策。林深得日薄。地靜覺蟬多。文章知汝在。功名何物是。騎馬問春星。殘雨夕陽移。清婉深至。五言上乘。

吳國倫。顧洞藻。獻吉。仲默。並策上駟。而馳中原。高子業雖驂駕。第綏轡後至耳。

國雅子業。負奇氣博雅。其詩磊磊喬松。凌風迥秀。響振虛谷。

詩數。高子業視李何後出。而其五言古律之工。不欲作今人一字。在唐不減張曲江。韋蘇州。

梁園風雅。子業負淵敏之才。有抗潔之性。爲詩多胸臆語。吐言成章。不假緣飾。誦之若落落直致。而中自豐腴。

明詩選。陳臥子曰。子業沈婉雋永。多獨至之言。讀之如食諫果。味不驟得。又曰。詞存清曠。意成悽楚。

池北偶談。明詩本有古澹一派。如徐昌國。高蘇門。楊夢山。華鴻山輩。自王李專言格調。清音中絕。同時王奉常。小美。作藝圃。擷餘。有數條。與其兄及濟南吳者。子特拈出云。今之作者。但須真才實學。本性求情。且莫理論格調。又云。詩有必不曉者。雖衆體未備。而獨擅一家之長。如孟浩然。沈沈易盡。祇以五言雋永。千載並稱。王孟有明。則徐昌國。高子業二君。詩不同而皆巧於用短。徐有蟬脫軒舉之風。高有秋閨愁婦之感。更千百年。李何尙有廢興。二君必無絕響。此真高議。迥論。今于麟。大美。早聞此語。當不開後人揜彈矣。

田按。子業襟抱既超。故吐屬蘊藉。有魏晉人標致。次亦不失爲孟襄陽。京蘇州。自叙云。李空同方盛。邑子之屬。出其門。撰爲文辭。模於古人。私心不能無慨慕。時時竊撰一二篇。大本非所長。而強力慕之。度必取調於衆。可以明其宗旨矣。陳東之蘇門集。序出一時名流。捧手歎絕。可謂玄賞。

少年行

死士結劍客。生平藏博徒。里中夷門監。牆外酒家胡。有時事府主。無何擊匈奴。虎頸一侯印。猿臂兩雕弧。誓使名王侍。羞聞邊吏誅。長驅隨漢馬。轉鬪出飛狐。蒲壘遂破滅。莎車不支吾。甲第起北闕。蠻邸開東都。豈學霍嫖姚。椒房仗子夫。

明月引

滿地金波迴。中天玉鏡飛。有鳥多夜語。無雁不春飛。影徹銀河水。光翻織女機。何當御尊酒。常此奉澄暉。

歲暮作

旦夕茲歲改。蕭條旅思多。雲物媚晴宇。氣候屬妍和。崢嶸新陽至。故景實蹉跎。感時豈不懷。二紀修焉過。栖身慚擇木。望道歎伐柯。如匏吾自繫。匪玉孰爲磨。有髮日就長。心短獨若何。但云畢夙志。陳力豈知他。

謁海上人相

京邑驅匹馬。日有塵沙顏。清晨整巾幘。時叩高僧關。白日照仙閣。晴雲滿空山。相看偶一笑。念此客身閒。富貴不可求。余將從此還。

生日

年往歲空除。時來循虛至。明兩無留晷。吹萬有逸氣。我行淹一周。茲辰適再值。束髮歲更七。算齒紀逾二。

少懷滄洲心。壯損青霞志。淮禽終異化。魏瓠始同棄。五游存予歡。三費亡吾忌。達生庶不疚。乘流隨所寄。
登真定大悲閣

關山千餘里。平分南與北。臨路兩悠悠。客子情何極。青山地北橫。白日天南落。欲緩故園思。聊憑最高閣。
送別永之

憐君方遷戍。況我嬰愁疾。一別若流雲。相從竟何日。平生重交遊。弱冠弄篇帙。書願藏名山。功期銘石室。
安知事不就。跌宕情如一。已矣復誰陳。今亦返蓬華。

再去都別親知

少缺經世用。遭遇明時康。出入在省闈。仰逐羣賢翔。譬如驚馬足。側畏道路長。顛躓不終朝。中歲還故鄉。
願言守舊廬。沒齒乃其常。皇恩究微物。明照收羣方。改服起漁樵。端笏陪鷓行。頑疏果難容。進退益多妨。
猶參大藩居。守此國西疆。華階豈不崇。榮進非所望。退念孤蹇迹。臨路私自傷。無爲世俗遷。久要不可忘。

再同子延上方寺賦

已忝陽春遊。再陪瓊瑤作。首歲與君同。名區踐初約。芳風散入林。陰靄遞相薄。微雨點春城。流雲薄仙閣。
樓當望遠立。酒共馮高酌。樹裏梁王臺。水際夷門郭。伊余本孤蹤。事主乏明略。偶因負郭田。解印歸邱壑。
閑居道心增。日戀空門樂。安得拙病軀。放達從此託。

答谷司僕見問

幸自返中園。非關逃微祿。方因疾病餘。黽勉供樵牧。春至東郭田。夏來北林木。時從遠原上。日縱平郊目。野老逢與言。道書間能讀。何爲共世人。無事相追逐。勞君問出處。日暮掩茅屋。

與客集和氏園

惟君遊每接。自余居多暇。留連上客筵。款曲中園駕。賦詩芳泉側。舉爵茂陰下。放心安知憂。攜手不能罷。日氣淡將夕。雲影垂方夏。爲農信可憐。世自薄躬稼。

九日登城樓宋故都門

佳節倚秋城。朋曹晚相逐。竊憐坎壈心。暫寓登臨目。日落故鄉杯。霜寒遊子服。百里覽山河。千年看陵谷。生欣盛時康。追歎亡王促。帝功頽九五。霸氣消百六。猶能識宮觀。但見登樵牧。縱酒在高樓。悲歌對喬木。身同司馬病。懷異步兵哭。舉頭望長天。萬里來鴻鵠。

夏夜同袁德延騎出宿村家

景落息炎氛。輕策稍相試。微風送林木。皓月臨平地。路遠忘前期。情愜隨所至。田父止我宿。茅屋勸客醉。起步中天空。仰對明星次。一與雞黍筵。三歎前賢意。軒冕愁束縛。江海傷憔悴。明發返故墟。努力看身事。

劉西陂函山二先生見過

簡略缺世用。守此郊扉居。天寒草樹盡。臥病情何如。豪臣存舊好。宴飲及吾廬。伊昔趨天階。俱銜君子惠。提攜文苑游。出入鷓行綴。良時未可忘。世故身相繫。安知尊酒同。歲暮荒城際。無輕一日歡。乖離幾更歲。

秋夕

問年有短髮。逐世無長策。日已遠人徒。秋方臥阡陌。天高星流火。夜久月生魄。萬形觀此化。四運愁相迫。身非塞北翁。情是周南客。聊齊得喪心。安此留滯迹。

秋日贈別諸進士

別館敞秋晴。離筵蕩客情。致身付公等。分手使人驚。陽鳥迎霜動。陰蟲候夕鳴。贈言何以歎。虛薄媿吾生。行至車騎關。河南界盡處。與親知別。

山河未可盡。行處與春長。驛路沙俱白。關門柳欲黃。親知還自返。離別各相望。且緩征車發。中心戀故鄉。途中憶樊少南。便別行至安肅縣。作

驅馬一相見。悠悠難再逢。客心春夜月。官舍白溝鐘。不免微名累。其如多病慵。空臨南北路。愧此平生蹤。安肅縣寺病居。漢陽董玄亮見過時。董奉使還闕

門前易水路。下馬漢陽人。野寺天晴雪。他鄉日暮春。相逢一尊酒。久別滿衣塵。不憚王程急。應憐伏枕身。

謝病後初朝

舊識趨朝路。重來謁帝廷。出門聽曉漏。立馬望春星。拙病身仍在。羈栖志少甯。盛時誰不戀。終日憶山垌。
寓居慈仁寺游覽

終日仙宮掩。青松繞殿遮。到來長春草。行坐落天花。閣上玉城盡。門前官路斜。微身隨處是。何敢歎吾家。
毘盧閣上同伍疇中諸公西望

客來常一上。對此西山平。向夕檐楹立。憑空閣道行。楊花飛暮野。雨色動春城。卻戀同攜手。都忘羈旅情。
飲任文選宅

敢謂齊年齒。常嗟抱夙心。文章知汝在。交契爲誰深。華屋春燈豔。層城夜柝沈。賴蒙終夕語。客路一開襟。
與鄒生游香山宿僧房

處愁春草歇。驅馬春山中。夜宿禪關下。時將心賞同。風生近谷滿。月照前湖空。終愧淵明輩。玄言對遠公。
歲暮答許武部廷議懷歸

掩閣日愁晚。他鄉歲已深。未能逃世網。豈是戀朝簪。以我不如意。憐君同此心。故園春事及。歸路儻相尋。
呈劉西陂先生將按部洛陽道出小園

喧言洛陽去。卓蓋首行春。尚枉柴門步。應憐伏枕身。柳條簇官驛。雪色沒征輪。公問袁安事。平生解避人。
偶題

久爲南畝客。況此北窗時。翻笑陶元亮。應多歸去辭。涼風昨夜起。殘雨夕陽移。坐臥身無事。茫然生遠思。

曉起

惆悵空堂曉。蕭條秋氣陰。懸窗對疏雨。落葉滿重林。長往懷仙事。端居養道心。誰知歲復晚。高志莫能尋。

冬日西園

泱泱空寒野。蕭條只舊林。登高時送目。望遠日愁心。世與身爲累。貧將病轉深。無能學袁盎。閭里共浮沈。

星軺驛雨中別林八南還

驛外陰雲合。窗中宿雨含。深巖龍自鬪。險路馬能諳。短髮星星甚。長愁日日堪。休將南望淚。歸傍二親談。

駕出

帝出南郊日。言觀黃屋尊。選神役風伯。徙樂具雲門。馳道青陽麗。齋宮紫氣屯。九朝祠禮祕。歸待侍臣論。

仲春山行

春事殆過半。客行殊未閑。流雲開白日。微雨點青山。身世本遲鈍。林皋當早還。煙郊草色長。感此奈愁顏。

襄縣城東卽事

春晴汝岸曲。夜雨襄祠東。日出冥濛靄。天垂斷續虹。關梁臨水閉。馳道與山通。旦夕龍輿度。千城望幸中。

晚出都門登寺閣

柳葉桃花雨夜乾。今年寒食在長安。淹留不爲依雙樹。蹭蹬合應笑一官。行出都門常日暮。到來客舍已春闌。芳菲滿眼心無奈。祇上毘盧閣上看。

明詩紀事卷三

戊籤

薛蕙三十八首

蕙字君采，亳州人。正德甲戌進士，授刑部主事，改吏部，歷員外郎中，以議大禮下詔獄，尋復職。未幾罷歸，有《考功集》十卷。

四庫總目：正嘉之際，文禮初新，北地信陽，聲華方盛。蕙詩獨以清削婉約，介乎其間。古體上挹晉宋，近體旁涉錢郎，雖亦擬議，多而變化少，然當其自得，覺筆墨之外，別有微情，非生吞漢魏，活剝盛唐者比。又蕙與滿若水俱爲嚴嵩同年，嵩權極盛之時，若水年已垂耄，不免爲嵩作鈐山堂集序，反覆推頌，頗爲盛德之累。蕙初亦愛嵩文采，頗相酬答，迨其柄國以後，薄其爲人，凡舊時倡和，悉削其稿。人品之高，迥出流輩。其詩格蔚然孤秀，實有自來，是其所樹立，又不在區區文字間也。

王氏家藏集：阮公詠懷，間亦有迫切者。君采反儉游寬暇，有漢人意，可謂妙擬矣。

藝苑卮言：薛君采詩，如宋人葉玉，幾奪天巧。又如倩女臨池，疏花獨笑。

國雅君采七歲能文，弱年擅藝，古體如江南曲，從軍行，甚佳。近體如詠燭云：珠簾照不隔，羅幃映疑空。又餘花飄近落，衆鳥喧深竹。征鳥不返顧，浮雲相背馳。落花藏笑語，沙鳥亂歌聲。翠帷低舞燕，錦薦踏驚鴻。並是警句。辟之馬飾金鞵，連翩蝶躞，穩步康莊，了無踟躕之迹。

詩載弘正五言律。自李何外。如薛君采之瀟洒溫醇。高子業之精深華妙。置之唐人。毫無愧色。

梁岡風雅。西原咀英。魏晉振秀齊梁。意緣密而辭新。格醇雅而調逸。

明詩選。陳臥子曰。君采詩如貴主初降。雲耕驚輅。懸珠編貝。自然莊麗。李舒章曰。君采如出閣好婦。意態妍莊。未能跌宕。

靜志居詩話。薛公南巡。諍吏大禮正人。條達詞源。淵源理學。古詩自河梁以暨六朝。近體自神龍以迄五季。靡不句道字琢。心摹手追。卓然名家。

明詩別裁。西原詩力迫雅音。故不落凡近語。

田按君采詩。長於擬古。氣馥蘭茝。音振瓊瑤。其論詩云。神韻爲勝。才學次之。又云。清遠秀麗。深服康樂。可以識其意境矣。戲成絕句云。海內論詩伏兩雄。一時倡和未爲公。俊逸終憐何大復。粗豪不解李空同。薛之俊逸。與何爲近。宜其不許空同也。

飛龍篇

晨登金壇。神君所治。芝草叢生。玄泉泌泌。乘彼飛龍。以遨以戲。憫我衰老。乃告要秘。周流神庭。壁門十二。授我神藥。盛以玉筥。教我服食。長生久視。優哉游哉。壽等天地。

江南弄

芙蓉嶼口。茱萸潭。朱唇一笑。酒乍酣。牽裾並袂。歌江南。歌江南。望江北。思不見。情無極。

游俠篇

君不見。翩翩游俠子。虎變龍淪世。叵測轉海摧。山力無比。君不見。闔廬堂上養死客。吳王酒酣客進炙。千金七首。匿魚腸。俄頃蛟龍飛霹靂。又不見。夷門老翁。屠肆兒。陸沈大梁人。豈知竊符奪將。付公子。秦人北

解邯鄲師。古來豪傑皆若人。意氣激昂肝膽真。傾軀寫心不自惜。排難解紛如有神。丈夫自是英雄者。左拉荆軻。右古冶。甯當刎頸臥道旁。誰能槁死蒿廬下。君不見虞卿齷齪絕可憐。託身魏齊捐相權。平生著書萬言在。不如刺客三尺之龍泉。我今落魄復如此。放歌飲酒長安市。結客曾通滄海君。報讐欲借幽并士。酒闌擊劍歌莫哀。眼中豎子何有哉。明朝事就拂衣去。卻隨梅福觀蓬萊。

長信怨

異時陪玉輦。同載召蛾眉。寵極有衰歇。恩深多怨思。秋風吹網戶。春草被丹墀。不及主家伎。空歌團扇辭。

莫愁曲

儂家住石頭。綠水繞歌樓。不是工娛客。何緣字莫愁。

效阮公詠懷二首

窮漠萬餘里。海水周四隅。中原勒千乘。翱翔順風趨。白羽翩翩飛。一軍驚且呼。揚節下高闕。長纓繫單于。右行臨月窟。左旋出日區。立功何足矜。猛氣聊以舒。涼風起中林。槁葉落如埽。徘徊此何時。歲暮一何早。吾生隨物化。安得不枯槁。惆悵終日夕。延頸望雲島。榮名非所慕。神明可長保。手把三皇文。五嶽訪芝草。

擬郭弘農遊仙

瑤溪臨赤岸。曾潭揚素波。巨鯨冠蓬萊。玉堂映巖阿。中有羽衣客。陵岡拾若華。髣髴乘紫煙。縹緲吸翠霞。靈妃奏妙曲。六蚪駕雲車。西謁上帝廬。東戲海童家。下視九垓內。蜉蝣良可嗟。

擬謝臨川遊山

徂節淹登臨。開歲促遊玩。陰崖雪猶積。陽溪冰始泮。遊帆憇絕壁。抗策陟窮岸。撫化雖未盈。即事已可玩。幽谷風華媚。晴峰雲彩粲。尋異迹轉緬。覽勝景迭換。洲分島參錯。巖聚岫迴亂。丹梯架懸梁。石室構層館。初經洞穴底。乍出翠微半。羽人謝世蓮。靈景變昏旦。汗漫無冥筭。疏罔有塵絆。放懷聊自慰。含情爲誰歎。

冬初

開冬肇時序。時序異時曩。烈烈嚴氣升。肅肅玄陰敞。同雲市阡陌。凝霜被榛莽。寒暑鑿迭代。休咎空消長。郊園值窮節。庭戶息羣響。疾病倦淹留。寤寐縱假仰。感物殷懷抱。離人絕心賞。幽獨豈無悶。至樂非外獎。形變化隨逝。意愜神俱往。永解區中緣。安徼契眞想。

候大駕回

西北收皇旅。東南歸帝京。山囑八駿下。海汎六龍行。後車環外區。前駟集神坰。支兵連四校。中堅屯九營。絳氣曳朱竿。青雲生翠旌。鏡歌綵吹激。行漏玉鸞鳴。人觀萬國至。清宮羣后迎。金貂雜流景。玉璧委繁星。錄功對五帝。合符朝百靈。俯窺地紐正。仰瞻天柱平。郊禋方展義。升封將告成。祈招美土度。長謠頌休明。

答何大復

宵權不繼晨。朝游豈延夕。款念未云周。勞心彌已積。篤好追昔悰。興言撫今戚。纏綿金玉音。參差翰墨迹。開帙虛雲閣。臨觴闕瑤席。惠思荷來章。寒裳奉良覲。

答祝禮部

屏居寡權愛。懷疴積悲戚。勞君惠繁翰。結言慰離析。荒楚向疏蕪。寒花方寂歷。良辰已云暮。清揚不可覲。

舟行

朝辭枉渚汭。夕驚清川路。經過方自今。神期宛如故。沈吟招隱曲。徘徊遠游賦。西北有浮雲。行行一反顧。

首夏

寥寥塵外意。更對蕭然境。竹竦檀欒葉。雲起嵯峨影。迹幽疑避喧。神虛匪耽靜。嗒爾此端居。誰知晝方永。

西郊

清曠自有素。富獨在幽深。誰謂西郊地。宛似南山岑。四野多景色。青春晴復陰。鮮雲冠綠苑。回颿翔翠林。寢疾託閒逸。卽趣恣登臨。嬰累悼自昔。取適懽在今。豈嗟時易頽。但願力難任。穿池玩遊鯈。種木候鳴禽。將營人外賞。聊賦邱中吟。

郊居作

池籩鮮珍鱗。樊籠多鍛翮。物情忌窘束。人事傷紛迫。拙薄繆榮塗。疏慵謝朝籍。銷聲背誼競。息影投幽隙。邱園雖寂寞。悠然殊自適。徘徊弄文史。流連眷泉石。神輕片雲上。目瑩清川激。蓬嶠宛相聞。滄洲如在覿。未申隱淪志。稍習澆冥迹。外慕非所希。聊用終晨夕。

雜詩

富貴使心惑。嗜欲致行妨。宴安損性靈。美疢生膏肓。吾觀古來士。高躅互相望。首路或暫同。中道更蒼黃。班生嗣前烈。馬融遁遐方。藉梁奄爲累。附竇終自戕。通人識尙爾。咄咄可悲傷。

柏屏

何時別陵上。移居來後庭。牽條擬峰勢。總葉學山形。白雲轉自綠。綵雲相對青。無勞台嶺側。陵虛搏翠屏。

邱中

蕭條風雨散。淒清松桂冷。邱中一游睇。處處雲霞影。稍愛夕陽佳。復聽秋聲靜。遙懷賞心侶。歲暮空延頸。送劉子緯病歸

鄴下劉文學。成都漢長卿。淹留臥病意。瀟灑著書情。賓客頻頻去。風塵轉轉生。天涯雙淚眼。回首送君行。

送董侍御應期

同時多逐客。而我獨憐君。棄置勿復道。淒涼不可聞。風波一流落。江海遂離分。他日書相及。常因西北雲。

道院秋日海棠

偶來仙館內。花萼滿枝紅。彷彿看珠樹。玲瓏映棗宮。預傷白露下。坐惜綵雲空。躑躅攀條處。佳人不可同。

九日遊興隆寺

厭就騷人會。欣投釋子家。林風鳴貝葉。徑露溼金沙。宴坐依雙樹。清齋服九華。晚來歸客倦。欲借白牛車。

秋日溪上

何處窺秋色。牽舟入水隅。清波照鳧雁。寒露洗菰蒲。促迫悲生事。登臨快病軀。由來野人意。終日羨江湖。

晚過鄰叟

野外歲陰早。晚色正霏微。石闌向風靡。海鶴犯霜飛。投策暫云憩。采苓方未歸。幽人已相候。隔水啓荆扉。

元夜諸公會不赴

九陌帝城中。煙花繞漢宮。銀河流夜月。火樹煖春風。衾枕憂如昨。軒車恨不同。時聞玉珂響。寂寞臥牆東。

泛舟

水口移舟入。煙中載酒行。渚花藏笑語。沙鳥亂歌聲。晚棹沿流急。春衣逐吹輕。江南采菱曲。回首重含情。

觀舞

妙伎出秦中。纖腰學楚宮。翠帷低舞燕。錦薦踏驚鴻。宛轉歌相似。嬋娟態不同。無因逃酒去。懊惱白頭翁。

寄題延陵吳長史山居

魏苑芙蓉沼。梁臺修竹園。徐陳遊上國。枚馬託名藩。歌賦從容地。追隨優渥言。病來謝賓客。歸去臥邱樊。巖穴仍招隱。風塵稍避喧。山疑七里瀨。水似武陵源。昔洛排江閣。迎峰架石門。波瀾生枕席。彩翠落琴尊。鴻寶傳遺術。離騷念舊恩。秋風懷帝子。春草怨王孫。勝事幾人共。賞心千載存。相思隔雲外。桂樹屢攀翻。

對雨有懷

乍淡乍濃雲片片。半疏半密雨絲絲。林花落盡漸成子。巢燕飛來頻哺兒。坐對空尊應笑客。行騎羸馬欲尋誰。平生歡友俱南北。此日傷心獨詠詩。

遊盧巖歸月中紀興

雲林纔一曲。林屨已三休。遇可淹留處。應須緩緩遊。

城南梅開簡友人

郭外新梅樹。春風吹雨殘。未能攜酒出。幸爲折花看。

秋浦

秋浦多香草。當年怨楚臣。安知千載後。尙有廣騷人。

春日漫興

草芽半吐參差碧。花葉初開淺淡紅。安得黃金高北斗。盡輸青帝買東風。

宮詞三首

禁園處處鎖名花。步障層層簇絳紗。斟酌君恩似春色。牡丹枝上獨繁華。
閒倚闌干看柳條。可憐渾似董嬌嬈。東風何處吹桃李。空費心情學舞腰。
紅袖低回拂錦茵。玉顏憔悴掩羅巾。空房獨對嬋娟月。賴是嫦娥不笑人。

擬仙詩

碧光衫子紺霞裙。月下輕風淡素雲。一曲參差吹未徹。海邊琪樹落紛紛。

王廷陳三十三首

廷陳字稚欽。黃岡人。正德丁丑進士。改庶吉士。授吏科給事中。諫南巡杖謫裕州知州。尋下獄免歸。有夢澤集二十三卷。

四庫總目。廷陳少年高第。以恃才傲物。致放廢終身。其器量殊爲淺狹。至其詩意警語圓。軒然出俗。則不得不稱爲一時之秀。司勳集夢澤集樂府古詩。潘陸齊軌。下擬陰。何五七言律。沈杜比肩。參之虛駱。

藝苑卮言。王稚欽詩。如良馬走坂。美女舞筵。五言尤自長城。稚欽少爲文。頃刻便就多奇氣。爲庶吉士。詩已有名。其意不可一世。僅推何景明。而好薛憲。鄭善夫。以諫出知裕州。宰省監司。過州不出迎。相戒莫敢道裕州。而恨稚欽益甚。爲文致逮下獄。削秩歸家。居益自放。達官貴人來購文。好見者。稚欽多蓬首垢足。因服應之。間衣紅紵窄衫。跨馬或騎牛。嘯詠田野間。人多望而

避者晚節詩律尤精。好縱倡樂。有聞爭一首。花月可憐春。房櫳映玉人。思繁纖指亂。愁劇翠蛾繁。投色歌頻變。留賓態轉新。曲終仍自敘。家世本西秦。又一書答人云。綺席歷改。伎倆雜陳。絲肉競奏。宮徵暗移。羲和既逝。幽宵嗣輝。逸興狎狎。千霄薄雲。禮廢罰弛。履遺纒絕。俱妙極形容。可謂才子。

國雅。稚欽調高趣新。頗多命句。如深谷懸巒。冷然幽響。其少年行云。金羈及狡兔。珠繪落高鴻。弔道士云。海田猶有變。洞壑豈無哀。還蜀云。峽東秋江怒。雲盤石棧懸。始與高岑方軌矣。

明詩選陳臥子曰。稚欽爽俊。故意警而調圓。

靜志居詩話。稚欽逸藻波騰。雕文霞蔚。音高秋竹。色豔春蘭。樂府古詩。既多精詣。五言近體。亦是長城。固已邈後凌前。足稱才子。

田按稚欽格矜復古。意取標新。亮節清音。絲情麗製。大約古體勝於近體。五言勝於七言。固由詣有專精。亦是才分各限。薛君采高蘇門。亦復爾爾。

煌煌京洛行

辭我故里來遊帝鄉。誰云周道險踰羊腸。一解車馬如雲。意氣揚揚。昔為奴虜。今狎侯王。二解伯兄乘軒。仲父鳴璫。唱騶馳道。徵歌教坊。三解千金買劍。百寶為裝。風雷一擊。星日回光。四解朝探俠窟。暮宿名倡。酣呼六博。縱酒千場。五解傾財結客。隱罪匿亡。名齊郭解。人比孟嘗。六解

田按此康陵時事。稚欽擬古詩。略無陳色。

白紵辭二首

高堂邃宇施翠帷。蘭膏明燭散朱輝。二八接武步舒遲。被服姣麗光陸離。彈箏鳴瑟商羽移。喜溢歡恣不自持。轉盼含嬉屬所私。柔觴勸君君自知。主人既醉客不辭。燭滅纓絕珠履遺。

朝露未晞夜霜零。衆芳凋歇鷓鴣鳴。逝者如斯不復停。人生百年命忽傾。爲君秉燭縱遊行。三星在戶參差明。騰觚飛爵何縱橫。垂羅映縠耀珠纓。衆中不言懷隱情。色授神馳流目成。士女雜坐交和歌。河轉參橫奈夜何。

雜謠

烏母謂烏子。弋人在傍汝勿唬。弋人得知將汝歸。我但高飛起。安能救汝爲。

名山藏。武宗將南巡。廷陳與同館汪應軫、江暉、曹嘉、舒芬、馬汝驥等。上書劾江彬罪。學士石瑄聞而止之。廷陳賦烏母謠。書翰

林壁間。

少年行三首

幽并聞騎射。閭里藉輝光。朝遊從許史。夜宴挾姬姜。鳴鞭當大道。調瑟坐中堂。傍人爭借問。云是羽林郎。
長安本俠窟。烈士多英風。殺人帝輦側。射獸上林中。金羈及狡兔。珠彈落高鴻。歸就博徒飲。酣歌意難窮。
悲歌白日變。裂眦秋雲高。仇家諒不釋。怨吏幸無遭。全生脫虎口。獲死等鴻毛。豈效儒冠子。終歲濡柔毫。

子夜歌

共歡種梧桐。十載青雲齊。百年化雙鳳。來此樹上棲。

怨詩

隕葉春柯斷。株懷帶寒霰。飄溫陰巖希。霽頽魄愠玄。駛波僧逝。令德鮮終。良辰忽替。

湖上行

麗服出芳郊。香車臨綠水。留連天桃下。宛轉垂楊裏。妝憐草色鮮。坐逐花陰徙。相攜拾翠行。暫拉聽鶯止。忽驚玉珮遺。時將芳樹倚。紛紛遊冶兒。側目情無已。

詠懷六首

人生本殊方。神範各有宜。參錯匪一致。妄鑿乖天倪。臆脛續則瘁。鶴脛截則悲。拇駢決則憂。指枝嚙則啼。匙劣不假益。羨溢甯俟虧。紛彼使嬾子。作意相追隨。智殫力云匱。成理曷能移。

民食美芻豢。鷓鴣甘臭陳。西子豈不都。魚鳥不見親。萬類殊所嗜。物豈慕非倫。箕畢各有好。況此世上羣。情欲孰爲正。參差何可均。黜智任自然。悠悠葆天真。

河清不可俟。川逝誰能止。朝露忌太陽。夕日愁濛汜。歌舞化塵埃。都邑生荆杞。大運厄陽九。銷毀固恆理。填海精衛勞。逐日夸父死。齊景悲牛山。晏嬰笑未已。彭殤孰短長。無生悟方始。

日月互天塗。照耀各有時。榮枯若循環。智巧難控持。賈生愁遇鵬。莊周憚爲犧。糾纏誰不嬰。文繡焉能辭。

放言用自慰。虛言誠我欺。得失去來間。北叟迺深知。

愚公亦非昧。智叟未爲得。獻疑親反嘖。贊詭竦爲德。大人計億代。俗士愁日昃。通蔽鮮一致。損益非易測。茲歲忽云暮。駕言出城闕。楊林翳白日。岡岑蔽玄雲。荒原離獸馳。寒鳥鳴索羣。上有百尺臺。下有千古墳。登高一聘望。思我平生親。延佇久不至。俛仰懷酸辛。萬物靡不化。千載猶茲辰。驅馬復來旋。咏歌聊飲醇。

歲暮雜興

孔公深贊蠖。賈生虛忘鵬。屈伸在一時。憂喜本同域。河清豈能俟。途窮安足哭。久息漢陰機。莫問成都卜。

詠秋泛

鮮曦登首秋。緒風革闌暑。孤嶼濺驚湍。輕橈驚蒼渚。寒舟吟越人。鼓枻歌漁父。霜林隕葉揚。沙岸輕鷗舞。兼葭寒隱汀。芰荷衰映浦。披拂枉蚤緣。維繫乍延佇。蘂片翠縷翻。鱸鯽銀絲剖。俯睇怍虬潛。仰盼愧鴻舉。泛梗傷在今。乘桴豈獨古。

贈人

南塘凋儻士。薄宦向西陬。石竹臨江映。春雲抱峽流。徘徊去國日。浩蕩望鄉愁。莫厭卑棲地。三巴足壯遊。

送李子中養病歸

游颺傷人事。興衰感世情。虛傳授簡叟。無復抱關生。客散梁王苑。人耕宋帝城。行多懷古詠。一一寄同聲。

贈方子

鄰並復同調。過逢數舉杯。謝公興不淺。莊鳥吟何哀。霞日赤城曉。雪濤滄海迴。何當共舟去。攜客訪蓬萊。

出獄後歸興

孤憤辭梁獄。高歌唱楚鄉。煙花春沔鄂。樓閣畫瀟湘。弔古懷增慨。尋仙事頗荒。何如共漁父。一笑詠滄浪。

道中憩廢寺

寶地元虛寂。金仙合杳冥。空林沈紫翠。畫壁落丹青。羈旅暫投迹。殘僧一啓扃。迷方隨處是。含意訊山靈。

寄方思道

閒爾遊華頂。令予夢彩烟。戶庭羅峭壁。枕簟落飛泉。山有藏書穴。溪多送酒船。春江如有興。花裏到吳天。

湖泛

楚地饒洲渚。騷人戀芰荷。鷁舟張錦席。龍笛起滄波。鳥影隨檣影。漁歌入棹歌。前溪聞更好。欲進暮煙多。

送王知事還蜀

佐郡已三載。還家無一錢。苦心成白首。達命任皇天。峽東滄江怒。雲盤古棧懸。歸來揚子宅。寂寞守吾玄。

丁酉之夏觀文溪子於大江之濱與之述往感時命酒坐石揮涕而別太息成詩

愴爾離羣久。艱危更可傷。一麾堪白首。萬死出南荒。天入瀟湘闊。風驚鶴鶴揚。垂堂古有戒。去矣慎舟航。

聞箏

楚館名娃出。秦箏逸響傳。徘徊芳樹側。掩映雜花前。雁促玫瑰柱。鶯喧錦繡筵。年來哀怨切。復此感繁絃。
閒步

卜築蒼巖畔。爲園碧水涯。浴童依淺瀨。浣女散晴沙。中散林惟竹。東陵圃是瓜。村頭歸欲暮。巾服映殘霞。
寄韓道人

吾愛飛霞子。殢霞臥藁宮。時將黃綺曲。高詠紫芝風。洞草秋生細。壇龍晝護空。丹應九轉就。地與十洲通。
玉樹扳何及。青牛望不窮。因君惠羽翰。自此脫樊籠。獨鶴冥冥去。相從碧海東。

遊西山作

西山憶昔宣皇幸。幸罷千巖御氣留。金界尙看金殿峙。玉泉長接玉溝流。君王水石遊人重。畿甸煙花賦客收。天上翠華無復度。五陵松柏迴含愁。

卽事

楚國村墟煙霧裏。春朝門巷薜蘿間。柳條到地可攬結。燕子定巢頻往還。新水潺湲遵故渚。歸雲縹渺戀家山。生涯甘榜漁樵侶。世事虛傳鷓鴣班。

病後客過有贈

病骨旬時虛酒筵。壯心激烈嗟暮年。秋堂過客擊柝後。寒渚哀鴻吹笛邊。尊罍當戶映初月。松桂傍人生夕煙。與君一醉緩世慮。深夜敢辭吾欲眠。

明詩紀事卷四

戊籤

華察二十二首

察字子潛。無錫人。嘉靖丙戌進士。選庶吉士。改戶部主事。歷兵部郎中。復改翰林修撰。賜一品服。使朝鮮。尋罷歸。起原官。歷侍讀學士。掌南院事。有巖居稿八卷。

秦泉集。鴻山詩。追蹤陶。杜。卓然大雅。

選巖集。華君詩。洒然自立於塵垢之表。意象超越。音奏淒清。若木居草茹。服食導鍊。淪隱聲迹者之所爲言。非世人語也。

藝苑卮言。華子潛詩。如磐石疏林。清溪短棹。雖在秋冬之際。不廢楓橘。

舉用卿雲岡稿。華子巖居稿。沖淡閒曠。如秋水芙蓉。不事雕飾。步驟陶。韋。而得其自在。

明詩選。陳臥子曰。子潛清儉。似茅茨下人。

懷閔宮諭

伊昔託明義。蓋簪從北扉。久要重南金。歲晚期同歸。如何鑠衆口。中路忽分違。鄙夫昧出處。達士能先幾。養疴識遼海。戒寵知防微。嵯峨道場山。白雲朝夕飛。室遠人自邇。莫使音塵稀。

過煙水莊

垂楊陰平田。湖畔多菑畚。茫茫煙水中。結茆成隱居。開門閉白日。密竹臨清渠。行隨溪上雲。倦枕牀頭書。客至時命酒。興來兼捕魚。願言託幽迹。卒歲同樵漁。

晚晴泛舟

載酒隨輕流。演漾情未已。夕陽映前川。棹入微茫裏。散髮弄煙波。竊比鴟夷子。沙際暝色來。歸楫還自理。何處滄浪歌。因之一洗耳。

送俞汝成遷紹興武守

一官謫南楚。三載始得遷。積薪豈足歎。養晦有固然。榻來佐會稽。境中秀山川。八月錢塘潮。送君江上船。麻宇倚絕巘。蒼翠生檐前。嵯峨越王臺。日夕空雲煙。臥治饒化理。登臨富詩篇。吾將探禹穴。藉此東道賢。澄觀樓曉坐。和僅初韻。

曉色澄秋林。霞明映山翠。貪奇事夙興。爽氣醒殘醉。空霜日夜繁。坐見木葉瘁。天高宿霧收。白雲出平地。初日照重巖。寒流響虛隧。景物清心魂。冷然起遐致。

雨後山園卽事和僅初韻

山色曉微霽。山鳩鳴不已。雨氣積重林。巖陰木生耳。荷鋤歷中園。開畦看新水。羣峰對草堂。白雲滿窗几。

因茲避世心。悟彼攝生理。萬物皆自然。至人貴無已。

過環谷草堂

采藥到仙家。白雲滿空谷。翠峰環四面。蒼翠常在目。一徑何透迤。頽垣見修竹。岩扉白日扃。隱几睡方熟。有時學灌畦。抱甕蔭喬木。悠悠林壑間。俯仰聊自足。

姚山人茶夢閣

山人恥獨醒。啜茗亦自醉。清風敞高閣。隱几頽然睡。平生之苦吟。冥想入寤寐。殷勤夢裏言。款曲詩中事。神超萬象融。意愜情景備。松陰泣山鬼。夜靜猿鳥避。天籟本希聲。筌蹠一何贅。悠悠池草心。千秋可同致。早春園居次僅初韻

樗散任吾真。幡然早乞身。不辭爲圃陋。聊給罷官貧。荷鍤初經雨。開畦正及春。猶憐聞道晚。應媿漢陰人。寄尤郡博

遙聞授經處。正對錢塘門。白鳥出還沒。青山朝復昏。家貧常自足。官拙詎須論。爲問相如賦。何年達帝關。送施子羽謁選北上

把酒那能別。江城落木初。鄉心縈客路。寒色上征車。旅食途將暮。人情交易疏。漢廷方重賦。誰爲薦相如。巖屋

鑿坏宛成室。偏側嵌危岡。花發洞門隱。雲生石几涼。巒巖通水氣。幽隙引晨光。豈是逃禪處。塵心已坐忘。

秋日閒居漫興和僅初韻

高齋著書暇。雲盡見諸峰。已卜青山宅。言追處士蹤。溪深度夕鳥。地靜聞疏鐘。蓬戶無人到。蒼苔一徑封。

芝谿詩爲蔣上舍作

自居鑾江上。迢遞憶吳關。棲鳥尋故處。歸雲懷舊山。春明紫芝秀。月照清谿閒。孰謂川途遠。神遊時往還。

送談同年轉台郡二守

浮雲本無繫。去住欲何爲。山郡興自僻。大夫官不卑。俸錢足酤酒。暇日但吟詩。莫入天台去。花深失路歧。

酌紅梅下和姚山人韻

巖梅發紅萼。獨樹明高林。春晝鳥鳴寂。雪晴山閣陰。鄉愁不入夢。歲序自驚心。對此生華髮。甯辭杯酒深。

秋初雨後同姚山人山行

空山秋雨霽。載酒一從君。林靜發清磬。潭虛生白雲。登臨聊適意。去住自爲羣。歸路溪橋晚。涼蟬噪夕曛。

荆溪曉發

挂席出溪口。微茫天漸明。殘星帶高樹。春水抱孤城。野曠月初沒。村深雞亂鳴。停舟問漁父。誰識濟川情。

山中和文壽承韻

林色晚來淨。秋聲雨後新。偶然松下坐。對此山中人。流水任去住。白雲忘主賓。安能向城市。終日勞吾形。
送安郡倅還京口

離亭一悵望。春水渺孤舟。黃鳥啼津樹。青山對驛樓。恨添芳草色。夢繞大江流。爲問衡陽雁。何時過潤州。
冬日送周上舍歸婁江

歲晏束書去。悠然返故園。爲文已自信。生事復何言。落葉藏深徑。疏梅帶遠村。離情不可極。寒日下荒原。
贈彭孔加

聞說幽溪處。衡門委巷通。業存三徑僻。道在一經窮。霜葉墮虛牖。雲山隨短昂。坐憐華髮改。莫遣綠樽空。
楊巍三十二首

巍字伯謙。海豐人。嘉靖丁未進士。除武進知縣。擢兵科給事中。出爲山西僉事。歷參議副使。擢右僉都御史。巡撫宣府。改陝西。進右副都御史。移撫山西。入爲兵部侍郎。改吏部。以終養歸。起南戶部尙書。召爲工部尙書。改戶部。進吏部尙書。加太子太保。贈少保。有夢山存家詩稿八卷。

四庫總目。巍中歲學詩。與唐高適相類。而天分超卓。自然拔俗。故能不染埃壙。獨發清音。
海岳靈秀集。夢山詩。不事雕繪。旨趣天成。

鄒觀光字如集。揚公詩。高曠玄遠。冲夷澹泊。河朔魏允中。擊節誦公晉中詩。燈前梳白髮。馬上夢青山。思沈而致遠。非唐人不

能道。

分甘餘話。吾郡楊太守夢山。五言冲古淡泊。在高子業。華子潛。季孟間。如遠道令人愁。况近單于壘。秋風入雁門。羽書日三至。微微霽。放流。天壤色俱素。鄉心生寒草。世事入秋風。風雨樓煩國。關山李牧祠。閒將流水引。夢與古人居。雨響殘秋地。城分不夜天。古石苔生徧。泉香澗過餘。皆逼古作。

靜志居詩話。讀夢山詩。如水仙十蕤。江梅一夢。孀然薄冰殘雪之外。

田按夢山集。五律最勝。直擅右丞。文房勝境。餘子不足道也。自書存稿後。乃謂得於曹紀山。呂時臣。爲多雅抱冲襟。令人豁然意遠。

彈琴峽

瑤琴何處聞。停車空緬想。谷靜水聲幽。霜餘山氣明。無聲心亦閒。况復聞清響。大道晦有時。靈物豈易賞。徘徊坐磐石。高歌動林莽。

馬谷山

馬谷近愚谷。所以人跡稀。昔名烏鴉山。不見烏鴉飛。惟有紫蕨菜。其苗高且肥。洞口封白雲。專待主人歸。

述懷

鯤鵬翔萬里。鷓鴣在一枝。大小各有適。進退豈無時。胡爲徇利祿。營營至死悲。榮公行帶索。陶氏恆苦饑。至性苟無累。貧賤復何辭。歸去臥山中。斯人良可師。

送黎樂溪憲副轉甘肅太僕

帷幄運籌者。翻令在牧芻。髮時雙鬢短。去路一琴孤。已振蘭臺紀。應蕃沙苑駒。誰云閑散地。天子欲平胡。

柏溪書屋

入夏門長閉。爲園道不疏。閒將流水引。夢與古人居。野鶴窺丸藥。山精聽讀書。尋詩自來往。風起柳塘初。

石州陷後作二首

石州古名郡。一日化爲灰。虜騎豈飛到。關門不戰開。腐儒終誤國。盛世自多材。好用廉頗輩。空談何補哉。自昔聞兵火。傷心在目前。生存猶墮淚。死去益堪憐。城壘酸風日。干戈積歲年。請纓還我輩。悔禍是皇天。

雁門九日無興登高作詩二首

九塞行將徧。三秋歲欲殘。故鄉歸未得。客抱向誰寬。雲送臺山暝。風吹關樹寒。干戈正擾攘。何處可凭欄。把酒不能醉。登高奈所思。豈堪雲斷處。正值雁回時。風雨樓煩國。關山李牧祠。寒花無意賞。況復鬢毛衰。

寓安邑

回首同戈路。忽驚歲序徂。腐儒慚籛廩。多病夢江湖。凍水寒雲合。條山夕照孤。荒涼城郭裏。惆悵禹王都。

過懸空寺

一寺空虛裏。危欄高幾層。懸崖惟度鳥。無路去齋僧。雲隱多羅樹。天垂寶月燈。塵心何處覺。孤磬下峻嶒。

路中逢立春

簫鼓迎春日。喧喧客裏聞。馬消邊地雪。旗煖晉山雲。隱隱川光動。微微柳色分。田園正好去。莫待有移文。

過石嶺關

石嶺月初上。登登僕從勞。山城秋路遠。戍鼓夜聲高。驅馬臨重隘。感時換二毛。風塵頻看劍。無夢向江皋。

贈車鎮村族叔三老

吾家養齋老。所性好清閑。薄地不盈頃。草房只數間。宅鄰廣武墓。樹接烏鴉山。已往郊原外。柴扉長日關。

郊居秋興

郊原淨秋色。幽事甚從容。不厭山僧過。每於田父逢。爲橋通野水。伐木出寒松。更願煙塵絕。時清一老農。

答王龍門見寄韻

自向山中臥。蕭條門徑秋。市沾愁不醉。藥品病多收。世事歸詩卷。生涯有釣舟。聞君欲相訪。家在海西樓。

月夜至山園

以我愛光景。山園夜亦過。微風醒鳥夢。明月澹煙蘿。露冷蛩聲少。亭空樹影多。此中得佳句。高詠向星河。

還家逢九日

芳辰來故國。秋色徧柴門。正值菊花候。新開竹葉尊。晴雲高雁鶩。暮雨長蘭蓀。偶誦閒居詠。斯人可共論。

重過馬谷山村

山村重到日。風景益堪親。家遠惟宜病。境幽豈避人。雲開三洞曉。水漫九河春。投老此中得。當年枉問津。送孫司訓之任良鄉學諭

幾載借荒城。爲師獨有名。那堪驅瘦馬。猶自戀諸生。月上蘆溝白。風傳黍谷清。莫言官尙冷。已得近神京。秋晚桃嶺再集

已過重陽日。風高寒更催。菊殘猶待客。病後尙登臺。萬木霜中落。浮雲天際來。祇應拚一醉。騎馬夜深回。題趙子冲玄稿

嗟君狂者流。一第竟悠悠。見客少青眼。吟詩欲白頭。谿山無世態。花鳥共春愁。從此聲名著。前身趙倚樓。過響水堡

塞水合流處。聲喧十里繁。乍聞堪動色。相對未能言。東峽龍羅怒。驚濤日月翻。祇應阻胡馬。不得入中原。早秋登龍門城樓

朔塞樓頻倚。新秋天乍晴。雲山兼日色。鼓角帶邊聲。路有元人轍。臺餘漢將名。楊公石柱在。極目舊開平。九日大同登高

已作雲中客。更登塞上臺。風塵回老眼。節序託深杯。碧海雁行斷。陰山雨氣來。故園今日菊。惆悵向誰開。

題龍門圖送溫侍御還朝

疊浪下危岑。誰言禹鑿深。羣龍鬪白日。客子發孤吟。怒損山川氣。愁關天地心。憑君爲砥柱。到海萬波沈。

遊大慧寺同李行人烹任計部鎧羅廷評節汪山人淵賦

尾

花垂羅洞口。樹滿碧雲層。對境疑爲夢。前身恐是僧。樓臺依北闕。經論有南能。卻恨相過晚。登臨意不勝。

宿小山望海寺

岩頭燈火起。幾處見僧房。蘿薜昏初夜。星河滿上方。人歸山店遠。磬入海天長。明日正東望。蓬萊接混茫。

酬紀山見寄韻

別離二十載。書到見交情。始信山居好。益憐詩韻清。花開宋玉宅。雲抱楚王城。何處思君切。秋高古北平。

宿凌雲寺二絕句

繫馬夕陽邊。山僧訝客至。門開古殿秋。云是凌雲寺。

野寺一僧住。朔風萬里來。虜營猶未徙。獵火照邊臺。

爲任柏溪題畫

萬壑縈迴一草亭。溪雲漠漠山青青。主人何處尋芝朮。留得松聲與客聽。

明詩紀事卷五

戊籤

皇甫冲八首

冲字子浚。長洲人。嘉靖戊子舉人。有華陽集六十卷。

藝苑卮言。太原兄弟俱擅菁華。吳中一時之秀。海內寡儔。

皇甫孝少玄集。吾兄因是子樂府。其秀於古者蓋鮮。觀其意直欲極詣以求乎至當。而不俯仰於世俗之談者。

司勳集。吾兄詩兼綜諸體之妙。而不能稱之以一長。盡臻名家之奧。而不能擬之以一子。此二陸辭藻。獨秀於平原。三謝聲華。莫先於康樂也。樂府雄深。古選雅澹。歌行縱逸。五言近體典麗。絕句清婉。差弱者。其七言近體乎。

國雅。吳中四皇甫。盛稱才藻。宜嗣冉曾。

列朝詩集。子浚遊虞山。有紀遊詩。自爲之序。詞致甚美。其全集不傳。金陵張文寺曰。四甫之才。子浚爲冠。亦闡幽之論也。

靜志居詩話。四皇甫詩。源出中唐。兼取材於潘左。江鮑。清音亮節。淨掃垢氣。高蘇門。華鴻山。楊夢山。而外。無有及者。

明詩別裁。吳中詩品。自高季迪。徐昌穀後。應推皇甫兄弟。以造詣古澹。無一點縷織之習。時二黃三張。空存名目耳。

田按。子浚詩。五言與諸弟合轍。歌行獨得變風變雅遺意。子浚舟中讀楊兵部疏。詩云。誰讀楊公疏。聞之感慨生。無從得借劍。空使欲沾纆。壤獄人誰惜。投沙已獨清。須知直臣志。九死一毛輕。弔椒山之死。義憤勃發。乃弟司勳集中。壽介裕序。謝嚴相公。分惠大官攢品。謁鈴麓書院。嚴公解相還豫章。追送淞陵。諸詩。過於放翁之賦南園。在山出山之詠。能不於茲三歎。

築垣行

朝聞築外垣。畿甸紛縱橫。五城發閭庶。九營糾踐更。司徒庀餼糧。司馬量期程。司空度基址。板築戒時興。繚繞百餘里。周帀遮宸京。婦女喜往饁。童稚歡呼行。予前相勞苦。豈不愛此役。天子守四夷。何須問疆場。有臣居北門。可以謝西域。蒙恬築長城。猶謂秦無策。時詘乃舉嬴。徒爲智者惜。父老來告予。公但見其迹。請言前年秋。胡馬入塞來。兵環順義城。馬飲三河涘。關山豈不隘。如涉無人墟。壯士豈不猛。無敢當其威。六道召義勇。九門宿王師。胡虜晝殺人。夜火爇民居。火焰燒天雲。白骨盈溝渠。醜婦割乳飲。美者爲月支。橐駝滿千萬。寸鐵貴金珠。六鎮坐觀變。誰來衛王畿。選將盡純袴。黠兵非鐵衣。邊懸本兵首。市暴中丞尸。元戎閉營臥。曾無一矢遺。或言召之來。聲勢相互持。虜去竊自慰。吾師殺其軀。取首作俘馘。□□奏彤墀。王民百萬戶。乃不如蓬蓽。思之骨猶寒。安知勞與罷。吾將從王事。請子且勿嗤。回首謂其徒。胡虜已刷馬。築垣戒時成。朝夕慎勿惰。不記奔逃時。吾儕苦顛播。若子槩上盤。若妻馬前裸。有弟生不歸。有親死棄野。東家歎夫鰥。西室哭婦寡。爭門後者死。踰河疾者墮。舉畚墜下基。爲堞高著堦。一朝壞斯垣。誰來顧爾我。垣成詠惟甯。庶免兵燹禍。胡去開門行。胡來閉門坐。臣尹但畫諾。將軍幸安妥。且侍太乙祠。無問三邊火。

實錄嘉靖三十二年十月辛丑新築京師外城成上命正陽門外門名永定崇文外門名左安宣武外門名右安大通橋門名

廣渠彰義街門名廣甯

順義戰

鄰有順義人。告我庚戌事。八月月生魄。道傳俺達至。朝聞古北屯。暮見遼陽騎。李生正下帷。奮激報守吏。守吏不敢言。雙目但直視。馳馬歸赴敵。城門忽已閉。登城望家室。膏血乃塗地。里閭盡焚燒。妻子身首異。李生按劍怒。背裂聲色厲。詎惜中山羹。甘心河東棄。惜哉無一兵。不能爲之計。乃有陳使君。挺身獨不避。下令開四門。彎弓插兩幟。左書報仇文。右寫勤王字。當門據胡床。潛軍弛銜轡。李生與之俱。不覺增勇氣。胡虜來覘窺。一矢兩酋殞。胡驚齟齬奔。倉皇解圍去。城邑不破殘。凡以二子庇。功高主不知。事往名亦墜。李廣豈數奇。耿恭終棄置。斯理自古然。況乃居今世。請君勿復言。此事猶爲紀。

下邳

天曠川途遙。長楊繞墟陌。歸舫若飛蓬。飄飄挂輕席。圮水東流長。邳山暮雲白。爲儒四十年。哀然一縫掖。投筆緬幕中。爲問山中客。儻有墮履人。先雞待黃石。

七星檜三株猶存

停舟繫石岸。踞躡遶瑤壇。梁宮暮雨濕。蕭檜陰風寒。攬衣就拂拭。詭怪極偉觀。形分巨靈擘。影屈螭蚪蟠。上澗煙雲色。下蝕苔蘚斑。何須屬霄漢。假塞當層軒。代禪若反手。日月如飛翰。載記豈所覩。圖繪良工難。生者宛神理。摧者非靈殫。緬念封殖人。千載增長歎。

過濟甯懷周白川尙書

忽憶尙書思惘然。歸舟還過濟陽川。棠陰寂寞猶今日。楊柳依稀似往年。江上自吹懷舊笛。道傍誰問孝廉船。清尊獨對南城月。惟見歸鴉噪晚煙。

和子約弟帝京上元

走馬來逢帝里春。上元今夜物華新。萬家煙火明侵月。夾道香車暗起塵。穠李歌中喧笑語。簫韶聲裏豔陽人。更看天際神光起。道是西宮祀玉真。

西苑卽事

曉日曛曛照御堤。君王身在大庖西。雲邊鐘磬和仙樂。日下旂幢雜綵霓。侍從詔看玄鶴舞。中官敕賜紫駟嘶。長生殿上長明火。不數秦王祀寶雞。

渡淮

去國逢春春復過。歸舟四月渡淮河。岸當齧處沙成漲。水到迴流漩作渦。直北煙塵看遠在。向南風氣覺暄多。八公叢桂今何似。欲就山中結薜蘿。

皇甫湜四十九首

湜字子安。沖弟。嘉靖壬辰進士。除工部主事。改禮部。歷員外郎中。遷春坊司直。謫廣平通判。進南

刑部主事歷員外出爲浙江僉事有少玄集二十六卷外集十卷

四庫總目津詩憲章漢魏取材六朝婉麗之詞綿澹之神以驥駕昌穀蘇門固無愧色

甫田集子安雅性閒靖慕玄晏先生所爲自號少玄子詩沈蔚偉麗早歲規倣初唐旋入魏晉晚益玄造鑄詞命意直欲窺曹劉之奧而及之惜乎未見其止皇甫沖華陽集仲氏子安謂余曰今之爲文者王宋稱一代之宗李何爲中興之冠然王宋反元習之靡而不能不病於聲李何矯一時之弊而不能不泥其迹故於詩獨取迪功子安刻勵二十餘年其性敦靜簡默又能致其深沈之思其於詩鑄詞精而爲旨遠體骨奇俊辭彩英發吾宗之有子安則衣裳之冠冕居室之棟梁矣

司勳集司直兄學臻博極思覃深湛余分則友于義同師授每有述造輒相詔視商榷砥礪可得而言方其家食含章與徐生二黃定交筆札薦嗜工部既何李篇出病其谿徑專意建安至解巾登仕與蔡王二行人廣搜六代之詩披味耽翫稍回舊好雅許昌穀又與王文部李司封唐陳二編修劇談開元天寶之盛乃曰詩雖選體亦無使盡闕唐風也故其詩特工五言而七言近體薄不經想蓋錯綜魏晉託宿唐英幽玄以通思存容以御氣婉麗以陳詞和易以達理憤懣以抒情綿暢以該事雋永以歸趣其始構也隻字不憚於心片言無斃於目踞壁窮思擁案寤寐曾不少休今稿中或兩字未定或二語並存致蓋密交藝苑危言子安之東覽古選頗勝子循之禪棲近體爲佳子安卒蔡子木以詩哭之云五字沈吟詩品絕一官憔悴世途難可謂實錄又云子安詩如玉盤露屑清雅絕人惜輕練短幅不堪裁翦

續吳先賢贊皇甫兄弟自相師友濬對策高第爲郎尤爲昆季所推貴溪相任宗伯時所上章奏皆草之或有故使他郎代即無以當其意改太子司直坐法謫又移按察浙其在越詩曰東覽最盛以五言名

馮時可元成選集皇甫濬九日詩鷓鴣入怨柱蟲響切離欄楓落他鄉早草寒故國秋又河虛平夕霧閣掩澹秋塵素霞昇逾靜高雲歛更新又新月詩微暉不照綺清漢欲生塵雁山詩遙鶴引疏磬翠峯寒暮天四傑之概也公負才傲睨曾爲春坊司

直卒以機廢。然郤中稱其人甚介。謂皇甫白眉。

明詩選陳臥子曰。少玄疑思。深調意。求雅則惟取境不廣。無縱橫宕逸之致。

靜志居詩話。子安逸藻。風飛清文。綺合視子。循工力悉敵。錄兩未分。宜子浚之。雖爲兄。而子約之。難爲弟也。

明詩別裁。子安枕藉選體。故五言自高。然得風格而遺精理。未云詣極也。

田按。子安刻意摹擬。詞俊而格超。可謂鐵冰雕瓊。心手雙絕。

銅雀妓

帷牀棲累榭。椒鶴鎖深宮。花月常如昔。君王不可同。綺羅芳愛盡。臺館御遊空。惟有西陵樹。時時入望中。

春朝雪後

拂曙啓荒扉。雪照蘭林瑩。迴榭眺氛氳。層原閱爛互。春動鳥數聲。晴開煙一徑。欲訪垂綸人。悠然五湖興。

秋夜憶山中

悵茲豐景淪。感此流暉馳。青霄有翔隼。落蕊多寒枝。徒對盈樽酒。美人不共持。聊且娛心髮。華月泛金池。意隨流波結。情逐孤雲移。猿鳴鶴以怨。歲暮何遠爲。

生朝述懷

修名悵未立。悲辰嗟屢遭。眺榭感徂川。芳華逝不留。淒露洒皋蘭。颯颯天氣秋。析析葉去榦。翻翻鳥赴儔。密雨垂檐駛。迴風繞隙流。臨此傷年髮。曾是戀恩猷。且當投絨去。桂樹山之幽。

歲暮述懷

崇情系淵邱。遠迹愧朝闕。自予結華綬。於今垂素髮。風樹斂寒皋。霜鐘流哀月。乘此菽蕭悲。彌傷芝蕙歇。

雜詩

玄駟適虛轍。青旂肅盈軌。時暘耀林端。餘寒散巖趾。乘化皆良游。登瞰春原美。翩翩翔霄鸞。矯翰憑雲起。思慕遺榮客。曠襟有如此。疇昔慨斯言。風塵淹暮齒。密親庶來同。韡鄂邱園裏。

和子約弟新霽閒適

中林散微雨。開軒眺晚晴。山原一綺麗。虹日兩輝明。長槐交戶蔭。新渠出水生。開襟玩來藻。延佇有餘清。豈伊西陵獻。獨得啓予情。

往視城南別業同子循弟作

赤嶠倦征軺。滄江遂還策。調笑掩竹書。行吟事泉石。芊綿東溪樹。迤邐南城陌。榛蕪獨懷往。堂構仍慨昔。不見禾黍秋。但逢麇兔迹。沼近伍胥臺。市遠梅生宅。遙觀經始期。歲月殊復易。焚枯進深酌。煙華藹將夕。攜手迺歸雲。惆悵平津客。

春日隱居二首

從宦蹇無成。竭來務田畝。悟身一虛幻。萬事夫何有。昭曠始自茲。逍遙眇長阜。遠墟絕行塵。東風搖谷口。

薜荔竊清川。雲霞生敞牖。隱几忘吾言。嗒焉喪其偶。
崇蘭茂北谷。鮮藻榮南津。摘蘭間雜佩。采藻羞嘉賓。攜手登晴隴。舒嘯懷先民。潁陽有清波。畏壘有清塵。
朝陽爛五雲。光照岩壑新。且當放歌去。聊用全吾真。

春日閒賦

驚暉慕屢生。淪華懼易失。獨往終可期。徒然嘆衰疾。澤徑茲翳茂。林園趣非一。芳雲起崇朝。諸峯乘望出。
初泉乍交戶。新花尤映室。覽物寡嬰慮。幽居親道術。邴生游或似。尚子願未畢。寄謝山中人。無使淹蕙日。
子木見過伏枕弗對述簡

塔草含薄滋。庭花罷餘蔭。林淨夕迎霜。天長朝送雁。思君一水隔。跋予三秋眷。馳暉杳莫攀。歸雲時可見。
贈閒上人

東林禪誦地。寰中闕靈壤。蘿徑罕人蹤。泉竹諧幽賞。朗公法門秀。超迹絕煩想。皓月窺淨心。明霞鑒空象。
虛薄匪世姿。胡然久塵鞅。領茲析冥論。永言欣獨往。

下西店遊目健跳海渚匯潮環山雲濤華勝

修坂無輟輪。孤征寄塵鞅。客心忽昭洗。巒林納澄瀆。蓬萊幾清淺。靈潮閱何廣。伊予一壑觀。從知百川長。
煙黛縟峯華。雪錦涵濤滉。春合滄波深。晴搖翠微上。茲言采秀行。兼值乘桴往。達生趣既秉。齊物理尤朗。

東方傲旅遊。西笑非情賞。

雨宿桐巖嶺

朝馳碧澗隈。夕到翠微裏。揚炬歷危岑。披林息塵軌。半空霧雨交。衆壑風泉委。清耳不避喧。瑩心自爲美。秉牘向雲蘿。問俗攜琴史。滄洲非滯滯。冥翰尋當理。

登雲峯最高頂

稍聞翠微鐘。猶自厭城郭。復躡丹梯霞。所見惟峯壑。步趾窺蓬瀛。舉身向寥廓。斜日挂危竈。非煙開化閣。翔鹿登素雲。冥苔繡瓊粦。鞅掌懷仙蹤。信宿春華落。靈區事遙踐。海嶠果幽諾。伊予期會人。聿來遊鸞鶴。

踰盤嶺觀石門潭

總駕踰盤嶺。探奇自茲始。禽木非曩觀。岑泉愕今擬。來觀石潭勝。乃知巖瀨鄙。淳泓瑩靈碧。錦礫耀蘭渚。輕漣不噴雲。冷風綠碇起。春生滄海外。霞散綠蘿裏。客心在澄瀾。豈但濯纓美。

入舟

停策厭霖潦。登艫美雲樹。輕颿自遠集。川色滿已暮。澄瀾含霞彩。遙洲泛秋素。頗協倦遊情。殊深隱淪慕。從來困弱植。拊志慚遠度。時會苟難并。操持不易固。放斥金河居。眷戀玉門鶩。幽桂日夜零。悵望江海路。邈哉袁生室。忝此千載晤。

夕泛遣思

開秋兆徂節。汨吾旅川陽。臨此秋氣悲。旅魂滋洋洋。何況隔心賞。徘徊春河梁。感別念有緒。指途憂無方。汀渚屢迴復。風濤增慨慷。兩鄉日予跂。一葦思誰杭。微月挂石壁。萍草亂寒塘。翳翳雲去岫。塗塗露委芳。淥水沿北舳。朱華嬉南橋。聊自知魚樂。江湖永相忘。

之崑邑道中書懷

迫歲物務勞。念此近郊客。趨塗無百里。江城望來隔。三年謝旅遊。登艫悵疇昔。既感道路艱。復嘆時序易。川葦夾岸鳴。湍浪乘風逆。微微散林旭。泛泛隨波翻。眷言濁酒尊。誰遣他鄉夕。予方畏簡書。奉陽事行役。

湖泛

我行踰孟冬。風湍日云滯。聿來沂淮甸。還途指江裔。暮靄散長蕪。遊目盡湖勢。蒼茫寒葭外。浩漭白雲際。棲鳥去人煙。驚鳧下漁柵。行行忽超遠。望望更前詣。天色隱鴻濛。潮湍失空霽。客念坐纏綿。臨泛泊無繫。適國情已違。歸田事仍戾。永言期滄洲。拂衣自茲逝。

桐巖曉發

厲澗越南岑。拂霧趨東士。宿處惟蒼煙。遙天徑如縷。林光曙鳥散。海氣寒雲聚。憫勞感婦歎。搖搖涉春雨。發郡城之天台道中述所經覽寄孔謝二憲副趙何二僉憲同年

委羽周遐討。飛流更幽悰。林蘿踐已深。巖巒去彌重。綠雲迴幽溪。紫煙蔚奇峯。霞摛金潭藻。雨濯春山容。但聞松泉音。不見鸞鶴蹤。當同羽化客。海上期遊從。

觀石梁夜宿萬年寺述遊寄伯氏子循子約三弟周山人

微生不偶世。孤拙愷自將。徒欽楚老喻。載履越人鄉。五辭念乖忤。一往形瘵傷。春山填委暇。乘日事遊翔。夕棲鸞霞陰。旦發桐栢陽。既弄石潭月。復掇瓊臺芳。雙闕轉天徑。萬嶺鬱蒼蒼。鳳侶時鬢髩。花苔深紫房。徘徊送落日。上下窺飛梁。緬懷同襟懿。暮色含悲涼。絕冥良已遂。心賞何由忘。愁思雲關客。聞猿清夜長。

贈施比部四詠

孤雲正棲峴。閒月始登嶠。綠苔席餘尊。金風吐仙調。客有緱山姿。靜聞天聲妙。萬壑皆能吟。甯假蘇門嘯。
峴山
鐵笛

山尊不雕飾。鴻濛契予情。逃樊託深好。遊古遺榮名。神將餐霞澹。思與颯泉清。頽然視萬物。何啻如流萍。
窪尊
醉客

連山對澄磯。輕漣發幽賞。緬懷任公釣。悠然范生漿。花源互窈窕。雲波彌滉漾。試問五陵豪。何如雙溪長。
茗雪
漁長

蘭橈去悠悠。碧浪何瀾瀾。嘯傲天影中。徘徊月明裏。望隨蒹葭盡。興逐鷗鳧起。余亦倦塵纓。從君問煙水。

雲浪
蘭舟

早春雪後看雨

雪罷清江曙。春隨細雨來。郊西好風景。柳色半樓臺。散漫兼空淨。芳菲觸處催。行雲自無意。怪得潤莓苔。

高杜諸君同集

曲徑雲深處。幽窗雨過時。村墟隨地僻。花鳥怨春遲。綠酒追朋好。青山隔夢思。開襟對公子。高興戀佳期。

夏夕雨後命酌同周子伯氏叔氏得頭字

暝陰淨窗竹。池上雨初收。坐覺寒泉瑩。仍憐芳杜幽。故人與斟酌。清夜愛淹留。應附三何躅。雲門可白頭。

集談氏園亭

幽興偕仙步。名園集綺辰。檀欒題賦客。巾拂舞花人。落日臨池好。行雲繞坐新。黃昏催秉燭。更益畫堂春。

昭慶寺翠筠禪房同孔學憲

城樓隔深竹。龍象宛湖隄。況復蒼蹊暮。閒聞幽鳥噦。情知多惠好。靈境數招攜。惆悵寒山路。雲關處處迷。

林居晚興

歸來滄海畔。非復戀人羣。獨樹晚成適。疏花寒共芬。南山平入牖。西澗靜流雲。且對一杯酒。誰能迷世氛。

卜築

卜築向何處。閒吟在澗詩。自來迷歲月。直是偶心期。白鳥分磯石。寒山共酒卮。一行歸蓮勺。那復有塵羈。
錢朱包三子過集賦贈

能賦三君手。爭雄綵筆詩。風雲難遽料。今古一長悲。秉燭宵仍遣。當歌興暫隨。並看憔悴者。數藻盡吾師。
橫塘晚興

郭外有幽棲。閒情泝碧溪。湖山相映發。鷗鳥日招攜。霞色浮塘上。鐘聲過水西。歸來一邱壑。源路使人迷。
湖上作

芳章已被徑。初陽仍滿津。緬懷滄洲趣。獨往雲蘿春。鷗鳥宛如故。烟霞時復新。暝延南湖月。身意同清真。
治平寺

風中到香界。獨往意冷然。步引花木亂。坐看洲鳥連。一林寄空水。滿院生雲煙。正此化心寂。鐘聲松外傳。
修和觀

桃溪隔隱處。淡淡春波生。乘日候煙駕。有時聞鶴鳴。山來香閣徧。雲下石床平。永願啓金鑰。齋心朝玉清。
題朝天宮東麓亭

尋幽歷華苑。緜嶺忽茲逢。行引冷風入。言將青鳥從。花明石道雨。春靄雲溪鐘。數到陸沈客。如何迷去蹤。
吳山人留宿靈谷禪房

松門下迴策。杳靄鐘聲隨。卻望東林路。懷君獨往時。歸禽白雲盡。殘日翠微滋。惆悵烟蘿夕。清風不可期。

宿雁山靈巖寺

寥寥到真境。宿處傍風泉。遙靄引疏磬。羣峯寒暮天。白雲滄洲賞。清夜石門禪。卻笑桃源客。空從蕙路旋。

石梁

來尋方廣寺。石壁路中分。合澗飛丹壑。春蘿挂碧雲。苔梯徒屢踐。芝客信難羣。不見花前女。空音時復聞。

登弘濟寺閣別謝施侯蔡四省友

高閣橫江出。凌空石道行。朋遊謝城郭。幽意靄山楹。斷壑晴雲滿。長蕪夕鳥平。迴波對延佇。一遣別離情。

將至東昌

前瞻博平郡。雲落蕩清暉。晨風一何鷓。秋鴻稍欲微。今日他鄉酒。思共故人揮。獨有空林葉。蕭蕭滿岸飛。

舟還使風

宵來苦湍浪。晨喜逐風行。獨此揚帆去。遙隨飛鳥征。望雲疑岸駛。出浦覺船輕。卻笑淹留客。元知不共情。

懷吳客部以容

故人吳季子。起草仙臺端。蘭省碧雲外。瓊枝何日看。江銜遠空盡。月帶疏煙寒。芳歲一爲別。夢來秋草殘。

同子循初秋雨後懷虎山橋

同君別山寺。心每懷滄洲。山館對新霽。烟虹開遠流。空歌碧雲暮。悵望石梁遊。況復西津月。蕭蕭此夜秋。

皇甫沔三十五首

沔字子循。涑弟。嘉靖己丑進士。除工部主事。歷員外郎中。謫黃州推官。召爲南吏部郎中。謫開州同知。改處州。遷雲南按察僉事。有司勳集六十卷。慶歷集二十卷。

馮時可兩航雜錄。皇甫子循詩名。與王元美相累。吳下能詩者。朝子循而夕元美。或問其優劣。周道甫曰。子循如齊魯。變可至道。元美如秦楚。強遂稱王。

王世貞弇州史料。子循五言律最工。七言次之。有錢劉風調。

四友齋叢說。近時皇甫百泉解頤新語。不但文字藻麗。而銓品亦精確。可爲詩家指南。

詩數。皇甫子循以六朝語入中唐調。而清空無迹。楊用修以六朝語作初唐調。而雕繪滿前。故知詩有別才。學貴善用。

明詩選。宋轅文曰。子循望過子安。而其實不逮。

靜志居詩話。百泉清音藻思。五言整於小謝。五律僭於中唐。清真朗潤。妙絕時人。

田按。子循五律。清裁雅調。自是一時之俊。五古亦是當家。至模範魏晉。鏗鏘齊梁。於子安稍遜一籌。

臨高臺

高臺望不極。臨竚意何窮。茂苑花爲苑。吳宮錦作宮。管絃虛夜月。羅綺罷春風。獨惜烏嗁處。猶聞曲怨中。

折楊柳

不見隋隄柳。長條大道間。絲陰流水去。帶影逐春妍。妬眉銷翠黛。聽笛損朱顏。日暮行人盡。思君可重攀。

擬中婦織流黃

金閨方永夜。翠袖理殘機。燈花斜落鏡。月光低鑿幃。寸心共絲斷。雙淚與梭揮。作伴除蛩響。驚眠惟雁飛。織就當窗素。裁爲遠道衣。從今芳訊達。不及早旋歸。

空梁落燕泥

金閨春色早。玉關芳信賒。人歸繡後燕。淚盡每先花。戶暗香泥積。梁低舞影斜。不作雙飛去。東鄰王謝家。

春日遊西山作

吳鄉信云美。山水饒嘉麗。疊巘表參差。層巒隱虧蔽。時惟二月芳。雨散千門霽。蕙畹蕩雲滋。蘭皋屏氛翳。獨攜邱中琴。言鼓江上柅。結友遵巖阿。尋僧指林際。仰看衆鳥翔。俛悅鯨魚逝。物理相因依。余蹤且留滯。

天界寺贈半峯上人

顧省紛俗嬰。尋山愜幽趣。秋水淨金河。寒雲翳珠樹。了看花落時。莫辨鳥還處。休公別來詩。江生擬將賦。

雨過高座寺

積雨黯花邱。綠雲入香界。修策振林間。疏鐘落峯外。康樂誦阿含。陳思演清嘒。欲除常戀牽。惟是逃虛快。

雪日寄王戶曹湖上官舍

初雪度江城。殘雲來省閣。覽物嗟歲殫。懷人悵居索。擇木本同棲。傾枝猶異託。維舟安可從。開尊自成酌。

移官越中初返家園奉答伯兄虞山見寄

薄遊逗京邑。獨往眷長林。始奉越鄉役。因愜故山尋。曠茲二載別。良晤展斯今。誰謂百里間。猶自邈徽音。未結邱中賞。先枉池上吟。睇燕悲稍戢。懷荆慨以深。花源迴俗轍。蘿逕斷塵簪。且駐稽東駕。雲扉期此心。盛二仲交示廣志賦因贈

江左本多奇。盛生稱獨秀。速化有性靈。棲玄謝塵垢。披帙十行俱。擁衾萬言就。搦手青門東。醉心在良覲。廣志擬雕蟲。織書臻古籀。情同呼覓餘。興是凌雲後。愧匪辨璧資。相邀出金奏。雨懷盛二時在清聽齋中

支齋營八關。陶情緬三徑。嗟我裘羊徒。悵此琴尊興。室邇心獨遐。城嚴迹難并。卮言誰與談。籥理自相證。細雨忽成寒。輕霏坐生暝。天風迴海潮。秋聲送清聽。

郡齋作

雅志懷山棲。復得理山郡。蒼岫入南楹。白雲帶西徑。雖事簿領勞。時與烟霞并。心曠眺旣遐。迹沈尋亦近。下車芳載徂。牽牒明兩迅。仁靜樂有餘。拙遲澹無競。命藻酬清暉。濡毫愧靈運。

聞郡檄至簡子約

同時參外庭。一朝謝朝列。鍛羽非難馴。所驚峻網設。逸足晞高驥。聊以就羈紲。予季廟廊姿。爲邦茂時哲。

及非宣令猷。何暮佇來轍。承檄懼有愆。趨裝悵無悅。曾是東山情。薄茲西河烈。芳歲若電馳。降休亦飄瞥。翹首關路長。寸心念將別。

春日懷子安兄

恭承東省拜。悵望北辰遙。香寢分宵直。花天散早朝。吏情春更逸。詩興日應饒。空有雙鳧舄。無因渡玉橋。

渡衛

問水知臻衛。揚帆此渡河。清秋常細雨。落日更蒼波。言采芙蓉佩。情忘鷗鳥過。江千有舟楫。歸興獨如何。

同陳給事林尚寶遊毘陵胡舍人園

竝是仙舟下。因成金谷遊。亭開一水曲。山隱百花幽。繁圃春常駐。晴尊雨更留。那知龍臥意。猶繞鳳池頭。

親友道余至京口擬登山餞別值雨不果

雲將孤鳥翳。雨阻一江分。竟日嵐猶濕。終宵汐並聞。遊心飛浩渺。望眼入氤氳。莫恨登臨晚。晴時是別君。

懷楚中舊僚張子時遷東昌尉

牢落同爲郡。飄飛最憶君。離尊郢門雪。歸馬漢城雲。道路情難極。星霜歲易分。心如洞庭葉。秋晚只紛紛。

道中寄憶衲子大林

歲晚東林樹。淮南落木同。齋虛玄度月。江倚惠連風。塵劫看爲累。榮名悟是空。歸期殊未得。持此報休公。

送陳子知杭州

東省含香吏。南邦佩印臣。離心冶城月。別路武林春。碧水移蘭舸。青山擁畫輪。岳王遺寢在。拜手薦江蘋。
觀音閣同比部諸君餞別家兄

躋險因慈閣。憑虛託化城。江山一以眺。雲樹總含情。鐘外潮聲盡。尊前花雨輕。迴波去無限。應是旅愁生。
安隱寺

人天卽此路。花雨見空臺。刹盡南朝建。經多西土來。碑荒殘蘚合。僧定野棠開。了悟身如幻。何須訪劫灰。
上巳日同友人集大雷寺得幽字

帝里冠裳集。禪堂禊事修。人天春駐景。花竹暝通幽。香積開芳宴。金河引曲流。誰云王逸少。陳迹獨千秋。
秋夜集李守衙齋

政閒庭每寂。吏散日猶曛。下榻生秋思。傳杯語夜分。暗花微泫露。纖月淨開雲。失路聊相倚。何期御李君。
邯鄲道

邯鄲臨古道。車馬此通津。錦瑟空埋恨。緇衣易染塵。王昌非蕩子。趙女是才人。迸逐漳流盡。荒臺蔓草春。
白雲山

青山行處盡。始覺白雲深。錫化無僧在。鐘鳴有客尋。花溪遙隱壑。蘿徑曲通林。坐得浮生理。悠然忘我心。

東溪寺

東溪斜帶郭。數里接仙源。嵐氣迴盤嶺。灘聲到石門。僧開翠微舍。客造白雲軒。訝可無機事。看鷗代晤言。

登赤壁

萬古滄江上。清秋赤壁開。浴鳧知舊渚。橫鶴見新臺。妙齒瑜非昔。雄心操已灰。媿無題賦手。猶欲記重來。

哭姪阿乘

長魚疲侍疾。季琰妙通禪。毀性安疏節。無生得大年。松邱成異代。花徑隔重泉。一見西河泣。誰能不泫然。

詠扇

吳繭新傳製。齊紈舊得名。塵來聊障面。歌罷尙持情。學月何曾滿。懷風不奈輕。莫須逢內史。價始重稽城。

關索嶺

斲石微通路。攢峯儼作關。雲中馬嘶去。天上鳥飛還。水向盤江匯。坡從香樹攀。平生慣履險。於此亦摧顏。

寄雲谷上人

棲霞信靈境。滅迹企前規。松覆梁王宇。苔荒江總碑。鱸歸秋興後。猿定夜禪時。怨別心千里。惟應江水知。

贈嚴叟

聞有君平隱。湖山不易逢。溪藏幽處鷗。雲合曉來峯。嘯鳥閒中興。馴鷗物外踪。尋君迷九曲。花樹一重重。

鄱陽

鄱口曉來望，潯陽路此通。頽波銷霸業，蔓草沒王宮。霧色香爐上，秋聲瀑布中。禪心與遊思，并落楓林東。

惠山簡汪沛

閉戶沈冥久，尋山感慨生。靈泉常淨色，空梵亦秋聲。花雨行間濕，松陰坐處清。不逢雷處士，臨眺獨含情。

皇甫濂九首

濂字子約，一字道隆，冲弟。嘉靖甲辰進士，除工部主事，謫河南布政理問，遷興化同知。有水部集二十卷。

司勳集子約詩每出開曠，彌覺冲逸，兼好絲華紫清之章，貝葉珠林之偈，景純振響於仙遊，摩詰據懷於禪寂，興到斯成，曾無造次應酬之語。

松韻堂集水部詩清竅罕儷，其志意亦復玄曠，故其文乃爾。

黃德水國華集水部詩意玄詞雅，律細調清，長於造景，務在幽絕，山藏水閣，披露良多。

明詩選宋轅文曰：子約盛有才名，其詩頗傷浮急。

靜志居詩話：蔡子木哭子安詩云：五字沈吟詩品絕，一官憔悴世途難。李于麟送子循詩云：吳下詩名諸弟少，天涯宦迹左遷

多。子約宦亦不達，與諸兄同，詩稍不逮也。

田按子約詩步趨晉宋盛唐，善於言情，讀之令人增骨肉之重，近體微傷局促。

王勃至傅家兄信感賦

明詩紀事 戊戌 卷五

昔我別都門。與子成東西。蔓草一爲惜。柔楊三綠萋。今爾客南冠。猶沾故國泥。再歎浮迹言。因傷中道睽。爲我說余兄。低眉曠雲霓。能不摧人心。喟焉鄉思迷。生世苦結束。悵遯青山蹊。

彭澤

重江轉溪綠。疊嶂敷林滋。山色信茲美。清風播休時。弦歌薄從宦。景物聊所宜。遐想歸來晚。何勞束帶爲。以子獨往意。兼此形役悲。飛鳥征途外。浮雲空我思。有情依澤柳。結念在江蘼。愧彼栖遲者。猶懷三徑資。

悼子乘

冥冥雨露集。熙熙歲始更。靈蠢各有化。人理獨無生。念我泉下子。一絕如朝榮。生男以待終。胡爲遘天榮。情塵布虛室。寒晦凝軒屏。流目無存影。涕淚交霑纓。恫懷何能已。歎息每遺聲。堂闈曠綦迹。詩書空復盈。奚但腸九迴。心膂成頽崩。媿乏延陵達。無乃傷我明。

列朝詩集。吳中先輩。盛稱水部悼子。不減安仁悼亡。能敘悲怨。

眞州留別華陽兄

河梁意不盡。相送到眞州。歲月成今別。江山是昔遊。各言衰鬢客。那忍故園秋。明發東西恨。惟看一水流。百泉兄同過虎邱如山僧院

春中微雨後。卉木散華滋。況是東林近。偏宜吟臥時。水煙閒鳥下。山靄夕雲遲。何必招蓮社。相攜就遠師。

偶過吳江訪子新

一徑翛然臥。何如仲蔚廬。蘿煙棲枕簟。湖月入階除。靜有名山思。閒惟老氏書。平生尊酒意。重對夜窗虛。

登懷庾樓

一作江陵客。長懷庾子山。林陂美相映。雲榭獨來攀。恩禮湘東舊。才名鄴下還。子規花外語。愁思入鄉關。

柳枝詞

韶華回首悵離宮。梁苑隋堤荒草中。獨有江邊楊柳色。垂垂還是怨春風。

潘岳宅

寂寂閒居弔昔人。芳臺修閣總遺塵。洛陽花態渾無數。空作荒郊一段春。

明詩紀事卷六

戊籤

頓銳二十四首

銳字叔養涿州人正德辛未進士除高瀋知縣入爲戶部主事改代府右長史有鷗汀長古集二卷前集二卷別集二卷續集一卷漁嘯集二卷頓詩一卷

列朝詩集北人云涿郡有才一石人得其二銳得其一

田按叔養古詩微嫌冗長竹垞所評良然至五律音節高亮隊仗鮮明七言律絕亦復翩翩振響在正嘉之際不失爲第二流

隴頭流水

隴水清且深。東南西北下。千里不見人。胡兒來飲馬。

長安有狹邪行

長安有狹邪。馳道相背開。宛轉近曲江。詰曲臨章臺。曲江何逶迤。章臺亦崔嵬。越陌植長楊。夾路列高槐。縈回少城隩。盤礴新宮隈。雕輪結黃霧。華轂飛紅埃。前載旣已償。後車還復來。要途生坎穽。趨競亦愚哉。三誦覆車言。浩嘆令心哀。

蜀道難

孤雲兩角去天咫。三峽雙流與鬼鄰。翻載覆舟道相屬。不聞一日斷行人。

雲居寺

地偏疏過從。寺僻愜招尋。風雨吟山鬼。松杉上水禽。壞壇蒼蘚合。廢殿白雲深。向晚聞煙磬。空冷宿客心。

虹蘿巖

絕壁臨千尺。懸崖結數椽。巖虛回梵唄。霧重合炊煙。僧定猿聲上。人行鳥道邊。談空歸未得。留宿愧無緣。

巖頭寺宿

山行三十里。路過百千峯。縹緲巖頭寺。微茫天際鐘。澗風吹短鬢。嵐氣濕長松。問我今宵宿。雲煙定幾重。

昭烈樓桑廟

芒碭收雲氣。樓桑掩日華。廟庭諸帝後。簫鼓萬人家。龍豈池中物。雄慚井底蛙。西陵銅雀去。無樹可棲鴉。

逃禪室

書帙經年廢。禪因竟日閒。地非緣客埽。香許對僧焚。禿塵空談豎。清齋佛粥分。病來休萬事。不是故離羣。

慈光寺

慈光開淨域。沙界出恆河。花雨阿蘭若。鈴風窣堵波。羣山空色相。一徑入松蘿。僧衲翻經字。雙林寫貝多。

潭柘寺

潭柘前唐寺。名山碧殿開。松高雲影亂。竹密雨聲來。吸澗龍歸鉢。銜花鳥集臺。數碑勒塵蹟。文字半莓苔。

西禪寺

禪意西來遠。空門東里深。松蘿開一徑。龍象護雙林。燄燄曇花色。泠泠梵磬音。片雲間過寺。如我本無心。

北園書所見

治產無千畝。爲園僅數弓。荒城足塞日。古堠易秋風。佛塔高雲白。邊樓晚葉紅。灌畦甘抱甕。轉地罷飄蓬。

春日宿長楊寺

長楊隱殘照。蘭若暮鐘時。靜得禪中味。閒題壁上詩。園蔬青雨甲。烟柳綠風絲。一宿聞清梵。三生本不期。

顯靈宮

星月浮璇闕。雲雷繞絳宮。虬軒開顯氣。鶴馭下罡風。道演濠梁叟。經傳河上公。鼎封龍虎伏。萬境寂寥中。

新春訪成長老方丈

霄漢千尋塔。香雲十笏房。金燈明廣殿。瓊唄靜長廊。花放優曇色。珠含舍利光。遠公開社地。戒行服諸方。

山行逸興

葛屨行山徑。筇枝度石門。鷺峯天外寺。蛤嶼水邊村。紅葉疏林影。丹崖挂瀑痕。炊煙生碧嶠。嶺月閣黃昏。

對竹

何處山泉落石灘。虛檐十箇瘦琅玕。鳳翎搖影三更月。鶴膝敲風一夏寒。深謝年年伴幽獨。曾教日日報平安。繞闌粉籜成蒼雪。不覺春光過牡丹。

贈史子慎

吳興郡守須人英。山開罨畫毛骨清。道場天目萬峯碧。響水苕溪雙眼明。釣艇不驚鷗鳥睡。蓮歌那避使君行。西湖便訪林逋宅。竹外寒梅瘦影橫。

過賈島墓

汨盡窮轅得舊京。旋披叢灌拜先生。桐鄉遠在今西蜀。梓里遙鄰舊北平。奔走髒消何位業。推敲骨瘦是詩名。太行秋色桑乾水。野老相呼後世情。

落花

薄晚芳菲盡。崇朝錦幃空。墮紅無一語。應是怨春風。

衰草

淺白輕黃逐望迷。遠拖秋影上平堤。王孫尙作天涯客。不待春來亦慘悽。

正月十七日

燒燈已過春寒減。巢燕未歸花信遲。一曲竹枝清瘦盡。小窗紅雪看梅時。
琵琶

墨黑香雲驪不收。并刀秋水翦橫眸。春葱浙瀝檀槽淺。亂點銀冰下急流。

石橋村清泉寺

綠遍汀洲水遶村。碧波橫印小橋痕。春流到處生芳草。江北江南人斷魂。

齊之鸞十首

之鸞字瑞卿。桐城人。正德辛未進士。改庶吉士。授刑科給事中。改吏科。謫崇德縣丞。歷長興知縣。遷南刑部郎中。出爲陝西僉事。歷河南。山東副使。擢河南按察使。有蓉川集七卷。

盛明百家詩。蓉川齊公。早負詩名。發爲詩歌。皆切民瘼。國獄筆力遒健。曲盡事情。

靜志居詩話。蓉川入夏諸詩。山川險隘。誦之有如聚米。與尹僉事耕並工。惜乎志澆。闕者未之採錄也。

田按。蓉川詩有蹴張之力。超距之勇。不屑屑於詩流派別。而句奇語重。可與當時名家各分一席。

宜和堡渡河

春漲河初急。孤軍待曉天。健兒工使馬。修岸怯迴船。革泛傳驕虜。魚喁亂巨川。莫憑衣帶水。千古塹腥羶。

入中衛城

右臂伸西極。留靈近勢聯。沙山橫絕塞。河水上腴田。草木江南色。旃裘嶺外煙。壯心驅倦足。乘郭思翩翩。

三山暫駐

金陵望何極。此地亦三山。苦水愁胡騎。高峯倚漢關。兔深青草窟。蛙急黑泥灣。土屋無完堵。饑人未盡還。

遊獻花巖

過雨初憑竹樹涼。巖居盡以北爲陽。天開斗分山迴拱。江束關形海混茫。星裏小槎浮露電。松間清梵引笙簧。勝遊無那芒鞋劇。欲問仙人借鳳凰。

張茅坐雨

魃虐蝗妖氣塞空。自從霍汝到秦東。霑衣晚坐千山雨。岸幘秋襟萬里風。黍穀大侵成野哭。豆藿小穰覲神功。憂時未遣持杯興。白鳥翻飛谷樹中。

韋州月夜望螺山有作

缺月秋山顛氣高。霜清衆皴翠作濤。溪通澗谷方逢水。地近鹽碛半不毛。胡馬幾年空野屋。王宮萬木俯荒壕。何當聽續韓公策。歲省千車轉運勞。

過安定堡不入

塞上塵勞久自便。追風驥褭錦鞍韉。防秋鼓角孤城裏。轉粟車箱大道邊。沙磧蓬蒿青布套。鹽池潦水碧

生煙午陰絳綵增寒吹似比甯靈倍颯然。

同姚拙菴憲長張心齋副使盧藍山僉事遊小雁塔

南山秋氣翠巒岬野思淒淒碧殿寒塔隱佛燈無雁宿樹如僧臘有龍蟠
寬旌古苑悲金罍霜節清樽洗玉盤十里曲江遊興盡夕陽風雨幾歸鞍

牛頭山寺

翠山四合鍵青銅約束河流萬古東天護漢槎迴鷺嶺地無胡馬飲龍宮
飯僧歲稔陽坡粟吹客秋高瀚海風搔首泱寥呼謝朓靈奇屬最月明中

始皇墓

金泉已鋼鮑魚枯四海驪山夜送徒牧火燎原機械盡祖龍空作萬年圖

李濂二十六首

濂字川父祥符人正德甲戌進士授沔陽知州遷甯波同知擢山西按察僉事有嵩渚集一百卷
四庫總目嵩渚集濂所自訂皆於七子之外自爲一格大抵筆鋒踔厲泉湧颯馳而裁翦尙疏不免才多之患濂跋石琚熊峯
集謂詩文傳世豈貴於多其說良是而自定己作乃不能盡翦榛楛信乎割愛之難也

田按川父作理情賦左舜齊持以示李獻吉獻吉大驚訪之吹壘王子衡少石子歌云大梁翩翩李川父薛君采梁園歌云大
梁李侯才絕妙司馬鄒生爾同調其爲名輩推譽如此余檢嵩渚集大約近體勝於古體七言勝於五言川父尤留心鄉邦故

實所著汴京遺蹟志二十四卷。博綜典故。幾與長安志。雍錄抗衡。又撰祥符鄉賢傳八卷。祥符文獻志十七卷。著述繁富。不僅以詩歌擅名已也。

楓林晚照

蕭蕭楓樹林。極目水煙積。斜陽池口明。照此霜華赤。佳景不負君。一尊秋浦夕。

夜雨

向夕雨不歇。一室生蕭爽。砌寒絡緯嘯。院靜芭蕉響。壺酒度深更。齋燈照虛幌。兀坐已忘言。翛然息諸想。

讀孟浩然詩

落魄襄陽客。清芬不可攀。秋風漢江水。斜日鹿門山。野寺漫留詠。松林恆閉關。底須凌鮑謝。佳句滿人間。

邯鄲懷古

邯鄲佳麗地。傳是趙王宮。廢苑春陰裏。孤城返照中。叢臺還似昔。漳水自流東。野眺悲無盡。棠花黯淡紅。

剡中雜興二首

夜雨過漁溪。春風入會稽。雪舟人不見。腸斷剡雲西。古廟凌霄發。深山戴勝嘯。多慚許玄度。恆在石城栖。緯繅傳斯境。東南名勝州。水迴車騎宅。花遶右軍樓。樵下晚峯碧。鳥鳴春寺幽。何當解簪紱。卜築剡溪頭。

擬唐人送宮人入道二首

苦憶僊人萼綠華。乞身遙入太清家。向來寫恨餘紅葉。此去行蹤有碧霞。學道晚依新藥竈。洗妝朝棄舊菱花。玉笙不作昭陽調。織嶺閒吹月影斜。

蚤承丹詔入華清。卻戴黃冠出漢京。簫譜好傳秦弄玉。練師初拜許飛瓊。衣沾別島朝霞色。夢斷長門夜雨聲。十二層樓何處所。芙蓉花外是仙城。

冬日出南薰門赴吳家屯別業偶值起風悵然作

晨興獨往城南村。沙風野霧寒天昏。小車驀過大堤曲。白酒初熟吳家屯。弋鴻獵兔暫爲樂。故苑遺宮今幾存。不見古時信陵慕。朔雲滿地蒿藜繁。

梁王臺

梁王臺下春草生。梁王臺上春霞明。兔園積雪有詞賦。鳧渚廢榭無歌笙。百花雙燕且對飲。碧海黃塵空復情。落日爲誰吟思苦。千秋城闕暮雲平。

僊女臺在沔陽石湖村

僊女瑤宮俯石湖。湖光激豔勝蓬壺。春風絳節還升降。夜月明珠定有無。流水舊迷秦洞古。片雲偏傍楚雲孤。知從南岳夫人去。何日東還海上臯。

百門卽事

百門山前花裊裊。三僊洞口雲悠悠。高車駟馬我何意。翠壁丹崖誰共遊。幾家蘿竹背巖郭。滿眼煙霞明石樓。自憐衰朽興不減。春日行歌泉水頭。

戊寅元日

簌簌春盤薦蓼芽。盈盈杯酒酌勸椒。花青幡綵勝聊時俗。雪郡江關自歲華。萬事傷心愁對酒。三年作宦苦思家。雲霄未上王喬履。服食空懷葛令砂。

沔陽上巳

三月上日何處遊。錦鞵白馬河之洲。忽驚風打棟花盡。苦恨春隨江水流。翩翩拾翠北村女。雙雙喚雨東林鳩。蘭亭勝事久寥落。碧草池塘聊唱酬。

春日谷園賞梅

谷園梅花春可憐。欲開未開香滿筵。隔城祇愁西日墮。倚檻轉惱東風顛。攀條嗅蕊忍令折。短句深盃能爾妍。衆賓醉歸主人臥。暝鳥嘯合村墟煙。

澤州分司見竹

自別南州見爾稀。行臺駐馬暫相依。情知水石生秋思。肯放細塵點客衣。深院度颿鳴瑟瑟。短牆留月靜輝輝。家山亦有篔簹宅。十畝清陰待我歸。

汴州懷古

花石今何在。孤城涕淚中。金梁橋上月。偏照宋遺宮。

夷門

俠骨已成塵。夷門草自春。斜陽騎馬過。獨憶抱關人。

過金陵寄徐駕部

烏啼板橋浦。露落歷陽樹。夜聞青山鐘。揚帆過江去。

春遊

太乙宮前柳色。天清寺口鶯啼。暖風吹面酒醒。斜日穿花路迷。

閨思

寶鴨香銷畫樓。月明初上簾鉤。今夕不知何夕。仰看織女牽牛。

登臺有感

臺邊草色苑邊雲。載酒來遊白日曛。富貴可憐成一夢。疏花冷雨信陵墳。

途中雜識

銅雀臺邊逢早春。西陵西去草如茵。蛾眉皓齒今安在。碧水黃雲愁殺人。

明州歌

鮪嶺蛟池空復春。越王宮殿已飛塵。蹋船莫唱明州曲。一閱明州愁殺人。

寄王倅玘

九華山下讀書樓。秋浦寒雲濕不流。最愛風流王別駕。白頭詩思滿滄洲。

雲中歌送蔡成之都憲之鎮

黃河北來東勝州。桑乾水寒雲朔秋。壯士齊歌搜套曲。元戎時宴望京樓。

明詩紀事卷七

戊籤

許宗魯三十二首

宗魯字伯誠一字東侯咸甯人正德丁丑進士選庶吉士改雲南道御史歷湖廣按察僉事霸州副使太僕少卿大理少卿以僉都御史巡撫保定進副都御史巡撫遼東有少華陵下遼海歸田等集五十二卷

王維植槐野存笥稿少華集婉麗秀俊

喬世甯邱隅集少華詩足繼唐音

藝苑卮言許伯誠詩如賈胡子作狎遊隨事揮散無論中節

列朝詩集東侯才氣宏放開府雄邊多所建置家本秦人承康王之流風罷官家居日召故人置酒賦詩時時作金元詞曲無夕不縱倡樂關中何棟西蜀楊石浸淫成俗熙朝樂事至今士大夫猶豔稱之

香祖筆記金州卮言載李滄溟在關中過許中承宗魯伯誠許問今天下名能詩何人滄溟曰惟元美次則宗子相許請子相詩觀之滄溟勃然曰夜來火燒卻許面赤而已余嘗嗤之夫子相詩未必能過伯誠卽素觀亦屬恆事何至佛然如此特著以爲文人相輕之戒

靜志居詩話少華諸體皆工。寓和婉於悲壯之中。嘗之秦箏。獨無四氣。足與邊廷實王子衡並驅。

田按東侯固是關中之俊。音亮氣遒對山。漢陂皆在下風。

渡白溝

昔運遘厄。恆紀變參商。南風日不競。朔吹亦遠揚。英雄各乘御。龍戰血玄黃。矯矯平將軍。獨立當中央。張弧射九日。撫劍盼四方。事去迹故隳。志伸願已償。竭來歲月久。道里未能忘。仲生固有爲。忽死亦其常。停驂覽故壘。雪涕履戰場。清川帶滌紆。白骨浩縱橫。惋歎不能發。總轡歌此章。

田按平將軍平安也。小字保兒。建文元年伐燕。安爲先鋒。燕王將渡白溝河。安伏萬騎邀之。戰最力。屢挫燕師。王親搏戰。幾爲安槊所及。已而敗。被執。燕軍歡呼動地。爭請殺安。王惜其材勇。選銳卒衛送北平。王卽帝位。授安北平都指揮使。永樂七年。帝巡北京。覽章奏。見安名。謂左右曰。平保兒尙在耶。安聞之。自殺。東侯此詩感慨激昂。仲生固有爲。忽死亦其常二句。蓋爲安惜之也。

寒夜懷皇甫世庸

夜色寒以肅。北風振高枝。況有南飛鴻。嘹唳雲間悲。思君隔煙水。還望情無涯。豈無琴尊歡。而與誰共之。耿耿不能寐。起見星河垂。願言拾瑤草。順風能遠賙。

宿渡口寺

朝行辭蔚蘿。暝宿寄禪室。乍屏車馬喧。頗遂山林癖。閉門謝囂閨。宴坐同隱逸。雨洗蓮界青。月照松關白。

夜榻秋聲遠。海鏡定光碧。道心難遽探。俗慮暫可滌。匪曰參上乘。聊以寄空寂。

亭上

羣動暮已息。吾亦與時休。暫去簿書勞。薄言懷夕遊。逶迤步畦徑。逍遙卽林邱。涼風洒檐樹。亭影漾池流。澄神對止水。沖慮復何求。尊中有素醪。獨酌還自酬。心遠境亦寂。何必於滄洲。

答惟喬夜集

檐雨罷宵響。海月升東楹。杪秋氣高肅。臺館滋虛清。長歌命深酌。豪談對友生。春春一夕歡。悠悠千載情。春日登含元殿故址作

覽故躡崇基。披荒撫遺跡。川原諒如斯。壯麗感非昔。五城隱見分。雙闕峩峩立。參差想華構。凌厲餘層級。卻繞涇渭明。俯視終南屹。落日黯將暮。春草萎以碧。嗟哉市朝變。去矣雄圖熄。黍離有餘悲。桑海詎終極。八月十三夜開福精舍對月

靈境自虛寂。秋期倍森爽。西風洒樓閣。鐘梵虛空響。浮雲薄暮盡。華月東溟上。光明麗中天。羣昧倏以朗。對此悟圓照。因之釋衆想。況有素心人。相將共幽賞。

期遊蒙谿菴過歸不果途中賦述寄遺道侶

邃壑啓神窟。延阜羅仙源。富有山水勝。獨謝塵土喧。芒田蒔大藥。洞府弭華軒。玉桃千載實。珠樹四時蕃。

冲想寄靈園。遐矚阻玄門。愴往齒髮變。期來歲月奔。纏綿未能解。飛舉詎堪言。因書達羽客。聊以展寒溫。
暮春同諸子登望江樓作

曩宦闕茲遊。今來遘斯賞。朱閣凌漢飛。丹磴緣雲上。芳時豔桃柳。春渚茁菰蔣。浩浩江水修。茫茫楚封廣。惠風拂綺楹。淑氣耀金榜。波光蕩空洞。石霞映虛敞。層觀每興矚。萬籟各奏響。冲騫信有基。大造窺無象。暫喜辭喧卑。同懷納高爽。寄言御風軒。兼以出塵網。

秋日過相國熊峯先生故居

垢台願已違。奠楹兆何速。山立衆不搖。川逝迴難復。生中靈氣闕。化宿餘精鬱。烈往寵獨延。代遙舉恆馥。膺門儼若存。拭履愴彌篤。翟羅張已久。容閔式誰續。時態傷雨雲。義感填陵谷。

留城懷古

哲士昔未達。龍伏於草萊。翻然奮鱗翼。出際風雲期。手握黃石符。身爲赤帝師。智運祕神鬼。蕭韓那得知。四海歸皇圖。英雄多見疑。開國重始遇。乞留有餘機。河山奄舊疆。珪組紛陸離。履滿戒知止。居崇慮蹈危。遊殺假高蹤。赤松杳何之。冥冥九霄上。飛鴻振羽儀。寄謝工弋者。懸情一何爲。此意商巖叟。庶幾達其微。
送葛穉方赴河西幕

君乃上谷才。遠赴河西幕。山中忽相見。故舊情如昨。神駿本爲龍。屈蟄今成蠖。驍騰千里駕。且困鹽車縛。

遙聞主將賢。愛客時開閣。相逢一二語。卽訂平生諾。日飲葡萄春。醉舞蓮花鍰。歡言魚水契。不道殊方惡。秋城與爾別。霜葉繽紛落。丈夫輕遠遊。爲賦從軍樂。

秋日曲江同韋西諸君子遊燕

柴門曲江畔。榆柳晝陰陰。入竹尋幽徑。開窗得遠岑。野蔬童旋摘。村酒客同斟。坐聽涼蟬響。蕭蕭秋滿林。三月三日遊含元殿

芳辰臨上巳。廢殿訪前朝。地古佳名在。時移王氣消。河山看表裏。觀闕想岩嶠。春草興亡恨。行歌麥秀謠。登毘盧閣

香閣標靈勝。丹梯覽壯模。人天開化國。海岳衛皇都。結蓋蓮雲涌。懸珠寶月孤。飄飄辭世網。萬有盡空無。

野酌

野酌傾崖密。山羞薦渚蘭。藉雲衣袂溼。浮翠酒杯寒。醉舞攜玄鶴。仙謠奏紫鸞。臨風思羽翰。長嘯振岩巒。

石鐘寺

抱郭雲林麗。懸巖樓觀虛。窗光挹彭蠡。簷翠下匡廬。霜吼鯨音石。風翻貝葉書。煙波五湖上。到此憶高居。

歌風臺

亂水疑無地。荒城但有臺。風煙沈王氣。歌詠想雄才。世遠川原變。秋深草木哀。登臨招猛士。芒碭暮雲來。

別館奉餞劉士奇參政湖南

花明翡翠館。酒灑鳳凰卮。楚塞動行色。秦箏起別思。雲疑神女夢。竹想帝妃辭。倘著南遊賦。因風一寄之。

邊事三首

九天行殿丹青麗。列鎮雄兵虎豹屯。上谷將軍新賜姓。晉陽妃子獨承恩。錦屏歌吹天顏喜。玉帳森嚴將令尊。流水浮雲俱過眼。傷心甲第鎖千門。

采顏三衛海西頭。保定河間種類稠。千里營屯成拱衛。百年禮樂化旃裘。虛傳江統能高論。須信文皇有遠謀。古北黃花俱肘腋。瞻天誰抱杞人憂。

眉山司馬萬人豪。曾築長城心計勞。坐使匈奴無右臂。笑談邊鄙失腥臊。黃雲北去龍沙迴。黑水東來雉堞高。衛霍不須論戰伐。萬年基業本蕭曹。

望洪光寺

香臺隱隱蔽層峯。曲磴盤盤轉萬松。縹緲煙中祇樹色。稀微花外上方鐘。光搖涌殿琉璃淨。路入雙林翡翠重。渡海何年心自許。梯雲此日恨無從。

功德寺

功德寺前湖杏冥。渚花汀草流芳馨。法堂雲深殷仙梵。塔院書寂喧風鈴。野煙空濛石閣邃。春水蕩漾蓮

臺青開門秀色淨如洗。落日西山虛翠屏。

九日同劉司徒慈恩寺登高得嚴字

積雨初晴爽氣嚴。南山空翠落虛檐。登高尙覺秋懷壯。抱病深嗟酒興廉。白社有緣逢惠遠。黃花如約遲陶潛。爲耽佳節忘歸暮。風帽欹斜醉不嫌。

寄馮伯房御史

夏口別君今廿年。地偏書札迴難傳。遙聞御史如桓典。且喜諸生有鄭玄。老去交情懸楚澤。秋來離思滿江天。雨花臺上登臨處。寄我雲霞賦幾篇。

立春夜燕師徵君宅醉中作

西京豪士青春燕。南國佳人白雪歌。醉裏不知身老大。歡來那問夜如何。纏頭錦段無勞惜。到手金尊豈覺多。白髮紅粧笑相向。良宵爲樂肯蹉跎。

正月十四日汧邸燈燕遇雪

長安霏雪滿山川。帝子張燈令節前。六出花明流夜月。九枝光煖結春煙。仙倡玉樹調新曲。上客瑤華擬鉅篇。十載王門枚叔老。強將衰白侍賓筵。

春日遊興慶故池

昔是皇家苑。今爲藩國池。景龍餘舊號。花萼尙殘碑。風館榛蕪合。龍舟歲月移。藤垂千尺蔓。樹拱萬年枝。芳草王孫賦。霓裳帝子辭。翠盤懷妙舞。玉笛想橫吹。佳麗前朝迹。興亡異代時。乘春聊命賞。覽古一興思。海變旋成陸。臺傾已就夷。援琴歌慷慨。徒感雍門悲。

題畫

草閣生晝涼。南風滌炎暑。幽人坐忘言。靜聽泉石語。

送別吳醫馮元理

採藥吳中久。匿名偶騎山。虎下山行。還丹賣畢。還山去。人說都門有宋清。

茗溪歌

沙際交飛雙燕子。池頭並宿兩鴛鴦。採蓮人自愁相見。況遇青衫白馬郎。

黃佐三十一首

佐字才伯。香山人。正德辛巳進士。選庶吉士。授編修。出爲江西按察僉事。改廣西提學僉事。致仕歸。起左春坊左司諫。遷侍讀。掌南院事。再遷左諭德。歷南祭酒。進少詹事。兼侍讀學士。贈禮部侍郎。諡文裕。有泰泉集六十卷。

四庫總目。佐詩吐屬沖和。頗見研練。於時茶陵之焰將熾。北地之鋒方銳。獨能力存古格。可謂不失雅音。

蕩苑后言黃才伯詩如紫瑛石大似韎韐才伯亦有佳語如青山知我吏情澹明月照人歸夢長長空贈我以明月海內知心惟酒杯門前馬躍簫鼓動欄上雞啼天地開

湧幢小品夏貴溪妾蘇廣陵人其父曰綱少女適曾石塘銑與貴溪爲聯衿綱出入兩家傳石塘復套之說夏大喜主其策綱益自負與巡倉御史艾朴通賄作奸爲衆所嫉分宜已一一刺其陰事伏毒深夏不悟妄度河套指日可復得意甚作漁家傲一闋適黃泰泉至掀髯示之索和黃有千金不買陳平計之句蓋諷之也夏大詬詈賦言者遂之去去三日而禍作

國雅黃詹事才伯性尚沖和韻含芳潤玄覽鰲洲藏珍瓊海爲一代名家其詩譬之龍躍懸河鳳鳴阿閣輝映高絕

廣東新語歐真伯云泰泉先生岫出南海持漢家三尺以號令魏晉六朝而指揮開元大歷變樞結爲章甫闢荒穢於炎激功不在陸賈終軍下

列朝詩集才伯髣髴以奇雋名及入翰苑博綜今古修詞揆藻爭雄藝苑嶺南人在詞垣者瓊臺香山後先相望後來梁公實黎惟敬皆出才伯門下南越文學彬彬然比於中土矣才伯有漫興詩落句云倦遊卻憶少年事笑擁如花歌落梅自注云欲盡理還之喻王元美云此公作美官講學恐人得而持之故也今刻泰泉集不入此注故附記之

明詩選陳臥子曰才伯亦窺見格律

靜志居詩話文裕撰體頗正而取材太陳故格雖聳高而氣少奔逸

田按才伯論詩云吾見近世古詩以綺靡爲精工律詩以粗豪爲氣格然則徐庾之玉臺優於蘇李之河梁蘇頌之輕花捧觴岑參之柳拂旗露反不如羅隱之天地同力韋莊之萬古坤靈矣持論甚精泰泉集古體微傷堆砌律體與七言斷句極得唐人格意

都門逢美人行姚倅牽席上賦送陳參政探韻得高舉二字

都門柳絲青可纜。開關好鳥求其曹。美人久矣人夢寐。笑揮結綠歌鳴皋。憶昔贈我金錯刀。欲往報之阻
煙濤。雲裾月珮忽相見。冰雪一洗心煩勞。兔園開尊延旆旄。春風淡蕩吹緋桃。觥籌凌亂絲竹動。燕笑不
知明月高。泉陵別駕醉起舞。舞罷逡巡淚如雨。感恩自是門下人。殺身未報尊前主。當年人棄君獨取。英
雄未遇多齟齬。劍埋楚國終作龍。璞售宋人何異鼠。君不見毛公。薛公誰當語。風雨感會生毛羽。平原之
客徒豪舉。

暮春郊外

五日逢休沐。千山得勝遊。樓臺蕭寺迴。花竹習池幽。春事已黃蜨。舊盟惟白鷗。煙塵奔走地。回首意悠悠。

次韻贈張子

長安木葉下。蕭蕭生客愁。夜寒空對酒。雲淡獨登樓。柳岸橫長笛。花灘放小舟。向來江海意。淒斷爲清秋。

秋日遊迎祥寺至玉泉分韻

迢遞尋蓮宇。淹留詠桂枝。玉聰穿柳入。錦席傍泉移。山翠浮龍苑。雲光溢雁池。塵心今已淨。應有白鷗知。

贈別韋評事歸靖江

抗疏甘南謫。知君不負丞。離情江上樹。聚首驛前燈。幽谷歌鳴鳥。天池息大鵬。扁舟汎明月。回首夢毘陵。

控海樓有懷徐可大

南州徐孺子。落筆滿人間。江上笑爲別。天邊去不還。高樓題控海。此日獨看山。尙憶危言日。投簪且閉關。
粵臺懷古

勝地經秦漢。高臺近斗牛。片雲浮鬱水。孤月滿靈洲。事往市朝變。秋來林壑幽。霸圖何足問。吾得采真遊。
草堂夜坐

浪迹少城隈。衡茅向水開。閉門青嶂合。卷幔白鷗來。地僻清虛洞。天高玄覽臺。坐聞松籟起。竟夕思悠哉。
全節廟

極目煙塵暗帝畿。樓船南去逐斜暉。已無虎帳鳴金柝。祇有龍潭葬寶衣。精衛何時填海滿。蒼梧終日見雲飛。貞魂若化吳宮燕。應是年年一度歸。

桂江秋懷借養齋方伯韻奉寄

桂江水高三尺強。秋來鴻雁相回翔。鳴橈振柁亦何意。楓葉蘆花俱可傷。蒼梧望斷粵雲白。滄浪歌罷湘煙長。會須萬里去寥廓。嗟爾尉羅空自張。

羅浮青霞谷贈甘泉

青霞谷中飄紫煙。誰其栖者甘泉仙。雲邊放鶴啄瑤草。雨後呼龍耕玉田。梅花不作翠羽夢。薤葉細寫朱雲篇。沖虛昨雨自高枕。曉來同話羲皇年。

補送孫學士之留都

景陽鐘動散宮鴉。南院新承北闕麻。潞洛夢回燕樹月。玉京吟對蔣陵花。山分龍虎曾開國。江足鱸魚莫念家。誰道桂坊成久別。佇看鳴珮入承華。

彭城懷古

華髮蕭蕭羈旅情。片帆衝雨過彭城。黃樓此日河聲急。赤帝當年劍氣橫。魏闕自生千里草。長陵誰薦一杯羹。歌風臺下休回首。惟有寒潮訴不平。

聞雁

瀟湘水碧莓苔青。白雁掠雲時一聲。疏燈古壁照蓬鬢。江湖心事秋冥冥。

厓山懷古

兩厓形勝自天開。奪港猶思卷土來。千古海陵遺跡在。雲濤回望重堪哀。

讀見素救李空同奏疏偶成

賈誼憂時舊有名。楚騷何事不勝情。長安宿鷺衝人起。應是風波到處生。

潞河阻凍戲贈文衡山

闔閭城下浩煙波。日日沙頭載酒過。垂楊繫艇不知數。一紙黃庭雙白鵝。

南歸途中

南旺湖邊沙柳春。鵝黃鳧藻相鮮新。棹歌歌遍江南曲。嫋嫋輕風吹白蘋。

西清詞三首

璧月珠星滿紫壇。蓮花齊簇切雲冠。瑤池豈必傳青鳥。蓬島惟應集絳鸞。
碧殿崢嶸概泰清。颯臺時送步虛聲。流鈴擲火飛章地。一片雲遮翡翠城。
滅卻雲鬟帶玉冠。紫煙衣薄露光寒。步虛聲裏琪花落。贏得君王轉盼看。

張時徹二十六首

時徹字唯靜。鄞人。嘉靖癸未進士。授南兵部主事。改禮部。歷員外郎中。出爲江西提學副使。歷福建參政。雲南按察使。山東。河南布政使。以僉都御史巡撫四川。改江西。入爲南刑部侍郎。改兵部。進尙書。有芝園定集五十卷。

明詩選陳臥子曰。司馬樂府頗有造構。近體宛倩麗逸。如層臺佚女。意帶雲霞。

列朝詩集尙書詩學殖富有。工力深重。樂府古詩。標舉典會。時多創獲。七言今體。靡盬蕪穢。若出兩手。楊用修評其詩云。四言以至六言。沖澹縝粹。沈鬱雄壯。匠意鑄詞。色具體備。七言之什。自鄒無譏。用修可謂能言矣。

甬上書舊集尙書歸老時尙茂齒。精思著推。爲詩古文詞。及他說林。家言凡數十卷。輯洪建以來大家名文爲文範。別爲文苑。撰郡誌。續四明風雅。旣以標格自持。益好士。寵薦後輩。凡經其門。後俱爲名士大夫。所執友。義重死生。始爲進士時。有騎馬來。

定交者曰王徽子揚。快士也。子楊死。為刻鶴山集。豐人翁以落魄死。為刻考功集。陳后岡早歿。既刻其集。復為勒石墓門。家有別墅在東皋。曰茂嶼。草堂在西皋。曰武陵莊。時引上客。觴詠其間。即單門年少。一經品目。藉以揚聲。吾鄉士大夫。壇壝於斯極盛矣。

靜志居詩話。芝園樂府不規摹古人。較之濟南覺勝。五律頗近初唐。

田按。芝園詩自以樂府為勝。駢文亦是當家。所作豐考功集序。情文俱美。視貌襲秦漢者。不可以道里計。

豔歌何嘗行五解

天有七曜。地有四維。天有七曜。不照汝情。地有四維。不能制汝遊行。解一結髮為婚媾。琴瑟兩相和。汝今但

遠去。信誓齊山河。解二池中有鴛鴦。箇箇兩相當。樹上有女蘿。葉葉自交柯。解三食蓼不言苦。食鬱不言甘。心

思所親人。過期而不詹。解四醯雞處餅盎。蠹蟲食桃李。不得同生。亦得同死。解五

子夜歌二首

乍來結女伴。江頭去浣紗。問訊郎消息。夜來燈燭花。

女郎宛轉歌。輕舟棹碧波。打動明珠碎。團團落芰荷。

古別離

春思已無那。如何又早秋。偏將一片葉。飛作萬重愁。鳳枕蘭香細。瑤階霜杵柔。暗揮雙淚眼。一望大刀頭。

有所思

清鏡久不御。朱鉛那復施。忍看雲並雁。愁見月穿帷。華燈冷紅豔。庭草委芳蕤。不及梁間燕。雙雙啄紫泥。

戰城南

朝戰城南。暮戰城北。矢若飈飛。戟如蟻積。晨起裹創。血淚沾臆。營中振鈴。帳下蓐食。城南舉火。城北揚旗。將軍如虎。偏裨如熊。衝堅陷瑕。什攻五圍。血流野草。肉挂枯枝。我聞有道。四海寢戈。桑乾草青。條支不波。北款呼韓。南制尉佗。魚麗雲屯。被甲則那。

關山月

東海冰輪出。西川桂影多。弓開玄菟郡。鏡轉白狼河。亂角驚城鶴。清霜照鐵戈。胡塵猶未滅。戍客奈愁何。

江南曲四首

儂住大江南。君家大江北。生長不相知。江頭見顏色。月白鸞簫細。江清龍笛鳴。長千里中兒。打鼓賽江靈。捕魚橫塘濱。船多不施罟。南風忽來吹。移舟向前浦。東涯芳杜綠。西渚蓮花紅。瓊英若可贈。徒棹及秋風。

嬋娟曲

繆承金屋寵。轉爲玉顏傷。妾意有何極。君恩自不常。朝朝占鳳釐。夜夜夢朝陽。不惜千金賦。能蒙一盼光。

寶刀吟

幽并遊狹兒。百寶裝吳鉤。處囊時電掣。出匣有星流。空抱屠龍技。未逢推轂收。何當承尺檄。一爲掃旄頭。

青山歌贈蕭封君

青山兮嵯峨。綠水兮層波。朱鳥兮上下。玉樹兮交柯。山有人兮考槃。殮玉屑兮弄潺湲。荷衣兮籜冠。紉之兮紫蘭。彼簪紱兮何有。徒忍尤兮抑首。睠鳳羽兮高飛。焚樹蕙兮盈畝。歸來兮山中。駕白鶴兮驂龍。丹邱兮羽人。聊與子兮從容。

君房下第歸

在在有芳草。處處有青山。君去與之去。君還與之還。燕臺空駿骨。漢宮擯朱顏。自古有如此。沈冥且閉關。

離別詩

朝殮共盤匱。夕夢貼衾帷。肝膽自相照。山河誓不違。脂車臨遠道。啟匣出裳衣。甯知寸心斷。還言千里歸。

送林民服歸省

大夫懸紫旆。相送出江東。那忍仙舟去。猶憐尊酒同。山青建業雨。雲白武夷宮。繡服承歡處。芳蘭滿故叢。

龍隱潭

磴險愁窺壑。巖開始見天。衣裳牽宿霧。石罅瀉鳴泉。四壁松蘿古。孤峯日月偏。雲雷時不歇。知有白龍眠。

邵武道中

明發衝寒露。征旄載曉星。水穿雲竇白。天掩石門青。鳥雀爭陽谷。松巒間短亭。所嗟筋力薄。奔走未遑甯。

大王峯次中溪韻

不有風流客。那知太上峯。盤雲出鳥背。拂石禮仙容。鍾乳流丹壁。巖花開紫茸。夷猶終永日。昏黑尙捫松。

自清泉至衛源舟中作

飛鳧將畫舫。只傍片雲行。本以風波客。因舒覽眺情。煙凝村店近。月上野鐘鳴。一曲陽春調。停琴待友生。

新秋詠懷時在病

芳杜秋風冷。蘭舟剡水遲。美人在何許。遠道本難期。皓月臨瓊樹。青樓出鳳吹。曲中有深怨。不奈妬蛾眉。

訊東田閉關不出

入林何太密。閉戶但窮玄。流水在屋外。青山落枕邊。藥從三鳥得。方自上池傳。勅斷人間世。逍遙一睡仙。

春日遊茂嶼山莊同諸彥作

蘭舟一出郭。步步可憐春。沙草不禁綠。谿花亦自新。煙霞青竹杖。湖海白綸巾。總爲疏狂甚。豪吟不避人。

雨望

高樓不可上。一上一添愁。落葉亂山暮。滄江凍雨秋。洩雲寒抱樹。決水曲通洲。白髮何爲者。空餘一劍留。

十四至茂嶼山莊

一自逃空谷。長爲山水雄。每逢青眼客。來伴白頭翁。煮茗燒松葉。齏泉引澗虹。瑤臺高不極。徙倚睇秋空。

明詩紀事卷八

戊籤

張含十一首

含字愈光永昌衛人正德丁卯舉人有崑山詩集六卷

四庫總目含學出於李夢陽又與楊慎最契故詩文皆慎所評定慎序有曰張子文必弓左字必蒼雅其推挹甚至然其病正坐此故襲續字句而乏鑄鑄變化之功明人別有雕鏤堆砌一派含其先聲歟

升菴集愈光未仲能詩有驚人句及長博極羣書條入葉貫雄辯邃古神搜靈璧上徹漢魏下汲李杜寢歌途罌鞠明究弗工弗庸弗似弗止

藝苑卮言張愈光詩如拙匠琢山骨斧鑿宛然又如束銅鋼腹滿中外遺

國雅張愈光如蘭津天矯騰逸浮空張之鴻雁不傳雲外字芙蓉空照水中花銅柱蒼霞鴻雁響鐵城煙雨鷓鴣暖此例敬篇非雕飾曼語

田按升菴謫滇滇人楊給事士雲王僉事廷表胡副使廷祿李荊州元陽唐僉事綺張舉人含與升菴遊同時吳高河懋品題爲楊門六學士六人中以士雲及含爲傑出含集中詩與升菴者彌望皆是升菴序崑山集所謂於困窮節義之交萬言不竭者是也升菴贈含詩云迢迢崑山珠璧交晶英兩美必相合誰言容易并懷崑山云一刻一折扎一日一款襟崑山歌云張子生長崑山野蒼髯聞日愛風雅翩翩欲度正始前栖栖不肯聞元下平生眼中人誰爲愛才者中奈何大復梁園李空同結

交折行輩聲價騰煙鴻。壽張出山歌云。壽君十載前。合樽促席在連然。壽君十載後。問月停雲遙舉酒。暇日檢海內交遊詩云。高河長句出山律。懷我好音三百篇。海內絕句云。張含秀句滿天下。二人襟契不淺。詩格亦略相似。惟才遠不逮升菴耳。

瘡痍

懶慢棲巖壑。憂時還淚垂。祇聞徵彩石。不復念瘡痍。海涸魚龍泣。城荒虎豹馳。歌謠無采使。紀詠舍吾誰。
離夕有贈效垂拱體

僊子武陵溪。春深歸路迷。翠翹迎露濕。羅袖避風颺。留佩花籠玉。分釵月印犀。金杯延落日。酒醒各東西。
潁川侯祠

野老爭傳潁川。當時功業冠南滇。平蠻營壘蒼山外。破虜旌旗白石邊。祇見荒祠通落日。不聞遺像照
凌煙。陰風古樹無窮恨。長爲英雄弔九泉。

香祖筆記。永昌王端簡公安祥嘗屬余選張含禹山集。余尤喜集中潁川侯祠一篇。足稱詩史。至結句云。陰風古樹無窮恨。長爲英雄弔九泉。可以泣鬼神矣。

歲暮寄升庵

頻年爲客棲濱海。何日還家過錦城。謝傅風神動王導。李侯佳句似陰鐙。赤龍不見凌霄漢。銅柱徒聞起
甲兵。時有交南兵事。月浦霜橋牽別思。嶺嶺江雁總關情。

憶升菴

故鄉玉壘三千里。異域堂琅二十春。楚道方言兒女解。梵宮新偈錫緇鄰。鳳毛池上眞仙客。龍尾關前老
逐臣。青史聲光日月動。白頭呼應馬牛頻。

閒適

圖籍珍收外史菴。杖藜閒過老僧龕。詩閒擬彈成何用。世變藏基苦未諳。陵下茗華憐郭璞。階前蘭葉對
羅含。高人自古多垂釣。上客今誰解左驂。

避世

假塞疏狂散髮人。青囊象飯不愁貧。鄰翁問字攜村酒。稚子眠磯守釣緝。肘露旋縫蠶白袷。山遊纔帶小
烏巾。誰知避世尋源事。只爲桃花不爲秦。

長安旅夜

委巷積雪數尺深。萬里鄉思絕難禁。客子倦遊是何意。梅花未開空苦吟。抱病維摩欲說法。不眠阮籍須
彈琴。三更風急鴻雁響。歷歷哀音愁我心。

六言呈升庵

憶昨高燒風雨。三更燭下題詩。遙避南鴻北雁。月明滿地相思。

獨步

青竹園中獨步翻雲淹竹溪流春花一開雙淚春鳥一囀千愁。

有客約遊東湖不果

聞說東湖湖水清荷花荷葉滿湖生。卽教閉戶從花盡莫遣看花不盡情。

張合一首

合字懋觀含弟嘉靖壬辰進士授戶部主事改兵部吏部歷員外出爲湖廣副使。

田按懋觀與崔後渠論詩崔云唐人詩郊寒島瘦全怪俱自成一家今人詩皆是描紅未有白出機軸者懋觀云唐人詩本於心如太白好酒飛翺好色者言與心符故不可及今人詩與心迥異故格調雖規模古人而意味終不如此論爲當時摹古者進一解懋觀詩惜不多見。

過聞

日斜候得聞夫來鼓擊鑼鳴開始開獨有龍船先得過南都中使進鮮回。

金大車四首

大車字子有其先西域默伽國人明初歸義賜姓居南京遂爲上元人嘉靖乙酉舉人有方山遺稿。

金陵瑣事羽伯陳公評青溪社中四子詩云高汝州近思雄壯奇拔馬國學承道博雅曲則金文學子坤清新秀朗金孝廉子有則兼總諸長詞義雙美夫金氏昆玉尙有詩集若高馬二公人且不知其姓名也況於詩乎。

列朝詩集。子有從遊於顧華玉。華玉極愛重之。子有詩法壘陽。隨州。搯筆立就。嘗有不堪搖落逢秋日。况復蹉跎入暮年之句。陳羽伯怪其壯歲出語不祥。死時年四十四。羽伯與其弟子坤掇拾遺詩。定次百篇。

田按。子有與陳羽伯爲素交。子有卒後。羽伯有詩哀之云。大金吾風好。偉然清廟質。五色煥龍鬣。希聲中琴瑟。束髮友斯人。畢志期作述。沈冥同往歲。瀟灑弄文墨。吾方墮塵網。曠期阻親暱。豈意南陽別。歎好此焉畢。仰視天方營。取成不世出。誦子臨歧贈灑淚。空永日。其爲儕輩歎慕如此。

漂母祠

王孫去不返。淮水亦東流。宿草封遺塚。行人說故侯。荒祠黃葉暗。寒渚白蘋秋。一飯猶懷德。空悲雲夢游。

祝禧寺訪馬承道

地僻秋堂靜。琴書此盍簪。短檠禪榻暗。微雨梵鐘沈。絡緯鳴莎徑。松杉繞石林。擁衾不能寢。山氣夜蕭森。

幽居

依依人境外。削迹散幽情。放棹晚潮至。閉門春草生。青蛉溪上浴。黃犢雨中耕。長日江村靜。惟聞伐木聲。

經廢寺有作

金身隨雨臥。紺戶藉風開。聽法龍辭樹。翻經石掩苔。藤花檐際冒。木魅洞中來。澗道千年楸。山僧手自栽。

金大輿三首

大輿字子坤。大車弟。應天諸生。有子坤集。

朱緒曾金陵詩徵。平湖高才困於諸生。曠達豪邁。不問家產名日起。而貧日甚。有詩五百餘首。生時貧不能梓。卒後郭次甫。蓋中有一漢鼎。售四十金。遂刻其集。黃道甫序。謂大都清新婉麗。迥過錢劉。

與文源朱二過溧陽道上

路歧苦奔峭。村舍多蕭索。遠水明石渠。疏雨散林薄。唧唧棲鳥喧。澹澹油雲幙。頽陽卽主人。野飯開山酌。窮途賴所歡。言笑解寂寞。丈夫江海心。何事勞羈縛。引棹息遠遊。長歌耕負郭。

移居

素心厭囂雜。移居人窮巷。本無卜宅心。所貴寡輪鞅。草蟲鳴樹根。秋花旅階上。三徑竹陰多。一樽時獨賞。荆扉白日掩。事罕絕塵想。不見古臺榭。今來唯草莽。願言謝天伐。窮屋逃世網。

江上送陳元甫還江西

送君江上路。心逐斷雲飛。野飯投孤館。寒霜照客衣。鳥衝黃葉下。潮帶白蘋歸。故國方兵火。山中晝掩扉。

馮惟健一首

惟健字汝強。臨朐人。知府裕子。嘉靖戊子舉人。有陂門集八卷。

海岳靈秀集。陂門集。奇思駿發。古選冲逸。近體嚴整。

大泌山房集。汝強才情駿發。超然絕塵。

漁洋詩話。馮氏自關山先生起家進士。以詩名海岱間。有四子。惟健。惟重。惟敏。惟訥。皆有詩名。惟敏兼工詞曲。惟訥纂古詩紀。

風雅廣逸諸書有功藝苑。

舊歲八月送舅氏及弟至下關。今秋出餞蔣丈復來江滸。觀山河風景有慘舊別。

不見渭陽信。空懷杖屨憂。寄書驚別路。送客感深秋。見說之河洛。何時到錦州。遠人應貯望。去矣莫淹留。

馮惟重二首

惟重字汝威。惟健弟。嘉靖戊戌進士。官行人。有大行集。

大沁山房集。惟重刻。意爲詩。無大歷以後語。

冷氏園亭待宋一川不至

宛宛凌溪曲。誰家雙竹門。鳥啼松菊徑。人坐桔槔園。白板明斜日。青山帶遠村。美人殊未至。搔首對平原。

遊張氏園

翠柳窺窗碧。朱顏映酒紅。花枝青浥露。蒲葉白翻風。荒徑思陶令。名山對謝公。酒闌仍悵望。家在海雲東。

馮惟敏七首

惟敏字汝行。惟重弟。嘉靖丁酉舉人。除涑水知縣。改鎮江教授。遷保定通判。有海浮山堂詩稿。石

門集。

藝苑卮言。馮汝行詩。如幽州馬客。雖見伉俪。殊乏都雅。

大泌山房集。汝行文不爲刻削語。情事若指掌上。填詞尤號當家。西北人往往被之絃索。

海岳靈秀集。海浮詞雖逸而氣弱。律雖協而調卑。列朝詩集。汝行善度。近體樂府。盛傳於東郡。王元美謂李尙寶先芳。張臧方重。劉侍御時達。此調皆可觀。而惟敏獨爲傑出。其板眼務頭。攢搶緊緩。無不曲盡。而才氣亦足以發之。余所見梁狀元不伏老雜劇。當在王漢陂杜甫春遊之上。詩雖未工。亦齊魯間一才人也。

山左明詩鈔。張廷案惠夫云。海浮山在臨朐縣南二十五里。石青色無寸土。上有古松數百株。松下野生迎春。花時望峯金嶺。下卽海浮先生別業。危樓三楹。顏曰懸襟。取水經酈注語也。左右古木千章。修竹數十畝。千霄蔽日。夏不知暑。傳署杜句爲聯。云名園依綠水。野竹上青霄。可謂切矣。北臨冶泉。一名薰冶水。發源山之西麓。治官祠。下匯爲巨浸。大百頃。淵深潭泓。游鱗可數。中產鯽最美。客至。主人舉網爲膾。又有臥雲。卽江南等亭。並在竹林中。石門亦勝地。似靈巖而差小。先生集名以此。田按。臨朐四馮。朱中立首推汝強詩。王秋史謂汝威爲四集之冠。朱竹垞謂汝言詩華整可觀。其賞氏之偉節乎。余謂終不若汝行之才氣縱橫也。

禽言三首

鳳凰不如我。竹實醴泉眞瑣瑣。何不委形濁世中。飛鳴飲啄無不可。鳳凰不如我。

報穀報穀。透犁好雨夜來足。不愁田中惡草多。但願年年風雨和。夜來雨急風聲惡。聞道村南一尺雹。老翁歸來語老妻。村中報賽煮鳴雞。

向前還好。可惜今年種田少。早知今年勝去年。卽死不賣山南田。欲向靈禽頻借問。禽言味遠唯知近。能

知歲事報陰晴。不知官租重與輕。

黃見源再過小齋而余闕一造謝微名羈人無論遠近雨中話舊漫賦此章

欲渡西津屢未能。閒官猶自愧良朋。微茫一水成疏越。咫尺三山阻共登。每憶春風燕市酒。重憐夜雨郡齋燈。高情從此頻過訪。首着盤餐恐不勝。

夜登金山絕頂

亭在丹霄第幾層。脩然吾與月同升。望中更覺天無際。立處惟愁地不勝。風靜沈沈聞梵磬。雲開隱隱見漁燈。吏情最喜滄洲近。欲託幽棲恨未能。

紫荊關閱武

萬年天險關鴻濛。不數崑崙百二雄。勅使觀兵中執法。守臣分輔右扶風。從來肘腋三關重。此去華夷一路通。今日正煩廊廟策。安危何獨在元戎。

貽獨往生

不見獨往生。依稀想幽事。買藥遊江城。夜宿城邊寺。

馮惟訥七首

惟訥字汝言。惟敏弟。嘉靖戊戌進士。除宜興知縣。改魏縣。歷蒲州知州。揚州同知。改松江。徵授南

戶部員外進郎中改兵部出爲陝西僉事歷河南參議浙江副使山西參政按察使陝西布政使改江西加光祿卿致仕有光祿集十卷

四庫總目馮惟訥古詩紀前集十卷皆古逸詩正集一百三十卷則漢魏以下陳隋以前之詩外集四卷附錄仙鬼之詩別集十二卷則前人論詩之語也時代縣長採摭繁富其中真偽錯雜以及抵牾舛漏所不能無故馮好作詩紀匡謬以糾其失然上薄古初下迄六代有韻之作無不兼收溯詩家之淵源者不能外是書而別求固亦探珠之滄海伐木之鄧林也

藝苑卮言馮汝言詩如晉人評會稽王有遠體而無遠神

海岳靈秀集少洲詩俊逸秀麗縱橫繩墨間時出奇鋒

列朝詩集汝言有光祿集評其詩者以爲博洽多聞自出爲鮮

送杜明府謝政還遊

仙郎逸氣橫朝野。傲岸不落風塵下。邗丹六百輒免官。王陽九折能旋馬。羈心浪迹日悠悠。楚水吳山十度遊。秋風君度紅驛磧。知我題詩白鷺洲。

同葉司法登北固山甘露寺

紺園臨楚郭。碧巘控吳關。閣道傳多景。江光合二山。雲隨前代盡。歌及此身閒。況是逢山簡。誰能不醉還。

送王閣山赴均州別駕

迢遞糜城道。看君白髮新。孤猿楚山夜。芳草漢江春。去國懷明主。憐才憶故人。呂虔如有贈。時拂寶刀塵。

隴州閻氏水亭延栢泉小集

習家臺樹枕滄浪。飛蓋西園共舉觴。一徑花香含宿雨。千林樹影帶斜陽。莫辭醕酌留山簡。自喜追隨有葛強。明發征輶各回首。兼葭秋色正蒼蒼。

至都始見峻伯留宿廨舍

可憶毘陵夜雪船。亂帆相背各風煙。探囊詩卷行堪把。計日心期又隔年。秉燭更疑成別夢。當杯翻怯近離筵。同遊自昔多豪彥。獨對狂歌倍黯然。

毘陵舟中夜別萬吳二明府次俞汝成韻

渡口雲深樹色蒼。孤舟寒雨共離觴。憑君莫話從前事。只是無言已斷腸。

皋蘭觀兵

露骨山前月色高。夜聞胡騎在臨洮。將軍未挂平羌印。獨倚長虹看寶刀。

栗應麟三首

應麟字仁甫。潞州人。嘉靖己丑進士。除陳州知州。歷順德同知。遷陝西僉事。有去陳集、家藏集、碧虛漫興。

四溟詩話。晉川詩清雅不減劉文房。

潞安詩鈔前編程二漳曰晉川詩集大梁高叔嗣爲之序稱翰林唐荆川許栗氏兄弟詩可傳世

謝茂秦將赴晉陽留餞園亭以詩識別分韻得秋字

盍簪方讌晤引轡復西遊草白晉陽路霜清汾水秋詩名無去住客計有淹留心在浮雲外飄然不繫舟

山居閱道經

棲幽寡繁繫端坐閱玄書深院無塵雜閒心自靜虛煙霞悅野性水竹伴山居不是能甘廢疏庸與世殊

古意

抱瑟空相憶臨妝復自疑宮中莫深妬妾豈是蛾眉

栗應宏八首

應宏字道甫應麟弟嘉靖乙酉舉人官南陽通判有太行集十六卷

四溟詩話道甫弱冠工詩與兄仁甫齊名所作含英咀華風調竄別其論詩曰詩貴解悟識有偏全斯作有高下古人成家者如得道故拈來皆合拘拘於述者未矣又曰詩莫古於風雅皆可解漢樂府有不可讀者聲詞雜寫之譌由譜錄爾

列朝詩集高子業解司封歸道甫擲筮相造雞黍定交子業作紫團山人歌贈之云紫團高山鑿青雲栗家兄弟殊不羣陳州一出驅五馬令弟二十窺三墳

田按道甫兄弟與謝茂秦高子業遊甚有詩名近體沈思研鍊不落尋常蹊徑

遊五龍山

巖壑古留迹。藤蘿春可捫。遊人歷世代。零露越朝昏。鶴夢通雲島。猿嘯下石門。浮沈只自異。感念復何言。

西還留別李嵩洛僉憲

并州舊辟士。梁苑惜離心。飲餞洪河滸。言旋王屋岑。白雲看是伴。芳樹若爲吟。遙憶惟明月。松窗理玉琴。

贈古鏡禪師

福德茲方久。眞知老益耽。村居皆法食。弟子徧行菴。飛杖山泉落。開經猿鳥參。本來無住著。何異古瞿曇。

登泰山

秦嶽巖嶢凌碧空。魯宮漢峙草煙中。淒淒零露朝昏易。漠漠浮雲世代同。東度欲隨蓬島客。上清期謁玉宸宮。海田陵谷尋常變。安得神遊一御風。

龍山中行漸及幽遠

晴巒遠近草煙濃。屨杖逍遙世外蹤。採藥偶然逢異境。看雲不意入羣峯。橋邊父老說黃石。山上仙翁憶赤松。自覺漢陰機已息。茲遊麋鹿遂相從。

寄酌謝茂秦都中見貽

有客高懷共酒樽。歧途悵望別都門。鄴中才子能爲賦。稷下先生久放言。日暮冥鴻經旅館。春初芳草憶王孫。思君欲寄清漳水。直到檀欒修竹園。

柏谷

柏谷東連十八盤。山行時到玉虛壇。黃庭道士能留客。旋煮人侵作早餐。

都城別二皇甫謝山人

燕中春盡塞鴻鳴。久別相逢俱客情。斗酒與君相共醉。浮雲聚散不須驚。

候一元二首

一元字舜舉。樂清人。嘉靖戊戌進士。除南刑部主事。歷員外郎中。出爲廣東參議。歷河南副使。廣西、雲南參政。廣西按察使。河南、江西布政使。有二谷集二十卷。

靜志居詩話。二谷詩雖率易。然有真趣。

寄石屋

一枝棲已定。舊業未全貧。白水連三畝。青山作四鄰。烏蟲披古篆。牛馬應時人。獨愛林間月。無由寄許詢。

夜渡甌江

暝色度歸橈。長風動沈寥。漸藏江岫月。正落海門潮。委運同飄瓦。全生學緯蕭。江湖易成夢。頓欲謝清朝。

候一麀一首

一麀字舜昭。一元弟。有龍門集。

和家兄南塘書懷

人意各有適，自得貴不違。潛虬本淵媚，冥鴻入雲飛。南塘山水清，可以築釣磯。日夜起棹歌，處處見樵漁。野老多農語，東鄰閒讀書。當知陶晏意，奚必市塵居。

何良俊二首

良俊字元朗，松江華亭人。嘉靖中貢生，以薦授南翰林孔目，有柘湖集二十八卷。

四庫總目：良俊頗有文名，所作縱橫跌宕，亦時有六朝遺意，而落筆微傷太快，殆亦才人輕脫之習歟。

司勳集：吾鄉文徵仲以推擇待詔金馬門，後十餘年而蔡九達繼爲南孔目，嫻於文辭，聲聞藉甚。世傳南館集云：後二十餘年，而何君繼之。杜甫草堂，開於潭水，雜舍精舍，寄之江陵，加以談茗懸河，識同藻鑿，車騎填門，履綦告座，狎梵侶以玄探，結勝流而觴詠，每一篇出，匪但藝苑翁推，而閭巷遞誦。君又妙解音律，晚希聲伎，樽壺傾於北海，絲竹理於後堂，躬自倚詠，尤長屈曲，江左餘風，不在茲乎。

列朝詩集：元朗清詞麗句，未逮文蔡，然文以修謹自勵，蔡以豁刻見譏。元朗風流豪爽，爲時人歎羨，二公殆弗如也。靜志居詩話：元朗詩頗率易，其買宅句云：一須焦革鄰舍，二要秦青對門，與固自蔡第，乖好樂無荒之旨矣。田按：柘湖放誕不羈，賴有才情，足以濟之。

白下春游曲

萬片天桃迎笑靨，千條弱柳鬪纖腰。潘妃死後芳魂在，散作城南一段嬌。

聽李節彈箏和文水韻

汨汨寒泉瀉玉箏。泠泠標格映清冰。愁中爲鼓秋風曲。不負移家住秣陵。

列朝詩集。教坊李節箏歌。何元朗品爲第一。盛仲交有元朗席上聽彈箏詩云。酒清香蕙夜擲箏。絃上涼生六月冰。但許風流擅南館。不教飛夢繞西陵。文水和之云。泠泠寒玉寫秦箏。片片清聲似斷冰。一曲渾疑李愬在。不知秋旅是金陵。元朗又和之云。金陵全盛時。東橋每宴集。必用教坊樂。以箏琶佐觴。武宗南巡。樂工賴仁隨駕至北京。在教坊學得金元人雜劇詞。何元朗家小篋盡得之。老賴言。此曲懷之五十年。今供筵所唱。皆是時曲。此等詞曲。無人問及。不意垂老遇知音也。

何良傅一首

良傅字叔皮。良俊弟。嘉靖辛丑進士。除行人。遷刑部主事。改南禮部。歷員外郎。中有禮部集十卷。

田按。分宜官南祭酒時。叔皮以文受知。厥後分宜入政府。元朗因得官翰林。觀叔皮致分宜書可見。二何集中感恩之作不一。余謂此等著作。爲玷不小。二何宜亦不達。爲此瑣瑣。徒貽千古笑端。

宋敏齋叔丈有詩見懷遠寄金陵次韻奉答

羨公飽邱壑。愧我逐風湍。河上一云別。盟言三載寒。銀缸花自落。江館雁堪憐。回首蕭塘曲。吳雲倍黯然。

王昺一首

昺字文晦。侯官人。參政佐孫嘉靖壬午舉人。授海門教諭。歷國子博士。監丞。遷戶部主事。有晴川

集四卷

邳州守歲

守歲邳州道。羈孤萬里情。鐘聲鄰子廟。樹色項王城。栢葉愁相對。燈花黯不明。難成鄉國夢。風雨破長更。

王杲一首

杲字文旭。曷弟。有怡漫集。

病中寄傅木虛諸子

伏枕滄江上。終朝苦憶君。幾時同夜月。一別已秋雲。霄漢青燈夢。江湖白雁羣。閩山與吳水。誰爲寄慇懃。

明詩紀事卷九

戊籤

李開先二首

開先字伯華章邱人嘉靖己丑進士除戶部主事改吏部歷員外郎中擢太常少卿有中麓閑居集十二卷

四庫總目嘉靖初開先與王慎中唐順之熊過陳束任瀚趙時春呂高稱八才子其時慎中順之倡議盡洗李何剽擬之習而開先與時春等復羽翼之然開先雅以功名自負既廢以後猶作塞上曲一百首以寓其志又閒居集末卷有蘇息民困或問及顏神事宜潘渠私議潔議諸篇汲汲於經世不甚爭文苑之名故所作隨筆揮灑一篇或至數千言其詩亦往往疊韻至百首其持論確於李何而終不能奪李何之增埒蓋有由矣

海嶽靈秀集中麓積書好客豪宕不羈著作甚富如魏貅縱橫江海泛溢一韻百篇蓋自樂天之流也然詞意浮淺多何尙馬列朝詩集伯華弱冠登朝奉使銀夏訪康德涵王敬夫於武功鄠杜之間賦詩度曲引滿稱壽二公恨相見晚也罷歸置田產著聲妓徵歌度曲爲新聲小令搗彈放歌自謂馬東籬張小山無以過也爲文詩不循格律詆諧調笑信手放筆所著詞多於文文多於詩改定元人傳奇樂府數百卷嘗謂古來才士不得乘時柄用非以樂事繫其心往往發狂病死今借此以坐消歲月暗老家傑耳

田按嘉靖八子王道思唐應德之文自是一代傑出詩則道思體頗清俊尙不足與邊徐角勝何况李何陳約之善論詩而所作殊不稱其言伯華詩尤頹放頗稱好事藏書畫極富自負賞鑒嘗作畫品次第明人以戴文進吳偉陶成杜堇爲第一等倪瓚莊麟爲次等而沈周唐寅居四等王漁洋香祖筆記云伯華論畫與吳人頗異王弇州與之善嘗言過中麓草堂觀所藏畫無一佳者而伯華謂文進畫高過元人不及宋人亦未足爲定論漁洋與伯華爲鄉曲且不能爲之左袒矣

讀書省悟

多取不爲貪詩書僻性耽借鈔先館閣內書原陳芳洲奏請自南都移來共八十廚掌以典籍後遷代不常因而攘竊抵換存者無幾例許鈔覽必先具領狀以時繳納世所謂讀中祕書者是也今館中博覽及瞿曇譽望慚書麓文章效濟南李廌有濟南集若無眞實行萬卷總空談諸君不得如前聞只市書而已

靜志居詩話中麓藏書之富甲於齊東詩所云豈但三車富還過萬卷餘又云借鈔先館閣博覽及瞿曇是也先時邊尙書華泉劉太常西橋亦好收書邊家失火劉氏散佚無遺獨中麓所藏百餘年無恙近徐尙書原一購得其半予嘗借觀愛籤帙必精研朱點勘北方學者能得斯趣殆無多人也聞中麓後人尙餘殘書數十部巡撫丹徒張公物色之中有陸農師禮象一編張公歿後訪之不能得矣

塞上曲

掌上張燈酒正豪帳前駿馬縮寒毛忽聞羽檄傳來急上馬酖陶弄寶刀

王慎中十三首

慎中字道思晉江人嘉靖丙戌進士授戶部主事改禮部復改吏部歷員外郎中謫常州通判遷

南戶部主事。歷禮部員外。出爲山東提學僉事。歷江西參議。河南參政。有遵巖集四十卷。

四庫總目。正嘉之際。北地信陽。聲華藉甚。教天下無讀唐以後書。然七子之學。得於詩者較深。得於文者頗淺。故其詩能自成家。而古文則鉤章棘句。剽襲秦漢之面貌。遂成僞體。史稱慎中爲文。初亦高談秦漢。謂東京以下無可取。已而悟歐曾作文之法。乃盡焚舊作。一意師仿。尤得力於曾鞏。演述詳贍。卓然成家。與唐順之齊名。天下稱之曰王。唐詩則初爲藻豔之格。歸田以後。又雜入講學之語。頽然自放。亦與順之相似。朱彝尊明詩綜。乃謂其五言文理精密。嗣響顏謝。而論者輒言文勝於詩。未爲知音。今考集中五言。如遊西山普光寺。睡起登金山。遊大明湖諸篇。固皆遼穆簡遠。七言如每夜撥聲如舍裏。四時山色在城中。萬井遙分初日下。翠山微見遠煙中。琴聲初歇月挂樹。蓮唱微聞風滿川。亦頗有風調。然綜其全集之詩。與文相較。則淺深高下。自不能掩。文勝之論。殆不盡誣。彝尊之論。不揣本而齊末矣。

中麓閒居集。遵巖在留都。與龍溪王畿講解。王陽明遺說。參以己見。曩惟好古。漢以下著作無取焉。至是始發宋人書讀之。覺其味長。而曾王歐氏文尤可喜。眉山兄弟猶以爲過於豪而失之放。以此自信。乃取舊所爲文。如漢人者焚之。唐荆川見之。以爲頭巾氣。遵巖言此大難事。君試舉筆自知之。未久。唐亦變而隨之矣。嘗言吾之詩文。不外古人。而有高出古人者。中麓止知敬服唐荆川。殊不知荆川特得吾之緒餘也。其大言如此。

藝苑卮言。王道思詩如驚弋宿鳥。撲刺迢迢。殊愧幽閒之狀。

國史唯疑。擬人必於其倫。王道思序唐荆川集。謂江左自季札言優之後。惟唐一人涉過譽。吳中閔然。薛方山答王槐野書。吳如唐陸贄。宋范仲淹。鄒浩。非盡乏人。唐豈得優然其上乎。唐亦有自嘲詩。力希顏氏何能望。竊比言游未敢安。爲王序發也。列朝詩集。道思詩體初宗豔麗。工力深厚。歸田以後。摻雜講學。信筆自放。頗爲儒林口實。略與唐應德相似。東南嶠外詩話。道思詩世事浮雲機久息。故園芳草夢空還。世態無端爭夢裏。人生何事勝樽前。蘊藉自然。令人三復不厭。

田按道思五律與同時皇甫子安華子潛輩相較略無愧色陳臥子明詩選不錄道思一篇毋亦爲弇洲歷下之論所讎歟

白鹿洞書院作

昔賢敦雅尙。設教託靈壤。妙得高深理。非關山水賞。道因名勝尊。神以流行養。時去迹空留。風存化猶廣。宏基茂草餘。巍構浮雲上。忘幾鳥頻飛。有懷予獨訪。林芳鬱紛敷。庭木自滋長。泉石有餘清。絃歌輟遺響。川水逝如斯。山形高可仰。徘徊西日斜。惆悵前人往。

由撫州之建昌道中宿山寺

客行亦已倦。投足秋山深。月色空香徑。清宵宿道林。蒼松多古意。流水有餘音。釋子一相偶。聊忘生滅心。德安公署雨中書懷

荒齋掩夕景。倦迹易淹留。細雨同寒意。空山向暮愁。逢迎還自懶。鞅掌祇增憂。抱此微軀病。何能爲世謀。蔣方伯行部德安走筆奉柬

離抱易爲感。復此芳春時。雜英委閒徑。好鳥鳴高枝。坐惜歡言阻。空令淑景馳。方聞整駕去。惆悵獨來遲。發東林寺登廬山絕頂還過留止

年來知淨理。在世比虛舟。偶此同生滅。因之任去留。色空廬阜起。禪定虎溪流。已矣東林社。長廊擲葉秋。

宿湖中

蒼茫煙景晦。舟楫自如家。宿處隨鷗鳥。秋初惜月華。遙心連浦雁。歸夢滯江花。爲客誰知者。疏燈水一涯。
署中讀書

雨散空堂靜。囊籠微月初。古人聊取對。塵事自相疏。曲几螢光映。殘編蠹簡餘。不緣嫌簿領。飾律用經書。
春日永甯寺山亭願中丞招遊

煙曉雨初晞。亭皋春日輝。相從窮宴賞。一倍惜芳菲。柔草纔勝藉。新條恰拂衣。謝公方愛客。日暮不言歸。

金山雜詩

康定陵前栖夜鳥。盤林鬱鬱鎖松梧。總聞再造驅戎虜。不見千官拜鼎湖。內使司香開寢殿。祠臣常祀掃金鋪。翠華縹緲空中度。絳節靈應羣帝俱。

登江東城樓

花片飛飛柳色深。登樓一倍攪鄉心。長隄煙草迷人去。遠寺斜陽帶磬沈。江水無風時起浪。春雲不雨每成陰。躊躇滿目誰相會。惆悵前林倦翼禽。

夏日燕惠山同荆川是堂諸君

茲山誠負勝。野性本耽幽。偶獲盍簪會。聊爲結駟遊。桂觴臨曲水。蘭帳俯崇邱。廣坐清光滿。層軒空翠浮。升高憑四覽。撫景散千憂。芙苑林端見。長湖天際流。巖花如共笑。谷鳥亦相求。翻愧蓬飛客。來參竹社遊。

滄洲道中寄蔡道卿

泠泠風舉碧羅裳。一曲焦桐月在牀。寂歷寒波兼墜葉。不知何處是瀟湘。

涼州詞

莽莽平沙雁不飛。馬頭誰復寄征衣。欲知春色惟憑柳。柳葉初青春已歸。

唐順之八首

順之字應德。武進人。嘉靖己丑進士。授兵部主事。改吏部。尋改編修。歷右春坊司諫。上疏請朝東宮。奪職爲民。起兵部郎中。視師浙直。超拜僉都御史。巡撫淮陽。天啟中。追謚襄文。有荆川先生集十二卷。

中麓閒居集。荆川素愛空同詩文。篇篇成誦。且一一倣之。及遇王遵嚴。告以自有正法妙意。何必雄豪兀硬也。故癸巳以後之作。別是一機軸。有高出今人者。有可比古人者。未嘗不多遵嚴之功也。

藝苑卮言。近時毘陵一士大夫。始刻意初唐精華之語。亦既斐然。中年忽自竄入惡道。至有味爲補虛一試肉。事求如意。屢生嘆。又若過顏氏十四歲。便了王孫一裸身。又詠疾則幾月。蠶疣是雨。浮閣箭則箭箭奔月。兒裏角力則一撒滿身都是手。食物則別換人間。蒜蜜腸等語。遂不減定山沙邊鳥共天機語。擔上梅挑太極行。爲詞林笑端。

國雅。唐中丞應德詩種名家。蚤居翰苑。便躋貞觀。武德華躡。及還毘陵。直造開元。大歷妙處。並足流響。詞林。

詩藪。嘉靖初。爲初唐者。唐應德。袁永之。屠文升。王汝化。任少海。陳約之。田叔禾等。爲中唐者。皇甫子安。華子潛。吳純叔。陳鳴野。施子羽。蔡子木等。俱有集行世。就中古詩。沖澹當首。子潛律體精嚴。必推應德。

國琛集。應德初務清華。晚趨險怪。考其所撰。若出二轍。故譽有所自。毀亦隨之。

明詩選。陳臥子曰。應德氣象爽邁。才情駿發。使能深造。常有超乘。其後馳驚功名。詭託講學。遂頽然自放。國史唯疑。翁萬達親執小卒手與論心。幕客常數十人。至躬拜參游之母。士因感奮。卽周尙文健嗣。亦賴翁駕馭有法。滴水巖之役。旣嚴檄之。復趣授之。恩威具得宜。唐荆川詩。得一降胡如愛子。用三敗將立奇功。極力寫出。

吳錫麒有正味齋日記。慈仁寺殿左穹碑聳立。乃成化二年御製詩。但稱爲太后祝釐而建。孫國牧燕都游覽志云。寺本爲周太后弟吉祥建。當時蓋諱之也。唐應德詩云。同行更說前朝事。繡蟒銀魚有故僧。是也。

田按。嘉靖初。學初唐者。如薛君采。皇甫子安。七古詩便不能佳。無論餘子。蓋其調圓轉流利。須擇題而施。惟何大復明月篇。最爲傑出。以其才自度。越尋常也。五律一體。人握隋珠。君采。子安兄弟。高蘇門。袁永之。唐應德。陳約之輩。不可勝數。應德古文。自是明一代大家。詩學初唐。律體自有佳篇。厥後談兵講學。不復能唱渭城。潦倒頽放。弇州。臥子之論。具在。不必爲之諱也。

寓城西寺中雜言

誰言龍藏遠。亦在鳳城旁。塔湧金銀界。筵開功德場。常明瞻慧月。利涉藉慈航。沈痼還能消。齋心奉藥王。

送陳翰林松溪謫居朝陽

天連窮髮國。地近卜雞鄉。禁闕心偏遠。關河望轉長。翻飛看鳳隱。消歇怨蘭芳。此路饒荆棘。思君欲斷腸。

暮春遊陽羨南山

花落已成蹊。村村綠葉齊。一園通蝶路。千嶂隔鶯啼。澗草多名蕙。山人舊姓嵇。窮歡猶未返。忽是夕陽西。

南苑

秦園盧橘標炎節。漢苑蕤荷駐羽旗。雲氣自依雕輦集。星辰故繞畫梁飛。林行草木皆成隊。水戲魚龍各合圍。更取薰風調曲奏。已看暘谷藉光輝。

送王翰林浙江兵備副使

同時詞客不如君。一劍還將靜海濱。雞舌舊從香署吏。虎符新領伏波軍。帆檣萬里輸蛟織。樓閣三秋吐蜃雲。自笑馮郎將白首。欲從幕下策奇勳。

題龍池菴相傳伏虎禪僧開山處頂有龍井螭蜥見則雨

遠游爲訪白雲巖。轉盡孤峯路更南。龍見小身時出井。虎馴大士舊開菴。禪心客思俱潭水。古佛寒松共石龕。坐對老僧無一事。夜深相與說楞嚴。

嵩陽宮柏

嘉樹植崆峒。年長勢更雄。已無秦帝幸。尚有漢皇封。幹比孤生竹。根猶半死桐。靈泉玉女灌。甘雨嶽神通。葉密鳥難度。林樛葛易蒙。垂陰九華帳。弄影五雲宮。色掩重巖翠。聲含衆竅風。賓來虬蓋假。仙去鶴巢空。非因不材壽。春秋自無窮。

塞下曲贈翁侍郎總制

少年意氣王千斤。鐵棒曾穿萬虜羣。壯士從來不病死。孤兒今屬羽林軍。

陳束七首

束字約之。鄞人。嘉靖己丑進士。選庶吉士。改禮部主事。歷員外。復授編修。出爲湖廣僉事。歷福建參政。遷河南提學副使。有后岡集二卷。

四庫總目。束與唐順之爲同年。共倡爲初唐。六朝之作。以矯李何之習。而所學不逮順之。年僅三十餘而卒。文章亦未成就。故順之終以古文鳴。而束無稱焉。

中麓閒居集。后岡詩。每情會景來。思奇興發。一篇成則一篇便可名世。大抵李何振萎靡之弊。而尊杜甫。后岡則又矯李何之偏。而尙初唐。

司勳集。陳子方齡於終章。比才於賈生。雕章綺合。藻思羅開。考其遺編。早歸四傑。晚鎔二張。適軫於平原。曠駕於康樂。麗於游燕。充於入洛。雋永於浮湘。備於吳越。賦閩。展可傳以不朽。

藝苑卮言。陳約之詩。如青樓小女。月下箏篋。初取閒適。終成淒楚。又如過雨殘荷。雖爾衰落。嫣然有態。國雅。陳學憲約之。余讀其集。篇篇都秀潤。句句少警拔。亦就色象中自然寫出。如波擊菡萏。淨麗天萬。尙未舒笑。

列朝詩集。約之初與唐應德輩。俱爲初唐。以矯李何之弊。晚而稍厭。靡心折於蘇門。明詩選。陳臥子曰。約之典禮之作。精麗典重。不減沈宋。

靜志居詩話。約之取組六朝。亦稱典則。

田按。約之高蘇門集序。闡明詩緒。正變得失。言言科律。字字珠玉。豈在多乎。今觀所作。意極矜鍊。境乏闕深。趨步雖工。音節未壯。良山賦。實荏弱。又傷早逝。採錄遺詩。爲之三歎。

過徐李一子再遊東林寺

入山禮名禪。山深變炎夏。清颿激層欄。流水注戶下。孤磬遠煙微。長廊飯僧罷。整結塵外蹤。緬懷遠公駕。虎去識舊溪。蓮開見遺社。四禪邈難依。百齡竟安假。冥心合委和。曠覽齊物化。疏達任吾生。塵玄兩相謝。送張秀才省兄還句章

臥病穿營慮。閉關生道心。還聞異國去。忽動故鄉吟。海樹延寒色。山城結暝陰。懸知康樂思。春草別來深。公安得應德村居詩酬贈

相期邱壑意。悵望海雲深。更落淮南葉。愁聞吳會吟。祖生先著策。貢禹未投簪。言貫盈尊酒。歸來共竹林。送張子言

送君已蕭瑟。況復值秋時。鄰比存千里。勞歌起四思。口有張生舌。囊無季子貲。空聞說詩好。到處解人頤。伏日櫛溪上疏乞休

夙昔秉玄志。凌翰升紫臺。雄談迴馬辯。巨藻顧龍才。輝光四座滿。軒蓋五方來。不求文仲舉。甯論公孫猜。一朝分楚服。三載滯江陵。辛涼峴山淚。悽斷郢門哀。感往情彌吝。懷來節易摧。屈平形稍頽。潘岳鬢全衰。瓠質甯須用。蓬心信不開。題書移魏闕。畢志在蒿萊。

辰州送王兵憲

奉命宣威建節旌。翩翩繡服照山城。傳章遙識蠻酉拜。負弩新看縣令迎。臘月梅花催別騎。春原柳色待

行營。此日西南須靜鎮。知君無檄諭耆叅。

高陽行

高陽年少事橫行。重俠由來不重生。奪得寶刀搖雪色。騎將飛馬蹙風聲。

趙時春一首

時春字景仁。平涼人。嘉靖丙戌進士。選庶吉士。改戶部主事。復改兵部。以建言下獄。黜爲民。起編修。兼司經局校書。以言事再黜。起兵部主事。遷山東按察僉事。進副使。以右僉都御史巡撫山西。有浚谷集十七卷。

四庫總目時春詩文多慷慨自喜。不可拘以格律。

送大學士石門翟公巡邊東旋

四海共皇風。分憂切上公。位兼八座重。鎮屬九邊雄。文武仍才傑。經綸翊聖功。揚旂截塞外。曳旆度湟中。嘉善傳周賚。錫金侈漢宮。便蕃來寄譯。歌舞遍華戎。萬里鳴鞭下。三軍挾纊同。台光方燦爛。時雨亦零濛。纔出天山北。吏之鴨澤東。旗翻關月黑。緋映海鹽紅。尙憶吟鴻雁。無勞歌阜螽。橐戈安衽席。庇士共幘幪。迢遞皇華節。旬宣帝澤洪。先驅紛虎豹。上略藉夔龍。麟閣威儀著。鳳池勳業崇。履應旋斗柄。劍已過崆峒。龐相空圖史。梁公富藥籠。明謨多俊乂。登用及愚蒙。庸敢玷蘭室。終當返桂叢。他時擊壤頌。元凱奉重瞳。

任瀚四首

瀚字少海南充人嘉靖己丑進士選庶吉士改吏部主事歷員外郎中改春坊司直兼翰林檢討有忠齋集

田按少海詩音節抗朗在嘉靖八子中自爲一派與前後七子略近

病懷二首

杪秋霜露至暮夜極蕭森別館砧聲切嚴城寒氣深盧龍邊月苦涿鹿陣雲深牢落江關夢摧傷鴻雁音
茂陵已多病宋玉復悲秋江遠音書斷天寒鴻雁愁霜燈見黃葉隋開皇寺名今爲天甯風露下長楸永夜那能寐
含悽吟白頭

晚次閩州滕王臺

蘆荻陰陰王子臺秋濤冥冥猿嘯哀黃雲古戍踏歌去落日千帆賈客來江鶴倒窺如意舞岸花斜映接
羅開月明水深不可渡石壁繫纜魚龍迴

咸陽東樓望闕

漏下寒關鼓角雄秋清絲管郡樓風正思袞冕春天上細聽簫韶月露中身世留連雙鳳闕乾坤衰晚一
漁翁承明官閣文華署玉珮遙知委上公

熊過一首

過字叔仁富順人嘉靖己丑進士選庶吉士改禮部主事歷員外郎中坐事斥爲民有南沙集八卷

田按嘉靖八子惟叔仁詩罕見選家多不及余從費經虞劍閣芳華集獲詩一首

題王生卷

烽火恆山逼近途雲中南畔是天都詞臣記得瑤池事王母西傳益地圖

呂高一首

高字山甫丹徒人嘉靖己丑進士授戶部主事改兵部歷郎中出爲山東提學副使遷太僕少卿有江峯漫藁

暮秋述懷

瀟瀟寒雨對高秋寂寂空牀擁敝裘歸向釣天頻有夢挽回滄海獨無謀平生頗愛任公子末路方思馬少游珍重故人招隱意家園南郭可淹留

明詩紀事卷十

戊籤

鄧黻一首

黻字文度。其先松江華亭人。徙常熟。正德丁卯舉人。

列朝詩集。文度以通經博古爲學。嘗做呂成公大事紀。論次古今得失。類成卷帙。曰。如有用我。執此以往。詩學昌黎。東坡。不肯時調。爲文有體要。陸子餘。歸希甫皆稱之。

慧日寺十八大阿羅塑像

至人自藏珍。古貌元氣備。博士造佛徒。追真信難事。亭亭青蓮宇。諸天奠其位。尊者十二輩。高座納雙屣。覺能越幾先。慈欲放踵施。龍驤以珠象。虎跳以呪弭。目瞑澄淵黑。頂突華峯翠。若真外形骸。能以理勝自。嗒然了得喪。何有立同異。塵柄操瑩玉。寶花自空墜。想當經營初。其手空俗士。我思彼尊者。所造亦深邃。兩經入方夏。後乃道宏肆。以空攝萬有。以道獵衆智。窮山養枯骸。野鳥習其髻。善士瞻梵相。瓶錫此焉侍。安得如此塑。慰我懷古意。

汪本一首

本字以正。歙人。正德丁卯舉人。有西巖集。

壬寅新都秀選集。以正童稚。性解爲詩。弱冠挺興。遂傳高唱。若愁邊草木歇。夢裏關山多。有懷成遠詠。無伴趁朝行。野草不媚世。沙鷗審近名。皆潛思取境。不落常情。

晚興寄羅子應程師魯

白日下平林。長風起層波。美人不可見。消息今如何。愁邊草木歇。夢裏關山多。惜哉歲云晏。回首鬢將皤。

吳益夫一首

益夫字惟裕。閩人。正德丁卯舉人。武學教授。有古迂集。

長千柳枝詞

橋頭春水拍春隄。楊花柳花撩亂飛。長條總被行人折。那復青青上舞衣。

周允中一首

允中字宏道。金鄉人。正德丁卯舉人。歷官西甯參議。有南莊詩。

和南灣亭

南灣亭子澗之南。雲影天光一鑑涵。翠柏依巖巢水鶴。青山拔地聳晴嵐。人如元白詩千首。夢到羲皇酒半酣。聞說往來有畸士。相逢半日劇清談。

呂柟一首

柟字仲木高陵人正德戊辰第一人及第授修撰以議禮下詔獄謫解州判官改南宗人府經歷就遷吏部郎中歷尙寶卿太常少卿詔拜國子祭酒擢南禮部侍郎隆慶初贈禮部尙書謚文簡有涇野集三十六卷

田按涇野及第後以忤劉瑾引疾去厥後康對山以救李空同謁劉瑾牽連放斥涇野與對山詩唱和相得甚歡能諒其心故也講學與陽明良知不合時陽明倡學東南當路者嫉之癸未會試主司發策有焚書禁學之議涇野力辨而解救之得不行此皆盛德事可以愧講學攻擊者

遊郊東道院

尋幽過道院曉霧縞珠林小逕蒼苔合層軒翠竹深南山長對面渭水更關心雨後千花醉風前百鳥音

景暘一首

暘字伯時儀真人僑居南京正德戊辰第二人及第授編修歷司業遷南中允

國寶新編中允詩主盛唐蕭散遺俗庶幾高臥北窗之懷

金陵瑣事景司業伯時憶藉水部云雲竹晴還雨風花落更飛石駙馬山莊云移席澗歌歌食杯較句遲送高汝立云湖堂翻石壁山色入虛樓送沈華父云情深惟縱酒髮亂似驚秋夜酌對曹十四云風簾分坐月皎皎夜榻翳燭花紛紛遊永甯寺云竹陰到午風猶冷石磴穿雲踏轉幽

噪鵲行

鵲鵲復鵲鵲。春明飛向深樹落。樹邊人家懷抱惡。去年征夫從衛霍。邊頭烽火接回中。羽書晝警清夜同。一自將軍度河曲。天山萬里風雲空。邊頭戰血赤河水。戰士磨刀寒落指。天子深坐甘泉宮。回頭北顧常拊髀。樹頭鵲噪如有知。朝來蟬子檐前垂。夫君封侯應有期。鳳臨鸞鏡當窗移。

戴大賓一首

大賓字寅仲莆田人。正德戊辰第三人及第。授編修。

田按編修登第時年僅十四。才思精敏。未幾卒。世論惜之。

九鯉湖

雲霞競相逐。水天同一色。何處有瑤花。湖空秋月白。

方豪三首

豪字思道。開化人。正德戊辰進士。除崑山知縣。遷刑部主事。諫南巡杖闕下。起湖廣僉事。進副使。有棠陵集八卷。

田按思道頗有時譽。王浚川少谷子歌云。彼時才傑遊帝旁。信陽之何棠陵方。大梁翩翩李川甫。吏部薛生尤擅場。今觀其詩。無論何薛。卽方之川甫亦非其倫。

留別選禪師

分經蓮漏下，幽徑石苔封。卻笑此時別，更於何處逢。敲門思看竹，解榻愛聽松。明發孤舟在，江雲千萬重。

重至波光閣

去歲奉親遊白岳，登君畫閣挹波光。秋風再向長橋渡，隔岸遙聞濁酒香。數里人煙楓柏赤，一年好景橘橙黃。憑誰拔卻南阮嶺，日日相過雲水鄉。

開河

三月開河驛，垂陽綠覆堤。征人歎蕭索，未有一鴛啼。

戴冠五首

冠字仲鵠，信陽人。一云吉水人。正德戊辰進士，授戶部主事，以言事謫廣東烏石驛丞，起戶部員外，出

知延平府，改蘇州，終山東提學副使。有蘧谷集十二卷。

田按：仲鵠詩宗何大復，天才雖遜，工力亦深。

訪陳邦器不值寄之

朝出江東門，暮出江東門。美人棄我去，望望江色昏。君行向何許，君家在江洛。我心逐江水，見君不能語。

立秋雨

終夏無善睡。人秋眠始安。高雲散疏雨。短榻生微寒。炎涼一瞬目。造化如轉丸。感此復不寐。中夜興長歎。

秋興

山中白酒今正熟。復有黃雞啄黍肥。瘦馬蕭蕭時出郭。涼風淅淅故吹衣。卽看敗柳驚秋色。忽見殘鴉送夕暉。野老淹留共酩酊。相將白鷺亦忘機。

汝言旣歸舉酒酌菊席上作

去年今日客東京。今日燕山歲又更。佳節兩經皆負菊。久遊隨處是浮萍。一秋懷遠雁將盡。薄暮登高雲忽生。醉後不須便歸去。多情況復有張衡。

春日湖上

匹馬春風湖上來。湖中新水碧如苔。柳條弄日遙堪恨。鷗鳥銜魚近不猜。入浦漸多閒島嶼。抱江無數好樓臺。楚州自古稱雄鎮。此日遊觀亦壯哉。

胡纘宗二首

纘宗字孝思。秦安人。正德戊辰進士。特授翰林檢討。出爲嘉定州判。遷潼川知州。入爲南戶部郎中。改吏部。出知安慶府。改蘇州。遷山東參政。改浙江。歷河南布政使。以右副都御史巡撫山東。改理河道。復改河南。乞歸。以作詩下獄。尋得釋。有正德集四卷。嘉靖集七卷。烏鼠山人集十六卷。擬

古樂府二卷擬漢樂府八卷。

四風總目續宗詩激昂悲壯頗近秦聲無媚媚之態是其所長多粗厲之音是其所短。

藝苑厄言胡孝思嘗爲吾吳郡守才敏風流前後罕儔公暇多遊行湖山園亭間從諸名士一觴一詠題墨淋漓遍於壁石後遷御史中丞撫河南肅皇幸楚爲一律紀事云聞道鑿輿曉渡河嶽雲縹緲護晴珂千官玉帛嵩呼盛萬國衣冠禹貢多鎖鑰北門留統制璫璣南極扈羲和稷天八駿空飛電湘竹英皇淚不磨刻之石後以他事坐罷家居者數載矣嘗扑一貧令王聯其人爲戶部主事以不職免殺人下獄當死乃指程天湘竹爲怨望咒詛而所繇成獄及生平群毗皆指爲孝思奸黨奏上大怒悉捕下獄欲論死分宜相陶真人力解救久之乃罷免猶摘杖孝思三十當是時孝思將八十矣了不怖讙取錦衣獄中柱械之類八日制獄八景爲詩紀之衆爭答孝思掣其筆曰君正坐詩至此耳尙何吾伊爲孝思澹然咏不輟曰坐詩當死今不坐詩得免死乎出獄時謝茂秦貽之詩有云白首全生逢聖主青山何意見騷人孝思方病杖創甚呻吟間猶口占以謝人謂孝思意氣差勝蘇長公才不及耳。

登天柱閣

與客上江樓橫江山欲浮雲當天柱出月傍小姑流帆外收吳楚尊前落斗牛瀾漫忽千里倚檻思悠悠

林屋洞

繫馬靈宮第幾天紫霞丹竈坐羣仙金庭空闊蛟龍鬪玉柱玲瓏日月懸改火欲烹山乳食掃雲初藉石牀眠隔凡不隔岳陽水黃鶴飛飛何處邊

唐龍五首

龍字虞佐蘭溪人正德戊辰進士除郟城知縣入爲御史擢陝西提學副使歷山西按察使召拜太僕卿改右僉都御史總督漕運兼巡撫鳳陽諸府進左副都御史歷吏部侍郎進兵部尙書總制三邊召拜刑部尙書加太子少保乞歸尋起南刑部尙書就改吏部入爲兵部尙書加太子少保進吏部黜爲民卒後以子修撰汝楫疏辨詔復官贈少保諡文襄有漁石集四卷

四庫總目龍所著有黔南集江右集關中集晉陽集其文頗具浩瀚之氣詩尤長於五言

藝苑卮言唐虞佐如苦行頭陀終少玄解

國雅唐文襄風度瓌爽頗臻古雅筆爲蔡子木所編輯中有長淮接江水千里映空色夜雨分芝草晴天落蠶魚亦作玄解語明詩選陳臥子曰漁石五言本之少陵已涉藩籬漸窺堂奧李舒章曰漁石五言律詩刁斗精明風雲狎競足爲名家

褒城

地勢雄臨漢風聲遠接巴霧深城市隱日照谷門斜鳥道懸青壁龍江走黑沙未觀諸葛壘先問子眞家
子午嶺

鞏昌

嶺名分子午天險限西東劍閣千人廢吳山一箭雄雲封關樹黑日出塞門紅遠道悲遊子驅車背朔風
關塞遠仍到音書靜不聞山高八月雪木落萬川雲藥裹秋隨病松燈夜校文賢勞猶自愧未敢數辛勤

伏羌

木脫羌山出。雲寒羌水清。干戈經百戰。燈火聚孤城。雪岸兼葭色。風營鼓角聲。將軍功伐在。馬革快平生。
塞上曲爲蘧翁先生作

黃榆塞口旌旗卷。白草山頭烽火收。春動茫茫水如雪。家家河磧飲耕牛。

毛伯溫二首

伯溫字汝厲。吉水人。正德戊辰進士。除紹興府推官。入爲御史。遷大理寺丞。擢右僉都御史。巡撫甯夏。坐事褫職歸。用薦起故官。撫山西。移順天。皆未赴。改理院事。進左副都御史。復褫職。起右都御史。協理院事。遷工部尙書。以兵部尙書總督宣大山西軍務。加太子少保。兼太子賓客。以征安南功加太子太保。還朝。復理院事。改兵部尙書。削籍歸。隆慶初。復官。賜卹。天啓初。追諡襄懋。有東塘詩集十卷。

靜志居詩話。東塘數與夏公謹。李獻吉。方思道相酬和。故其詩頗具風格。

東湖

東湖春渺渺。隱士此幽居。迴艇愁鷺鳥。垂竿不上魚。興來時覓酒。得暇且攤書。斜照臨波影。軒窗日日虛。
大雲寺訪友

爲訪王摩詰。來遊祇樹園。花邊容駐馬。竹裏共開尊。山翠遙當几。溪流曲抱村。乾坤傷浩劫。吾欲託空門。

周金二首

金字子庚。南京右衛籍。武進人。正德戊辰進士。授工科給事中。累遷戶科都給事中。歷太僕少卿。擢右僉都御史。巡撫延綏。改撫宣府。進右副都御史。再改撫保定。遷兵部侍郎。進右都御史。總督漕運。巡撫鳳陽諸府。擢南刑部尚書。就改戶部。贈太子太保。諡襄敏。有上谷漁陽二稿。

路鴻休帝里明代人文略。橫山周公善爲歌詩。羽檄惶惚中。率不廢詩。

秋日送客歸江南

故鄉此日多幽賞。家傍青山獨掩扉。野寺雲間僧有約。寒塘楓落雁初飛。吟邊歲月空流水。夢裏關河半夕暉。一葉扁舟五湖上。蓼花秋色轉霏微。

過楊六郎故城

倒馬關頭塞日西。孟良白畔風淒淒。可憐絕壑荒煙裏。古戍無人鳥自啼。

王應鵬二首

應鵬字天宇。鄞人。正德戊辰進士。除嘉定知縣。入爲御史。歷大理少卿。擢僉都御史。巡撫順天。改撫山西。進右副都御史。協理院事。有定齋集。

田按。定齋詩頗有秀句。如良月便從今夜得。好詩還到故山吟。鐘聲出岫客初到。月色滿庭僧未歸。皆可誦也。

送王廷直

一別青山二十年。白雲長在草堂前。曉辭雙闕東風裏。夜見繁星北斗邊。花鳥夾隄春似織。江湖一艇水如天。詩成爲送王摩詰。煙雨桑麻入輞川。

張白齋席上次韻

竹里先生竹作扉。白雲長傍小山飛。江雷忽送冥冥雨。又有嫩涼生翠微。

歐陽鐸一首

鐸字崇道。秦和人。正德戊辰進士。授行人。歷工部郎中。改南兵部。出爲延平知府。擢廣東提學副使。累遷南光祿卿。以右副都御史巡撫應天。進南兵部侍郎。改吏部。贈工部尙書。謚恭簡。有集二十二卷。

十二日風雨。次宣風館。王伯安投詩。有天際浮雲生白髮。林間孤月坐黃昏之句。用其韻。

馬蹏沿路踏霜痕。野水橫流一段渾。兩戒關河中置驛。幾家雞犬自成村。枕邊聽水塵懷淨。山頂看雲望眼昏。愧是宣風天萬里。幾人此地漫消魂。

徐文華一首

文華字用光。嘉定州人。正德戊辰進士。授大理評事。擢監察御史。以言事下詔獄。黜爲民。嘉靖初。

起故官。歷河南副使。入爲大理少卿。以議禮再奪俸。尋以李福達獄遣戍遼陽。隆慶初。贈左僉都御史。有遼陽集。

岳陽樓

天外雲帆晚。洲邊朔雁秋。湘君何處弔。靈瑟至今愁。

夏良勝一首

良勝字子中。南城人。正德戊辰進士。授刑部主事。改吏部。遷員外郎。諫南巡。予杖奪職。嘉靖初。起故官。進郎中。遷南太常少卿。未赴。轉給事中。謫茶陵知州。以在郎中時議禮黜爲民。再下獄論杖。謫戍遼東三萬衛。隆慶初。贈太常卿。有東洲稿二十卷。

四庫總目。良勝兩以直諫謫。風節凜然。其詩文無意求工。而皆嶽嶽有直氣。

瓊花觀

慢櫓低聲唱浪沙。餘哀尙寄野人家。誰將主業中原地。祇換揚州一樹花。

陸震一首

震字汝亨。蘭溪人。正德戊辰進士。除太和知縣。徵爲兵部主事。進員外。諫南巡。下詔獄杖死。嘉靖初。贈太常少卿。

朝房待罪

驥尾思千里，葵心託萬言。一身曾許國，九死敢忘恩。梅福冠猶在，朱雲檻不存。空庭對明月，古道照乾坤。

靜志居詩話：太常力批龍鱗，九死不悔。詩存無多，錄四十字，一字一碧血也。

程啓充一首

啓充字以道，嘉定州人。正德戊辰進士，除三原知縣，入爲御史，以劾郭勛謫戍邊衛。隆慶初，贈光祿少卿，有初亭集。

田按：以道在正嘉兩朝，號爲敢言，惜謫戍後不復起用。與升庵爲素交，升菴亟稱其詩。今全集不復可觀，僅於費經虞劍閣芳華集見二詩，不足見所長。所著又有南溪詩話三卷，四庫存目著錄者僅二卷，提要亦不詳其名，未知是二是一也。

峨眉山寺

一夜中峯雨，清涼曙色新。到來垂老客，擬作問禪人。石徑休辭滑，山雲不染塵。會當凌絕巘，一覽小西岷。

盧煦一首

煦字子春，東陽人。正德戊辰進士，授長垣知縣，入爲刑部主事，累遷四川按察僉事，進湖廣參議。

輓西湖李徵君

西湖隴上鶴仙銘，過客停驂問姓名。酌酒東風人不見，海棠殘月杜鵑聲。

王大用一首

大用字時行。興化衛籍。儀真人。正德戊辰進士。授工部主事。累遷右副都御史。巡撫順天。改撫大。同。進右都御史。入掌院事。尋罷。起撫四川。遷南刑部侍郎。有彙谷集。

遊武夷

控鶴仙人渺何許。幔亭綵幄重堪憐。溪流九曲依然在。三十六峯凌紫煙。

顧可適一首

可適字輿行。無錫人。正德戊辰進士。授中書舍人。歷刑部郎中。擢廣西參議。有蓉峯遺稿。

和彭別駕石屋登錫山觀五湖

錫嶺尋前蹟。丹邱出上方。七盤凌絕磴。千仞俯滄浪。陵谷推遷後。蓬瀛縹緲鄉。雲謠惜荒宴。萬里泛瓊觴。

陸伸一首

伸字安甫。太倉州人。參政容子。正德戊辰進士。授大理評事。

四月五日游淮雲寺儀上人限韻求題

得見支郎半醉中。相將高閣詠南風。何年許入雲門社。辦取青鞵出輓紅。

丁奉五首

奉字獻之。常熟人。正德戊辰進士。除行人。歷南吏部郎中。有丁吏部文選八卷。

靜志居詩話。南湖詩。不事鍛鍊。興酣落筆。往往暗合。曩篇。卽嘔心燃髭者爲之。不過爾爾。

田按。獻之有南湖留稿。逸稿。宣城梅李豹合二稿。選爲丁吏部文選八卷。詩興趣天然。頗有山林逸致。

家居

家居承祖德。奕世享清平。山襲虞雍號。湖傳呂尚名。僻鄉便吏隱。腴土愜農耕。自揣孤邱志。微吟記此生。

蠡口夜泊

野渡無人到。扁舟卻自橫。村燈明更滅。鄰舫聚還行。水靜人聲遠。霜寒雁夢清。思家不成寢。斗柄已三更。

晚秋雨中

暮雨黯秋光。新寒喧宿鳥。一日不開門。落葉知多少。

晚秋

漫讀書消晷。苦吟詩送秋。出門黃葉盡。風雨暗東樓。

對山

世事年年流水去。門前日日好山來。東君更自添煩惱。春冷梅花苦不開。

胡德一首

德字全之。婺源人。正德戊辰進士。授南戶部主事。歷四川參議。雲南參政。有紀行錄。迂樵雜著。

桑婦吟

茜色裁裙蘭麝薰。鳳釵十二壓春雲。黃金駟馬躊躇處。誰爲羅敷謝使君。

顧彥夫一首

彥夫字承美。無錫人。正德庚午舉人。官河間通判。有瀛海集。

送人考滿

白鷺洲邊春水生。一帆去去暢吟情。溪山十里小桃豔。書畫半船行李輕。雲起峯頭無定迹。鶯飛谷口有離聲。別來想望風神遠。月暗容臺燈夜明。

明詩紀事卷十一

戊籤

鄒守益三首

守益字謙之安福人正德辛未第三人及第授編修以議禮下詔獄謫廣德判官遷南禮部郎中就改吏部召爲司經局洗馬兼侍讀遷太常少卿兼侍讀學士出掌南翰林院就改祭酒以上疏落職歸隆慶初贈南禮部侍郎諡文莊有東廓集十二卷

田按四庫提要稱嘉靖二十九年九廟災守益疏陳上下交修之道忤旨落職其疏具載明史本傳今東廓集乃不載余檢史稱守益言殷中宗高宗反妖爲祥享國長久帝大怒落職此數語具載本集九廟災自陳疏內提要偶未檢耳謙之此疏辭亦不甚激烈蓋帝以議大禮故隱憾之耳

題扇

青山夾茅茨竹徑含煙霧時買泛月舟江上自來去

阻風池口晚霞登岸望九華

渺渺平原送落霞南風吹浪滯汀沙江神不是淹歸興留待晴光看九華

晚睡懷內重諸友

自笑驅馳兩載忙。羨君隱臥北窗涼。不知攜去浮峯石。新種菖蒲幾許長。

夏尚樸四首

尚樸字敦夫。永豐人。正德辛未進士。授南禮部主事。歷郎中。出爲惠州知府。投劾歸。起山東提學副使。擢南太僕少卿。有東巖集六卷。

田按。敦夫講學得之安一齋。一齋出自吳康齋。康齋詩入擊壤派。殊不耐觀。敦夫詩清超可喜。其論詩云。漢魏以來。至唐宋諸大家。皆有典則。至陳白沙。自出機軸。好爲跌宕新奇之語。使人不可追逐。蓋本之莊定山。定山本之劉靜修。規模意氣絕相類。詩學爲之大變。獨古選和陶諸作近之。蓋嘗究心此事。宜其所作不入擊壤一派也。

松溪

風潭百尺水溶溶。潭畔亭亭萬樹松。坐待夜深明月上。一溪寒影走虬龍。

答周用賓

天上神仙不易逢。相逢一半是孤筇。何時直上郎峰頂。看爾青天騎白龍。

題桂州象麓草堂

昔年卜築三峯下。象麓曾題舊草堂。明月柴門應自好。不堪秋枕夢江鄉。

雙溪

二水縈紆夾翠烟。山中流出是何年。誰人結屋臨溪曲。兩派風湍落枕邊。

林文俊二首

文俊字汝英。莆田人。正德辛未進士。改庶吉士。授編修。累官南吏部侍郎。贈禮部尙書。諡文修。有方齋詩文集十卷。

四庫總目。文俊詩從容恬適。不事雕琢。

將抵昌平

百里昌平道。停車日未昏。浮生渾似夢。舊事復誰論。小邑圍平野。溪流抱獨村。向來征戰地。營壘至今存。

彭城夜泊

江海眞成汗漫遊。秋風繫纜近黃樓。數聲寒柝孤城戍。幾點殘燈隔岸舟。水落枯萍粘古堞。棹移宿雁起平洲。可憐楚漢分爭地。今日惟聞水自流。

常倫四首

倫字明卿。沁水人。正德辛未進士。除大理評事。謫壽州判官。遷甯羌知州。有評事集二卷。

嵩渚集常評事詩疏。幾有奇氣。

藝苑危言。常明卿多力善射。雖爲文法吏。時妹輩附注兩韃騎而馳於郊。諸徵侯子弟從俠少年飲。常前突據上坐。起角射。成不及。間稍知爲常。許事敬之。奉大白爲壽。常引滿沾醉。竟馳去弗顧。又時過倡家宿。至日高春徐起。或參會不及。長吏訶之。傲然曰。故賤時。過從胡姬飲。不欲居薄耳。竟用考調判壽州。庭嘗御史。以法罷歸。益縱酒自放。居恆從歌伎。酒間度新聲。悲壯豔麗。稱其爲人。一日省幕。從外舅滕洗馬飲。大醉。衣紅。腰雙刀。馳馬塵絕。從者不及。前渡水。馬顛見水中影。驚蹶墮水。刃出於腹。潰腸死。年僅三十四。平陽守王溱其故人。爲收葬之。常有詩弔韓信曰。漢代稱靈武。將軍第一人。禍奇緣蹠足。功大不謀身。帶礪山河在。丹青祠廟新。長陵一抔土。寂寞亦三秦。至今爲中原豪俠之冠。

田按。明卿豪縱。詩頗效太白。容於邊幅。不稱其爲人。

大醉後題大雲寺閣柱上

謝公昔高臥。挾妓東山遊。豈榮黃閣貴。不顧蒼生憂。簪綬聊暫出。江漢乃安流。國器良有待。局促非吾儔。

李翰林

白也稱楚狂。長嘯隘八極。吐論識仙才。浩歌知酒德。藉藉陰何間。逸駕時凌逼。召用嗟未幾。風塵遂長謫。寂寞彭咸居。千載爲惻惻。徒傳驅巨鯨。幽渺詎可測。

玉泉亭

武帝時乘輿。金輿駐翠微。至今看草樹。猶似被光輝。泉迸聞仙樂。雲流見畫旗。亭高重回首。冉冉下斜暉。

采蓮曲

棹發千花動。風傳一水香。傍人持並帶。含笑打鴛鴦。

柴奇三首

奇字德美。崑山人。正德辛未進士。授吏科給事中。歷南光祿少卿。應天府丞。進府尹。有黼菴逸稿十卷。

田按。德美釋褐。觀政吏部。時楊文襄爲太宰。德美上書言東南水利。其要字無過白茅塘。其次疏七鴉之壑。寒在深陽之五堰。復江陰之一十四瀆。可以興百年之利。請以逆墮沒入。賞給工費。言甚懇至。厥後工部尙書李充嗣開白茅港。疏吳淞江。六閱月而工訖。其論蓋自德美發之。德美詩。疏豁無滯。七絕特有風韻。

題湖東草堂卷

草堂開向沙湖東。鷺鷥鸕鶿菰蒲叢。溪雲飛去琴書潤。艇子歸來夕照紅。

過邵伯湖

東風新水碧波平。十里湖光一鏡明。幾樹桃花傍茅屋。祇應人在畫中行。

京口夜泊

幾樹寒松高閣前。一燈無那對愁眠。惟應鐵甕城邊水。相送行人不記年。

張壁一首

璧字崇象石首人。正德辛未進士。改庶吉士。累官太子太保。禮部尚書。東閣大學士。贈少保。諡文簡。有陽峯家藏集三十五卷。

劉郎浦

當年留滯行兵處。今日淒涼賣酒家。惆悵遺蹤重弔古。晚風殘月槽啞。

王以旂一首

以旂字士招江甯人。正德辛未進士。除上高知縣。徵授御史。累官兵部侍郎。兼僉都御史。總理河漕。遷南右都御史。召拜工部尚書。改左都御史。尋爲兵部尚書。總督三邊。加太子太保。贈少保。諡襄敏。有集四卷。

送徐宇量

八月江南水茫茫。萬頃通王孫。詩勝蹟。輕棹下吳中。曙色寒鐘遠。秋光醉葉紅。行看長卿賦。豪氣吐長虹。

許成名二首

成名字思仁。聊城人。正德辛未進士。改庶吉士。授編修。歷諭德。侍讀學士。進太常卿。掌國子監祭酒。擢禮部侍郎。有龍石藁。

海岳靈秀集。龍石詩。氣平音和。蓋晚唐之佳者。

桃源道中

桃源縣南清水長。蓼汀蘆渚空茫茫。安流遙蕩雙槳去。殘雨猶帶秋雲涼。野鶴有時立高柳。沙鷗無數點橫塘。官情鄉思兩不定。繫舟何處兼葭蒼。

宿靈巖方丈懷雪泉

信宿靈巖尙未還。幽情暗與白雲閒。美人繫我松堂夢。清夜悠悠繞故山。

王道一首

道字純甫。武城人。正德辛未進士。改庶吉士。累官吏部侍郎。贈禮部尙書。諡文定。有順渠文錄。

同年劉祠部士鳳遊玄武湖有詩見示次韻

問訊桃源路。劉郎是舊遊。何時楊柳岸。繫我木蘭舟。

屠僑三首

僑字安卿。鄞人。正德辛未進士。授御史。出爲延平知府。歷廣東布政使。進光祿卿。累遷刑部尙書。改左都御史。加太子太保。贈少保。諡簡肅。有東洲雜藁。

田按。簡肅不以詩名。特有風韻。

水東驛道中

炎海東來路。龍川曲避沙。江村孤驛舍。竹屋幾人家。地瘠春無菜。山稠樹少花。瘴煙愁未已。汗漫薄天涯。

次文卿清明日老軍塘阻風志感

水逆兼風逆。難窮汗漫程。船頭折楊柳。客裏過清明。江壘淒煙雨。天涯遠弟兄。相悲重相別。愁絕海雲橫。

贈棟塘李先生

棟樹蒼蒼我白頭。林塘無事比滄洲。主人自分調三業。野老相從話四休。涼月滿江秋放鶴。夕陽平壘暮歸牛。謀生此意爲真訣。浮世聲華等一漚。

汪文盛一首

文盛字希周。崇陽人。正德辛未進士。除饒州推官。徵授兵部主事。諫南巡。杖闕下。出爲福州知府。歷浙江陝西督學副使。遷雲南按察使。擢右僉都御史。巡撫雲南。召爲大理卿。有節愛。詩集二卷。

田按。希周守福州時。與高繼。傅汝舟影刊宋本兩漢書。頗稱好事。巡撫雲南。經營安南事。伐謀制勝。希周功爲多。賞不副功。史論惜之。

擬古

昭陽歌舞正淹留。羌女新來勝莫愁。曲盡胡笳十八拍。爭扶玉輦下瓊樓。

王思二首

思字宜學。泰和人。太保直曾孫。正德辛未進士。改庶吉士。授編修。以言事謫三河驛丞。起故官。以議大禮杖死。隆慶初。贈右諭德。有改齋集十卷。

十八灘

春雨欲平岸。灘灘無急流。孤舟如鷁汎。千里有猿愁。世路風波在。吾生汗漫遊。鬱孤臺突起。疑是望鄉樓。

登快閣

萬家煙樹澄江上。長笛歸船愧白鷗。忽見輕陰起天際。恍疑身在岳陽樓。

游瑣一首

瑣字世重。連江人。正德辛未進士。累官廣東按察副使。有東行、南行橐。

過伏波祠

漢代中興將。歸然重古祠。江河洗甲杖。雷雨捲旌旗。夷落威還肅。英姿老未衰。豐功滿南服。不數峴山碑。

趙德剛一首

德剛字崇節。閩人。正德辛未進士。官武昌通判。

廣陵懷古

碧草白沙湖上隄。隄邊楊柳有鶯啼。瓊簫一曲今何在。二十四橋煙雨迷。

汪必東一首

必東字希會崇陽人正德辛未進士累官雲南參政有南雋集

駐潯州

三峽聞藤斷雙魚見桂平牂牁通道遠勾漏出江清何事虛開府頻年未戡兵蕭條駐藩節慙愧說干城

周廷用三首

廷用字子賢華容人正德辛未進士除宜黃知縣徵授御史出爲福建僉事進參議歷四川副使江西按察使有八厓集十三卷

國寶新編子賢才氣超融文鋒迅湧兼能博涉強記培滋詞本故援筆長賦爛然成章
田按子賢七律音調高華

次水峽驛

隔岸長風吹白波蜀江千里暮愁多啼猿每聽三聲苦飛雁難逢一字過滿眼黃塵馳羽檄幾時滄海問漁蓑夜深月上灘聲靜時有巴人發棹歌

夜泊岳陽樓

波淨沙明月色浮孤舟又泊岳陽樓天低接水雁來度夜靜抱珠龍出遊湖海放歌聊對酒鄉關聞笛易

生愁。君山縹緲虛無裏。欲躡風雲到上頭。

登岳陽樓和朱淩溪韻

百尺高樓俯洞庭。樓前波浪晝冥冥。雨來湖水兼天黑。雲去巴山擁地青。仙子傳書孤鶴下。漁人吹笛老龍聽。兼葭零落芙蓉冷。誰采湘蘭弔屈靈。

孫繼芳一首

繼芳字世其華容人。正德辛未進士。除刑部主事。改兵部。歷員外。諫南巡。廷杖。尋遷郎中。出爲雲南提學副使。有石磯集。

沈湘香集。華容孫氏。自副使。至子雙先生。凡五世。皆以文學顯。其曰洞庭漁人集。五十三卷者。副使之子宜也。曰闔居。鳴鏜。浮湖。北遊等集者。副使之孫斯億也。曰遂初堂集。十一卷者。副使之曾孫羽侯也。曰徵書四種。今所存。刪微三十六卷者。副使之元孫殼卽子雙也。副使立朝有風節。詩其餘事。

嵩明次韻

海畔青山山上城。野橋驛路接昆明。風開林木千章秀。水抱沙田十頃平。蠻井夜深人尙汲。炎洲霜後瘴還生。飄飄萬里西南路。莫採芙蓉愴獨行。

范格一首

輅字以載。桂陽人。正德辛未進士。授行人。擢南御史。以劾宸濠及鎮守太監畢真下獄。謫龍州宣撫司經歷。起故官。歷江西密雲副使。遷福建布政使。有三峯、二京、宦游等集。

遊靈谷和張汝立韻

草深迷野徑。峰簇暗煙蘿。吠客犬聲遠。照人花影多。到來空俗慮。小住卽行窩。長嘯青山下。人生能幾何。

周敍一首

敍字子厚。九溪衛人。正德辛未進士。除大理評事。歷寺丞。以諫南巡廷杖。謫永嘉縣丞。起故官。出爲韶州知府。歷四川副使。山西按察使。陝西布政使。以右副都御史總理宣大軍務。入爲大理卿。遷戶部侍郎。改兵部。進工部尙書。左遷侍郎。

夏日過淨居寺飲流杯池

巾紫峯南淨居寺。僧房遙倚半岩陰。徑連叢篠迷珠樹。澗引飛泉落玉琴。說法壇空丹壑竅。流觴池在綠苔深。勝遊誰繼蘭亭會。幸有羣賢此盍簪。

朱鳴陽一首

鳴陽字應周。莆田人。正德辛未進士。授戶科給事中。累官浙江布政使。有南岡集。

蘭陔詩話。南岡詩亦秀拔。

書懷

世路多巖嶮。奔走非子心。浮雲莽無極。白日生層陰。寶瑟空自彈。誰復爲知音。長歌賦歸去。高鴻何冥冥。

南大吉一首

大吉字元善。渭南人。正德辛未進士。授戶部主事。歷郎中。出知紹興府。有瑞泉集。

閒居

碧窗紅藥砌。青簡綠牙籤。花落鶯啼樹。風回燕入簾。

陸倕一首

倕字天爵。吳人。正德辛未進士。官寶慶知府。

岳岱今兩瑤草。桃谷陸倕。早登仕用。無暇篇章。晚就操觚。遂超多士。靈心夙構。穎悟居多。

除夕

病拋綉紱風塵外。老愧詩名五十間。華髮漸看青鏡曉。草堂重伴碧山雲。春歸柳岸啼新鳥。門閉江村帶夕暉。獨酌椒花燃柏子。歲除空自嘆離羣。

胡佩一首

佩字時鳴。湯溪人。正德辛未進士。除萍鄉知縣。有隴南集。

盆石

窗前置石盆。盆中疊山石。廣袤不數圍。挈瓶小涓滴。那知造化工。大小無所擇。元氣一周流。無處不融液。居然盆石內。草木亦蕃殖。綠葉閒黃花。生意興勃勃。不見春園中。繁株嬌的皜。條已秋風至。憔悴無顏色。花草雖細微。亦或感衷臆。頗類幽人貞。貧賤不移易。又如晚遇士。抱璞無人識。不用傷白頭。對作楚囚泣。

盧雍一首

雍、字師邵。吳人。正德辛未進士。官監察御史。有古園集十二卷。

毘橋兩渡

橋斷毘江路。殘霞水底天。渡邊還有渡。莫怪急呼船。

王溱一首

溱、字公濟。開州人。正德辛未進士。除沁水知縣。徵授御史。出知平陽府。遷□□鹽運使。

春日同呂子遊土官谷

中條何透迤。天柱鬱嶙峋。西指重華都。世遠見隱淪。矯矯司空子。誰能識其真。所託元不偶。孤嘯傷心神。

袁達十二首

達、字德修。閩人。正德癸酉舉人。授貴溪知縣。坐事下獄。既釋。除湖廣都司經歷。有佩蘭子集三卷。

東南嶠外詩話。佩蘭子詩。大雅不羣。非晉安派所能囿。

田按。佩蘭子近體詩。詞雋格高。在閩人中。可與鄭少谷抗行。世鮮傳本。余所藏者。爲林吉人樸學齋鈔本。詩綜僅錄四詩。不足盡所長也。

貽傅丁戊山人

獨步才名盛。三秋吟思高。校書幽鳥下。洗硯毒龍逃。山色霑遊屐。花枝挂白袍。散愁思爾過。風雨暗蓬蒿。

送晉安張白崖歸杭州

爲吏滄海上。彈琴桃樹前。美名今不忝。直道古難全。纒解鷗迎棹。江流月送船。春深煙水闊。相望各愁牽。

暮春約友登鰲峯

遊春城南春事深。花光醉眼亭臺陰。短窗伏枕夢不徹。高鳥喚人愁更吟。豈而白駒隔陋巷。不見黃耳來遐音。明朝赤腳踏鰲去。海上諸峯與汝尋。

過西湖宛在堂

晉山不出事如何。日把綸巾濯錦波。五代宮堂王氣盡。一天湖水客星過。江妃倚竹羞環珮。山鬼迎人笑薜蘿。紫蟹白魚秋正美。滄浪萬里起漁歌。

題王嵒泉澗似堂

浣似堂開叢竹林。層軒窈窕雜花深。青藜夜動龍蛇影。彩筆秋淩鸚鵡吟。瀼西烏几聊漫興。市南美地安論金。散愁愛汝經過易。短屐長鐺時一尋。

九日少嵩邀登烏石

高石長風吹鷓冠。班荆晚酌自晨歡。迴巖秀色黃花靜。近洛秋聲白鳥寒。搖落江山傷錦樹。沈埋日月憶金丹。孤雲不礙明雙眼。天北天南一倚欄。

登雁峯

全楚山河明眼界。九天鐘磬自樓臺。暮春花鳥愁詩句。絕頂煙霞照酒杯。漫興且攜靈運屐。離騷猶抱屈平哀。青鞋皂帽從今始。獨倚孤雲意未回。

遊溫州江心寺

寺門逼水長陰陰。山雲結雨江樹沈。禪僧翻貝鳥雀下。前佛幻世塵土侵。波濤起伏蛟龍窟。舟楫飄零湖海心。安得草堂春夢醒。願言攜屐共登臨。

春洲

春洲多杜蘅。曠懷不可束。天風自何來。吹我紫芝曲。

贈平山王總戎

寶弓夜挂青羅月。錦纜秋閒白鳥風。花外釣絲雲裏屐。將軍指點似臨戎。
舟次清口慰懷

江上離魂逐暮霞。江洲愁目亂歸鴉。官舟未發還搥鼓。直上長安莫憶家。

鄒頤賢二首

頤賢字養浩。德州人。正德癸酉舉人。官平涼同知。有蘆南集。

程先貞詩搜鄒公詩直學漢魏。深於樂府。

山左明詩鈔蘆南詩深於比興。多所寄託。得古人長言詠歎之旨。

雜詩二首

人以支離全。木以支離壽。夫豈愛支離。支離原可宥。才美生嫉嫌。而況自求售。謙沖猶可爲。驕盈乃速咎。周公尙流言。屈平卒蒙詬。庸鴛有過愆。情亮不相構。初春氣猶肅。柴荆風更寒。布衾夙不溫。寒士無好顏。披衾坐終夜。情幽思亦玄。義理靜深省。嗜欲無牽纏。奈何牛山木。斧斤戕自然。富貴斲天性。貧賤吾何嫌。

張縉七首

縉字世文。高郵人。正德癸酉舉人。除武昌通判。遷光州知州。有南湖集四卷。

顧璘寒松齋存稿世文爲詩文。璘筆立就。尤工於長短句。

朱曰。陂山帶閣。南湖射冠。作無題詩及香奩雜詩。一時盛傳。以爲淮海才子。善長短句。從王西樓遊。早傳斯技之旨。每填一稿。必求合某宮某調。萬幾聲。其聲出入第幾犯。務俾抗隨圓美。合作而出。故能獨步絕響之後。

田按。南洲詞是富家詩。亦輕俊可喜。

效李長吉體

丁香枝上輕雷響。南塘水碧蒲芽長。狂風滿地吹花飛。小翠開簾燕子歸。

雜詩

心逐行雲一向賒。玉樓愁絕抱琵琶。綠波細雨傷南浦。紅樹春風夢若耶。自把芳心繫柳帶。誰將遠意寄蘋花。昨朝半醉疏簾外。獨立沈吟到日斜。

飲司肇田舍用白樂天韻

年豐樽俎家家會。地僻漁樵處處逢。五畝君今開水竹。一巢吾亦在雲松。野人釀飲畢秋穫。鄰客答歌消夜春。慚愧高賢遠來意。皋比無以慰相從。

金陵清明日偕繡柵弟飲姪膽館用韻

春來夢遶水西田。坐對東風一惘然。吳地風塵淹去馬。楚鄉花木怨啼鵑。三年寒食家山外。此日清尊弟姪前。想見柴扉關細雨。自將榆火試新泉。

湖上

涼風吹羅衣。自唱採菱曲。日暮不見人。秋蘋滿湖綠。

秋詞

葉落空庭知已秋。彩雲夢斷思悠悠。從今莫向雕闌倚。一葉芙蓉一葉愁。

維揚懷古

廣陵城西百尺臺。臺下遊人數往來。煬帝行宮遺事在。至今流水不勝哀。

明詩紀事卷十二

戊籤

唐皋一首

皋字守之歙人正德甲戌第一人及第授修撰賜一品服充朝鮮正使進侍講學士有心菴集
列朝詩集學士老於場屋暮年始登上第爲文下筆立就或求竄易字句伸筆直書不鑿一字人咸服其才惜未究其用也

楊白花

楊白花飄飄落誰家渡江江水闊江岸多泥沙歸來舊時樹不妨舊棲鴉楊花不來楊葉愁江水晝夜隨東流

蔡昂二首

昂字衡仲淮安衛籍嘉定人正德甲戌第三人及第授編修累官禮部侍郎贈尙書有頤貞堂稿
寄頤鷗汀

雲中八月天雨霜北風蕭颯秋衣涼美人才高在散地苦吟歲晚揚清商有時發興成獨往無枝假息聊疏狂丹山之鳳久不作安得攜子鳴朝陽

送劉希尹同年

冥鴻得意日高騫。鷺鳥高飛正刺天。元祐黨人滄海上。貞元朝士曙星前。煙花紫禁同遊少。風月孤舟別夢牽。遙憶政成多暇日。郡齋還紀著書年。

靜志居詩話。希尹諫草兩陳。再筮闕下。其詞知壽州也。故事。京官外謫出都時。以眼紗自蔽。過部門。選人擁其馬不前。希尹擲紗於地曰。吾無愧於官。俾汝輩見吾面目可耳。蔡鶴江遂以詩云。元祐黨人滄海上。貞元朝士曉星前。王耕原遂以詩云。君不見盤中紫脂蟹。曉昔橫行今安在。又不見坐上虎皮褥。當日負嵎思殺人。世間反覆那可數。鄙夫何事用心苦。蓋以刺譏人也。

劉天民六首

天民字希尹。歷城人。正德早成進士。除戶部主事。諫南巡受杖。改吏部。進郎中。諫大禮。又杖闕下。謫知壽州。累遷河南副使。改四川。有函山集十卷。

四庫總目。天民擬宮詞五十首。古別離。宿楚相祠等作。尙可謂怨而不怒者。

董復亭繁露園集。予讀邊。李二公及函山集。庭實若濼上之泉。于鱗若華不注。函山則大明湖。槐柳婆娑。蒲荷蒼蔚。

漁洋詩話。劉希尹及與邊華泉相倡和。古選在華泉之上。五言近體。精深華妙。遠不逮邊矣。

田按。希尹以諫名。亦留心風雅。不盡合轍。漁洋謂古選在華泉之上。亦鄉曲之言耳。

有所思

幽居杳不愜。新情無與語。江草發相思。山花亂愁緒。涼風滿故林。明月下前澗。何處抱琴來。搔首曠延伫。

雜詩

周轍不西馭。王風散真淳。河嶽匪闕靈。世豈無材人。臣主不兩遇。千古流酸辛。賈誼客長沙。公孫據平津。所應非所求。漢皇甯未仁。果哉遵晦子。撫化事沈淪。

閩中歌二首

閩州城東天下稀。閩州城西生事微。松肪艇子櫻皮衣。侵晨翁媪犯潮去。網得魴鱗薄暮歸。城下江流綠似羅。城頭山色翠成窠。美人勸酒朱顏酡。未到錦川卸鞍馬。行人爭唱閩川歌。

晚泊浮山寺

淮水西來春不流。楚帆南下晚初收。巖頭村老寺何古。江面雲平山欲浮。錦石斑花迷遠望。白鷗黃鵠動新愁。上方未畢登臨興。它日重維洞口舟。

用韻答任侍御元朴

雪白沙清秋可憐。美人遙隔紫山煙。傳來秀句多情致。應在花籬酒壺邊。

蔣山卿十二首

山卿字子雲。儀真人。正德甲戌進士。授工部主事。諫南巡。廷杖。謫南京前府都事。歷刑部郎中。出知河南府。改潯州。再改南甯。遷廣西參政。有南冷集十二卷。

藝苑卮言。蔣子雲詩。如白臘糖。看似甘美。不堪咀嚼。

四友齋叢說。顧東橋文譽藉甚。又處都會之地。戶外之繩常滿。喜設客。每燕必用樂。乃教坊樂工也。有小樂工名楊彬者。頗俊雅。先生甚喜之。常詫客曰。蔣南冷詩所謂消得楊郎一曲歌者也。

國雅。蔣參政才豪朗邁。頗好激賞。一時名士多延致之。其詩五言學杜。無奇語。

聖輒集。嘉靖臨御久。簡於視朝。日居四宮奉道。初用邵真人。繼用陶真人。官皆極品。后妃而下。法服以從。蔣子雲宮詞云。君王親著紫衣裳。白玉冠簪八寶光。夜半碧壇星月冷。九天仙樂下鸞鳳。離宮復道接蓬萊。雲繞千峯五色開。香叢無塵珠箔捲。後宮遙望上陵回。小年選入蕊珠宮。紫閣玲瓏十二重。日侍上真修法事。水晶盤捧玉芙蓉。碧殿瑤壇禮上清。桂花甘露浸銀屏。雙雙玉女扶青案。跪啓琅函諷道經。

田按。參政詩格調整齊。微有陳色。錄其清婉者。亦自楚楚。

長門怨

故愛心非故。新人意自新。長門風月夕。別院管絃春。苔侵文履迹。絲縈網戶塵。卻憐宮草細。尙可藉車輪。

王昭君

拭淚新裝束。朝來殿裏辭。何堪辭訣日。卻是見憐時。漢騎臨關少。胡笳出塞遲。琵琶寫哀怨。淒切轉添悲。

烏夜啼

門前楊柳樹。借汝烏夜棲。郎眠夜未半。無奈汝爭啼。

夏山詩爲張用載作

于越多名山。會稽饒禹蹟。探穴懷子長。疏峯思謝客。識迴趣彌遠。興在情自適。夫子金華彥。山中此維宅。危構基層巔。高齋鄰峭壁。石澗屢迴轉。雲林互蒙幕。褰帷挹空翠。開窗抱虛白。神超詣高曠。理悟玩幽寂。一爲簪組累。長與煙霞隔。綠蘿寄遐興。蒼苔迷舊迹。大道有卷舒。至人戒沈溺。功成謝塵鞅。終老臥磐石。

譙國薛考功君采

七友詩錄一

薛子無雙士。千載乃一見。翩翩颯鸞舉。矯矯雲龍變。貞心保沖素。自然匪營鍊。玄言析祕奧。文詞餘采絢。妙契感同懷。乖隔情彌眷。丹梯果可攀。朱門何足戀。

秋夜過君采宅

過訪清秋夜。俱懷楚客悲。芙蓉不可采。江上重相思。霜華早零落。風葉日參差。共爾一杯酒。此情人詎知。

八月十五夜懷京中舊遊

今夕那無月。他鄉獨上樓。兵戈添白髮。幕府滯清秋。對酒傷前事。尋詩數舊遊。呼童把官燭。漏盡不能休。

夏日休園

晚來無一事。假仰任疏頑。門對青山掩。心將流水閒。數杯邀月上。孤艇信風還。卻笑巢居子。虛名落世間。

失鶴

尙憶疎林下。清宵明月光。花陰眠小逕。松影踏長廊。磊落情相似。翻飛意不忘。怪來幽思極。夢落水雲鄉。

送吳子鍾

我愛能詩吳少微。風流醞藉眼中稀。沙明雪樹人遙去。江動雲濤帆亂飛。滿把金尊臨別浦。高張錦瑟送斜暉。蕭蕭爲憶南溪竹。日日開林遲爾歸。

春興

遠水湖邊靜。春風野外多。踏青二三月。芳草意如何。

溪上

山風木葉飛。夜雨松花落。散帙坐高齋。幽心成寂寞。

馬明衡一首

明衡字子莘。莆田人。少卿。思聰子。正德甲戌進士。明史作丁丑誤除太常博士。遷監察御史。以建言廷杖

削籍。

闕該詩話。嘉靖三年。興國太后誕辰。舉行朝賀。慈壽皇太后誕辰。有旨免朝。子莘上言。暫免朝賀。若出皇太后中間必有因事。摠押之懷。往來存沒之感。若出聖意。則母子之情。有隆無已。豈忍輟此盛禮哉。朱侍御澗亦上言。皇太后親挈神噐。以授陛下。母子之情。天日在照。今乃旬月之間。一舉一罷。彼此相較。形迹太分。何此慈母心而隆孝治。疏入。永陵震怒。命梓二人至庭詰問。將置之死。將文定膝行泣救。乃免。子莘與父翠峯稱雙忠。

田按。子莘初春卽事詩云。疏謬自甘明主棄。孤狂甯受世人憐。可以見其志矣。

答黃西壺先生

孤亭高敞紫霞旁。招隱歌成逸興長。靖節早應歸栗里。龐公久不入襄陽。百年海上丹心遠。五月松風白葛涼。徙倚危闌瞻北斗。山中夜夜挹清光。

林大輅一首

大輅字以乘。莆田人。正德甲戌進士。授工部主事。以諫南巡。予杖下詔獄。謫夷陵判官。起故官。出爲江西僉事。以副都御史巡撫湖廣。有愧瘖集十六卷。

嵩濟集。林以乘詩。若萬事看斑鬢。十年遲素書。歧路長風雨。春山有嶽薇。遠漸彭澤宰。深巷掩荆扉。之句。良佳。

東南嶠外詩話。二山之下詔獄也。其妻對黃夫人留邸舍。日夕焚香籲天。爲其夫祈免。鄰人衛尉修風怨。誣以詛呪。並逮入獄。鞠訊時。備極楚毒。不肯承。主者危詞怵黃。黃慷慨對曰。妾夫被繫。妾焚香告天。幾幸皇輿不出。思良獲宥。則誠有之。庸敢有他。妾以兒女子無知。使吾夫重獲罪戾。惟有一死。以謝官家。並謝妾夫。妾方有身分。不任受刑。願溲賜死。主者曰。噤而罷。居五日。始得釋。二山有詩紀之云。那知罹百災。妻妾欲同死。鎖械分天牢。雷霆威如此。顛沛裂肝腸。涕下孰能已。並死誠堪傷。一生差可擬。決絕語通霄。香黍俟神理。是日。夫婦偕出獄。都人士聚觀。稱爲鐵夫人。

田按。二山與馬子莘同鄉同年。其和子莘咏志詩云。佩玉須璜珩。佩草須芝蘭。砥礪砥奇珍。蕭艾隕微寒。二人並以志節著。又有句云。邱壑元貧賤。廟廊自聖明。斯言也。可以怨而不怒矣。

浮蹤

浮蹤廿屏裔。簿領亦閒閒。虎跡村間路。猿聲郭外山。四愁仍欲結。雙鬢漸成斑。長見乘槎者。天風萬里還。

劉儲秀一首

儲秀字士奇。咸甯人。正德甲戌進士。授刑部主事。歷郎中。出爲山西提學副使。歷湖廣按察使。以右副都御史巡撫遼東。擢戶部侍郎。進尙書改兵部。

田按尙書爲部郎時與僚屬薛君采胡學之張孟獨倡和爲詩社都下號西翰林。

酬馬戶部雨中送別

老去江鄉識馬卿。那堪別路雨猶鳴。年華冉冉嗟何待。世事悠悠久未成。江上黃蘆鴻雁影。山前紅槿鷓鴣聲。亦知不是悲秋客。笑問如何太瘦生。

顧瓌三首

瓌字英玉。上元人。正德甲戌進士。除南工部主事。改兵部。歷郎中。謫知許州。遷温州同知。歷山東僉事。進河南副使。有寒松齋集六卷。

靜志居詩話。英玉爲東橋從弟。東橋詩有落魄吾家蘇季子。風流南郡小馮君。蓋謫牧許州時所寄也。東橋闢息園以延賓客。載酒促席諸亭。朋簪滿座。伎樂雜陳。而英玉居隔一牆。臨街小樓曰寒松齋者。坐臥其上。訓童子以自給。所謂名教之外別有風醴者耶。

碧溪

何處濯塵襟。澄溪湛空碧。悠然寄真賞。靈境斷行迹。雨散灌木陰。煙寒孤嶼夕。流淙激鳴絃。峭石礙輕幘。日暮澹忘歸。白鷗共分席。

隱吏亭

卷幔青山入。拋書白日長。苔茵承履穩。竹粉惹衣香。病喜諳禽戲。貧嗔減鶴糧。自堪稱吏隱。不用問行藏。過楊生東歸

簡霄一首

南雁驚鄉思。新寒入客衣。故人憐遠別。把酒送將歸。楊柳暮潮暗。蒹葭夕露微。今宵江上月。何處共清暉。霄字騰芳。新喻人。正德甲戌進士。除石首知縣。歷大理丞。以僉都御史巡撫河南。進南副都御史。提督操江。就遷兵部侍郎。有蓉溪集。

和袁別駕除日

歲事撩人懶出郊。殘棋且聽隔窗敲。新篳柏葉春浮甕。待訪梅花雪滿梢。天上故人懷久別。山中勝事覓新交。明朝又是明年到。獨守殘更未忍拋。

吳鐙一首

鎧、字文濟。陽穀人。正德甲戌進士。授行人。擢監察御史。出爲福建按察副使。歷陝西參政。雲南按察使。以僉都御史巡撫甯夏。

涇州

隴坂秦雲暗。涇原春草萎。河流沙漠外。亭列玉門西。雪嶺傳烽火。天山震鼓鼙。酬恩當此日。戰馬向風嘶。

翟瓚一首

瓚、字廷獻。昌邑人。正德甲戌進士。累官右副都御史。巡撫湖廣。有蟲吟草。

塞上曲

朔風吹合太行雲。千里旌旗盡漢軍。何事雁門先失守。漁陽鼙鼓不堪聞。

彭大治一首

大治、字宜定。莆田人。正德甲戌進士。累官長蘆運使。有定軒集。

長安旅舍

書齋僅容膝。門巷不容車。朝朝掃落葉。庭樹在鄰家。

林炫二首

炫、字貞孚。閩人。尙書庭楫子。正德甲戌進士。歷官通政參議。有榕江集。

古意

輓轡上深井。一轉一愁結。井水有時乾。愁心幾時歇。

自君之出矣

自君之出矣。玉鏡多塵埃。思君如鯉魚。永夜雙眼開。

桑溥 首

溥字伯雨。濮州人。正德甲戌進士。歷官浙江按察使。有宦遊。閒居二集。

登咸陽北原

高原出飛蓋。四望暫徘徊。水入黃河去。山從華嶽來。漢陵埋宿草。秦苑剩遺灰。莫數興亡迹。秋深客思哀。

頤可久一首

可久字與新。無錫人。正德甲戌進士。授行人。諫南巡受杖。降國子學正。遷戶部員外。議大禮。復受杖。尋進郎中。出爲泉州知府。改贛州。擢廣東副使。有在署。在疾。釋禮。溫陵。虔州。珠江。在澗等集。

題繡嶺草堂

司徒焚魚歸故山。山中高結玄都壇。前岡時傳笙鶴度。疊嶽會有龍蛇蟠。繡林娟娟長瑤草。陰洞拂拂飛霞丹。座上春風不可束。振衣飄灑青雲端。

錢憲一首

憲字國章無錫人正德甲戌進士官常山知縣

秦從川邀入吟社

春社臨芳野青林變渚禽題襟思漢上修禊繼山陰花氣薰飛屐泉聲答玉琴追歡興無那刻竹記清吟

陳能一首

能字大用華容人正德甲戌進士歷延平知府終廣西參政

已公菴

山雲濃作雨石瀨淺流花擬約浮邱伯同來咽紫霞

范永鑾一首

永鑾字汝和桂陽人正德甲戌進士除貴溪知縣徵授御史出爲福建副使改陝西歷河南按察使遷四川布政使

題朱氏醒溪亭

峭峽迴青嶂虛亭俯碧流林花飛綺席鷗鳥下春洲曲水流觴入高軒縱鶴遊主人醒道眼清嘯坐忘憂

雷應龍一首

應龍字孟升。蒙化州人。正德甲戌進士。除莆田知縣。徵授御史。

送別陳大剛上舍

仕路一萬里。儒冠三十年。蹇驢明日道。回首亦悽然。

金賁亭一首

賁亭字汝白。臨海人。正德甲戌進士。歷官福建副使。

田按汝白述懷詩云。謀生力拙仍千祿。用世才疏敢擇官。可謂真鑿。

贈西溪居士

野性本愛溪。結屋溪上住。酒醒山月明。溪雲自來去。

陳器一首

器字德器。臨海人。正德甲戌進士。除淮安推官。遷刑部主事。進郎中。有石居漫興稿。

彭城與同年伍汝文周少安別

會多忘是客。別近覺愁人。風雨偏當夜。鶯花又送春。悲歡燈下酒。去住夢中身。魚雁江湖足。來書莫厭頻。

林春澤一首

春澤字德敷。侯官人。正德甲戌進士。授戶部主事。遷員外。謫甯州同知。歷吉安通判。肇慶同知。遷

南刑部郎中出為程番知府有人瑞翁集十二卷

堅瓠集。侯官林德敷。生於成化庚子。至萬歷己卯。一百歲。劉中丞。高御史。為建人瑞坊。德敷謝詩云。翠旗谷口萬松風。喘息猶存一老翁。詔賞鑾。龍黃閣上。尚憐閑。綺白雲中。擎天華衣三山壯。醉日桑榆百歲紅。顛倚末光乘晚照。庚衢朝暮頌華封。又四年卒。子應亭。嘉靖乙未進士。以戶部侍郎侍養。年亦八十六卒。孫如楚。嘉靖乙丑進士。工部侍郎。卒年八十二。閩小紀。侯官林太守春澤。少年與鄭少谷。方棠陵。張翼崙為詩友。其子應亭。則少谷之壻也。有人瑞翁詩行世。東南嶠外詩話。人瑞病起。即事示憲兒。起兒。佾夫。藹夫。二外孫。詩云。賴有兒孫供筆札。碧桃花下寫新詩。不類老年積放之作。

早秋登昌平城樓

城上高樓凌紫清。山城氣候早涼生。居庸南去蟠三晉。天壽西來奠七陵。秋興又窮湖海望。帝鄉獨繫古今情。登樓不道非吾土。何處林端蕭瑟聲。

戴鈞二首

鈞。字時亮。馬平人。正德甲戌進士。授刑部主事。進員外。以諫大禮受杖。有鹿原存稿九卷。

四友齋叢說。馬西玄極重戴時亮。二公皆丁初唐故也。

露書。戴時亮詩。如曲江春色早。直為麗人催。離愁撥不開。結在春江樹。春風亦作憐花伴。恰在花前卻倒吹。皆佳句也。

汪森粵西文載。時亮詩清新俊逸。

田按。廣西志及粵西文載均云。時亮以受杖死。余檢明史。當時以諫大禮受杖死者十七人。無時亮名。又時亮姪希儻跋鹿原集云。丙戌。時亮卒於京邸。考受杖在嘉靖甲申七月。至丙戌己巳。隔二年。則非杖死明矣。時亮詩合節劄亮。粵西詩家。在明中葉。

此爲翹楚。

興安道中遺興

不是天涯子。誰知行路難。高江吞地轉。翠嶂倚雲蟠。斗口牽腸曲。龍塘照膽寒。萬重煙樹外。何處望長安。

明妃怨

自倚顏如玉。誰知畫失真。卻憐胡地老。虛作漢宮人。淚泣龍沙月。魂棲鳳幄塵。翻思兩黃鵠。連翼上林春。

張治道二首

治道字孟獨。一字時濟。長安人。正德甲戌進士。授長垣知縣。遷刑部主事。有太微前後集。

對山集。孟獨每有所作。子輒稱善。若鮑謝復出。沈宋再作。

藝苑卮言。張孟獨詩。如罵陣兵。曠日揜袖。果勢壯往。

嘉靖丙戌六月五日京兆驛觀進貢獅子歌

嘉靖中葉稱至治。海內紛紛多異瑞。天子雖閉玉門關。狡狴猶自遠方至。嗚呼此物胡爲來。鈎爪鉅牙身。崑崙忠順邱墟土。番叛西域之國絕貢獻。月支疏勒稱西極。此物十年達中國。傾都之人盡來觀。我亦走馬入長安。長安市人色無歡。爲道食羊責縣官。一時無羊人遭鞭。羊備猶索打乾錢。高鼻番人眼如拳。錦衣繡袴赤檻前。有時玩弄口生煙。踞地咆哮聲震天。百獸伏匿虎豹瘡。雞犬不復鳴青田。噫嘻先皇好搏

獸豹房虎圈親來鬪。自謂真龍虎敢當。挽衣一近遭虎傷。至今海內傳其事。嗚呼此物安足視。鳳凰絕鳴麒麟不遊。牛馬不蔽野。狡狴達皇州。我來觀罷生繁髮。

青樓曲

長安狹邪緣水濱。青樓羅綺暗生春。碧紗窗外東風起。飄落楊花不著人。

霍韜一首

韜字渭先。南海人。正德甲戌進士。除兵部主事。以議大禮驟貴。擢少詹事。兼侍講學士。進詹事。兼翰林學士。歷禮部侍郎。大禮成。超拜尚書。以事下都察院獄。輸贖還職。以母喪歸。起吏部侍郎。出爲南禮部尚書。加太子少保。贈太子太保。諡文敏。有渭崖文集十五卷。

四庫總目。韜性強執。謬戾不顧是非。議厚典獻爲皇考。則斥司馬光不知忠孝。不當從祀孔廟。議合祀天地。則並誣及周禮。可謂無忌憚者。其他文亦皆爭辨迫急。異乎有德者之言。

贈方棠陵用陶飲酒韻

衡湘古雄邦。風氣猶頗真。民居限山溪。習尚稱古淳。義皇雖世隔。濂溪迹尙新。九疑留舜轍。桃源嗟暴秦。迨今百世下。湮淪同飛塵。君行過湘江。敦古心應勤。精神苟相契。異世情自親。他年石屋歸。爲藏折角巾。候我採藥來。山花我主人。

左國璣二首

國璣字舜齊尉氏人正德丙子舉人有南部集

中麓閒居集左中川國璣詩無副稿身後被衆客改換首尾擴爲彼作

四溟詩話左舜齊曰一句一意意絕而氣貫此絕句之法一句一意不工亦下也兩句一意工亦上也以工爲主勿以句論趙

韓所選唐人絕句後兩句皆一意舜齊之說本於楊仲弘

盛明百家詩盧工部刻左中川集敘稱其豪縱磊落爲文馳騁踔厲才藻逸發殆信然矣

明詩統中川空同內弟得之塚磨爲深

明詩選陳臥子曰左君跌宕亦未成家

田按舜齊與田深甫並稱舜齊馳騁有餘較深甫爲優

芳洲吟

嵩艾徒滿握不如佩蘭芷所期芳洲人引棹在何許烟波浩無際凝望獨延伫日暮思不來涕泣零如雨

九日訪白塔

嚴霜日午氣不煖客到竹扉僧自開已見高梧下黃葉更憐叢菊委青苔甌將埜筍供茶入杵出山蔬送酒來郭外相逢惟老衲劇談常是月中回

田汝棘一首

汝霖字深甫祥符人正德丙子舉人官兵部司務有莘野集

四溟詩話大梁田深甫從李獻吉遊嗜酒耽詩十三科不第嘗擬少陵秋興詩得盛唐氣骨

西亭書院偕孫東蒙宴集

不識王孫館。脩然水竹鄉。林堂秋黯淡。烟澹晚蒼茫。良會留孫綽。追陪愧子方。傳杯散圖史。餘興滿滄浪。

董穀二首

穀字碩甫海鹽人處士澣子正德丙子舉人除安義知縣改漢陽有象龍子四存前後集

攜李詩歸魯里山樵詩新警可誦

塞上曲

賁道紆回馬市平。令嚴邊塞敢誅徵。聖主不乘照夜白。遠臣休貢海東青。洗劍潮河冰滿川。彎弓古北雪封韉。將軍好著燒荒令。莫遣花當易近邊。

吉梁二首

梁字大用丹陽人正德丙子舉人除京山知縣改墊江

田按大用詩有別趣惜不多見

登吸江亭

江畔懸崖開一亭。天垂四面列如屏。窗含千里雪濤白。座擁無數秋山青。有客弔古鬼泣句。何人瘞鶴僧傳銘。酒酣長嘯日西下。松際月來心自醒。

春懷

茅堂生事雨中饒。菊圃分畦種藥苗。花鳥向人成主客。江山容我作漁樵。破除午寂琴三弄。滌蕩春愁酒一瓢。不到西園纔兩日。亂紅棲草綠垂條。

陳文學一首

文學字宗魯。貴州宣慰司人。正德丙子舉人。累官耀州知州。有耀歸存稿。餘生續稿。

黔詩紀略陽明先生謫帥場驛丞。提學庶副使。書請居文明書院。爲諸生講知行合一之學。得其傳者。首推陳宗魯。陽明居夷集中。獨有示宗魯詩。蓋進之也。

上巳日

昨日清明楊柳芳。今朝上巳薺花香。可憐佳節多風雨。孤負臨流泛羽觴。榆火新煙歌老杜。蘭亭舊事憶諸王。洗心未竟童心在。狗俗無勞祓不祥。

明詩紀事卷十三

戊籤

舒芬一首

芬字國裳。進賢人。正德丁丑第一人及第。授修撰。諫南巡授杖。謫福建鹽課司副提舉。嘉靖初起。故官議大禮再杖歸。萬歷中追諡文節。有梓溪內外集十八卷。

田按正德已卯車駕將東巡祀岱宗。歷徐揚抵南京。蘇州復泝江浮漢登太和山。是時宸濠久蓄異謀。待釁而發。結陸完、錢甯爲內應。人情洶洶。懼禍不測。國裳與同館編修崔桐、庶吉士汪應軫、曹嘉、王延陳、馬汝驥、江暉聯名疏諫。有曰：痛哭泣血。不忍爲陛下言者。江右有親王之變。大臣懷馮道之心。以祿位爲故物。以朝署爲市塵。以陛下爲弈棋。以革除年間爲故事。言甚激烈。時陸完以智術倖掌銓部。利帝遠出。得以久其位。又倖宸濠之謀。遂則有非望之福。造爲惡語。以阻抑諫者。謂帝聞直諫。便舉刀爲刎狀。且曰：今撤賴矣。國裳不爲沮。復要同鄉夏考功良勝、萬儀制湖、陳太常九川至寓舍。酌酒訣曰：匹夫不可奪志。吾儕乃爲大臣所奪乎。今日之事。當死諫無二。復聯名疏諫。楊遂菴詩：所謂江四四君子。北闕幾封章也。受杖幾死。嘉靖初復與尙官諫大禮。再杖闕下。顏死不悔。世稱爲忠孝狀元。國裳登第後。其塔省視來京。送歸詩云：杏園回首幾經春。敢卜移家住要津。偶逐風雲上管漢。獨勞車馬驚京塵。夢魂無定憐親遠。骨肉相看賴汝真。歸去朋從如問我。爲言官似秀才貧。可以見其志節矣。

出郭

野外尋幽雨過初。碧山濃淡畫難如。未能莊子舟藏壑。欲買謝公墩結廬。高樹閒雲輕護鶴。小橋新水淺通魚。因緣莫向山僧話。安得禪心片月孤。

倫以訓一首

以訓字彥式。南海人。正德丁丑第二人及第。授編修。歷官國子祭酒。有白山集十卷。

田按。祭酒。諡德文敘之子。文敘。弘治己未會試殿試皆第一。祭酒。兄以諒鄉試第一。祭酒。正德丁丑會試第一。殿試第二。弟以說亦成進士。科名鼎盛。冠絕一時。南海之倫。靈寶之許。世稱爲南倫北許。

江行

柳色青迎路。花光紅到船。何須聽簫鼓。嘯鳥卽繁絃。

崔桐一首

桐字來鳳。海門人。正德丁丑第三人及第。授編修。諫南巡授杖。歷侍讀。累遷國子祭酒。南禮部侍郎。有東洲集二十卷。續集十卷。

折楊柳

出門折楊柳。卻憶贈君時。分明春在手。不是去年枝。

張岳一首

岳字惟喬，惠安人。正德丁丑進士。除行人，諫南巡受杖，謫南國子學正。嘉靖初，復故官，遷右司副。改南兵部員外，歷郎中，出爲廣西提學僉事，改江西，以忤張璁，謫廣東鹽課提舉，遷廉州知府，歷浙江副使，遷參政，改廣東，擢右僉都御史，撫治鄖陽，移撫江西，進右副都御史，總督兩廣軍務，兼巡撫，進兵部侍郎，改刑部，再改兵部，進右都御史，總督湖廣、貴州、四川軍務，降兵部侍郎卒。後敍功，復右都御史，贈太子少保，諡襄惠。有《小山類稿》二十卷。

蘇茂相寶善類編。張襄惠岳撫江右，夏相言築賜學，廣信七邑議各致千金。岳曰：是將鉅金爲榷乎？邑百金足矣。嚴相嵩奉敕，建延恩棹，復減其費曰：是非元老意，況供費如式。實奉明旨，嚴銜之。陽致書謝曰：延恩之制，誠儉然如足下，則爲伯夷之所築。後三阻其內召，多方齟齬之。岳與所知書曰：棹棧寒骨，只欠馬革一張，自分已定。人如之何？又曰：自古刀鋸鼎鑊，皆儒者當之云。

焦歛歐徵錄。嚴氏擅政二十年，制閩不入一錢，沒得完其身名者，僅岳一人耳。

靜志居詩話。襄惠文治武功，所至登績，詩其餘技，然如宛宛西飛日，餘光照我裳，江空流月華，白石光浚亂，理深物有悟，興極感相因，幽篁迷舊蹊，回蹬距飛轍，非熟精文選理者，不能作也。

瑯琊寺

朝遊瑯琊山，暮宿瑯琊寺。寺古山徑荒，寒林積空翠，概念千載人，欹枕不成寐。六一安在哉，智僊亦已矣。

燃燭讀殘碑。剝落不可紀。誰謂金石堅。所託謾復爾。秋風拂庭柯。落葉盈階屺。所以稱達生。靜觀良有以。不見龔中僧。白髮垂兩耳。

張經三首

經、榜姓

字廷彝。侯官人。正德丁丑進士。除嘉興知縣。徵授吏科給事中。歷戶科都給事中。擢太僕

少卿。歷大理卿。以右僉都御史巡撫山東。進兵部侍郎。總督兩廣軍務。以功進右都御史。兵部尚書。以憂去。起三邊總督。尋報罷。起南戶部尚書。就改兵部總督。直隸浙福軍務。改右都御史。兼兵部侍郎。爲趙文華所構。逮至京。論死。降慶初。復官。追諡襄愍。有半洲集七卷。

靜志居詩話。襄愍詩特清婉。無拔劍橫槊氣。

沔池亭上對竹

小亭頗虛敞。石竹三五竿。輕颯颯然至。瀟瀟秋雨寒。相逢若舊侶。對此真忘餐。盤桓坐將晚。新涼襲衣單。我懷耿不寐。秉燭夜已闌。明時有鳳鳥。愛爾青琅玕。

少谷深入武夷九曲。日旰不得食。因抱病崇安。書來以文稿相託。隨放舟南下。抵家之次日而終焉。或者不能無憾於山水之癖。因賦。

臥病崇陽日。貽書構李時。遙傳歸棹晚。每惜到家遲。道誼青霄迥。文章白首期。誰能探造化。灑泣對新詩。

慈恩寺

慈恩開古寺。坐對曲江頭。雁塔寒雲滿。南山爽氣秋。更無題姓字。空復見陵邱。往事誰堪問。橋西水自流。

夏言十八首

言字公謹。貴谿人。正德丁丑進士。授行人。擢兵科給事中。歷吏科都給事中。擢侍讀學士。進少詹事。兼翰林學士。掌院事。歷禮部侍郎。進本部尚書。加太子太保。進少傅。太子太傅。兼武英殿大學士。入參機務。加少師。特進光祿大夫。上柱國。進吏部尚書。華蓋殿大學士。以忤旨再致仕。落職閒住。詩起故宮。議復河套。爲嚴嵩所構。棄市。隆慶初。追諡文愍。有桂洲集十八卷。

四庫總目。言詩文宏整而平易。猶明中葉之舊格。

蘇玦玉堂叢語。貴溪久貴用事。故事閣臣日給酒饌當會食。貴溪與分宜供事二載。貴溪不食。上官供家所攜酒饌甚豐。餂什器皆用金。與分宜日對案。分宜自食大官供。不以一七及也。分宜謂華亭。吾生平爲貴溪所狼籍。不可勝數。而最不堪者二事。其一。太宗伯時。貴溪爲首揆。俱不直。欲置酒延貴溪者數矣。多不許。問許。至前一日而後辭。其所徵集方物。紅羊籠狸。酒熊。棧鹿之類。俱付之烏。有一日。候出直。乃敢啓齒。又次揆。諸城爲從。與則曰。吾以某日赴。自閣出。卽遣公。不過家矣。至日。諸城爲先。憩西朝房以俟。乃貴溪復過家。寢於他廡。所。薄暮始至。就坐。進酒三勺。一湯。取酪。沽唇而已。忽傲然起。長揖命輿。諸城亦不敢。後三人者竟不交一言。

野獲編。嘉靖乙未春正月朔。大雪。上諭大臣曰。今日欲與卿等一見。但蒙天賜。耳。禮部夏言卽進天賜時玉賦以獻。上大悅。以忠愛褒之。言亦能詩。然不甚當行。獨長於新聲。所著有白鷗園詞。委邁俊爽。有辛幼菴劉改之之風。其謀復河套。作瀛

家做詞亦其一也。夏之蘇夫人亦工詩餘。更是作家。

國史唯疑。諷陵有扈從。有居守。有頒賚。有蠲免錢糧。遠如薊遼。總督總兵官。咸於昌平迎駕。列兵擺防。特戒嚴。未易輕舉。本朝惟宣世穆神。四宗一再行之。武廟亦經駐蹕焉。夏言詩百年不覩。朝陵駕。父老歡呼。議漢儀。隆重可知。

列朝詩集。少師賦才敏捷。奏對應制。倚待立辦。喜爲長短句。在南宮。與屬吏虞山楊儀。夢羽倡和。今所傳元相桂翁詞。及鷗園新曲。皆夢羽序而行之。少師得君專政。聲勢烜赫。詩餘小令。草藁未削。已流布都下。互相傳唱。歿後未百年。黯然無聞。在問草堂之世。無有及貴溪名氏者。可一慨也。夢羽記一事云。少師嘗祈夢九鯉仙。得問舟子三字。及罷相再起。泊舟淮上。與夢羽賦詩贈別。取孟浩然詩探韻。拈得問舟子詩云。向夕問舟子。前程沒幾多。灘頭正好泊。淮裏足風波。悵然不樂。辭酒而別。此事亦可入前定錄也。

薛志昂詩話。貴裕遊覽。贈酬之作。不及分宜。而應制詩篇。投頌合雅。不若袁文榮之近於藝也。

田按。貴裕驕蹇。當時語云。不觀費去。不知相大。不見夏言。不知相尊。觀留侯玉堂叢語所紀。其取禍宜矣。五言特具高韻。才本揮霍。長禮部時。與翰苑諸公賦觀蓮歌聯篇。次韻層出不窮。雖未盡合節要。亦豪宕之作也。絕句尤有風致。

夜興

微颯振華樹。疏樞透涼月。虛堂華燭燼。別館清琴發。芳思徒延貯。山川豈吳越。幽夢遶西樓。迢迢度城闕。

羅琴十卷

拂拭朱絲琴。一彈白雪吟。調高嘆寡和。絃絕爲知音。以我邱壑想。契君山水心。相思洞庭闊。悵望匡廬岑。

偏橋道中

祇役越荒服。言歸念何時。迢遙道路遠。奄忽日月移。筋力苦登頓。山川多嶮巇。驅車高嶺巔。騁轡絕澗涯。俛聆衆壑淙。仰睇孤雲馳。去家萬餘里。覩物勞我思。怪禽翔水曲。猛獸噪山基。崖傾瘴雨黑。林深毒霧滋。壯遊經坎壈。憂端亂難治。

送李子中

盛夏理嚴裝。詰旦臨廣路。洛騎方北旋。吳檣會東鶩。清颿動野莽。落日隱關樹。眇眇余停瞻。依依爾還顧。

折楊柳

征人赴交河。楊柳鬢婆娑。馬上各攀折。歲暮無餘柯。岸上居人少。河邊戰骨多。不敢望舊鄉。袞裳淚滂沱。

贈涂夢卜令新昌

春雲冠層城。初陽耀丹闕。衢路羅祖席。車蓋儼成列。束裝及良辰。解纜值嘉月。修塗喜新踐。久誼傷今別。聖朝重明牧。玉書簡英傑。矧茲艱難會。弘濟仗達節。陽城自殿課。催科甘處拙。何武居無名。遺思乃在口。昔賢務寬政。豈弟有成說。新昌古名邑。山水擅句越。子行勵徽猷。慷慨紹前烈。敷辭魏膚宰。撫已矜薄劣。贈劉儀制伯雨擢南京尙寶卿

祇命謝朝闕。抗旌背京里。東曹循舊章。南國遲新軌。設筵芳甸側。停騎清江涘。高臺飛雲霞。緒風蕩蘭芷。飲饒萃時哲。綢繆盡知己。高人負經濟。弱冠振才美。十年守郎局。勞勩存邦禮。睽茲波蕩中。拯溺恃君子。

把別非予心。卽事味成理。指塗波嶺重。稅駕風塵引。卜室鍾山旁。賞花石城裏。舊京神靈地。廟社方毗倚。百司貯才彥。猶足直國紀。符臺本名卿。豈必親玉璽。祇虞江湖上。廊廟憂未已。太息抱情殷。永言愧辭隄。

萃墨亭歌爲徐州洪李主事香作

彭城城邊秋繁舸。黃河漲發波掀簸。隔水遙開水部亭。有亭岌巖山之左。我聞此亭新落成。築臺累石見高情。百年麗藻星辰聚。千秋遺墨煙雲生。憶昔坡翁守茲土。月中之遊果誰伍。張老還攜鐵笛吹。潛公白袵袈裟舞。一時清興真可憐。片石題名今宛然。那知埋沒黃塵下。復得摩挲碧檻前。古人蹤迹今不朽。文章照耀看身後。昭代諸公盡才彥。西涯東白名山斗。登臨嘯咏古今同。人代推遷感慨中。悠悠白日浮雲外。杳杳洪波砥柱東。亭中我是初來客。臨風重灑淋漓墨。芒碭山前木葉飛。滿天鴻雁悲秋色。呂梁白浪高崔嵬。盤渦轉石鳴萬雷。天關撼裂地軸動。吁嗟氣勢何雄哉。北風蕭蕭捲河水。落日吳帆下千里。夏子高歌爲誰起。作亭主人豫章李。

象麓草堂初成和杜

繞院松杉雲氣流。小窗高枕碧江幽。秋山杳杳蹠玄猿。晚水冥冥飛白鷗。伏枕經年須藥裹。閉關長日下簾鉤。得閒且覓邱園樂。汨汨風塵何所求。

晚歸自象山有懷諸友

溪上人家竹樹青。溪頭野客眼偏明。斷雲將雨江城遠。蟻屐穿花徑路平。春洞酒杯勞夢想。夜巖燈火隔書聲。西齋此夕成孤寂。草滿池塘蛙亂鳴。

侍上舟行恭述

曉日明柘袍。鮮雲護華蓋。舟轉碧楊灣。騎繞青林外。

鄱湖道中

落葉走迴風。幽花媚奇石。白雲無定蹤。時看度青壁。

送巾石呂子得告南歸

滄波渺子望。送子意何極。便欲製山中。還山煮白石。

江南曲

江頭楊柳花。風吹渡江水。愛殺雙鴛鴦。只在池塘裏。

江皋曲

江上蘼蕪草。東風吹又生。聞郎早晚回。日日堤上迎。

侍上泛舟金海

萬歲山前一棹迴。御舟遙望近南臺。柳陰不省宮車過。隱隱輕雷水際來。

張家灣阻風

張家灣裏滯行舟。洪河嘴邊河水流。關風伏雨作秋暝。汀蓼渚蘋生野愁。

弋陽道中

篠簜渡頭楊柳低。桃花灘上子規啼。蘭橈蕩入葛溪口。三十二峯春日西。

顏木五首

木字維喬。應山人。正德丁丑進士。除許州知州。改亳州。有燼餘稿四卷。

藝苑卮言。顏惟喬文。如暴顯措大。不構造作。

湖北詩徵傳略。湘潭王山長曰。汝中顏木與信陽同時。作詩最有風骨。而近時操選家不之及。何耶。

田按。顧東橋巡撫湖廣。聘王稚秋。顏維喬。王汝化同修承天大誌。書成。永陵弗用。惟喬詩格調甚高。燼餘稿已不可得。余從李

時暹明詩統獲詩數篇。亟登之。

出塞

結髮事戎行。年年瀚海旁。離旌搖漢日。候騎出胡霜。月滿交河白。沙飛絕塞黃。征衣今已破。惟有劍花光。

從軍行

秋草三邊白。胡霜八月飛。羽書馳上郡。烽火發金微。七謫空尺籍。千層縵鐵衣。左賢生已獲。右地虜應稀。

贈劉漢陽致仕

皋亭黯黯看江柳。煙雨霏霏隱漢槎。世道於人真一夢。東風送客好還家。雲連獨戍悲清角。月帶空城起
曙鴉。誰賦文通舊時恨。甘棠莫剪別來花。

贈陳進士伯業出使關陝

曙色沈沈秋已陰。雁傳丹葉下霜林。更堪別酒悲中淚。還聽寒城雨外砧。賈誼上書才調別。杜陵憂國鬢
毛侵。當年衰颯成何濟。猶自江湖一寸心。

關山月

關月明於晝。征人晚未還。高樓有思婦。一夕損朱顏。

馬汝驥五首

汝驥字仲房。綏德州人。正德丁丑進士。改庶吉士。諫南巡杖闕下。出知澤州。召還爲編修。歷修撰。
司業。南右通政。就遷國子祭酒。擢禮部侍郎。兼侍讀學士。贈尙書。謚文簡。有西玄集八卷。

藝苑卮言。馬仲房詩。如程衛尉屯四營。斥候精嚴。甲仗雄整。而士乏樂用之氣。

四友齋叢說。馬西玄遊西山古詩。清警藻綯。

田按。侍郎詩。鑠金錯綵。頗極璀璨之觀。惟少變化。

城南園亭燕集

闌闌苦紛雜。引轡南郊園。陰林旣攢岫。名花復繞原。矚目脩清曠。矧乃陪高軒。芳絃薦綠水。旨酒傾金尊。攀桂長淹留。折蘭成笑言。情洽禮或簡。時暎道並存。共美邱壑放。何羨霄漢翻。歡樂亮難久。感慨願已煩。流鶯遙自集。春草萋更繁。百年事未測。何用勞心魂。

元日祀孝陵和通參二首

高皇弓劍遠。禮報有祠官。鬱鬱開元祀。松楸改歲寒。神光浮翠壑。瑞氣遶朱闌。對越聞周頌。貽謀萬國安。晨光浮寢殿。松柏路微分。玉豆修元日。金燈結瑞雲。一戎開國大。八葉涖天勤。內使題新句。青藜照紫氛。駕幸西壇。

龍墀鼓角傳。鳳駕出春田。芝蓋晴團日。霜戈曉拂天。壇開仙陌草。幄引御爐煙。潘賦今誰奏。遙聞賜綺筵。答江子謁陵之作。

王氣浮周邑。仙才表漢陵。西山盤玉殿。北斗錯金燈。霜露絳纓謁。風雲劍鳥升。龍髯攀望地。翠木繞寒藤。王謳十三首。

謳字舜夫。白水人。正德丁丑進士。除工部主事。歷刑部員外。出爲山西僉事。有彭衙集九卷。

對山集。舜夫才情之妙。機軸不凡。蓋作者之雋。

燕苑卮言。王舜夫詩。如敗鐵網取珊瑚。用力堅深。得寶自少。

盛明百家詩。王子詩有氣骨。有聲武皇朝。非倖也。

列朝詩集。舜夫有高才而無貴位。故多煩促嘯殺之音。五言隱秀。時可尋味。

田按。舜夫詩集存詩太多。繁蔓不翦。時有俊篇。不愧名家。竹垞嗤爲關中下農。庶乃唐突。

閒居雜興

日月不照愁。天地不哀死。豈待造化乖。杳冥存至理。昔聞商山翁。採芝餐石髓。末世重浮華。泯沒如蟲蟻。夜發

別葉悲修幹。飄蓬憶本叢。莫言曾固蒂。俱是逐秋風。迢遞天涯遠。倉皇吾道同。愁心懸更切。白髮欲成翁。撥悶柬張用。載員外

嗜酒真吾性。爲官不近名。薄祿遊帝里。漫刺向公卿。去已慚亭伯。狂甯學禰衡。相知憐汝在。江海共含情。端陽後一日南湖亭子讌集

歲月虛爲客。乾坤限此亭。曲池一水綠。細雨亂山青。滌澗魚能樂。招呼鶴最靈。酒杯天費汝。入手莫教停。山行

絕壁纔容步。孤岩穩著花。春風不世態。此地亦年華。黃鳥學兒語。白猿作道家。平生愛泉石。隨意宿雲霞。不寐

旅次嫌多事。羈危轉獨身。馬牛須任汝。形影自相親。久別樊川勝。如何太白春。心傷渾欲碎。空老未歸人。

曉雨登舟

泛舟此河曲。曉雨生微涼。瀟洒鷗波淨。夷猶洲渚長。雲窩翠壁溼。日沒青林光。多興未云已。遙從覓酒漿。

晚坐

浮雲起層漢。迴野生微陰。獨坐廣庭暮。愛茲嘉樹林。青山入復暝。黃鳥寂無音。搔首悲歌發。悠悠傷我心。

秋日山行

長川滌東鰲。白日忽西歸。秋色浩無際。寒天孤鳥飛。風霜羈旅切。關塞故人稀。九月黃花節。淹留感授衣。

望泰陵

寡昧慚樗散。休明憶聖朝。風雲猶鬱鬱。松柏竟蕭蕭。弓劍仙原闕。謳歌帝德昭。放勳如可作。直欲贊神堯。

冬日訪吳園贈主人

村徑還蕪滅。林居亦晝閒。檻雲輕到竹。門雪暮連山。雙舞隨玄鶴。孤飛放白鷗。心期真出世。幽事自相關。

見碧堂卽事

見碧堂中春晝靜。主人好事卻攜壺。獨留古木爲鄰並。一任幽禽相叫呼。泉石自耽遊鹿豕。衣冠不識有公孤。對君堪笑青雲客。三十爲郎一腐儒。

識野別

官柳石橋風日幽。祖筵春水席邊流。浮生行樂有誰厭。爲別多情難自由。黃鳥銜花逐燕子。青山闌筆對林邱。芳年勝集那能數。往事關心老去愁。

汪應軫二首

應軫字子宿。紹興山陰人。正德丁丑進士。改庶吉士。諫南巡。廷杖。出知泗州。嘉靖初。遷戶科給事中。改南。尋出爲江西僉事。引疾歸。起故官。提學江西。有青湖文集十四卷。

田按。青湖南巡天禮。皆以直諫著。議天禮時。以戶科改南。故不在受杖之列。詩非所留意。然風送飛花入硯香。池塘新句夢生涼。村家歲晚無新曆。山鳥一聲知是春。驛路送人千里月。釣臺遲我一帆風。水榭煙波雙鳥白。雲門花竹六橋深。亦佳句也。

江寺同馬子莘遊

濱江十里文通宅。江上寒潮日夜哀。彩筆已隨春蝶化。遺文空對野花開。六朝賦手誰能敵。古寺遊蹤我暫來。莫怪風流憐宋玉。夕陽千古一荒臺。

過樂遂亭聞竹聲摘蕉葉書一絕送世明兄

臨階倚修竹。風從竹梢起。秋雲段段飛。美人隔湘水。

王鳳靈二首

鳳靈字應時莆田人正德丁丑進士授刑部主事歷郎中出爲襄陽知府歷官廣西參政有筆峯存稿

送鄭少谷歸鰲峯次韻

貧病今如此遠遊意若何冥鴻歸路杳芳草故園多郎署慚何補鰲峯好放歌無能共把臂長嘯入煙蘿過分水關

無情如此水各傍故山流何事山中客年年作遠遊

鄭洛書一首

洛書字啓範莆田人正德丁丑進士授上海知縣擢河南道御史出爲南畿提學以憂歸起故官以誣免有思齋文集

木蘭晚泛

關谿歸路晚款乃棹歌喧拳鷺依沙聚嘯鴉繞樹翻山容全黯淡野色漸黃昏仰見林端月纖纖露一痕

楊士雲七首

士雲字從龍大理太和人正德丁丑進士改庶吉士授工科給事中改吏科有弘山集

滇南詩略給事以病辭歸環堵蕭然手不釋卷與楊升菴張禹山友善升菴贈詩云螭頭早挂進賢冠跡遠東墀玉筍班倦意

已還飛鳥外。歸心元在急流間。仙郎高議留青瑱。學士新詩滿碧山。十九峯前同醉處。夢中瓊樹幾回攀。
田按。從龍名在楊門六學士之列。詩品可與張禹山方駕。非徒性耽吟詠。兼博涉典籍。集中讀尚書石經等詩。非學人不能者也。

讀東坡書東皋子傳後

不飲喜客飲。家常多釀酒。無病憂人病。蓄藥欲來取。藥病輕吾體。客飲適吾口。得意專自爲。此樂人知否。
待韶醞三升。東皋給一斗。東坡月釀醞。復賴五太守。氣味類相似。千載可爲友。

憂旱

農家望有年。得雪衆方喜。天胡愆雨期。曠旱復茲始。蘊隆蒸六合。赤地幾千里。安得呼天公。雷車卽奔駛。
亦欲訟風伯。金蛇掣無止。翻騰四海波。倒瀉銀河水。慰茲大地渴。一灑山川燬。中有感通機。庶徵乃其理。
願修雲漢誠。斯異或可弭。

八日

此日古宜穀。連陰喜復晴。燕風溫旖旎。山雪畫分明。脆憶紅綾餅。香聞七菜羹。甕頭春酒滿。對客勸飛觥。
升庵先生至榆

臥病青山舊。龍鍾白髮新。相逢一笑後。又別幾回春。檐燕去來數。江花開落頻。冷然仙馭至。喜得挹清塵。

人曰

此日是靈辰。焚香拂座塵。羲皇經一卷。七十六閒人。寒勒花遲發。春催柳未勻。回風飄急雪。山色玉嶙峋。

次韻酬升庵太史

曾伏青蒲地上冠。久虛華蓋殿東班。直從董賈敷陳後。未數王楊伯仲間。徵召幾時天北極。高名千古溥南山。九龍池畔相思夢。寸碧遙岑幾度攀。

田按。博南山人。升菴別號。

石經

洛陽四十六碑亭。太學門前看石經。遷邾半殘千古迹。人關誰續六書形。雨餘礎柱苔文綠。雲裏浮圖鳥篆青。獨有開成遺刻在。至今猶自說熹平。

許相卿六首

相卿字伯台。海甯人。正德丁丑進士。官兵科給事中。有雲村集十四卷。

四庫總目。相卿詩。五言有大歷之調。七言出入於陳師道。陳與議間。

樵李詩繫。相卿號九杞。乞歸後。以鹽菑紫雲邨山水佳勝。移居村南。蒼巒山。別石引泉。疏畦藝茗。時跨黃犢。短蓑高笠。二鶴自隨。往來山谷間。嘗大雪。上雲岫絕頂賦詩。人望之以爲神仙。自號雲村老人。又於永安湖買山。置柱曲圍。雲濤莊。後人因名其山曰九杞。始爲夏忠愍所。忠愍召赴道經嘉禾。以書致相卿。與決進止。於時藩臬郡縣。舫舟祇候。道相望也。相卿葛巾荔帶。

刺一小劔詣夏。夏問曰：僕此出何如？相卿不答。第言：可惜李長源，卻受觀察判官。夏正襟起謝曰：便當疏辭，以奉明教。須臾，過鼓週帆，顧諸祇候一時散去。夏憤然，遂不果辭。卒及於難。相卿詩多清冷，有丰骨。

宿石門山房

塵土三年夢，雲林勝日遊。小招聊擬賦，多難獨憑樓。月色千山午，江光滿意秋。心期應共汝，投老白蘋洲。

南樓

幽興屬遐眺，凭高散餘醺。徘徊出海日，邂逅還山雲。度鳥江天永，斷峯吳越分。超然俯清曠，何處有塵氛。

除夕感懷

洒冷香銷夢不成，逼人殊覺歲崢嶸。老如舊歷渾無用，醉戀殘燈亦暫明。雪霰已應隨臘盡，梅花甯復與

春爭。向來筋力虛名盡，白髮無愁也自生。

靜志居詩話：雲村詩取適意，集出其手自刪。自題絕句云：雲村病老語多噉。造次詩成雜宋腔。還湖開元論風格，拾遺壇上樹旌幟。由今誦之，諸體亦自清潤，不全難以宋腔也。若老如舊歷渾無用，病戀殘燈亦自明，此則宋腔之佳者。

獨往

興到海濱成獨往，千林風日淨娟娟。寒山病骨晚爭瘦，白鷺滄波秋可憐。天地閒愁塵夢醒，煙霞勝事草堂偏。斜陽深徑漁樵盡，弄影蕭蕭石上泉。

題扇畫

遠路歸來已白頭。豐厓猶似舊時秋。長藤短褐行吟處。不道山翁是故侯。

月林僧舍

月午天霜破衲寒。梵音蕭颯度林端。經殘香燼秋寥泐。時有風枝語夜闌。

朱豹一首

豹字子文。上海人。正德丁丑進士。除奉化知縣。改餘姚。擢監察御史。出爲福州知府。有朱福州集六卷。

過靜安寺

空山無事易黃昏。僧抱孤雲臥竹根。寂寂迴廊春欲暮。落花滿地不開門。

郭波一首

波字澄卿。閩人。正德丁丑進士。官戶部主事。有巖存稿。

夜坐

蟲鳴四壁靜。露溼山月冷。雲外鶴不歸。孤松散清影。

戴賢一首

賢字時重。鄴人。正德丁丑進士。除刑部主事。歷員外。出爲四川僉事。以事奪職。起河南僉事。歷江西參議。遷副使。改雲南。廣西。進江西參政。山西按察使。歷廣西。四川。江西布政使。以副都御史巡撫四川。有中丞遺集八卷。

張時徹芝園定集。中丞負慷慨之才。不屑屑爭雄錯槩。然長篇短咏。流布人間。識者寶之。
甬上香齋集。中丞詩。老健蒼涼。是一作手。

六月既望。同時化弟謁甬川太宰。還舟中述懷。

放舸城南觸熱新。濯纓欲傍滄江濱。溼雲挾雨時過水。時鷺將雛翻趁人。偶向竹洲綠窈窕。徑須松壑上嶙峋。祇今多病兼樗散。浩蕩輕鷗覺汝親。

胡侍一首

侍字承之。咸甯人。正德丁丑進士。除刑部主事。歷員外。遷鴻臚少卿。坐議大禮。謫潞州判官。以事逮至京。斥爲民。

藝苑卮言。胡承之詩。如病措大習白。瓊公術操舞如度。擊刺未堪。

登漢武帝玄都壇

曲磴回谿數百重。漢皇行幸有遺蹤。海西不復來三鳥。巖畔虛傳駐六龍。碧露暗滋金洞草。紫雲常護石

壇松使應別著登山履策杖高尋玉檢封

陳文沛一首

文沛字維德長樂人正德丁丑進士除工部主事歷郎中出知撫州府改蘇州歷霸州兵備副使進陝西行太僕卿有世槐堂稿

驛馬關

磴道迴岡麓烟村擁野城逢碑欲弔古剔蘚始知名關隘三秦轍江山萬里情孤燈愁絕處風雨送秋聲

汪佃一首

佃字友之弋陽人正德丁丑進士改庶吉士授編修遷侍讀以講書不稱旨謫甯國通判起禮部郎中遷太常少卿有東麓稿十卷

李默擊王棣稿大江以南兄弟並居詞苑著聲聞者有汪氏長曰石潭次曰聞齋其季東麓文章師承得之先輩不以時好輒廢繩墨

田按史稱張瓌初拜學士諸翰林恥之不與並列瓌深恨及侍讀汪佃講洪範不稱旨帝令補外瓌乃請自講讀以下量才外補改官及罷黜者二十二人諸庶吉士皆除部屬及知縣由是翰苑為空余檢嘉靖實錄與史合實錄云帝以侍讀汪佃講書遲鈍外調改甯國通判查夏重西江志曾資谷江西詩徵云佃以編修議禮不合出為松江同知非其實也詩綜亦不詳佃仕履因特著之

水陽舟中

一簇炊烟暝色昏。短籬疏竹數家村。逢年田舍渾無事。風雨蕭蕭對掩門。

林希元一首

希元字思顯。晉江人。正德丁丑進士。除南大理評事。謫泗州州判。歷大理寺丞。謫欽州知州。累遷雲南僉事。有次崖集十八卷。

四庫總目。希元之學。宗其鄉人蔡清。故於明代諸儒。惟推薛瑄胡居仁。與王守仁同時。而排其傳習錄最力。雖與守仁門人李本同年相善。而與本之書。亦不少假借其師。其祭守仁文。但推其功業而已。無一字及其學問也。至其氣質剛急。銳於用事。則類其鄉人陳真放。故其爲南京大理評事。則忤江彬。忤御史譚會。忤大理寺編陳琳。坐謫泗州州判。及爲大理寺丞。又請剿遼東叛兵。坐謫欽州知州。官廣東時。值安南莫登庸篡國。力請討之。疏凡六上。竟坐是中計典歸。歸後又以爭郡邑。何病。幾中危法。其負氣喜任事。蓋可想見。其由泗州再入大理也。蓋方獻夫。董道。薦之。故與二人頗相契。集中與周石崖書。亦自稱氣味與兀崖相似。又自稱大禮安南之議。所見與兀崖同。兀崖者。籍號也。然在泗州時。張崑。桂夢。欲引之同議。大禮終謝不行。則諸人固不足爲希元累矣。集中有與汪可亭書曰。今海內推大家者二人。曰李空同。何大復。二子雖詞鋒意。割陳去新。力挽積風。以還之古。似爲一時文人也。然考其所得。典謨已平。盤詰已平。余皆未能知也。云云。則非惟學問闕姚江。即文章亦闕北地。信陽。故其詩文皆惟意所如。務盡所欲言。乃止。往往俚語與雅詞相參。儻句與散體間用。蓋其素志。原不欲以是見長云。

雨中懷林汝桓同年

春闌花已落。況復雨淋漓。寒到惟勸酒。愁來或點棋。故人千里外。強項一官卑。欲寄相思信。何緣到海涯。

李士允一首

士允字子中，祥符人。正德丁丑進士，歷官陝西參政，兼苑馬寺卿。有《山藏集》。

藝苑后言：李子中詩如刁家奴，揮赫車馬，施散金帛，原非己物。

舟次吉水

沙迴連雲氣，江清蕩水文。鷗行一鏡轉，猿嘯四山聞。閩楚風煙接，秋冬氣候分。愁心與秋葉，天外共紛紛。

李鶴鳴三首

鶴鳴字九臬，義烏人。正德丁丑進士，歷官大理寺丞。

田按：九臬詩頗給麗，亦能作清俊語。

閨情

柳條垂綠東風柔，斜日杏花紅欲流。畫樓簾捲珊瑚鉤，美人翠斂纖蛾愁。山長路杳音信遲，空憐紫燕雙銜泥。辛苦營巢傍綺閣，墮淚不必烏夜啼。

山居

石壁日初上，春山風乍晴。偶隨黃犢出，閒傍綠溪行。幽鳥澹無語，落花如有聲。迴看飛瀑下，樹杪白雲生。

雜興

朱陽媚初夏。庭宇生閒情。餘寒戀春服。浮陰妨晝晴。雲頰山翠重。雨過林香清。興至發高詠。澹然心自平。

柯維熊一首

維熊字奇徵。莆田人。正德丁丑進士。除行人。遷工部郎中。有石莊集。

撫松亭

自與世相違。甯論生計微。沙田秋後熟。漁艇夜深歸。種樹曾鈔譜。灌園甘息機。本無食肉相。非戀故山薇。

王漸達一首

漸達字用儀。番禺人。正德丁丑進士。授刑部主事。家居十年。以薦起官。言事不報。復乞歸。隆慶初。追贈光祿少卿。有青羅集二十卷。

梅花寺

梅花舊名利。此日又相過。地僻翠蘿合。山深寒雨多。古碑還半蝕。丹竈已傳訛。惟有菖蒲草。春來綠滿阿。

曹嘉一首

嘉字仲禮。扶溝人。正德丁丑進士。選庶吉士。改御史。以言事謫大名推官。尋復故官。再以言事下獄。謫禹城知縣。降茂州判官。尋復職。出爲山西提學副使。終江西布政使。有漫山集。

藝苑卮言。曹仲禮詩如公孫大嫂。弟子舞劍。頗見淋漓。見其師者。不覺怡然。

聞雁

連翩升紫塞。嘹唳過秋城。此夜高樓笛。懷人幾度橫。

江暉一首

暉字景孚。仁和人。正德丁丑進士。改庶吉士。諫南巡杖闕下。出爲廣德知州。召授編修。進修撰。遷河南按察僉事。有賣爰子集。

明詩選陳臥子曰。景字好怪。合者亦六朝遺。

列朝詩集景字爲文。鶴玄猥祕。雜以古文奇字。聲牙詰曲。令讀者謬恨眩覓。至莫能句。隱口汗顏而罷。徐而繹之。卑之無高論也。與汴人曹嘉。東楚王廷陳。秦馬汝驛齊名。一時有曹王。江馬之稱。集名賣爰子。取山語。經賣爰山有鳥。食者不妬之。義以自寓也。王稚欽有詩嘲之云。江生突兀揚文鋒。千奇萬怪誰與同。博物豈惟精爾雅。識字何止過楊雄。求深索隱苦不置。一言忘使流俗同。令弟大篆逼鍾鼎。絕響恥作斯亂等。生也爲文遺弟書。一出皆稱二難也。縱有楚史不可讀。函堂觀者徒張目。少年往往致談評。生也不言但捫腹。好醜從來安可期。豪傑有時翻自疑。請君實此無易輟。聖人復起當相知。

謝政志喜

雲戶焚魚珮。煙汀放鷁舟。寂寥歌白石。浩蕩想丹邱。挂席牽風穩。垂竿颺月流。故園松菊在。聊得慰窮愁。

葉桂章一首

桂章字□□。名山人。正德丁丑進士。改庶吉士。授編修。遷侍講。

宿勝上人禪堂

開士禪堂寂重來。臥白雲地偏花竹淨。身與鹿麋羣。峯影窗前暗。鐘聲定後聞。十年南劍路。長愧北山文。

彭彝一首

彝字世望。安福人。正德己卯舉人。除衡山知縣。遷知靖州。

懷念菴太史

每爲思君坐晚霞。那知人境卽天涯。可堪山閣連旬雨。又是春風一晌花。何處清江橫浦樹。誰家明月映溪沙。竹巖花谷無窮意。長望公來點物華。

徐哲一首

哲字成夫。南海人。正德己卯舉人。除新城知縣。有半城集。

清明

驛路春將暮。江流夜不停。孤舟隨去住。一雨過清明。野墓芊芊草。荒園樹樹鶯。臨風閒縱目。鄉國倍關情。

方邦望二首

邦望字表民。閩人。正德己卯舉人。官惠州推官。有平洲稿。

送戴廣文

聞鷲懷故林。騎馬出江潯。共惜先生去。誰知隱者心。春風吹祖席。山月照離襟。他日思安道。悠悠剡水深。
送何刺史之南中

揮袂別親知。王程宿有期。幾年遊嶺海。萬里向滇池。樹擁彤襜轉。花明墨綬垂。遙思政成暇。爲訪碧雞祠。
張鉉一首

鉉、字叔治。鄞人。正德己卯舉人。有鳳山稿。

七夕詞

憶昔明皇清夜遊。曾誇比翼笑牽牛。長生殿上金蓮燭。不照驪山草樹秋。

明詩紀事卷十四

戊籤

陸鉞十首

鉞字舉之。鄞人。正德辛巳第二人及第。授編修。出爲湖廣僉事。歷江西參議。遷山東提學副使。有少石集十三卷。

田按。少石詩多鬱而未暢。錄其音節爽亮者。亦是翩翩雅奏。

秋溪

搖落楓林候。溪光淨可憐。蒹葭明遠浦。鷗鷺下平田。暮艇滄浪曲。晴窗秋水篇。嗟余形役者。訪戴定何年。

開元寺

寶梵開珠藏。龍池但劫灰。何年歸帝子。此地復樓臺。日月金輪轉。笙簫玉宇哀。山靈莫惆悵。拄杖我重來。

學臺秋集

嘉會啓清節。賓筵禮上英。鮮飆洒層宇。流景耀邃甍。候更令始栗。天高氣乃清。時菊布華彩。秋蘭綴玉莖。

敞席爛綺繡。列俎差瑤瓊。廣樂沸中除。靈謐震前楹。颯颯奏周雅。呦呦歌鹿鳴。颯沓珠履集。繽紛星弁迎。升階等魚貫。班坐似雁征。東壁萃文宿。西甌觀德型。肅虔若儀軌。溫穆款道情。旅酬旣卒爵。終燕鮮愆程。嗟余信寡味。接歲忝稱名。倡導謝師訓。切磋惟友生。蓬麻賴扶植。芝蘭藉德馨。屬茲選舉備。欽皇文教成。珪璋薦清廟。麟鳳羅廣庭。械樸有遺響。善莠廁頌聲。哲后敦化理。君子茂休貞。所期勤志業。宏樹翊昌明。

武當宮

仙宮積翠凌空起。飛磴盤梯上界寬。五嶽雲霞朝絳節。三天星斗傍朱闌。琅函日靜羅煙繞。石竇春生玉髓寒。塵土十年思羽翼。洞霄何日乞祠官。

贈白厓子

白厓溪流石齒齒。羅洞霧合花冥冥。君愛紫泉築堂靜。我攜素琴過月明。東遊天姥涉滄海。南望鍾山賦玉京。歲晚冰霜重相許。碧梧紫竹談心盟。

重過芳洲和王定齋

平湖淡蕩淨煙霧。誰人卜築林塘幽。麗日濃花已千樹。截波錦鱗須萬頭。不辭深杯恣佳賞。已覺爽氣凌高秋。鄭谷秦樓幾塵土。曠懷寂寞君爲酬。

郊行

杖藜出郭謝塵事。野曠物態怡心神。鷗鷺晴沙意自得。菰蒲小閣花鮮新。江湖滿眼不一醉。歲月如流能幾春。碧草萋萋上煙壠。越王臺暮山鬼鄰。

滕王閣晚眺

樓上煙霞回浦溆。樓中簫鼓暮銜杯。江光半隱漁燈亂。木葉驟鳴山雨來。萬井兵戈餘野哭。千年帶礪依荒臺。古今帝子俱消歇。王粲禰衡空爾哀。

廬山二絕

可惜南唐寺。誰招後主魂。小樓吹玉笛。遺響不堪聞。
參差萬樓閣。恍忽見諸天。僧住香爐頂。半空燒紫煙。

張治十首

治字文邦。茶陵州人。正德辛巳進士。改庶吉士。授編修。以修明倫大典成擢贊善。進諭德。以翰林學士官諭安南。未行遽止。擢南吏部侍郎。改北。進南吏部尙書。召拜禮部尙書。兼文淵閣大學士。加太子太保。諡文隱。隆慶初。改諡文毅。有龍湖文集十五卷。

帶禮鐙墟堂稿。文毅奉制及應酬諸作。脫腐遠俗。歸古典則。

藝苑卮言。張文邦詩如藥鑄鼎。傑翻驚人。終乏古雅。

國雅。張文毅才雄思贍。抽緒錯綵。岌然衡岳之秀。

靜志居詩話。張文肅夜過洞庭詩云。曉發吳閶門。夕渡廣陵池。日暮江帆遲。洞庭三百里。微風淡無波。明月照天水。隱隱見君山。鐘聲翠微裏。是吳地也。而混於楚矣。酈善長北人。未析南條。諸水注水經。二湖俱以洞庭爲目。誤也。文肅家茶陵。與洞庭湖密邇。豈得以君山屬吳耶。

沅湘耆舊集。龍湖先生詩體甚正大。詞旨憐惻。以之嗣響西涯。殆無愧也。

田按。文毅常議大禮時。附和張桂。與編修孫承恩。廖道南。王用賓俱與纂修明倫大典之列。未滿考。擢贊善。龍湖集中頌羅峯閣老詩。備極推崇。厥後廷推閣臣。世宗持之十日。以南吏部尙書召入。殆猶憶議大禮功耶。五七言律體特饒清音。詩綜專錄七絕。殆未見龍湖全集歟。

白溝河

白溝河水浩浩。昔時戰爭場。今成車馬道。向來棄骨不可收。千古殘魂哭秋草。白日照地寒雲黃。一溪落葉無人埽。世事悠悠甯足論。過客空悲天地老。

贈史給事出判通州

燕京木落秋初深。高雲白雁寒蕭森。玉壺載酒送君去。千里青山愁多陰。我欲贈君綠綺琴。一彈一曲傷人心。海門月出江煙薄。惟見滄波澄碧林。

酬友人

花下疏鐘靜。天涯獨客愁。功名揚子關。詞賦仲宣樓。杜若滄洲雨。春潮野渡舟。有懷吾共汝。雙鬢愧清秋。

城上

縱口南樓晚。蒼蒼落日昏。城回山不斷。沙白水無痕。疏雨誰家樹。濃花何處村。漁舟雙盞漿。杳杳下江門。

江宿

移舟下極浦。倚岸卽斜曛。淡淡月臨水。微微星出雲。流螢散高影。暗水聚寒蚊。山雨中宵至。淒然不可聞。

湘中憶鄭栗齋憲僉

細雨春帆溼。孤舟江色開。岸花當水出。沙鳥傍人來。綠草湘妃廟。青山帝子臺。湖南霜氣重。遙憶子真才。

觀湘閣與彭大尹宴別

湘江東下應千折。一水中分十里洲。岸坼孤臺浮地出。窗開雙練挂天流。芳蘿春暖生香細。殘櫓風輕落韻柔。萬里未辭孤棹往。一尊聊爲故人留。

聽雪

草閣冬深睡初足。忽聞寒雪下逡巡。空檐簌簌仍兼雨。虛枕蕭蕭欲近人。鴻雁天南無一字。兵戈塞北有驚塵。生涯落魄年將暮。羞見梅花幾樹新。

再寄雙石

湖上寒風吹月明。孤舟官燭照灘聲。美人遠隔青山暮。此夜相思白髮生。客淚暗隨江雨溼。愁心遙度塞雲平。多情不及中流水。日夕悠悠向北傾。

懷真齋江司業因羅子鍾寄去

憶昔追隨供奉地。江淹新賦動長安。雖羣卻恨相思苦。直道空嗟行路難。楚日斷雲孤雁遠。白門紅葉萬峯殘。愁心欲逐題封去。江水茫茫秋雨寒。

楊麒一首

麒字仁甫。上饒人。正德辛巳進士。除長樂知縣。改潯縣。徵授吏部主事。出爲福建按察僉事。遷南通政參議。歷應天府丞。南光祿寺卿。改北。擢工部侍郎。進南工部尙書。有司空集二卷。

題隱居草堂

花中池館柳邊橋。卜築溪村幽思饒。對酒放歌消白日。不知城市有塵囂。

敖英十二首

英字子發。清江人。正德辛巳進士。除南工部主事。歷禮部郎中。出爲陝西提學副使。改河南。進四川布政使。有心遠堂稿。

四江志。子發在當時。盛有詩名。人稱之爲敖清江。

田按。子發緣雪亭雜言云。近見一種文家。險澁其語。以爲奇。僻怪其字。以爲古。隱晦其意。以爲深。突兀其體。以爲高。蓋以盤庚爲古文之鼻祖。而淺視史記漢書。以樊紹述爲古文之宗子。而下視韓柳歐蘇。鯨吞鯨拚。牛鬼蛇神。瑤翻碧豔。鬼眼傾耳。揮霍自恣。居之不疑。噫。弊也甚矣。蓋亦不隨時好爲步趨者。詩亦有標致。

憶湖南舊遊

孤帆忽西邁。超忽憑虛遊。江風出斷岸。細雨菰蒲秋。美人隔湘浦。遺我珊瑚鉤。安得雲間鴻。一寄心之愁。

長干行

鴨嘴岸低春水滿。水邊膩綠蒲芽短。誰家兒女採蒲芽。髮溜寶釵金鳳斜。娉婷自信心如鐵。坐閱江流千萬折。歸來結鏡思獨苦。露滴風檐月亭午。

下第南歸

黃金臺下客。去去復奚疑。僮僕憎行李。居人勸酒卮。九江春草綠。孤棹北風遲。卻笑無鹽女。年年學畫眉。

野望

望中齊魯曠。一雨洗春柔。山影凌波亂。花光約樹浮。羣妖仍瀕洞。孤棹正夷猶。南斗江湖外。何人倚劍愁。

雨花臺

雨花臺上無花雨。此日登臨踏古苔。清楚不聞重說法。亂山依舊對銜杯。六朝蔓草天邊去。萬里江流席

下來回首長干笳鼓動。城南燈火映樓臺。

迎雲棧

朝朝木末行。路險色惆悵。絕壁何蒼蒼。援聲在天上。

秋興早邊華泉

池頭一雨送新涼。小坐茆亭月近床。和得竹枝三百首。西風無雁寄瀟湘。

出郊

春事不知還幾許。城南今日探芳菲。鳳凰臺前好春酒。醉到日西騎馬歸。

宿烏鼠山野館

西風無伴獨登樓。烏鼠山空鴻雁秋。家在五湖煙水外。何人燈下說邊頭。

毛女圖

毛女翩翩骨已青。往來西華弄寒星。無端回首人間世。風雨年年怨茂陵。

歸田志喜

江心桃竹可爲杖。拄杖還山不受呼。要與林逋同放鶴。六橋春水隔西湖。

昭明太子蓮池

年年池上蓮花紅。啾啾怨鬼噓青楓。臺城同泰久蕪沒。殘僧猶打南禪鐘。

張袞三首

袞字補之。江陰人。正德辛巳進士。選庶吉士。授監察御史。復改編修。歷侍讀。諭德。進侍讀學士。遷太常卿。左遷南太常少卿。就遷光祿卿。有水南集十一卷。

田按。水南絕句極有風致。

雪後放舟淮河

風帆遠下疾於鳥。萬里長淮帶雪流。岸上好山如待客。可無人與畫江洲。

和顧東橋新營息園

每多幽興在濠梁。曲曲京江見野塘。風磴雲門時隱見。有誰題作浣花莊。

閒情示邢道士

秋蘆江上白紛紛。鶴渚鳧汀杳莫分。寄語水雲邢道士。卻從何處謁仙君。

張鳳獅一首

鳳獅字岐山。甯州人。正德辛巳進士。官南監察御史。

書懷十首錄一

雲和開繡戶，錦鸞住誰家。凝思久無語，數徧砌前花。

田按：岐山自注云：正德十五年，予備數甲榜，時甯藩不軌，上南征，駐蹕南京，予輩倏廷對於京師，一年有餘，同列拮据句感，時花灑淚，恨別鳥驚心爲韻，因賦短章，考此年爲庚辰，越歲廷對爲辛巳，凡州縣志多稱此榜進士爲庚辰者，皆未詳此時事也。

王同祖二首

同祖字繩武，崑山人。正德辛巳進士，選庶吉士，授編修，以事罷歸，起原官，兼春坊校書，進南國子司業，有太史詩集六卷。

弇州山人續稿：司業詩，采建安、六季之才，而歸開元、大歷之格。

梅花草堂集：繩武宏博，爲文章，操紙筆，立書，融暢爾雅，居然合作，在朝多所建白，識者謂有出入將相之略，弱冠登籍，垂三十年，立朝者僅五閱歲，卒以譴死，天下惜之。

田按：繩武以世宗久居西苑，不視朝，時有宮女楊金英之變，疏請還大內，改元，忤旨，奪職放歸，弇州序司業集，謂集中疏多闕事，又謂宗廟石室藏主爲宗祏，公羊高曰：主藏廟室四壁，以備火災，漢儀：藏主四牆，增即石室也。北唐猖獗，疏請使齋遺金帛於別部，勸康，俾爲外援，得間則以一軍出雁門，一軍出居庸，左右掎角，其語甚壯，慨然以賈長沙、劉中壘、陸忠州自居，今檢明人選本，無及繩武文集，錄其詩，附識於此。

吳門遇邵仲德

三月逢君吳子城，百花洲上倉庚鳴。晴川著雨波汎汎，野館落日春冥冥。樽酒欲傾還惜別，逐臣相對自

關情長沙此去應無鵬。宣室何時召賈生。

張比部子儀騰酒見過分得年字

白水青山春可憐。野塘花竹淨娟娟。東風門巷多芳草。落日江湖有杜鵑。高臥馬卿愁病渴。長齋蘇縉愛逃禪。卽看載酒尋盟處。小閣秋雲已判年。

吳廷翰四首

廷翰字崧伯無爲州人。正德辛巳進士。授兵部主事。改戶部。吏部。歷員外郎中。出爲廣東僉事。改浙江。遷山西參議。有蘇原先生集二卷。

田按蘇原七律疏爽集中佳句。如白來說法青牛叟。雙去吹笙白玉童。管仲臺前春草亂。黃公石上暮雲生。念子久傷豺虎地。使人愁對鷓鴣臺。峽口草生銅柱沒。廟前月出石牛寒。湖上青山芳草夢。渡頭黃鳥落花情。滿浦葉聲飛晚照。隔江峯影落秋雲。滿地清秋雲片片。三更笛竹月娟娟。久病忽驚詩卷瘦。老懷難借酒杯寬。皆可誦也。

寒東王緇武陸伯載

北地時節苦不早。不謂四月寒見侵。風吹薊門日色薄。雲入西山雪意深。邊城蕭蕭鳴戰馬。野田啄啄下饑禽。可憐寺裏淮西客。幽獨傷神青竹林。

送溧淮太守入覲

此邦爲政多休暇。山水何須羨永嘉。齋閣留賓開一榻。湖亭對酒得孤槎。憶歸春日牽楊柳。送別寒城隱菊花。清問祇今勞側席。使君何以答重華。

逸山魯君隱居

闕下歸來今忽老。偶尋此地作幽棲。茅齋寂寞緣孤徑。野樹參差帶小溪。酒旆斜連官渡口。釣船常在石橋西。樣亭最喜相隣近。短杖從今得共攜。

白頭翁

點點綠殘荷葉落。枝枝紅映蓼花洲。可憐秋水清如許。閒與幽禽照白頭。

何棟一首

棟字伯直。長安人。正德辛巳進士。授河南道御史。改宜興知縣。遷順天通判。歷工部郎中。進右通政。太僕卿。以左僉都御史巡撫大同。左遷四川參議。用薦起右副都御史。提督薊州。進兵部侍郎。擢右都御史。有太華集。

望湖亭

丹磴入青靄。瑤亭俯翠巒。晴軒一以眺。湖漲正瀾漫。波影含雲細。荷珠滴露圓。須臾明月上。坐對水晶盤。

李默一首

默、字時言。甌甯人。正德辛巳進士。選庶吉士。改戶部主事。歷兵部員外。吏部郎中。以事謫甯國。同知。屢遷浙江布政使。入爲太常卿。掌南國子監事。擢吏部侍郎。進本部尙書。兼學士。加太子少保。爲嚴嵩、趙文華構陷。下獄。瘐死。隆慶中復官。萬歷中謚文愍。有羣玉樓藁七卷。

田按。文愍羣玉樓藁。有上三宰相書。曰。比者降發中之詔。修翊戴之功。執事首贊異數。進秩諸侯。可謂曠世雋談矣。然外內譁然。不泝衆懷。其說有二。小人曰。相公汰冗食。正典禮。義不假於君親。而乃自利其爵。君子曰。相公奉命之臣。無利之心。雖然。三子並拜而宮掖乖。五侯並封而武氏橫。相公不鑒功名自此去矣。夫是命也。執事謂盡出上旨哉。卽不過左右憑藉以階寵耳。觀其敘列。吾黨不及三四。而此輩已居八九。則其情狀先已敗露矣。蓋爲楊廷和、蔣冕、毛紀以定策功封伯爵發也。三人卒能固辭。文愍直諫亦有足多者。集中文學步昌黎。不拘李何成說。詩則頗傷率易。

江上訊故知

憐君四十不稱意。獻賦金陵仍未收。爲客敝裘曾貫酒。經秋零雨幾登樓。釣鯨無計悲公子。埋劍何年射斗牛。我亦長沙留滯久。江籬汀芷共牽愁。

董承敘二首

承敘字士疇。一字漢臣。沔陽州人。正德辛巳進士。改庶吉士。授編修。進侍講。歷中允、洗馬、國子司業、左春坊左庶子。有內方集十卷。

靜志居詩話。庶子與張文邦、廖鳴吾號楚中三才。永陵以從龍侍臣遇之。詩篇比廖差優。

湖北詩徵傳略。內方集多佳句可錄。如忽抱澗幽思。坐乘秋水來。林皋停返照。樓閣動新涼。衰晚饒詩意。清貧乏酒錢。仲宣詞賦人爭誦。平叔風流自可憐。門前自擬題凡鳥。天上寧知聚德星。坐受蘋風生水閣。臥看林影落繩床。皆清峭拔俗。

宮詞

三三兩兩不知愁。結束羅裙學打毬。傍晚忽聞天樂近。分明只在殿東頭。

江漢歌

清江抱村村樹齊。水風不動浦雲低。嬌女刺船深港裏。聞歌只在芰荷西。

倫以諒一首

以諒字彥周。南海人。正德辛巳進士。選庶吉士。歷吏部郎中。進南通政。司右參議。有石溪集。

海珠寺別李三洲王青蘿

兩岸西風吹白蘋。三城煙火隔紅塵。天涯黃菊雙蓬鬢。海上清尊幾故人。謀國計從窮處拙。倦遊心向暮年真。羅浮東去扶桑近。黃木灣頭好問津。

廖道南一首

道南字鳴吾。蒲圻人。正德辛巳進士。改庶吉士。授編修。屢遷侍講學士。謫徽州通判。尋復職。有玄素子集。

殿閣詞林記嘉靖時每遇經筵日講召講官顧鼎臣謝不及臣道南蔡昂賜資無算臣道南悉紀以詩賜仇杞葉詩云炎日殊珍出尙方賜來猶帶御園香珠丸雲筐承優渥玉液霞巖敢自嘗賦擬上林風韻別貢經南國露華芳翠龍函賜同袍士憲圖蘭皋倍寵光賜鱗魚詩云暑雨經旬溼不開雪鱗冰艦自南來御庖珍饌傳中使講幄金盤出上燕蔬縮未須歌疑廟釣鼈何必羨蓬萊素餐忝竊慚無補魚藻空懷絕代才

藝苑卮言廖鳴吾詩如新決渠浮楚濁泥一瞬皆下

田按學士在世宗朝頗蒙優眷纂修明倫大典成進侍讀在經筵講洪範稱旨其說具載實錄嘉靖八年元夕應制撰燈詩十五首以進又撰秦神殿禮成感雪賦闡邱載祀慶成九章聖主光闡陽翠嶺賦南巡江漢賦景雲徵烈四頌皆選睿賞自徽州賜環帝親灑鐘粹宮詞命和賜金綺有差生平著述甚富撰楚紀六十卷續黃泰泉翰林記爲殿閣詞林記二十四卷玄素子集五十六卷詩句變字轉不稱其名

登赤壁亭

亭傍石岩開風鳴萬樹哀人閒不知去鳥倦忽飛來江勢平吞開山形曲抱臺雲林秋色霽真自可幽懷

周祚三首

祚字天保紹興山陰人正德辛巳進士除東阿知縣改來安擢兵科給事中改工科有定齋集十五卷

翠玉樓集定齋文醋幕四京實疏達節去雕去腐時復爲燕稍慷慨悲歌之狀詩淡者似建安沈鬱復似少陵而魂心奇氣若河流下龍門積石奔激不得瀉風觸木怒號撇旋漂擊已而噫氣冷然故攬其詩若文而志可悲也

田按。天保致李空同書云。往寓幽燕。有攜空同集過予者。予抱而讀之。再三而歎之。嗟夫。世有是人。予不得而見之。予豈人也哉。予年四十有四。白日易下。逝水不返。墮弱苟且。以俟其老。將奈何也。求虞翻。趙擘。陸佃。放翁於鄉之遺書而讀之。吾意未覺其有當也。登會稽之山。想黃河之流。浮雲而馳。征翼東向。又不能不空同之思。抗慨幾於泣下。誠以惜時不如立名。慕德不如勵行。追古不如就今。執文不如親炙。此王粲有依劉之誠。張敏有夢思之歎。古今之所共親。烈士之尤甘心也。空同覆書云。僕少壯時。振翻雲路。嘗周旋鸚鵡之末。謂學必的古。苦心無益。又謂文必有式。然後中諧音度。如方圓之於規矩。當是時。篤行之。翕然臻向。弘治之間。古學遂興。而一二輕俊。恃其才辭。假舍筏登岸之說。扇破前美。稍稍聞見。便橫肆譏評。高下古今。謂文章家必自開一戶牖。自築一堂室。謂法古者爲蹈襲。式往者爲影子。信日落筆者爲混其比擬之迹。而後進之士。悅其易從。附唱答響。風成俗變。莫可止遏。而古之學廢矣。僕竊憂之。然莫之敢言也。又每竊歎獨立之鮮。勇往之寡也。今足下既有同聲之應。又相求也。僕安敢終默也。且人情未有不忽近而務遠者。何也。知其實者少。而徇乎名者多也。世遠則論定持定。采名則曠世相慕。故漢文帝拊髀思頗。牧而不知李廣。魏尙者。以其近也。近則疑。疑則實昧。實昧則忽之矣。斯時俗之重悲也。今足下於僕同時最近。涉疑而不疑。又無傾蓋之談。接衽之雅。乃一旦走千里之使。聲聽而氣求之。僕以是知足下立之獨而往之勇也。以是而的古。何古之不的矣。天保詩有氣格。而少風趣。文過詩遠甚。余愛二書。情詞斐然。故節而錄之。一二輕俊。蓋指大復。君采也。

擬青青河畔草

春日長安陌。落花何脈脈。陌上草青青。行人那復停。歌臺臨大路。相思春日暮。寶騎金作鞍。遙遙花裏度。去時鸞鏡臺。照郎未曾開。青天挂月明。弦望得歸來。

王雲谷以溪山深雪圖贈我六月展玩想憶不忘時雲谷西遊乃詠歌圖右以託意云

雲谷詩人苦詩癖時復工畫窮其力平生豪縱出萬夫不受文詞相促迫憶昨贈我溪雪圖山石半暝天模糊中有堅冰百丈長下垂大壑通江湖是時六月朱夏永萬里炎蒸骨殊痛遂令寒風生我堂坐間賓客毛皆聳青松挂壁牛已僵溪流欲流雲不揚茅堂盡亞天姥下孤舟忽出瀟湘傍王君玉君神仙侶一生好古心亦苦技兼鄭監名獨著祁岳韋假何足數近聞騎馬西入秦秦地山川三輔鄰他時定寫皇圖會猛欲題詩向涓涓

楊花

三月楊花暮看花并送春茫茫渡江去白日易愁人

謝蕢一首

蕢字維盛閩人正德辛巳進士除□□給事中以議大禮廷杖出知太平府未上官卒隆慶初贈太常少卿有給諫集

楊妃春睡圖

玲瓏樓閣長生殿紅塵遠隔輕風薦寶鴨香微午漏沈翠箔珠簾語雙燕深宮無事白晝長銀床冰簟參差光海棠欲睡嬌無力阿嚙雙雙扶不得沈香蝴蝶夢中飛飛來上苑戀春輝東皇有意醉傾國獨領春

風歸禁闌。玉顏如花。恩如海。千秋萬歲終不改。漁陽鼙鼓動地來。花落黃沙真可哀。

楊言一首

言字惟仁。鄞人。正德辛巳進士。除行人。擢禮科給事中。以言事廷鞫。謫宿州判官。遷溧陽知縣。歷南吏部郎中。再謫彝陵知州。累官湖廣參議。有集。

田按嘉靖六年。錦衣百戶王邦奇言哈密事。請誅楊廷和彭澤。下部議未覆。邦奇復誣大學士費宏。石瑤陰庇廷和。詞連廷和子主事愔等。將興大獄。惟仁抗疏曰。先帝晏駕。江彬手握邊軍四萬。圖爲不軌。廷和密謀行誅。俄頃事定。迎立聖主。此社稷之勳也。縱使有罪。猶當十世宥之。今既以奸人言罷其官。戍其長子慎矣。乃又聽邦奇之誣。而盡逮其鄉里親戚。誣爲蜀黨。何意聖明之朝。忽有此事。書奏帝震怒。并收繫惟仁。親鞫於午門。備極五毒。折其一指。惟仁有詩云。云何捐臂指。率爾忤雷霆。紀其事也。

玉莊驛

春仲一到此。郊原人望遙。草侵山路細。溪迫漲痕高。驅策煩羸馬。風塵闔敝袍。乾坤嗟孟浪。吾義更何逃。

任瀉一首

瀉字元朴。堂邑人。正德辛巳進士。官監察御史。有石麟集。

土木驛

白年土木蕩龍沙。九月風塵擁使車。白日猶餘征戰色。空山愁絕聽胡笳。

吳檄一首

檄字用官。桐城人。正德辛巳進士。除襄陽推官。遷戶部主事。歷兵部郎中。出爲湖廣參議。歷山東、雲南副使。遷陝西參政。有皖山集。

春日過張侯亭園

五侯臺榭競芳菲。三日花深車馬稀。絃管不隨流水奏。綺羅應化暮雲飛。空聞玉饌分天府。曾覩金葩捧御幃。借問樓前桃李月。從來此地幾人非。

列朝詩集。李開先游海澱詩序云。嘉靖乙未三月。王遵岩謫判毗陵。武選吳皖山檄。呂江峯高。熊南沙過。翰林唐荆川順之。陳后岡東。禮部張少室元孝。李克齋遂。及予共八人。饒之海澱。望日出阜城門。至則荒涼殊甚。蓋張昌國以癸巳福禍。已三年矣。亭臺傾圮。惟水聲潺潺。不異舊時。酒酣賦詩。皖山先成。意高詞雅。不減唐之名家。次日。夏桂洲遂劾奏張。李二司屬無事慢遊。下獄。未久。七人相次罷謫。皖山幸而獨免。詩卷歸予手。事如隔世。而人多下世。愴然作序。不惟感諸友之易銷歇。而且歎大臣之善傾陷也。嘉靖初海澱之獄。與蘇子美諸人監院飲酒之事。大略相似。貴溪恃寵恃橫。一至於此。西市之禍。豈不幸哉。昌國在孝宗朝。科道交章論劾無虛月。欽命置酒陪禮。傳諭守科。及該道接本者俱赴席。臨時又賜御物助杯盤。翌日謝恩。本上而劾本亦上矣。故此詩有天府玉饌之句。

田頊一首

頊字太素。尤溪人。正德辛巳進士。歷禮、兵二部郎中。出爲湖廣僉事。遷□□副使。有柘山集一卷。

四庫總目：頊詩頗爽朗，蓋沿前七子之流波，有意規撫唐人，而模擬未免有迹。列朝詩集副使乞歸，以文章自喜，多所著述。

寄玉溪舅

廉水扶桑北，石城句漏西。吏情甘散地，春色在扶藜。椰葉斜侵屋，江魚逆上溪。飄飄記蠻府，淚應暮猿啼。

陳大濩一首

大濩字則殷，長樂人。正德辛巳進士，歷官思恩府同知，有雙溪集。

擬陶還舊居

六年客京邑，鬱鬱但懷歸。今日歸故國，我心愴以悲。溪山雖則是，室廬半已非。出門訪鄰老，往往罕復遺。但見門前柳，含情尚依依。回看百年內，倏若車輪推。老者日以死，壯者日已衰。但當與鄰曲，杯酒聊共揮。

王洙一首

洙字崇教，臨海人。正德辛巳進士，除汝州判官，歷官廣東參政。

鄔子驛

彭蠡深無地，蒼波闊有天。晚山西落日，古渡北歸船。樹遠煙初散，帆高風正懸。孤舟憐去住，翹首思茫然。

蔣泮一首

泮、字良潔。僊居人。正德辛巳進士。授工部主事。歷員外。進郎中。

養病疏不行志感

抗疏辭明主。紆詞乞病身。尊鱸空入夢。簪紱苦羈人。東嶺煙花好。南檐烏雀馴。何時破蒼蘚。把酒席芳茵。

鄭一鵬二首

一鵬、字九萬。莆田人。正德辛巳進士。選庶吉士。授戶科給事中。改吏科。以議大禮廷杖。桂萼議令科道互相糾劾。執奏非事體。不受詔。再受杖。罷歸。隆慶初。贈光祿卿。

將命荆襄道中書懷

江漢在何許。我馬去何遲。豈不事鞭策。徘徊有所思。辭親遠行役。歲晏屢差池。憑高恣遠眺。仰睇白雲馳。白雲散還合。遊子歸何時。

感懷

林下碧蘿垂。陰崖紫苔長。欲取鳴琴彈。坐聆松風響。

洪珠一首

珠、字玉方。莆田人。正德辛巳進士。除戶部主事。歷官應天府尹。

題畫

柴門欹側對流水。石磴礚礚點落花。一壑白雲秋欲老。紅塵飛不到山家。

吳文之二首

文之字與成。吳人正德辛巳進士。改庶吉士。

答德深兄

池草頻生句。江魚不寄書。春來小樓興。應似舊時無。對月開新札。穿雲憶故廬。忽聞添米價。千里獨愁予。

聞黃季行消息

試檢來書憶故人。此生吾已失元賓。詩篇近寄何能及。消息初聞疑未真。病裏無家行棹盡。夢中有記玉樓新。曲江零落花千樹。北望長安爲愴神。

王璜一首

璜字廷實。潯人。正德辛巳進士。除陝西道御史。有大任子集。

談遷叢林雜俎。濟縣御史王璜雲中歌八首。一曰。小王子來打圍時。自稱北狩產龍妾。墩上老軍莫相信。英皇元不納胡姬。

感事

一戰不惜布衣死。堂堂肉食應含羞。納牟山下藏靈劍。夜夜龍元射斗牛。

田按。此詠普安王鏐事也。鏐。普安諸生。學孫吳兵法。弘治中。貴帥進討蠻寇。鏐兄以尺籍當行。灑行而病。鏐代之行。及戰。官軍

敗。鏢死之。此事黔志未載。當補錄。

陳講一首

講字子學。遂甯人。正德辛巳進士。歷官副都御史。有中川如鳥二集。

螿峒

欲訪飛仙閣。先臨問道宮。亂雲交密竹。斜日下危峯。木落層樓出。天高一鳥通。鼎湖龍去遠。巖壑自秋風。

朱子和一首

子和字□□。瀘州人。正德辛巳進士。歷官浙江僉事。有初溪集。

歸雲閣

路轉涼颺回。松古石泉落。竹外鳥不鳴。歸雲暮投閣。

邵經邦一首

經邦字仲德。仁和人。正德辛巳進士。除工部主事。改刑部。進員外。以建言廷杖。發鎮海衛充軍。有

宏藝錄三十二卷。

四庫總目。經邦以講學自任。嘗採古今論學語。發明其旨。爲宏道錄。又刪綴諸史。爲宏簡錄。所著詩文。則別爲宏藝錄。經邦自作誌銘。所云三宏集成。聲聞鶴鳴者也。經邦上武宗疏。及中興保治。日食建言諸疏。皆慷慨激烈。足以見其志節。其他詩文。則

類皆抒寫胸臆。不屑屑以研鍊爲工。卷首熱死元機七十三條。專明作詩之法。以嚴羽詩有別才非關學之說爲不然。且謂清廟。緝熙。莫非平理所寓。未可不謂之詩人。惟狃於習俗。謂與經生不同。故往往黏皮帶骨。觀其持論。其宗旨可知也。

灑水驛與巴鈍齋憲使宴

婺女星前瞻使節。斗牛槎底汎行舟。張騫自覓河源去。徐福從招海外遊。綺席玉杯光照夜。繡衣霜簡氣橫秋。來朝共擬尋天姥。白鶴脩脩下九州。

胡森一首

森字秀夫。湯溪人。正德辛巳進士。歷官南鴻臚卿。有九峯集。

金華詩錄。九峯詩頗有標格。如身世孤舟隨處擊。江湖白髮共愁長。澗戶苔封時遇鹿。石林客少只留雲。句外有神。

九日遊觀音山次劉紫巖韻

萬里江流天際來。無邊秋色上虛臺。荒煙落日迷漁艇。翠竹黃花照酒杯。搖落自深騷客思。羈棲空老杜陵才。謝公不負東山興。千古幽懷一笑開。

趙兌一首

兌字鸞洲。內江人。僑寓上元。正德辛巳進士。官御史。罷歸。起爲常州知府。歷官參政。

題謝子隱畫

峯回溪轉露山家。竹槿編籬整復斜。中有讀經人靜坐。野風吹雨落藤花。

彭汝寔一首

汝寔字子充。嘉定州人。正德辛巳進士。除吏科給事中。請改教職。奪職閒住。有得山堂集。

凌雲寺

誰從雲際結孤亭。萬斛蒼煙倚翠屏。二水遠浮天影白。九峯高擁樹痕青。佛煙渺渺空中散。估艇紛紛雨後停。新月送人涼霧起。石洲古渡未全冥。

浦瑾一首

瑾字文玉。無錫人。正德辛巳進士。除麗水知縣。有桂巖集。

閒居漫興

草堂幽事許誰分。石鼎煎茶隔戶聞。長日如年雙燕語。晴風似酒百花醺。輭莎新展青絲毯。濃墨閒書白練裙。稍待谿南荷葉滿。扁舟十里看紅雲。

林汝永首

汝永字君修。莆田人。嘉靖壬午舉人。累官長蘆鹽運使。有南崧集。

初夏集湖園有懷退齋弟

江南四月麥秋後。正是濛濛梅雨時。可惜池塘芳草滿。一春閒過已無詩。

王汝礪一首

汝礪字若金。金華人。嘉靖壬午舉人。官滄州知州。

擬相思行

鬱鬱連理枝。關關相思鳥。緬懷湘水人。此夕愁多少。

陳東一首

東字南塘。零陵人。嘉靖壬午舉人。除井研知縣。改龍泉。

黃葉渡

黃葉渡頭風。愚溪橋下水。日斜晚涼生。漁歌數聲起。

李松一首

松字鶴巢。曹州人。嘉靖壬午舉人。除沙河知縣。改開封教諭。

流民歎

惻惻背鄉井。遲遲行道側。凶年託此身。樂土是何國。追逐惟妻孥。可憐各菜色。聞道大河南。人家富黍稷。負擔不能達。誰知我心頭。裹糗臨風餐。蒙塵衣盡黑。日暮宿荒郊。愁吟聲唧唧。人生信多艱。無家最可盡。

風急走浮雲。林空無定翼。透池家漸遙。舉首望天北。

錢文僖一首

文僖字滌齋。無錫人。嘉靖壬午舉人。官南太僕丞。

過石瀨山莊次鄭平山韻

地擅千秋勝。泉流三徑分。澗芳生暮色。石壁亂春雲。人意花同愜。巖香鳥共聞。到來餘遠思。蘿月綠紛紛。

祝時泰一首

時泰字汝亨。侯官人。嘉靖壬午舉人。歷官戶部員外。德府左長史。有九山集。

過縉上人蘭若

東林秋入社。還叩遠公扉。地靜鈴相語。風高旛自飛。山留說法座。雲護定僧衣。欲識空中相。鐘聲繞翠微。

明詩紀事卷十五

戊籤

王教一首

教字庸之。祥符人。嘉靖癸未第二人及第。授編修。遷侍讀。歷左諭德。國子祭酒。進南兵部侍郎。有中川遺稿三十三卷。

巴江詞

皎月上巴山。影入巴江裏。不見郎舟來。江流去瀾瀾。

徐階六首

階字子升。松江華亭人。嘉靖癸未第三人及第。授編修。以論孔子廟制謫。延平推官。遷黃州同知。擢浙江按察僉事。進江西副使。召拜司經局洗馬。歷國子祭酒。擢禮部侍郎。改吏部。進禮部尚書。加太子太保。進少保。兼文淵閣大學士。參預機務。再進柱國。兼太子太傅。武英殿大學士。加太傅。改吏部尚書。加太子太師。進少師。建極殿大學士。卒贈太師。謚文貞。有世經堂集二十六卷。

千慎行穀山筆塵。分宜相嵩既殺貴溪。逐諸城。專任二十年。獨華亭與之左右。勢且不免。會吳中有島寇。華亭既卜宅懷章。洋爲避寇之計。有司爲之樹坊治第。附籍江右。又與世蕃結親。江右士大夫。皆講鄉曲之誼。於是分宜坦然不復介意。已而謀遂。分宜世蕃誅死。卽繫南昌里第。解江右之籍。

國史唯疑徐華亭初以爭孔子祀典謫外。斥爲佞。鏤柱譏之曰。徐階小人。永不敘。久亦遂忘之。其自江右習學改宮寮。賴馮恩力。馮時謫戍過南昌。代都御史何某草疏達夏桂洲。因被內擢。劄台輔。謂君相能造命。非歟。今人處謫官。邑邑不樂。徐華亭延平詩云。俗樸到庭文牒少。山深入饌戲薇鮮。自注。予往歲謫延平。樂其土俗。有移家之約。窺此老際度。正復超然。

田按。文真相業。以威福還主上。以政務還詔司。以用舍刑賞還公論。雖不盡副。自是名語。永陵修玄。非青詞不能結主知。又與相嵩共事。權譎舊濟。史稱任智。不其然歟。世經堂集爲所手定。一切青詞致語。刪削殆盡。雖不以詩名。而入格之篇。愈復俊爽。

詠古

漂母昔進食。慷慨不願酬。淮陰千金賜。高誼激頰流。悲哉一失職。怏怏生異謀。隆準多忌猜。國士諒所仇。一飯有厚直。高勳無荒邱。感彼君臣間。涕下不能收。

送潘子芳赴東陽簿子芳者少宗伯崔公培也

我初識君自崔公。珠玉照坐挹清風。得君高文不能薦。俛首簿領山縣中。人生仕宦如艇子。東西總在風濤裏。篙工舵師好身手。要使風濤爲我使。古今貴賤同一邱。獨有賢者名常留。如令人頌東陽簿。此事應輸君一籌。

題西莊卷

問訊高人第。城西莊更幽。竹深秋鶴合。花重夕陽留。澗水斜通渚。雲峯曲抱樓。不知塵世外。何處有丹邱。

登金山作

嶺樹鬱重重。江流接太空。下臨三楚盡。平挹兩都雄。寺古仙靈祕。潮生海脈通。無勞問天慳。萬國正來同。

送客赴雲中

霜月滿層城。憐君事遠行。平沙百戰地。羸馬一書生。漢戍雲邊色。胡笳雪裏聲。相思堪涕淚。送別若爲情。

送少傅木齋先生謝公致政

旌蓋催晨發。煙霞入望新。寵恩黃閣重。心事碧山親。司馬真辭位。留侯早乞身。繁維虛夢寐。瞻望渺參辰。大節全終始。神功付隱淪。鳳飛元快覩。鴻舉定誰馴。柳暗龍泉雨。花明羅壁春。笑歌淹日月。步履出風塵。勳業清朝範。文章弈世珍。高標振遐軌。懷企獨傷神。

潘恩二首

恩字子仁。上海人。嘉靖癸未進士。授祁州知州。改鈞州。遷南刑部員外。出爲廣西提學僉事。遷山東副使。以事謫廣東河源典史。累遷浙江參政。進布政使。以右副都御史巡撫河南。召拜刑部尚書。改左都御史。贈太子少保。諡恭定。有筮江集。

張時徹芝園定集笠江詩型範自然體裁各適
田按尚書詩有陟色錄其少新穎者

樓子石

壘磴巒棱層。日色籠雲氣。天迴石鏡光。風捲珠泉沸。仙人好樓居。飛帔下來未。

三入蜀過灑澗

灑澗已如象。川行良自傷。一官淹絨冕。三入戀舟航。大浸蛟龍鬪。天風鶴鶴翔。嗟嗟遠遊子。能不念垂堂。

鄭曉三首

曉字室甫。海鹽人。嘉靖癸未進士。授兵部主事。以爭大禮廷杖。改吏部。歷郎中。以忤嚴嵩謫和州同知。遷太僕丞。歷南太常卿。召拜刑部侍郎。改兵部。兼副都御史。總督漕運。入爲吏部侍郎。遷南吏部尚書。改右都御史。再改刑部尚書。隆慶初。贈太子少保。諡端簡。有集十二卷。

田按。端簡博通掌故。所著吾學編。今言九邊志。悉可奉爲典要。詩非所長。紀事之篇。風藻不賸。

諸將三首 嘉靖辛丑

胡馬南驅摧紫塞。材官北面守黃河。風塵不斷千山動。渾脫相牽一羣過。
胡兒落雁誇鳴鏑。元帥椎牛賽蘇牙。冀北於今驚趙魏。河西且莫問瓜沙。

驃騎未搜青海賊。匈奴還結黑山奚。朱旗夜躍雙城破。白骨秋燐萬鬼啼。

朱廷立二首

廷立字子禮。通山人。嘉靖癸未進士。除諸暨知縣。入爲河南道御史。歷南太僕少卿。擢工部侍郎。改禮部。有兩厓集十一卷。

懶谷

山盡若無去處。青松翠竹交加。風動茶煙初起。隔林知有人家。

山樓短述

病暑山城一月餘。竹床茗碗爲驅除。澄心自是延年術。誰向名山借道書。

屠大山一首

大山字國望。鄞人。嘉靖癸未進士。授台州知州。遷南刑部員外。出知吉安府。歷山東按察使參政。福建布政使。以右副都御史巡撫湖廣。召拜工部侍郎。以原職再撫湖廣。進兵部侍郎。兼僉都御史。總督湖廣川貴軍務。改南兵部侍郎。巡撫應天。與倭戰失利。下獄。黜爲民。有集。

甬上耆舊集。屠長輔曰。公歸田後。與里中故人縱飲。酒酣以往。援筆爲曼歌。了不求工。而往往神來。非詞人嘔心枯影而得。

青州瀑布泉歌

山神愛奇天帝憐。倒捲海水懸山巔。海神欲爭不敢言。怒觸山頂通黝淵。白龍騰攫挂紫煙。飛聲兩道雲光鮮。山神受聒忘安眠。徙置十里蒼崖肩。坐令林麓偉麗捐。頗費探討添煩冤。我來聞此心冷然。歛裳欲訪塵霧牽。望中彷彿璫幕褰。冰肌玉骨爭清妍。誰能移還大道邊。報爾萬鎰黃金錢。

李仁十首

仁字元夫。東阿人。嘉靖癸未進士。授行人。擢吏科給事中。累官兵部侍郎。有吾西遺稿。

海岳靈秀集。吾西清婉和粹。有中唐餘韻。

田按。吾西詩格軒爽。音節清脆。當時山左盛稱伯華。然欽爲二李。何獨遺此元珠。

湖行書所見

葭菼煙中界。茅檐水上村。漁舟常繫柳。鷺渚不離門。愛爾機心息。知予野性存。炎天供遠役。惆悵與誰論。

過高郵湖

郡接三吳會。湖涵萬派流。樓虛無地著。岸闊與天浮。細柳魚蝦市。香蘋雁鷺洲。孤舟蕩超忽。真得水雲遊。

送劉竹瀨赴西甯

曲水高旗駐。離筵急管催。驅車川路永。吹角隴雲開。青海霜鷗擊。流沙天馬來。百年番漢地。坐見古風回。

別約齋龔丈

同作羈栖客。如何復轉萍。高人甯避毀。吾道本無爭。草綠思公子。雲停悵友生。幾時清禁地。端簡笑相迎。
出塞

羽檄來青海。朱旗向磧沙。匈奴猶牧馬。主將敢言家。天接胡塵暗。山連漢戍斜。鐵衣寒不寐。徹夜聽鳴笳。
朝天宮東麓亭

飛閣東巖麓。遙憑修竹林。河山窗裏盡。宮闕望中深。晞髮迎朝日。鳴琴坐夕陰。便當從綺季。一洗市朝心。
寄張五臺

明時張博望。遠佐霍嫖姚。直以戎機重。甯辭邊地遙。油幢張晚甸。刁斗入寒宵。雄劍衝星斗。機槍觸處消。
壘川雨中宴集

小亭張畫燭。高宴紫薇衙。細雨江雲溼。微風徑竹斜。青衣行琥珀。翠袖拂琵琶。歸路衝泥怯。籠街引絳紗。
澠池重九

函谷關西山路長。會盟臺北野雲涼。雁傳朔氣清霜苦。地近寒流晚稻黃。木落前川還獨往。花開別縣又
重陽。薊門直上三千里。一夕歸心鬢欲蒼。

慶陽

慶陽山郭屹中天。勢壓胡兒不近邊。何事白狼鞮未入。至今青海箭猶傳。城頭帶甲嘗防虜。套裏連營自

控絃漢將秦師空拊髀。令人卻憶孝文賢。

李舜臣二首

舜臣字懋欽。青州樂安人。嘉靖癸未進士。授戶部主事。改吏部。歷員外。出爲江西提學僉事。改南國子司業。就遷尙寶卿。召拜太僕卿。有愚谷集十卷。

四庫總目。舜臣詩格雅飭。而頗管於邊幅。所長所短。皆在於此。文皆古質。其序記多名論。而西橋逸事狀一篇。觸張璪。桂夢之錄。直書不諱。文出之日。天下咋舌。抑亦剛正之士矣。

中麓閒居集。李空同有九子詩。率多詩文之友。予亦有友九人焉。詩文而兼經濟者也。勿論經濟。其詩文有可掩蔽前九子者焉。李愚谷舜臣。劉嵩陽繪。羅念菴洪先。呂江峯高。熊南沙過。唐荆川順之。趙俊谷時春。王遵巖。顧中。潘春谷高。

送丁德卿出守撫州

康樂臨川日。江山屬壯遊。羨君今出守。於此復鳴騶。地以紅泉勝。亭餘碧澗幽。遙知詞賦手。千載揖風流。

寄任元朴

去國今三載。獨傳諫諍名。聖朝非爾棄。時俗乍相傾。迹向陶邱歛。書從梁獄明。平生欲何似。歲暮臥山城。

陸銓一首

銓字選之。鄞人。嘉靖癸未進士。除刑部主事。諫大禮廷杖。歷兵部員外。禮部郎中。出爲福建按察副使。歷廣西按察使。遷廣東布政使。有石谿集。

甬上耆舊集石齋奇氣傲兀真詩家之烏獲

田按選之議禮與羅案不合羅案驛貴氣凌朝士排擠正人選之挽羅案詩云此後正人方貼席從前同黨幾張弧笑君十載爲公相不得徐生一束芻可謂快論也

度嶺後漸寒

初春戒羊城氣煖親絲葛度嶺春已杪怯風襲冬旻相去千里間寒燠判如割物性亦從人宜土乃易苗橘柚常去燕梨棗不榮粵植根一失所生意已先闕奚爲冠裳驅風土奪所悅六氣爲人讐變息苦伺隙行行歸吾鄉安栖養歲月

顧夢圭四首

夢圭字武祥崑山人嘉靖癸未進士授刑部主事改南吏部歷郎中出爲廣東參議改江西歷山東河南副使福建參政按察使遷江西布政使有疣贅錄二卷

四庫總目夢圭詩文皆平正通達直抒胸臆無鉤章棘句之習有明中葉風氣初更蓋學問移於姚江而文章未移於北地者也

田按武祥分守廣東雷廉海北故有平江青鸞楊梅樂民四珠池詔書嘗採甚急武祥疏言海面珠池道里遼絕往歲開採用舟筏兵夫萬計往來海中因以爲盜近年劇寇黃山秀蔓延縱橫覆轍可鑿且珠蚌出海有漸生息甚難先朝率十五六年或十年一採始得美珠隨者三年再採珠已耗竭自非積久欲得美碩繁艱必不可得之數矣况釐戶腰纏入海觸犯瘴霧嶺首就死實可憫念伏望亟賜罷採以寬民力不報責貢如初武祥有采珠歎詩云漢家嬾媼無麗師南海道遙養泉客昭陽新龍

門新妝。照乘之珠苦難得。孟嘗美政擊黃班。今人反怨珠來還。廉書三年兩頓降。驪龍亦蚌皆慙慙。往時中官澁合浦。巧徵橫索如豺虎。中官去後廉書來。誰訴邊陲無限苦。野老村童不著禪。四山戎馬夜紛紛。竹房無瓦緝無粟。猶折山花送使君。此詩可儆白香山新樂府矣。武祥抗叢集。長於古體。如灤縣行。獻縣行等篇。皆可採之。輶軒陳之太史者也。

崇安縣作

鵝湖始塞帷。延矚情未已。陟巘窮紆折。臨溪鑿清泚。修築蔽雲厓。繁英間霞綺。飛瀑萬壑鳴。玄關百靈啓。征夫憚殊域。物色差娟美。緬懷通道初。於今乃同軌。言瞻九曲間。秀石如瑜珥。鼓柁日紆徐。仍觀巖月起。

獻縣行

滹沱水決年復年。城北一望皆平川。田荒不聞免租稅。賣兒鬻女償官錢。百家今無十家在。老翁臘月衣無綿。編草爲船渡行客。破履深入厝冰間。索錢買餅不充腹。終委溝壑何人憐。北地凋殘此爲最。來往況復多輜軒。我來正逢貴者至。橫須供張何喧喧。辛勤爲民省百費。路旁但稱曾令賢。曾令名德字日宣。

過信陽追悼大理卿孟公

江東舊游處。雲樹俱寂寞。篇翰空流傳。斯人不可作。嵩山洛水幾俊人。此鄉何孟名嶙峋。東閣梅花能吟笑。落帽龍山迹已陳。我昔卑棲向南省。孟也邂逅情相親。秦淮命舟每清夜。冶城飛蓋當芳辰。歡娛未幾旋相失。楚天粵嶠疏音塵。英魂不逐彩霞散。或與黃鶴翔秋旻。我來故宅可羅雀。萋草忽復三經春。交呂

攀嵇如隔夢。山陽聞笛一霑巾。

九江雨泊

家近書仍少。情繁夢不清。芝山連夜雨。春盡九江城。

柯維騏四首

維騏字奇純。莆田人。嘉靖癸未進士。授南戶部主事。有藝餘集十四卷。

東南嶠外詩話。希齋登第五十載。未嘗一日爲官。人品既超。詩遂假之。

田按。奇純撰宋史新編。竭二十餘年之力。可謂精專。詩亦蘊藉。不染塵氛。

別陳若寶

悠悠江上雲。盤盤澗中石。蹤迹亦何常。寸心詎能易。長亭一杯酒。相看意脈脈。別後長相思。留歡罄茲夕。

宏路驛

雨歇江天淨。山迴驛路遲。客愁新歲減。風物故鄉宜。花事餘梅蕊。樵歌撥竹枝。祇慙司馬病。深負好文時。

寄文衡山內翰致政歸山

海內論交久。清朝偶共逢。談詩山寺月。並馬禁城鐘。林臥余多病。吏情爾亦慵。相望隔秋水。芳訊託芙蓉。

九日集東山

登高直到石巖顛。滿日雲山秋可憐。僧影夕陽紅樹裏。蘆花野水白鷗前。寒天搖落仍幽事。淨社招攜有宿緣。共把深杯對叢菊。不妨短鬢趁流年。

李新芳一首

新芳字元德。長治人。嘉靖癸未進士。除淮安推官。改保定。入爲戶部主事。遷監察御史。有漳堃文集八卷。

四庫總目。新芳漳堃文集。講學之作多至三卷。詩亦濂洛風雅之脈。

送李容之赴密雲

東郭送行客。淒其風滿樓。冠裳兼晉楚。意氣極燕幽。對酒堃花落。隔林嘯鳥愁。雙旌去何疾。回首北山秋。

馮世雍二首

世雍字子和。江夏人。嘉靖癸未進士。歷吏部郎中。出爲杭州知府。改徽州。有三石集。

湖北詩徵傳略。世雍書法山谷。有奇氣。

登岳陽樓望洞庭

澤國雲蒸水滿湖。茫茫煙浪混虛無。波心明月澹將墮。海上浮邱閒可呼。巴客布帆歸鳥盡。湘靈瑤瑟暮峯孤。汀蘭泣薰空相戀。恐有魚龍夜泣珠。

金陵春興

玉臺金闕帝王都。碧樹青山海嶽圖。瘦馬年年擡畫省。只將詩句詠蓬壺。

劉隅一首

隅字叔正。東阿人。嘉靖癸未進士。授福建道御史。出爲四川按察僉事。坐事謫。稍遷永平知府。歷河南副使。按察使。以右僉都御史巡撫保定。入爲右副都御史。有範東集。

再過草堂

亭皋叢薄帶寒流。杜老祠堂江水頭。一代文章懸日月。幾年衰病託林邱。空園葉落松檜老。滿地雲陰鳥雀愁。我亦羈栖懷故國。時來江上寫離憂。

馬坤一首

坤字順卿。南通州人。嘉靖癸未進士。累官南戶部尚書。贈太子少保。有石渚集。

送沙溪姜二守擢清江藩府審理

三年佐郡著賢勞。又上樓船汎雪濤。粵檄江山歸陸賈。梁王賓客讓枚皋。海東棠樹陰連舍。驛路煙花色映袍。把酒旗亭愁送遠。西風衰柳苦蕭騷。

朱澗四首

澗字必東。莆田人。嘉靖癸未進士。授湖廣道御史。以言事廷杖放歸。有《天馬山房遺藁》八卷。

四庫總目：澗詩不事鉛華，獨抒博雅。家居三十餘年，於民生國計，切切不忘。集中南洋水利之議，山寇海寇之防，指陳利病，斟酌時宜，委曲以告當事，不以罷黜而膜視。其爭誕節朝賀疏，史倖刪存大略，集中尙載其完本，用以壓卷，蓋自議禮諸臣後，舉朝皆附新局。澗與馬明衡、惓惓故君，尤其一生大節。故編錄遺文者，別爲一卷，弁於集首云。

關陵詩話：損廢與馬師山同批逆鱗，幸得不死。歸隱天馬，自謂龍官之歲，適與靖節相符。園中多植菊，每開時，必作數詩以紀歲月。其詩春容和粹，無窮愁牢騷語，雖不規撫柴桑，其興趣正自相同。

東南嶠外詩話：天馬山房稿中有二石歌云：英石出英嶺，端石出端溪。大生二石名天下，寶愛直與琪瑤齊。昨來端州過英德，忽聽人言心惻惻。窮山絕谷遠搜尋，斧鑿之聲日千百。持歸不敢爲家謀，紛紛爭向官司投。摩挲更與辨醜好，身當此役何時休。二州父母民之主，詎忍生民受茲苦。安得龍圖孝肅公，手不持之目不覩。此等詩有闕繫粵東方志中，尤宜大書而特書者也。

禾稼在野人有更生之望喜而賦此

低田美禾稼。高田饒黍菽。豐歉昧前期。苦樂易翻覆。貧者嗟已流。死者不可復。何當忍須臾。待此歲月熟。

寄竹坡施先生昆玉

尤川古邑佳山水。雙峰巒岷水清泚。地遠民風淑且閑。漁釣還多隱君子。薄遊已作廿年期。只今魂夢長依依。扁舟欲往關山阻。一雁不來音信稀。極目溪雲擁溪樹。君遊是我曾遊處。漫題短句送君行。直把愁心向君去。君到尤中見故人。爲余傳語寄情親。木蘭煙水壺公月。短髮蓬鬆一角巾。

扁舟沂木蘭。宿西冲僧舍。同馬師山和顧頤齋韻。

坐愛山中靜。庭柯永日移。婆娑遊客影。消息野雲知。釋子何年住。溪光入畫奇。題詩鐵絕壁。應作後遊期。

題九霄深紅菊

幾朵深紅籬畔栽。幽香剛到一尊開。江村秋色涼如水。五柳先生歸去來。

盧襄一首

襄字師陳。吳人。嘉靖癸未進士。官兵部郎中。有五隴山房藁。

和贈頓戶部

三年再見頓叔養。昔在范水今神州。矯矯高姿同海鶴。悠悠野思傍汀鷗。未拋薄祿緣慈母。忽動新吟感素秋。花竹郊居石湖好。問君還肯鄰不。

王激二首

激字子揚。永嘉人。嘉靖癸未進士。除吉水知縣。入爲吏部主事。歷員外郎中。遷南右通政。改北。進國子祭酒。有文江鶴山二集。

田按子揚爲羅山壻。羅山柄用。以喜怒進退人。子揚能講護善類。脫其荼毒。其卒也。張唯靜爲刻鶴山集。鄭澹泉爲作小傳。稱其天資闊達。不屑曲諱。願以舅氏驟起驟廢。坐是抑鬱以卒。羅山素不喜余。非子揚禍且不測。使子揚以縣令歸山。潔志峻節。

心迹之際嶙然矣。顧其意亦欲委曲盤桓。救之一於千百。其爲正人憐惜如此。余徧檢明詩總集。無錄子揚詩者。偶於溫州志獲詩二首。亟登之。

稼軒

太平無稿勸東封。且爲明時作老農。歲事經營春信後。衰衣料理雨聲中。百年自足江村味。一飽旋醅未
耜功。草澤行吟君莫問。遊人不是鹿皮翁。

喜歸雲峯山房

江上青山入望新。客衣初拂帝京塵。庭闈歲晚思歸養。雨露恩深許乞身。雲谷誅茅營別業。鶴山煮茗摘
先春。莫言林下無居士。東絹新裁折角巾。

黃直一首

直字以方。金谿人。嘉靖癸未進士。授漳州推官。以疏請建儲下獄。謫沔陽州判。再劾邵元節。廷杖。
戍雷州。隆慶初。贈光祿少卿。

羅漢洞

西風一蕭瑟。暇日暫遊山。花落亂鋪徑。雲來半掩關。流泉秋壑冷。疏磬晚龕閒。興盡自歸去。高僧猶未還。

方一蘭一首

一蘭字世佩。莆田人。嘉靖癸未進士。授刑部主事。改禮部。吏部。歷員外郎中。有少微堂集。

芝園定集。西皋方子詩。流藻繪於山川。播風標於簡冊。

留雲洞

望望瀨溪水。幽幽雲峯林。驅我輕車去。遲日載登臨。梧竹手移植。麋鹿相追尋。依依青楓樹。嚶嚶好鳥鳴。我興寄寥廓。斗酒聊自斟。解衣坐磐石。撫我膝上琴。他時畢婚嫁。長此棲雲岑。

鄭弼一首

弼字諧甫。莆田人。嘉靖癸未進士。歷工部郎中。出知雲南府。

夜坐

獨樹風漸生。四郊雨初歇。何處隔山鐘。聲聲帶明月。

黃禎一首

禎字德兆。安邱人。嘉靖癸未進士。授戶部主事。改兵部。進郎中。再改吏部。有北上。戶部。符臺諸集。

張貞渠邱耳夢錄。選部以人言免官家居。獨坐一小樓。日事吟詠。力追古作。

東田

東田陟蘭皋。別業山之麓。夕日銜嶺頭。山猿嘯東谷。颺颺晚風細。輕雲澹水木。曳杖尋友朋。溪月上茅屋。

華良佩一首

良佩字敬之。台州太平人。嘉靖癸未進士。除新城知縣。改貴溪。入爲刑部郎中。有海峯堂。前藝十
八卷。

靈谷菴讀道書

市居苦炎熱。逃住白石菴。開眼讀道書。峯影垂重檐。緬邈三秀圃。深沉九龍潭。簫笙自幽細。風日還清酣。
路逢王子晉。引致阿那含。親昵儻相問。餐霞隱終南。

金克厚一首

克厚字宏載。仙居人。嘉靖癸未進士。官刑部郎中。

遊天台

夜宿清溪覽桐柏。又從桐柏上瓊臺。仙人跨鶴歸何處。岩下碧桃花自開。

王度一首

度字律生。臨海人。嘉靖癸未進士。授兵部主事。歷員外郎中。出知建昌府。有石梁集。

望石樓

一路石山近石樓。十年詩興未曾酬。與君並馬談幽事。何日捫蘿到上頭。綠水平田初過雨。丹楓黃葉足

清秋年來蹤迹奔馳甚。聊向東溟學浪遊。

陳表一首

表字□□。新興州人。嘉靖癸未進士。官浙江道御史。

東湖驛題壁

雲峯日落暮猿引。江浦雨來歸雁忙。南入青山六十里。遙村烟樹影微茫。

吳鵬一首

鵬字萬里。秀水人。嘉靖癸未進士。授工部主事。累官吏部尚書。有飛鴻集二十卷。

次府江感懷呈劉憲使

上化灘前晚繫舟。黃茅嶺接楚雲秋。一天瘴雨來殘夜。千里蠻江有急流。知髮獨搔猿送淚。疏燈自照角深愁。卻憐留滯炎荒客。已似當年柳柳州。

毛衢一首

衢字大亨。吳江人。嘉靖癸未進士。官四川提學副使。有六泉集。

元日在涪

年華催客鬢。春意動山城。草樹初添色。溪流不換聲。煖將椒酒媚。織送菜盤青。時序偏驚眼。江籬愁與生。

徐獻忠一首

獻忠字伯臣松江華亭人嘉靖乙酉舉人除奉化知縣有長谷集十五卷

松風遺韻長谷集中五言如林密交加樹山迷去住雲七言門臨絕壁高於鳥竹引泉流曲似虹別浦煙光分蟹舍隔林晴日上魚梁殊自可誦

山居

高林深結宇礙屋有停雲。秋至驚黃葉。蕭蕭不可聞。客從樵徑入。泉向石根分。日暮牛羊下。時同麋鹿羣。

錢楞一首

楞字介夫臨海人嘉靖乙酉舉人官襄陽同知

春日

桃花杏花紅滿溪。野老候子來杖藜。斷崖水落雨初歇。春晴日出鶯亂嘯。酒盃入手醉不放。草色著眼望欲迷。最愛南鄰興更好。攜壺擬過石闌西。

孟思五首

思字叔正濬人嘉靖乙酉舉人選南陽通判未赴卒有龍川集二十卷

田按龍川與謝四溟盧次樞遊詩名不甚著於溟倒中時有渾成合格之作

愁

計拙甯爲隱。年衰未得閒。詩篇搔短髮。歲月落荒山。剝啄征徭急。尋常酒債艱。昔人何意適。瀨石弄潺湲。

暴雨

農事欣仍懼。天威暴暫迴。虹邊收斷雨。林外殷殘雷。薄暮酒杯進。小涼詩句催。西山足爽氣。倚仗看崔嵬。

送盧次樵遊南都

秣陵春色早。行客路從容。酒醒江船月。詩成野寺鐘。鍾山雲氣紫。澤國浪花重。莫聽竹枝曲。令人歸興慵。

雨晴

五更鳴雨忽斷絕。清曉皎日懸林東。坐枝黃鳥嬌睨睨。落地杏花殘白紅。青青麥苗抽短隴。飛飛閒雲開遠空。欲出山川泥不可。拂琴呼酒對春風。

夜

獨坐空階對綺琴。微微露下寒來侵。西風落木此時夜。明月在天何處砧。楚調悠悠吹遠思。胡笳故故送哀音。問誰今作燕山將。莫懈防秋萬里心。

劉陽一首

陽字一舒。吉安安福人。嘉靖乙酉舉人。除碭山知縣。徵授御史。引疾歸。起光祿少卿不赴。

書岡山

獨尋花徑覓幽居。借我書岡小結廬。十日西風人臥病。半床黃葉半床書。

明詩紀事卷十六

戊籤

龔用卿一首

用卿字鳴治。懷安人。嘉靖丙戌第一人及第。授修撰。歷諭德。終南國子祭酒。有雲岡選稿二十卷。渡江訪陳德英中丞。

曲岸橫橋通小溪。溪流清淺草萋萋。野花自落春歸去。澗戶無人山鳥啼。

袁袞十五首

袞字永之。吳人。嘉靖丙戌進士。選庶吉士。授刑部主事。改兵部。坐事下詔獄。編戍湖州。起南兵部主事。歷員外。出爲廣西提學僉事。有胥臺集二十卷。

四庫總目。袞詩不失體格。而特乏堅蒼。

藝苑卮言。袁永之詩。如王謝門中貴子弟。勸止可觀。

田拔永之與王履吉皆服膺空同。履吉未達。私淑而已。永之使大梁。空同賦相逢行贈之。空同獨曠之日。遺言必袁生表裏。其子伯材書乞永之作傳。永之又作悼空同詩云。李公海嶽秀。長庚兆靈異。發穎由西陲。空羣眇北冀。摛詞迫子長。作賦凌賈誼。

虎視萬古前。鴻冥陋李徐。何抗英特。晚達勞指示。金聲叶鈞韶。箴總集能事。煌煌弘治間。文章準天地。抗疏逐城狐。捩節抵關寺。八黨雖稽留。二張亦歛避。青蠅何羣飛。自首從吏議。淮南自狂謀。公也實奚累。繁臺昔罕稀。龍門幸無棄。白馬聆雄談。朱絃賞真趣。三復相逢行。網繆伏高義。哲人竟山頽。仰止庶可企。永之詩。雄詞快句。下筆凌厲。而直易之篇。傷於易盡。無復頓挫。含蓄之妙。惟五律獨多合作。其與顧華玉論詩。謂四言必以三百篇爲法。而取材於漢魏。今玩集中。此體了無高唱。欲副斯言。眇若河漢矣。

劉推官孟材過飲山樓

日掩山中扉。忽枉府中駕。登樓望澄湖。列宴臨虛榭。芳園榮槿葵。遠洲環桑柘。新篔冷風來。清陰滌煩夏。誦君瑤華篇。逸思騁陶謝。蘭厄且獻酬。焉知下其夜。

送沈山人玉父遊武夷

武夷三十六高峯。層巒削壁何重重。清溪九曲似明鏡。曲曲倒浸青芙蓉。仙人控鶴去已杳。沈生好奇快幽討。禮斗壇前吹紫簫。昇真洞口探瑤草。幔亭宴罷寂無聞。何日虹梁度綵雲。仙籍倘書余姓字。齋心同謁武夷君。

邵成都仲材過飲草堂醉贈短歌

君不見石崇金谷今安在。謝安東山陵谷改。人生忽若草頭露。河清海變誰能待。成都太守休嘆嗟。當年同看長安花。一朝挂冠武林下。荷鋤學種青門瓜。世間翻覆無不有。浮雲富貴真芻狗。何用長存身後名。

祇須痛飲杯中酒。君家兄弟二陸才。黑頭早賦歸去來。古人往往困屠釣。我輩落落俱蒿萊。西湖春來淨如鏡。南峯北峯翠相映。六橋煙柳隱漁舟。孤山草樹迷樵徑。林逋逝矣不可攀。千秋放鶴何時還。與君笑傲拂衣去。流水桃花心自閒。

夏日莊居

門前新漲滿。恰好沒漁磯。下釣驚鷓浴。開簾放燕飛。納涼憑水檻。習靜掩山扉。蕭散無拘束。林泉志不違。飲芙蓉桂花下。

幽居屏人事。散步窺西園。愛此石上坐。獨開花下尊。迎風桂子落。照水芙蓉繁。日入且歸去。沈冥誰共言。摘星樓

法界棲隋苑。星樓委廢臺。高秋躍馬望。遺事使人哀。池想龍舟戲。堤聞玉輦來。南朝歌舞地。何處不蒿萊。宿天界寺半峯房

殘照已全匿。空門猶半開。行人失歸徑。落葉厚蒼苔。暝色野煙合。寒聲山雨來。遠公應好客。宿鳥莫相猜。靈巖

君王歌舞地。樵牧使人哀。土木遺危刹。丹青委廢臺。草當香徑合。花傍鹿場開。且盡登臨興。山河望裏來。

登寶華諸山

夙有登臨興。春遊愜賞心。山盤數嶺盡。寺轉萬松深。樹古同僧臘。泉多雜梵音。仙津何處問。卽此可投簪。
蓮蕩舟宴

新霽恍無暑。微風宜放船。捲簾親水鳥。解纜惜吟蟬。玉帶休停手。青房不論錢。晚來花霧裏。縹緲欲凌僊。
送顧秋官伯從赴留都

伯也今司直。西曹俗事無。簿書多暇日。山水羨清都。柳綠盧龍觀。花香玄武湖。莫辭刀筆恥。讀律乃通儒。
送僧歸金山

高僧何處住。孤錫向空飛。驛樹連天盡。江帆帶雨歸。潮聲喧講座。山色映漁磯。遙憶東林下。精廬隱翠微。
送慧公住持寒山寺

古寺人天外。精廬杳靄中。君依蓮社去。心與白雲同。溪水看清淨。寒山對苦空。何時聽說法。爲我暢玄風。
東齋

楓葉紛紛落。荒徑無人掃。萬念杳虛寂。閑門閉秋草。

野步

新月生西嶺。窈窕穿叢薄。林深不逢人。時有松子落。

蘇祐八首

祐字允吉。一字舜澤。濮州人。嘉靖丙戌進士。除吳縣知縣。改束鹿。入爲監察御史。遷江西提學副使。歷山西參政。遷大理少卿。以僉都御史巡撫保定。進副都御史。改撫山西。徵拜刑部侍郎。以兵部侍郎總督宣大。進兵部尙書。削籍。尋復官。有穀原集十卷。

四庫總目。祐詩音節琅琅。都無新意。

四溟詩話。陳一菴太守謫戍瓊州。每聞督紳問盛稱蘇舜澤總制雪詩。初隨鳴雨喧相續。轉入飄風靜不聞。寫景入微。非老手不能也。

海嶽靈秀集。允吉詩。格不高而氣逸。調不古而情眞。

明詩選。陳臥子曰。司馬詩沈雄雅練。邊塞之篇。不愧橫槊。七律格律精嚴。聲調清亮。咄咄逸羣而上。

列朝詩集。允吉詩。蓋豪伉浪。奔放自喜。今人不復詳其風格。徒以其聲調叫號。近於雄渾。遂謂關塞之篇。不愧橫槊。何相者之舉肥也。

田按。舜澤詩是李何成派。昭聖太后輓章。忠愛悱惻。不愧詩史。可與朱必東諫慈壽誕辰疏并傳。

詠郭林宗

高張琴絕絃。暗投珠委路。嗟哉東都士。禍樞踵危步。穆穆郭林宗。深心託幽素。含章貞自抱。識微幾早悟。懿彼烝民章。明哲伊誰賦。

寄陳文晦侍御

良晤阻歡讌。停雲方在茲。東風吹野草。綠遍瓊華池。嚶鳴黃鳥聲。流轉綠楊枝。感物各有懷。婉孌惜芳時。攬轡眺連岡。迢遞滯前期。相思邈以緜。庶用證此辭。

戊寅元日

萬里王正月。千官漢侍臣。履端空鼓角。行在尙風塵。烽火新通代。鑾輿近向秦。已聞催羯鼓。夜半勅迎春。

河東道中

蒲坂水仍抱。首陽山故連。重華不可見。孤竹轉堪憐。煖色薰楊柳。春聲換杜鵑。河流日滾滾。百丈禹門前。

昭聖皇太后輓章二首

慈極空遺誥。僊輿去不還。千言臨內殿。萬姓哭深山。雉扇秋新掩。龍髯歲久攀。併將江上淚。霑灑秦陵間。

先帝留弓劍。千秋傷若何。竟違西內養。還葬北山阿。玉殿涵霜露。玄宮隱薜蘿。兩朝侍臣在。哭向白雲多。

真宗汾陰行宮有御製碑四金人

宋帝行宮汾水邊。翠華想像杏風煙。天書雲篆今何在。玉檢金泥竟不傳。伐石自鐫西祀日。渡河翻恨北征年。金人十二多零落。雙立猶看輦道前。

李牧祠下眺望作

泉源冰竇入春分。鳥語花香遲客聞。戍鼓寒沈龍塞月。夕烽晴照雪山雲。年來近野多戎壘。時過迴陽幾

雁羣險絕頗憐今昔地。無令但說李將軍。

張整一首

整字濟甫。南昌人。嘉靖丙戌進士。選庶吉士。改禮部主事。歷員外郎中。出爲浙江提學副使。歷遼東苑馬卿。廣東布政使。南太常卿。就改大理卿。擢刑部侍郎。進南兵部尙書。有遷鶯館集。

竹山洞

洞門虛敞幾重關。怪石玲瓏水竹間。滿地白雲流不住。仙家歲月自消閒。

陸埏一首

埏字秀卿。嘉善人。嘉靖丙戌進士。授南刑部主事。遷員外郎中。改北。再改南兵部。出爲常德知府。改武昌。再改岳州。擢太僕少卿。歷南鴻臚卿。就改光祿卿。以僉都御史巡撫河南。有簣齋集十卷。外集二卷。

四庫總目。徐階諱擢菴。稱擢讀書。恥爲章句。嘗曰。人心與事物不相離。言事物而徒求諸心者。俗學也。故集中有傳習錄存疑。不附和陸學。又有詩傳存疑。亦不盡墨守朱學。持論可謂篤實。詩文多近質朴。

訪柯侍御九華山留贈

趨朝同聽午門鐘。九陛森嚴虎豹雄。何事歸來化城臥。硯屏閒弄九芙蓉。

張子立一首

子立字原禮。黃人。嘉靖丙戌進士。除行人。擢湖廣道御史。累官僉都御史。巡撫延綏。謫戍固原。

黃花堡

關塞雄三鎮。風煙劇五戎。胡塵驚代北。漢月照雲中。戰士黃沙磧。將軍白玉驄。防秋烽火近。何日捷音同。

屠應竣四首

應竣字文升。平湖人。太保勳子。嘉靖丙戌進士。選庶吉士。改刑部主事。再改禮部。歷員外郎中。仍改修撰。歷侍讀。進春坊右諭德。有蘭輝堂集四卷。

四庫總目。應竣爲文善。比事屬辭。詩法汎濫。諸家時有獨造。然牽於華藻。蘊蓄未深。

秦泉集。漸山英穎天出。文不待蒐羅綴緝而自充遠。正誼發乎構思。浩氣動乎操觚。卓識烈於秋陽。危言皎乎金鏡。

明詩選。陳臥子曰。屠公典麗流暢。亦足名家。

靜志居詩話。論德取材六代。具體初唐。翻若春葩。將以秋實。是衆作之有滋味者。

田按。漸山文長於摹古。上規兩漢。下效唐人。格雖沿古。而意取切今。非徒以字句爲藻繪者。詩亦有氣格。

上之回

上之回。乘六龍。龍文五色雲九重。參駕日月前。飛虹。逐虜。蕭關道。祀帝甘泉宮。別館迢迢與天通。屬車絡繹渭橋東。翻翻豹尾翔煙空。瑤池終燕歌秋風。歸來萬歲樂無窮。

夏日延綏捷至奉寄總制唐相公

北虜安危繫。中原節鎮雄。君王親授鉞。相國坐臨戎。瀚海軍麾動。狼山轉戰空。遙聞六月頌。不數太原功。

送唐生

杖策欲誰親。侯門不禮賓。空彈馮氏鋏。莫救范睢貧。玉露凋紅樹。金風起白蘋。蕭蕭南去雁。飄泊自爲鄰。

朝陵

本朝宮寢居庸北。百二河山枕上都。隧道陰陰連大漠。金輿寂寂闕蓬壺。天留碣石爲華表。水繞桑乾作鼎湖。欲寫神功鐫嶧頌。窮崖絕壁倚天孤。

王格二首

格字汝化。京山人。嘉靖丙戌進士。選庶吉士。改永新知縣。遷刑部主事。改戶部。歷員外郎中。出爲河南僉事。坐事削籍。授太僕少卿。致仕。有少泉集三十三卷。

田按。汝化盛有時名。詩多率意。不堪留賞。

燕

高棟鬱嶙峋。年年一度春。堂前知幾主。來埽畫梁塵。

望太室

中嶽遙開洛水濱。東風吹夢上嶙峋。二十四峯春寂寂。碧雲何處訪眞君。

陸粲四首

粲字子餘。一字浚明。長洲人。嘉靖丙戌進士。選庶吉士。改工科給事中。坐劾張璉、桂萼。謫都鎮驛丞。遷永新知縣。有子餘集八卷。

四庫總目：粲早入詞館。負盛名。洎官工科。以劾張璉、桂萼。僣塞終身。亦緣是息意邱園。研心經史。學問具有根底。又爲王鑿門人。其授受亦有端緒。摛夫謠有香山新樂府遺音。未可以篇什無多。遂謂曾子固不能詩也。

弇州史料：真山爲文。精雅有法。得理氏及韓、歐遺意。國雅。陸給事浚明長於古風。至近體云。無夜不成寐。有書空道歸。郡古留銅狄。堂深繡土花。又無因得似宮前柳。時有長條拂御衣。有句如此。亦李唐西傑之選。

黃宗羲明文海：真山文秀美平順。不起波瀾。得之王文恪居多。乃歐陽氏之支流。

列朝詩集：子餘詩不多。獨出機杼。不落窠臼。

田按：世傳胡孝思爲蘇州太守。試士。賞拔王履吉爲第一。子餘少後。及子餘衡文浙江。孝思適以參政。公燕日。相對惛怳。余檢子餘集。致天水胡公書。情致不淺。或世誤傳也。子餘以劾張桂。謫吾黔。都鎮驛丞。驛舍廢。僦居平越。與郡人士講學。自是有擬科目者。子餘詩長於古體。存詩不多。咸自精美。以世多賞其文。故爲所掩耳。

邊軍謠

邊軍苦。邊軍苦。自恨生身向行伍。月支幾斗倉底粟。一半泥沙不堪煮。盡將易賣辦科差。顆粒那曾入鍋

釜官逋私債還未足。又見散銀來糶穀。去年糶穀揭瓦償。今年瓦盡兼折屋。官司積穀爲備荒。豈知剝肉先成瘡。近聞防守婺川賊。盡遣丁男行運糧。老弱伶俜已不保。何況對陣臨刀鎗。宛宛嬌兒未離母。街頭抱賣供軍裝。閭閻哭聲日振地。天遠無路聞君王。君不見京師養軍三十萬。有手何曾捻弓箭。太倉有米百不愁。飽食且傍枸欄遊。

送魏師召之蕪湖

魏子昨捧分司檄。與我青瑣門相逢。朱袍卓帽氣適逸。佩刀左右雙盤龍。燕山雪消河冰泮。玉節辭天春未半。江東花滿姑孰溪。君到春衣應未換。謝公宅前芳草生。李白墳頭江更清。日出青山看舞鶴。月明采石聽流鶯。多君俊邁今無匹。四十爲郎頭正黑。文貞遺笏世珍奇。知古流風本仁直。都門送爾惜離羣。日暮行歌潞水雲。明年躍馬東城陌。楊柳青青正憶君。

上饒道中

桃花參差柳葉多。新雨灘頭生綠波。一夜東風吹驛舫。榜人齊唱弋陽歌。

長門怨

金屋承恩事已非。玉顏憔悴度春暉。無因得似宮前柳。時有長條拂御衣。

江以達一首

以達字于順。貴溪人。嘉靖丙戌進士。授刑部主事。歷郎中。出爲福建僉事。遷湖廣提學副使。有午坡集四卷。

上清祝聖逢孫默齋使君感贈。因期同陳午江柱。顧山中。

憶別無今日。生還有歲年。那期千里合。相見一潸然。往事秋雲外。幽懷落葉前。何時與同好。方駕枉林泉。

林雲同一首

雲。同字汝雨。莆田人。嘉靖丙戌進士。選庶吉士。授編修。累官南工部尙書致仕。起南刑部尙書。未赴。贈太子少保。諡端簡。有讀書園集。

遊玉澗和他石韻

出郭神應豁。登臺氣益涼。風回青入座。澗曲碧流觴。林鳥迎風轉。池荷映日香。碧筒猶屢勸。待月恣徜徉。

翁萬達三首

萬達字仁夫。揭陽人。嘉靖丙戌進士。授戶部主事。歷員外郎中。出爲梧州知府。歷廣西按察副使。

遷浙江參政。改廣西。歷四川按察使。陝西布政使。以右副都御史巡撫陝西。進兵部侍郎。總督宣

大山西保定軍務。歷左都御史。進兵部尙書。以事降兵部侍郎。兼右僉都御史。經略紫荊關。尋斥

爲民。起兵部尙書。未赴卒。贈太子少保。隆慶中。追諡襄毅。有思德堂集二卷。

田按尚書以武功著不以詩名而橫槊之餘自饒豪氣

鳳城水漲

四月潮城溪水漲。老鴉洲畔橋欲平。娟娟鷗鳥踏浪喜。短短竹枝搖水清。得風舸舸相對發。入暮蛟龍時一鳴。北來客子念歸久。棹月臨流雙眼明。

枳兒嶺

枳兒嶺上煙火微。枳兒嶺下行人稀。長風捲樹葉飛落。道是將軍射虎歸。

送胡思岩

沙日茫茫塞草黃。塞風獵獵暮天長。手拈羽箭故人贈。射殺陰山雙白狼。

李元陽三首

元陽字仁甫。大理太和人。嘉靖丙戌進士。除江陰知縣。徵授御史。出爲荊州知府。有中谿漫稿、豔雪臺稿。

田按仁甫人楊門六子之一。詩品在弘山、愈光之次。

晚步戴氏園亭

小檻橫山色。幽居隔世氛。檐垂雙澗瀑。窗占五峯雲。竹影風前亂。花叢月下分。石鑄堪煮茗。遲客坐爐薰。

京都九日

兩度重陽逢客裏。蹉跎已覺賞心違。此時孤館堪流淚。何處高臺可振衣。黃菊向人徒自好。青山待我不能歸。茫茫塵海空奔走。欲傍沙鷗問息機。

別金陵泛舟懷南臺諸子

秋月雁空度。寒江舟自閒。時時回首望。何處是鍾山。

崔廷槐七首

廷槐字公桃。平度州人。嘉靖丙戌進士。授戶部主事。歷郎中。出爲四川僉事。有樓溪先生集三十卷。

田按。樓溪詩清麗可誦。

赤壁

嘉魚縣南石頭驛。石上大書赤壁字。龍涎蛟沫苔蘚封。點波猶帶風雲氣。攀蘿直上青林顛。千古封疆落眼前。英雄戰壘不可辨。但見萋萋江草凝寒煙。解衣沽酒楊花村。老翁擎出雙瓦盆。揮杯且弄山間月。弔古還招江上魂。黃州逐客玉堂仙。水落山高載酒船。片帆未挂臨皋岸。兩賦空令百代傳。

臨淄

山縣古臨淄。城廡淨晚颺。呼僮解寶劍。邀客換金卮。雲抱齊王塚。川回夏禹祠。不堪風雨夜。花落野棠枝。

王喬洞

鳧鳥朝元去。巖扉對日開。雲封春藥碓。花暗講經臺。挂壁猿猶至。衝煙鶴未回。何緣捐玉佩。從爾訪天台。

樓溪十景錄二

吾愛纓轡澗。清瑩鑑毛髮。中有避世人。臨流弄明月。
吾愛樓子石。秋水涓涓溜。循級下三疊。哀此雲和奏。

潼江

潼川江水抱村斜。兩岸青山似若耶。一葉小舟雙蕩槳。月明撐入刺桐花。

諸將

遼東傅瀚雖云老。猿臂猶彎兩石弓。獨倚營門無箇事。閒將獵騎捕黃熊。

田汝成四首

汝成字叔禾。錢塘人。嘉靖丙戌進士。授南刑部主事。歷員外。遷禮部郎中。出爲廣東提學僉事。降
滁州知州。遷貴州僉事。進廣西參議。有叔禾集十二卷。

四庫總目。汝成歸田後。盤桓湖山。搜別名勝。殊以風流自賞。其詩隊杖修整。娟娟秀出。然使逢大敵。則未足相當。

國雅田學憲叔禾學古才瞻網羅舊聞多所著述詩古體出入騷選頗沈鬱豪縱如探珠合浦夜光迫人往往眩目

靜志居詩話叔禾詩品在范善山江午坡間
田按叔禾宦遊所至撰炎檄紀聞歸田後撰西湖遊覽志及志餘可謂好事詩格不甚高時有俊語

萬民望久寓宜興詩以招之

浪迹名山恣遠探。白雲何處可停驂。鶴迷煙冷張公洞。花落春深玉女潭。玄酒未醅慚獨酌。丹經初試擬同參。爭如舊隱西湖曲。五柳毵毵杜草菴。

胡十八

新翻胡十八。急調出西涼。不入鴟絃細。能隨鶻管長。

憶張百戶一夔

不見西村張戶侯。惜花憐月近誰儔。南鄰酒伴應無恙。日日溪邊放小舟。

廣州竹枝詞

窄袖青衫白帽巾。波羅廟裏賽新春。聖童巫媪村村會。疊鼓鳴鑼拜海神。

樊鵬二首

鵬字少南。信陽州人。嘉靖丙戌進士。累官陝西按察僉事。有集。

田按：少南，大復弟子，五言差勝。

大悲閣作驛宋太祖常駐在真定

寶閣開金地，雲梯上紫霄。君王留勝概，人代已三朝。晉水寒聲近，常山秋氣遙。如何憑檻處，還似翠華飄。

東林寺

遠公不可見，此寺乃東林。客路登臨地，浮雲世代心。門幽山霧集，逕曲野花深。夕坐焚香榻，惟聞鐘磬音。

聞人銓一首

銓字邦正，餘姚人。嘉靖丙戌進士，除寶應知縣，擢山西道御史，歷湖廣按察副使。有蘭芷集。

楊棧嶺

楊棧接高天，白雲山下看。花落雨餘雨，風吹寒食寒。縱目黃山外，停驂紫漢間。斜陽過廣惠，始覺有人寰。

范言一首

言字孔嘉，秀水人。嘉靖丙戌進士，除蒲圻知縣，改保定教授，歷國子監丞，遷大理府同知，有善陽集、四音存稿。

湖上

誰開湖上閣，獨對晚來曛。鶯語排花出，潮聲帶雨分。遙看鄰牧散，閒與海鷗羣。自笑江干老，悠然臥白雲。

岑萬一首

萬字體一順德人嘉靖丙戌進士歷官河南布政使有蒲谷集

秋江玩月歌

今夕此何夕。弄月江上秋。秋江水清淺。上有黃蘆洲。把酒問明月。清光今幾何。如何今年景。還比去年多。波光月色兩相射。與君玩之發浩歌。斟美酒。百千巡。鸕鶿解換玉樓春。竹間村犬吠。衍衍山風颯。颯吹殘雲。漁笛一聲愁殺人。

郭鳳儀一首

鳳儀字□□祥符人嘉靖丙戌進士累官按察副使

送王後隅歸揚州用韻

維揚渺何許。引睇暮雲東。四月桐花老。扁舟出楚中。相思千里月。歸興一帆風。我亦懷鄉者。因君寄桂叢。

王宣一首

宣字敷言臨海人嘉靖丙戌進士官御史

日暮抵萬年寺

台山高不極。日暮倦躋攀。水向天邊落。人從雲際還。捫蘿轉絕壑。坐石俯深灣。檜竹禪房靜。逢僧意自閒。

祝文冕一首

文冕字□□德興人嘉靖丙戌進士。

檀嶽峯

檀嶽高如許。煙霞自往來。桃花馬頭落。莫認是天台。

陳仲錄一首

仲錄字子載。武陵人。嘉靖丙戌進士。除新城知縣。累官山東按察副使。有集。

德山寺和項節推韻

招提十載湖前遊。依舊青山枕碧流。鉢裏龍眠雲自透。雨中花落鳥空愁。金仙勝界塵蹤絕。玉帶高風過客留。欲向山靈分半隱。題詩先上最高樓。

谷繼宗一首

繼宗字嗣興。歷城人。嘉靖丙戌進士。官知縣。

山左明詩鈔。王季木齊音詩。七子爲詩本四家。太常筆底盛煙霞。華峯一柱誇難盡。翠玉瓊响更滿車。注云。濟上之詩。只邊庭實爲鼻祖。若劉函山。李于鱗。許殿卿。谷少岱。不可勝數。濟南名士多。從昔然矣。

贖舊亭後有感

可憐一曲吟詩野。乘作三年賣酒家。此日草堂歸舊主。傷心不見拒霜花。

李學詩一首

學詩字正夫。平度州人。嘉靖丙戌進士。累官中允。有桃花洞集。

聽蜚

黯淡籬邊月。淒清竹裏風。草堂秋夜永。獨坐聽寒蜚。

張鐸一首

鐸字西林。壺關人。嘉靖丙戌進士。選庶吉士。改三原知縣。遷戶部主事。改兵部。歷員外郎中。出爲湖州知府。有西林集。

崇雲寺

萬壑中開小有天。人傳卓錫已千年。蒼煙一抹丹崖合。靈石雙泉樹杪懸。貝葉翻時龍護法。蒲團入定虎參禪。一區靜土眞天設。社結青蓮共往還。

高遠一首

遠字近思。上元人。嘉靖戊子舉人。官汝州知州。有飲虹稿。

金陵瑣事。羽伯陳公評青溪社中四子詩云。高汝州近思。雄壯奇拔。馬國學承道。博雅典則。金文學子坤。清新秀朗。金孝廉子

有。則兼總諸長。詞義雙美。夫金氏昆玉。尙有詩集。若高馬二公。人且不知姓名也。况於詩乎。

弘濟寺

捫葛人從石壁行。入門坐久聽鐘聲。江豚吹浪出還沒。野鷺得魚棲復驚。孤嶺半遮春樹密。亂帆斜挂夕陽明。眼前似此流光美。不用登臨感慨生。

于玘一首

玘字子珍。東阿人。嘉靖戊子舉人。官平涼同知。有于氏詩略。

海嶽靈秀集。冊川詩。慨近工部。

滄州

九月一日渤海郡。涼風落葉何紛紛。孤舟伏枕逢秋色。長路停樽對暮雲。荒草亂迷龔遂廟。清川曲抱獻王墳。古今蹤迹堪惆悵。獨向滄波弔夕曛。

孫宜五首

宜字仲可。華容人。嘉靖戊子舉人。有洞庭漁人集五十卷。

藝苑卮言。國朝學杜者。華容孫宜得杜肉。

國雅。孫漁人新聲奇調。河嶽隱淪之賢秀者。句云。嘯裏驚山鬼。談中有谷神。角應江聲起。雲兼海氣浮。其品當在李唐二孟之間。

列朝詩集。仲可爲兒時。得侍何仲默。長而頌慕其風流。上春官不第。肆力詞賦。以不朽自命。自稱洞庭漁人。與漁人張含。秦人左國機。吳人黃省曾。皆以老舉子有名於時。仲可詩多至三千八百餘首。王元美評詩云。華容孫宜得杜肉。余觀其詩。割擬字句。了無意味。求杜之片鱗牛爪。不可得。而况其肉乎。

靜志居詩話。洞庭漁人詩。滔滔莽莽。下筆不休。亦楚產之傑出者。

苦雨走筆簡王生

城東草堂白晝開。洞庭主人騎馬來。昨當驟雨暗江縣。疾風迅雷中夜迴。堂前淤泥一尺深。欲往問子偕。醉吟蓑衣溼盡屐齒折。縱有美酒同誰斟。黑雲漸破雨漸微。青山映湖鷗出飛。花風宕煙畫漠漠。竹日澹影晴暉暉。我方臥病江城頭。君也磊落還舊儔。卽須度竹穿花去。爲買高歌伴醉遊。

閒居

苦憶南湖子。平生野興高。水傳滄海興。山有白雲謠。酒伴時相過。綸竿日自操。深居憐寂寞。飛夢故蕭蕭。

亭上對雨

對雨高亭暮。焚香獨院秋。水陰依檻合。雲氣隔城浮。羅竹占寒意。漁樵送野謳。葛巾欹側久。隨地卽林邱。

江漲二首

五月六月雨不歇。章華城邊江水來。排山觸石須臾事。未道瞿塘滌瀨堆。洞庭南望接江鄉。九派波流日渺茫。更遣岷嶓連楚鄂。卽疑巴蜀是瀟湘。

顧聞一首

聞字行之吳人嘉靖戊子舉人

岳岱今兩瑤華九嶷山人才華瓌麗通敘豐長究其所歸靡不有自至於染翰人稱並美

清明日過楊村

楊柳蔽楊村。桃花古渡昏。清明猶作客。白日正銷魂。天地催時序。關河杖酒尊。何爲千里夢。一夜落吳門。

鄧遷一首

遷字世喬閩人嘉靖戊子舉人官嘉興通判有別駕集

夜白紵歌

明月滿庭涼夜時。桂宮歌舞爲君施。纖腰嫋嫋聲遲遲。金蓮照耀光陸離。瓠犀螿首青蛾眉。銅壺玉漏夜何其。酌酒勸君君莫疑。人生樂在心相知。

明詩紀事卷十七

戊籤

羅洪先十一首

洪先字達夫吉水人嘉靖己丑第一人及第授修撰進左春坊贊善疏請朝東宮忤旨能爲民隆慶初贈光祿少卿諡文恭有念菴集二十二卷

司勳集羅子習於道論卒爲詩病

胡直衡廬精舍藏菴念菴先生學凡三變而文亦因之少學文做李空同襲之曰是未見端委者既入宮寮又與唐荆川趙汝谷相講磨大放於文久之語直曰吾無意爲之矣移答友人取譬於水曰古之人有能之者必其中有自得實見斯道之流行無所不在雖欲不爲波濤滿瀾之類不可得也

列朝詩集達夫詩文託寄可觀時人謂其早經廢棄久處民間往往深於致情易於興感殆亦近於言志者也

靜志居詩話達夫遠師擊壤近仿白沙定山然爽氣尙存未墮塵霧

重至仙居寺

山雨鳴鐘餘阡陌斷行迹高利隱回岡流潦汎春澤新構門巷更重臨歲月積訪禪草翳徑繙經塵在席

僧齋餘舊突。梵相懸頽壁。乍見驚夢寤。沈思悔形役。逝者今若何。躊躇增太息。

種蔬

謀生無遠術。樹藝有良時。嘉蔬來何遙。故人手致之。荷鋤出荆扉。荒榛力所披。景鑿苗易瘠。土薄根不滋。惡壤與敗株。能令蕃者衰。兢茲分陰功。日暮未辭疲。所欣寡逢迎。燃薪繼頽曦。黯黯開谷陰。柔芳亦離離。抱甕理晨夕。療饑方在茲。

種菊

結宇灌木下。庭除幽自閑。豈無豐草容。柔綠爭春妍。常恐秋風至。清霜凋故顏。萬族忻時榮。保終良獨難。惟此黃金花。可以結餘歡。

懷友

獻策動京華。還山種桂花。從知臥金馬。不及練丹砂。五月盧敖杖。三秋博望槎。伊人竟何在。歲歲望兼葭。

寄楊實卿

燕歌別易水。蜀道隔湘雲。江柳年年綠。攀條獨憶君。嘒援渺何在。來雁不堪聞。莫就成都卜。玄經自有文。

贈高洲劉述文

高洲似赤城。繞屋種黃精。溪水桃花色。煙林布穀聲。記年從漢魏。混世狎公卿。莫學劉郎隱。尋山更得名。

將入衡山貽李文輿

分袂懷蘭畹。飛帆倚桂舟。白雲何處所。綠樹是南洲。古嶽連雲起。清湘抱月流。鳳笙如可望。佇爾太清遊。

劉生

劉生多意氣。執別歲華深。一葦不肯渡。四愁空自吟。春江斜檻外。暮雨對峯陰。古調人多棄。泠泠鳴素琴。

同江

同江二月如潑醅。春水自上鵝洲來。一聲白鳥掠波去。無數好山當面開。漁樵苦說生事薄。笳鼓時聞驛使催。何日昇平棄棹散。扁舟應傍釣魚臺。

駕幸太學陪祀孔廟

萬乘出銅龍。千官扈蹕同。金根下星漢。翠葆麗春空。幄啓張皇邸。庭趨奠澤宮。詩因八佾變。是年去王號稱先師始用祀豈一牢豐。法駕橋門轉。周廡陞楯通。垂衣臨六館。委佩引羣工。見聖青衿合。橫經黼座東。嘉賓來聖裔。憲老憶申公。竊慕臣談業。躬逢帝典降。辟離遲獻頌。紀事序王風。

南旺湖

百年風景茲奇絕。到處江湖卻欠詩。驢背不歸秋易老。黃花也解笑人癡。

程文德三首

文德字舜敷永康人嘉靖己丑第二人及第授編修以事下詔獄謫信宜典史量移安福知縣遷兵部員外歷郎中擢廣東提學副使未赴改祭酒拜禮部侍郎改吏部再改南工部以言事除名萬歷初追贈禮部尚書諡文恭有遺稿三十二卷

芳桂

因君芳桂。鵠懷子雙桂堂。秋風賦招隱。清夢到江鄉。

題畫

雲深地僻草堂開。門巷經旬長綠苔。何處故人驚午夢。溪橋拄杖帶琴來。

宿天遊菴

天遊忽上憑虛閣。洞宿仍分絕頂雲。夜靜千峯涼月白。吹笙疑是武夷君。

胡松四首

松字汝茂。滁州人。嘉靖己丑進士。除東平知州。遷南禮部主事。歷郎中。出爲湖廣參議。進山西提學副使。就遷參政。以事斥爲民。起陝西參政。歷浙江按察使。進布政使。以右副都御史巡撫江西。進兵部侍郎。改吏部。遷南兵部尚書。徵拜吏部尚書。贈太子少保。諡恭肅。有集八卷。

同戚南玄渡江游宿長干諸山寺

桂館秋逾淨。荆扉晝不開。雨花飄法界。淪茗坐清齋。閣外江光動。檐前樹影來。禪心與鷓鴣。終日共徘徊。

桃川次韻

神仙丹洞古。樓觀白雲深。野鶴盤空下。江猿擁樹吟。地偏稀外事。坐久愜幽心。芟服終當製。行歌復弄琴。

山居雜興

隱几花千樹。看山石四鄰。翛然無一事。疑是葛天民。

旋途雜詠

花開煙嶼香風轉。霞映江波錦浪生。仙客船頭吹玉笛。不知何處是瑤京。

蔡雲程一首

雲程字亨之。臨海人。嘉靖己丑進士。授兵部主事。累官刑部尙書。贈太子少保。有鶴田草堂集十卷。

再遊雞鳴寺

城隱空中閣。林開象外天。松門芳草接。石磴碧蘿懸。花雨滋嵐翠。香雲覆澗泉。逢僧竹房裏。處處裊茶煙。

楊博一首

博字惟約。蒲州人。嘉靖己丑進士。除盩厔知縣。改長安。徵授兵部主事。歷員外郎中。出爲山東提

學副使。超拜右僉都御史。巡撫甘肅。進右副都御史。召拜兵部侍郎。經略薊州保定。遷總督薊遼。保定軍務。歷右都御史。進兵部尚書。加太子少保。改總督宣大山西軍務。加太子太保。改薊遼總督。召還。加少保。改吏部尚書。進少傅兼太子太傅。少師兼太子太師。贈太傅。諡襄毅。有詩文集十二卷。

田按：襄毅數歷九邊。屹爲重鎮。身繫安危者三十年。其送程鑾行邊詩云：何似籌邊相。全收出將功。九霄雙赤鳥。萬里一彤弓。襟抱可想見也。

送雷侍御出按甘肅

繡斧西巡日。河關碧樹齊。九重勤一使。萬里慰羣黎。回紇識驄馬。番戎謝鼓鼙。還知登望處。威振玉門西。

鄭大同一首

大同字皆吾。莆田人。嘉靖己丑進士。授行人。遷吏科給事中。歷都給事中。進南右通政。就遷太僕卿。歷太常。大理卿。擢刑部侍郎。贈尚書。有居俟堂集。

遊金山

九折趨溟渤。金山遠勢躡。孤根出窟窟。一柱控龍門。石露秋逾瘦。江平浪欲吞。蓬萊吾已得。應不數崑崙。

鄭綱一首

綱字子尙大同弟嘉靖己丑進士累官兵部侍郎總督兩廣

東南嶠外詩話鄭葵山與兄于野同成嘉靖己丑進士同登鄉貳有黃田驛句云春山入戶飛嵐溼古樹當門白晝昏可入畫稿

秋懷

霜前疏柳蕭蕭落水上寒雲淅淅浮莫怪登樓賦懷土秋風偏感仲宣愁

林恕四首

恕字道近福州長樂人嘉靖己丑進士除□□知縣遷都察院經歷出爲雷州知府累遷雲南按察使有西橋集

靜志居詩話西橋近詩依然林子羽王安中流派

滇南春暮寫懷

臺署春已歸風雨連朝夕庭幽花影沈砌冷苔痕溼愁人思轉深啼鳥聲偏寂悵望倚危欄簾捲湖山碧

過偏橋驛

牂牁戍壁鎖重鎖疊嶂凌空擁翠鬢萬里風塵連越雋九溪煙火接荆蠻星橋日落笳聲急雲邏春深草色斑聞道龍標圍未解何人橫劍倚天山

夜泊揚州

廣陵城外水雲幽。萬里歸程一葉舟。山勢北來衝海斷。潮聲東去入河流。瓊花觀裏春光去。楊柳塘邊野色秋。休聽秦淮商女曲。阿儂亡國是迷樓。

遊崇信寺

巢雲方丈鎖潺湲。流水柴門永日關。萬壑煙光秋雨後。一庭草色夕陽間。香殘石鼎僧初定。簾捲巖扉鶴未還。暫息雙林了真諦。倚闌邀月獨看山。

楊祐一首

祐字汝承。錢塘人。嘉靖己丑進士。選庶吉士。改刑部員外。出爲曹州知府。進江西僉事。改湖廣。有丹泉集。

萬歷錢塘志。汝承詩清俊。能爲顏鮑家言。

靜志居詩話。汝承諸體瀟灑拔俗。

郡齋自遣

丹泉野人木石姿。服官三十髮成絲。逢人齟齬苦不達。閱世喧卑翻自疑。礪田猶足飯黃犢。空谷能忘歌紫芝。攬衣拔劍忽自笑。浮雲四顧茫何之。

吳子孝十首

子孝字純叔長洲人嘉靖己丑進士選庶吉士改台州推官遷廣平通判徵授南吏部主事改禮部遷光祿丞出爲湖廣參議有玉涵堂稿十卷

司勳集純叔玉涵堂詩綴詞婉以麗御氣雄以健抒思優以備援事典以則振響和以平才情信美與寄尤深如汝官漳水北今得定州書工於發端寒空一雁去離思繞山河逸於終奏又雲來山閣風雨過石池秋大隱非人外微言乃道初月映蒼松

運雲生白石臺玉虛香火清齋地紫禁煙花悵望時蜀有馮唐頭已白青袍郎署自年年並若神構足稱警策

靜志居詩話純叔藉甚詩名特格未高登田按純叔詩語清新亦嘉靖中詞人之倫

韓陵行送人之上黨

春生具區水雲暗洮湖樹曉潮催兩槳君向韓陵去鄴下山川天下雄文章況有黃初風鬪雞晨出邙城北射獵宵歸漳水東君結豪英持一劍走馬韓陵如躡電賦詩應上三臺宮弔古須傷九華殿近聞惡歲土苗稀黃河不東民苦飢杞國懷憂竟何益念君此去何時歸

送沈潤卿還南陽

江南苦雨晝不開海霧上羈姑蘇臺臺前別有故人去驚濤疊浪爭喧歷君辭南陽雪初折吳門柳歲月來幾何長帆仍北首鄧尉山頭多桂枝虎邱石上攬瓊芝故園十載松楸淚楚國千年桃李辭粲爛華裾

曳來久。賜璧頒金陳醴酒。枕內曾書鴻寶方。座中誰在相如右。枚生老去戀梁王。清水豐雲道路長。千里月明堪悵望。洞庭霜橘待誰嘗。

金山

明月妙高臺。盤渦月照開。琳宮龍久駐。珠樹鶴曾來。雲霧空中靡。帆檣檻外迴。無言卷石小。江左擬蓬萊。送僧之杭

餅鉢今何適。飄然向武林。江風吹衲影。山月照禪心。巢鶴形容古。祛蛇道術深。欲知無上義。南北兩高岑。橘溪僧院

蟬聲不出寺。鐘斷祇聞香。流水迷松徑。閒雲滿石牀。無言忘寂寞。宴坐得清涼。欲謝人間事。冥心叩藥王。祇命拜陵出得勝門作

乍辭蓬閣下彤雲。風煖郊原草正薰。十里垂楊春澹宕。七陵佳氣曉氤氳。馬依輦路橋山側。鶯和錫籥曲水濱。回首故園誰麥飯。不堪愁絕倚斜曛。

送人使楚

長安七月雨不休。愛子持節凌清秋。水衡實少南方賦。傳吏須迎使者舟。廬岳雲霞迴席見。洞庭波浪接天浮。誰能詞筆誇三楚。遙憶仙人黃鶴樓。

題天池

竹疏漏雲色。泉細落嵐霏。日暮不歸去。山風吹客衣。

慈仁寺

寺前老柏不知歲。閣上風鈴欲語人。一榻秋窗槐影底。從教門外漲紅塵。

贈朱子羽之鉛山令

下馬愁腸劇轆轤。王喬今日去雙鳧。木蓮花發江南暮。君過靈山相念無。

楊本仁八首

本仁字次山。杞人。嘉靖己丑進士。授工部主事。改刑部。歷郎中。出爲江西按察副使。歷湖廣參政。遷廣西按察使。有少室山人集二十五卷。

田按。少室山人詩。不盡入格。時有佳篇。如披榛採蘭。香韻獨絕。

上元督府宴集

萬里逢元夕。軍門春獨私。江山俱是客。燈火自深卮。世局應難定。鄉心不易持。蒼梧今夜月。流影鑿鬢眉。

雨懷

愁絕經旬雨。冷然池館清。把杯春草色。燒燭暮江聲。雲裏天池寺。湖邊滙浦城。悠悠坐相繫。清嘯不勝情。

柏林寺灣

孤棧凌空雪後行。半山古寺晚鐘清。人從碧落窺丹壑。僧在白雲弄紫笙。翠柏不凋前代色。哀猿偏作異鄉聲。迴風落日江流急。匹馬千崖四望情。

巴人竹枝歌二首

院裏迎春郎手栽。花時郎繞百千迴。從郎去後春無主。縱有風吹花不開。江上帆檣亂不齊。煙波望望妾心迷。何如化作江中水。郎若東時儂不西。

上元命候吏折梅花

鄆江小吏誰家村。折得梅花枝半存。卻怪先生緣底事。上元時節不開尊。

四一亭對雨

逃暑何緣聊水坐。花眠竹困晚俱醒。隔雲遙揖匡南老。爲展插天九疊屏。

爲雪解嘲

春事江南異江北。年年雪裏放桃花。玉妃解識東皇意。細翦六英點絳霞。

沈愷四首

愷字舜臣。松江華亭人。嘉靖己丑進士。授刑部主事。歷員外郎中。出爲寧波知府。量移臨江。歷湖

廣按察副使進參政乞歸。隆慶初起太僕卿不赴。有環溪集二十六卷。

田按環溪論詩。皈依何李。五言亦爽脫有致。

暮冬寓山寺

冰霜驚歲晚。寥落詎堪論。官興懶於鶴。冥修未到僧。風塵虛歲月。城郭宛江村。忽憶環溪上。寒梅幾處存。

歸思雜言

幾年羈宦轍。一疏乞巖居。聖世容疏懶。冥心只晏如。閒調吳苑鶴。不食武昌魚。長日應無事。蕭然讀素書。作吏二千石。歸來無酒錢。苦心成白首。岸幘向青天。止飲憐彭澤。清遊憶輞川。塵心銷落盡。吾意欲逃禪。

憶任城

春風一渡魯陽水。夜月三更太白樓。安得四明狂客在。金龜換酒散春愁。

崔涯一首

涯。榜姓。方。字若濟。寧國太平人。嘉靖己丑進士。官監察御史。以劾汪鉉罷官。有筆山集十卷。

和縣尹韻

移樽就溪石。坐上東山月。老眼醉模糊。天空水雲白。

陳子文一首

子文字在中閩人嘉靖己丑進士除麻城知縣徵授戶部主事歷員外郎中出爲長沙知府改池州累遷湖廣按察副使有于山堂稿

送李主簿

相逢十年隔相送復天涯來折官河柳行看岳縣花千村連海嶼萬井帶桑麻異域今多事殷勤問左車

陳節之一首

節之字尹和閩人嘉靖己丑進士選庶吉士授編修遷春坊中允

早朝

太平天子御飛龍待漏趨階拜九重花落玉階仙露溼柳垂金鎖御煙濃螭坳漸集千官珮曙色微催太液鐘幸際明時慙補報願陳三祝効華封

胡經一首

經字□□廬陵人嘉靖己丑進士累官太常少卿

遊鐵佛寺

夙愛南郊禪寺靜孤吟落日戶長扃春來好鳥答人語老去枯僧如鶴形雨漲溪光連霧白雲開山色過江青紛紛桃杏爭開落春氣曛人尙未醒

馮彬一首

彬字用光海康人嘉靖己丑進士官松江知府

採蓮曲

越江採蓮女綠袂紅裙照江水。桂楫蘭橈破曉煙。歌聲宛轉荷花裏。儂家住在橫塘隈。日出採蓮日暮歸。只恐霜落荷衣敗。看見鴛鴦對對飛。

趙鯤一首

鯤字宇南壽張人嘉靖己丑進士累官貴州按察使有九嶺集

龍王關送家人歸

湖水北來曉色昏。湖邊春草怨王孫。微微樹影遮山閣。脈脈泉流漱竹根。羸馬衝泥尋浦路。孤舟拖雨過江村。臨淮欲灑思鄉淚。一夜隨潮過魯門。

周顯宗一首

顯宗字子孝濮州人嘉靖己丑進士除秀水知縣歷官漢中知府有桃村山人自適稿

真州工部分司

隱隱高城月。冥冥晚市煙。歸來人競渡。棹入蓼花天。

蔡鏗一首

鏗字天章寧晉人嘉靖己丑進士除行人擢浙江道御史坐劾汪鏞廷杖爲民尋以原官起用再謫山東按察知事隆慶初復職致仕有浚濱集十卷

送李樂菴赴池州司訓

依依楊柳暫停驂別酒何辭盡日酣此後相思成遠夢空隨明月到江南

張選一首

選字舜舉無錫人嘉靖己丑進士除蕭山知縣擢戶科給事中諫帝不親祀太廟受杖削籍隆慶初復官進通政司參議有靜思遺集八卷

僧房

幽枝一聲鳥春滿萬家邨落葉蒼苔厚山僧只閉門

王表一首

表字邦正無錫人嘉靖己丑進士選庶吉士改戶部主事再改南禮部歷員外郎中有代奕稿消夏編

題雲山圖

長空滿秋碧。境與心俱閒。我屋東山下。白雲時往還。

程烈一首

烈字惟光。歙人。嘉靖己丑進士。官工部主事。有水部集。

越中送楊次山

楊子洛陽才。東風征騎催。鄉心杜曲里。官舍濟城隈。客路鶯千樹。離亭酒一杯。相思更相望。擬上越王臺。

史元中一首

元中號鹿泉。鄞人。嘉靖辛卯舉人。除靖江教諭。遷魚臺知縣。有青蓮集三十卷。

農舍

布穀聲新春已分。一犁好雨綠楊村。年來底事催租吏。未到秋成夜打門。

林垠二首

垠字天宇。閩人。嘉靖辛卯舉人。除桂陽知州。遷撫州同知。入爲戶部員外郎。有世牧堂稿。

登河北城樓

古戍烽煙息。孤城對水開。山從三晉出。川向五原回。遠樹依秦堞。殘雲沒漢臺。昔人遺恨在。臨眺有餘哀。

沙河行宮

宮殿連雲起。城樓入漢低。寒鴉如望幸。朝夕自悲啼。

唐鉞一首

鉞字君錫。蘭溪人。嘉靖辛卯舉人。除溧陽知縣。遷揚州同知。改楚府長史。

九日山亭

淮南秋老菊初叢。佳日登高上客同。雲岫盡含三楚色。石林遙撼九江風。池陽虎渡飛鴻外。姑孰龍山落照中。烏帽黃花兩羞澀。愁邊短鬢已如蓬。

黃中一首

中初名忠。字文卿。遂昌人。嘉靖辛卯舉人。除鉛山知縣。行取授貴州道御史。出爲山東按察副使。有南窗紀寢集。吹劍集。

田按副使詩意取輕脫。問傷粗率。

過朱陽仲墓

江關詞賦舊淩雲。何事深山早築墳。天上豈真無李賀。人今猶自說劉蕢。西風歸鶴空留恨。落日啼猿不。可聞。三十年前交誼在。獨來披草薦溪蘋。

強仕三首

仕。字甫登。無錫人。嘉靖辛卯舉人。授江西廣昌知縣。遷德州知州。有考槃寤歌、綺塍集。

盛明百家詩。甫登夙嗜詩學。嘗結會碧山吟社。

陸龜蒙

澤國多隱淪。天隨更孤峭。甫里三畝居。山水足幽討。揮翰木蘭堂。太守驚絕倒。拜賜散人銜。永寄羲皇傲。
秋晚山行小酌吟社

歸休無復事。日與野情宜。爲愛秋原淨。言尋山館期。散行塵外屐。疏響竹間棋。一遣沈冥理。詩成懶重題。
憶河豚

春城燈事動。河豚首登俎。身遠闔閭城。夢繞西施乳。

劉成穆三首

成穆。字玄倩。崇慶州人。嘉靖辛卯舉人。有劉玄倩集。

玉筍詩談。玄倩生七歲能詩文。十歲博識。十五究經史百家。談玄理。談兵。談世務。珠貫川絡。以春秋舉鄉試第三。試春官不第。發憤卒。玄倩於詩文初不經意。卽席揮穎。有甚佳者。

田按。元倩才藻。是李長吉一輩人。惜不永年。遺集今亦不傳。故所錄止此。

過漢武陵

歲暮霜殘過漢都。武皇陵墓舊荒蕪。不將玉匣藏天馬。猶使金燈照野狐。賦客詞園清露盡。仙翁丹竈白

雲孤。千年惟有秋風曲。渭水長流啼野鳥。

玉筍詩談。元祐過漢武陵詩。升菴楊先生甚愛之。

過千佛巖和察罕廉訪韻

丹壁蒼巖青鐵楹。巖頭古溜苔蘚生。千年刻畫魚龍擁。白日陰冥麋鹿行。金草細搖蘿磴冷。玉魚橫過石梁清。臨流拊樹堪心折。野寺黃碑月二更。

溫泉宮

碧洞霜清臥火龍。翠華宮冷玉芙蓉。遊人綠酒流春殿。妃子霓裳化曉風。石閣獨逢明月醉。瑤壇虛有晚霞封。羽衣不見梨園曲。愁聽秦箏雜野蛩。

許炯八首

炯字彥縉。新會人。嘉靖辛卯舉人。有吾野漫筆十三卷。

田按。彥縉自謂少時不甚。從羣兒騎竹馬。黏蜻蜓鳥雀爲戲。未幾病若忽。則夢一父老。出袖中書授之。俄墜而覺。自是遂能。把筆作詩。頗近於怪。吾野集中詩率恣一往。真漫筆也。披沙揀金。時有合作。亦自警拔。

匡山大忠祠

古祠牢落對行宮。朝市荒涼夕照中。玉璽久歸滄海去。銅駝空見碧苔封。已無抔土藏遺劍。猶有餘民泣

墮弓。一曲雍門歌不盡。滿山松柏起悲風。

螺川望文丞相墳

六歌聲斷市朝空。紫蓋黃旂散朔風。匡海有心同捧日。燕臺無路可從龍。蒼梧處處愁雲黑。杜宇年年怨血紅。江上孤墳勞望眼。古碑芳草夕陽中。

春日燕集同何槩樵作

佳客芳時不易逢。江南三月雨濛濛。酒當半醉半醒處。春在輕寒輕煖中。柳絮亂飄歌扇白。海棠如妬舞衣紅。晚來更按揚州調。聲繞吳姬翠袖風。

舟中書所見

黃葉隱溪橋。歸雲擁高樹。爲問蕩舟人。蒼煙是何處。

雲集

幽人臥邱壑。相伴惟孤鶴。夜半山風來。時聞松子落。

三月晦日

東風無力近黃昏。花事蕭條半委塵。開到海棠還細雨。飛來江燕已殘春。

贈彈箜篌者

飛花無定水東流。繡幙春寒未上鉤。十四絃中新舊恨。一時彈作兩眉愁。

秋江晚眺

萬里滄江帶白沙。漁舟風起釣絲斜。水邊秋色無人管。半屬蘆花半蓼花。

黃省曾四首

省曾字勉之。吳人。嘉靖辛卯舉人。有五岳山人集三十八卷。

司勳集。勉之苞蓄既富。探汲不竭。譬玄黃雜組。而粉彩炫目。金石疊奏。而英韶盈耳。思劇沈幽。語罕仍隱。凡象外難摹之景。必鑄以新範。雖目前塵瑣之態。亦緣以華辭。

詩談。勉之詩宗六朝。如空江日明。獨鶴夜警。

藝苑卮言。黃勉之如假山池。雖爾華整。大費人力。

今雨瑤華。五嶽情謔。李杜辭。陳遊覽之餘。操觚靡倦。翦剔綺繡。咀嚼瓊瑛。每篇輟筆。粲然驚目。

國琛集。季父天澤獨宮。學海滋深。其詩擢景輒取。摹事必得。時有神詣。使人意消。

列朝詩集。勉之六齡好繡素古文。解通爾雅。弱冠與其兄魯曾散金購書。葺精藝苑。累舉不第。交游益廣。王新建講道於越。參預講堂。作會稽問道錄。洪元明振鐸成均。則又學於元明。名王。湛兩家之學。李獻吉以詩雄於河雒。則又北面稱弟子。再拜奉書而受學焉。獻吉就醫京口。勉之鼓柅往候。拜受其全集以歸。勉之文學六朝。好譚經濟。有五岳山人集。別撰西洋朝貢典錄。輿地經。老子玉略諸書。皆未行於世。

田按。勉之與獻吉書云。詩歌之道。天動神解。本於情流。弗由人造。故虞書顯爲言志。泗夏標之嗟歎。古人構唱。直寫厥衷。如春

蕙秋蓉生。巴堪把。意態各暢。無事羅樓。末世風顏。拾蟲鬪鶴。遞相迷師。如圖繪剪錦。飾畫雖妍。強先露。故實雖富。根亥愈哀。千葩萬藥。不如一榮之真也。勉之所作。正坐斯蔽。所謂歎他人之未忘自己之已拙。至其文序事。頗復彬彬。亦學人之雅製也。

麗娟曲

佳人年十四。吹氣勝蘭香。一曲庭花落。餘音繞杏梁。龍綃纏紫袂。錦帳掩明粧。若非琥珀珮。焉得動君王。

黃家集夜思

窈窕大河陰。宵舟轉曲潯。星驂如客影。波箭學歸心。夢積俱緣想。愁來若解尋。鄉園明月滿。應待緯瑤琴。

遊清涼山

舊利歡新陟。涼臺得煖攀。殿懸秋靄樹。江吐夕陽山。法食供遊僮。林杯悅旅顏。無勞支遁馬。碧草步人還。

虎邱詠

芙蓉近倚闔閭城。眺閣觴樓逐勢成。珠寺翻爲歌舞地。青山盡是綺羅情。巖花吐學紅粧麗。谷鳥嘯兼風管聲。十里垂楊芳草岸。四時常映彩舟行。

